

書叢本基學國

裁別詩清

選潛德沈

行發館書印務商



書叢本基學國

裁別詩清

選潛德沈

行發館書印務商

中華民國二十二年十一月初版

(二〇九一〇)

國學基
本叢書
清詩別裁一冊

每冊定價大洋壹元肆角

外埠酌加運費匯費

編輯者 沈 德 潛

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

* 版 翻 *
* 權 印 *
* 所 必 *
* 有 究 *

凡例

詩之爲道。不外孔子教小子教伯魚數言。而其立言一歸於溫柔敦厚。無古今一也。自陸士衡有緣情綺靡之語。後人奉以爲宗。波流滔滔。去而日遠矣。選中體製各殊。要惟恐失溫柔敦厚之旨。本朝御製詩。如日月經天。江河行地。千百世當奉全集爲準繩。非臣子所敢選也。錢牧齋選明高帝以下諸帝詩。失尊君之體矣。茲編不敢采入三聖御詩。別於牧齋選本。

黃崑圃侍郎多藏北方學者詩。王遴汝上舍多藏南方學者詩。余從兩處翻載而來。選中所收。幾有十分之三。餘皆逐漸徵取。鱗次投贈。積久成多。以供采擇。然四方萬國。其邊徼之遠。不能遍收也。挂漏實繁。無遺憾。

國朝選本詩。或尊重名位。或藉爲交遊結納。不專論詩也。陳檢討篋衍集。較諸本爲善。然祇及康熙癸丑以下。闕如。茲補癸丑後八十餘年詩。而名位交遊之念。不擾於中。此差可自悟者。

是選以詩存人。不以人存詩。蓋建豎功業者。重功業。昌明理學者。重理學。詩特其餘事也。故有功業理學可傳。而兼工韻語者。急采之。否則人已不朽。不復登其緒餘矣。觀者諒之。

人必論定於身後。蓋其人已爲古人。則品量與學殖俱定。否則或行或藏。或醇或駁。未能遽定也。集中采

取。雖前後不同。均屬已往之人。

詩必原本性情。關乎人倫日用。及古今成敗興壞之故者。方爲可存。所謂其言有物也。若一無關係。徒辨浮華。又或叫號撞搪以出之。非風人之指矣。尤有甚者。動作溫柔鄉語。如王次回疑雨集之類。最足害人。心術一概不存。

詩不能離理。然貴有理趣。不貴下理語。陶淵明汲汲魯中叟。彌縫使其淳。聖人表章六經。二語足以盡之。杜少陵江山如有待。花柳自無私。天地化育萬物。二語足以形之。邵康節詩。直頭說盡。有何興會。至明儒太極圈兒大。先生帽子高。真使人笑來也。選中近此類者。俱從芟蕪。

唐詩蘊蓄。宋詩發露。蘊蓄則韻流言出。發露則意盡言中。愚未嘗貶斥宋詩。而趣向舊在唐詩。故所選風調音節。俱近唐賢。從所尚也。若樂府及四言。有越唐人而竊攀六代漢魏者。所云雖不能至。心嚮往之。詩人名下。未詳生平者。祇載其表字省分郡邑。與夫科目官位之有無。若傳志可考。軼事可傳。詩話可引。或詳或略。輒綴評論。使讀者得其詩品。并如遇其爲人。

卷中有科目者。一以科目之先後爲次。無科目者。約以輩行之先後爲次。世祖十八年。俱先科目而後詞人。聖祖六十一年。若準此例。恐輩行之先後。太相懸矣。故三分二十年。科目詞人。相間次第之。世宗朝。及今上二十五年以前。仍準世祖朝之例。

人之無名位者。一生無他嗜好。惟孳孳矻矻於五字七字之中。而忽焉徂謝。苟無人焉表而章之。人與詩歸無何有之鄉矣。予與同人遠近徵求。志其生平。聊存發潛闡幽之意。

閨閣詩。前人諸選中。多取風雲月露之詞。故青樓失行婦女。每津津道之。非所以垂教也。選本所錄。罔非賢媛。有貞靜博洽。可上追班大家。韋逞母之遺風者。宜發言為詩。均可維名教。倫常之大。而風格之高。又其餘事也。以尊詩品。以端壺範。誰曰不宜。

國初詩僧。有棄儒而逃入禪學者。詩自激昂頓挫。錚錚有聲。其後多習口頭禪說。以偈為詩。即有稍知向學者。亦祇奉弘秀集一類為金針。於源流升降。茫然於中也。廣為蒐羅。共得四十三人。中有能讀儒書通禪理者。格外賞之。

詩中有相沿誤用者。如孤負之誤辜負。李陵答蘇武書。孤負陵心。陵雖孤恩。杜詩。孤負滄洲。顧韓詩。孤負平生志。皆是也。華罪也。與負不協。疑丞之誤凝丞。

左輔右弼。前疑後丞。疑謂有疑而問也。疑字何解。蒼黃之誤倉皇。北山移文。蒼黃反覆。杜詩。形勢反蒼黃。昌黎文。值吾南逐。蒼黃分散。柳州文。數州之犬。若黃吠噬。宋人以後始有倉皇。閨

閣之誤閨閣。史遷云。身為閨閣之臣。文翁傳。使傳教令出入閨閣。注謂東向小門也。二字不專屬。爛漫之

誤爛熳。爛漫見魯靈光殿賦。說文。玉篇。等書。並無熳字。匡襄之誤助勳。匡襄猶贊襄也。助勳急遽貌。楚辭。蓬此世之助勳。杜牧詩。塵土驚助勳。昌黎有新師不牢助勳。將進語。如何混為一。

誤認濫觴為末流。家語孔子曰。江始出於岷山。其源始於濫觴。濫泛也。觴酒杯。清和為四月。仲春之月。賦也。言初出微而下流始大也。近人多以濫為觴。為傷矣。清和為四月。張衡歸田賦。和氣清。謝靈運詩。首夏猶清和。言四月猶二月。故下云芳。此類不可枚舉。他如委靡靡聲。字。百揆揆聲。字。

草亦未歇也。後人有四月清和雨乍晴。句失卻稿字義矣。此類不可枚舉。他如委靡靡聲。字。百揆揆聲。字。

之類。無平聲者。誤讀平聲。漕字。雍字。丈人行。行字。冗長。長字之類。有兩音者。惣讀平聲。衛有漕邑。平聲。漕之漕。去聲。雍和

辟雍。平聲。雍州之雍。去聲。行之行。去聲。

長短之長。平聲。冗長之長。去聲。

朝請之請。非上聲。宜讀去聲。

漢律。春朝曰朝。寧馨之寧。非平

聲。宜讀去聲。

洪謂詩家無阿堵物。門有寧馨兒。東坡詩。空使姦雄笑寧馨。

亦不可枚舉。集中一一校正。恐外間溺於俗本。轉以爲譌。故

一論列之。

清詩別裁目錄

第一冊

卷一

慎郡王	蘊端	德普
弘曠	恆仁	博爾都
塞爾赫	李澧	楊思聖
魏裔介	魏象樞	趙賓
李霽	王紫綬	馮溥
宋琬	蔣超	王熙
宋徵輿	鄧旭	李敬
繆慧遠	曹垂燦	沈永令

卷二

清詩別裁目錄

卷三

施閏章	季開生	董文驥
王廣心	王庭	周體觀
盧紘	周茂源	許纘曾
沈荃	湯斌	程可則

卷四

曹爾堪	顧大申	王士祿
金漸皋	李來泰	黎士弘
王士正	馮雲驥	邱象升
嚴沆	汪琬	
曹申吉	劉體仁	秦松齡
閔鉞	王揆	丁澎
王日藻	董舍	彭襄
沈自南	王澤弘	陸鳴珂

方兆及 錢陸燦 計東

田茂遇 曾 畹 章在茲

陳廷敬 鄒祇謨 高 暉

李念茲 徐文烜 張一鵠

卷五

李天馥 孫一致 錢中諧

許 虬 王又旦 嚴允肇

顧 岱 徐元文 葉方藹

彭孫通 黃與堅 田 雯

董 俞 曹貞吉 崔 華

趙 灃

卷六

馬世俊 張玉書 葉映榴

孫 蕙 吳 光 王維坤

徐延壽 褚 篆 趙士喆

劉獻廷 徐振芳 沈道映

陸元輔 陸宗維 陸元泓

徐 波 侯 涵 劉逢源

吳兆寬 閔麟嗣 吳嘉紀

沈 磐 蔣平階 李 鄴嗣

王猷定 戴本孝

卷七

曾傳燦 蕭 詩 毛會建

董以寧 陳子升 何嘉延

張可度 沈欽圻 梁 逸

阮旻錫 陶 澂 趙與樞

董 闈 郁 植 徐 柯

文 點 陳 珏 陸 進

卷八

朱爾邁

韓純玉

魏際瑞

王遵坦

朱徽

舒忠讜

陳恭尹

董道權

任元祥

柳文

夏熙臣

蔣注

吳祖命

卷八

姚文焱

吳綺

黃雲

宗元鼎

潘高

惲日初

方膏茂

張宸

路鶴徵

范超

柴紹炳

沈謙

虞黃吳

陸圻

毛先舒

張丹

陸嘉淑

郭襄圖

顧萬祺

盧元昌

胡渭生

吳爰

譚吉璋

朱克生

第二冊

卷九

俞南史

黃九河

王孫晉

韓昌

王邦畿

梅磊

錢曾

吳物榮

卓爾堪

黃埴

嚴我斯

周弘

曹禾

勞之辨

趙士麟

盛符升

劉梁嵩

方殿元

吳元龍

繆彤

張英

張玉裁

魏麀徵

汪懋麟

顏光敏

喬萊

方象瑛

陳玉璫

傅昂霄

徐乾學

王揆

王士祐

孟亮揆

李振裕

許孫荃

葉燮

盧道悅

顧貞觀

卷十

韓莢

王鴻緒

徐倬

李基和

徐元夢

成德

邵瓊

彭定求

胡會恩

翁叔元

陳錫嘏

王頊齡

張榕端

王吉武

高層雲

葉舒崇

卷十一

毛奇齡

李因篤

尤侗

陳維崧

嚴繩孫

龐塏

汪楫

朱彝尊

卷十二

潘耒

徐鉉

李澄中

徐嘉炎

陸棻

邱象隨

倪燦

袁佑

高詠

馮昂

王昊

鄧漢儀

孫枝蔚

盛楓

陳王猷

趙執信

李孚青

王材任

沈朝初

卷十三

梅庚

彭寧求

金德嘉

許汝霖

史夔

馮廷樞

周金然

王九齡

尤珍

吳苑

宋犖

高士奇

吳興祚

謝重輝

孔傳鐸

孔尚任

丁焯

吳秉謙

卷十四

孫元恆
孫寶侗
江闈
戴梓

周箕
俞瑒
顧有孝

顧樵
周肇
顧涓

許旭
王撰
王抃

王據
王曜升
王曾斌

袁啓旭
李良年
黃始

葉世佺
惲格
修世臨

陳維岳
鍾映淵
馬世傑

金侃
徐夜
丁耀元

張實居
張篤慶
錢柏齡

吳磨

卷十五

吳雯
馮樾
楊岱

劉淑頤
邵長蘅
張宮

陸次雲
章靜宜
顧景星

汪徵遠
汪洪度
汪洋度

卷十六

彭始奮
陶竈
查容

潘鏐
彭桂
彭極

吳之振
崔岱齊
龐鳴

周穉廉
洪昇
毛師柱

陳學洙
李國宋
李藪

史騏生
藍啓肅
馬之鵬

徐元正
汪灝
施何牧

黃庭
梁佩蘭
湯右曾

卷十七

唐孫華

田從典

趙俞

許遂

周士彬

嚴虞惇

陶元淳

史申義

吳曠

姜宸英

徐賓

董思凝

孫致彌

卷十九

張尙瑗

查昇

陳大章

汪士鋐

徐發

陳蓑

陸寅

沈名孫

惠周惕

宋聚業

鄂爾泰

張遠

第三冊

卷十八

陳鵬年

黃叔琳

高孝本

徐永宣

蔡壘

陳沂震

姚弘緒

程文正

姚士陞

許湄

費洪學

劉師恕

顧圖河

呂履恆

陳璋

卷二十

張逸少

高其倬

修法海

秦文超

黃任

陳睿思

周起渭

焦袁熹

謝方琦

王式丹

蔣廷錫

張自超

何梅

沈育

王焜

何焯

吳廷楨

吳瞻淇

章藻功

查慎行

陳至言

喻成龍

曹寅

揆敘

鈕琇

于養志

管掄

陶孚尹

張養重

沈受宏

陸韜

方登嶧

濮淙

卷二十一

楊賓

王戩

顧希喆

許潤

毛世楷

楊模

沈峻

沈鍾彥

沈紹姬

張衍懿

孫中岳

謝志發

姜實節

吳祖修

陳炳

文挾

李必恆

孫元衡

蔣景祁

朱載震

陳于王

王丹林

顧嗣協

李寅

王錫

俞焜

劉石齡

黃中堅

沈廉

翁荃

卜煥

卷二十二

劉青藜

王萃

吳士玉

嵇曾筠

俞兆晟

蔣綱

鄭任鑰

喬崇烈

徐用錫

張麟書

繆沅

張大受

惠士奇

張照

秦道然

李紱

方式濟

呂謙恆

方覲

吳翊

卷二十三

張景崧

蔣仁錫

王時憲

黎志遠

王世琛

沈樹本

徐葆光 顧嗣立

王圖炳 程夢星

林 佶 虞景星

吳 襄 唐建中

謝遵王 顧陳墀

張弘敏 吳廷華

卷二十四

徐陶璋 凌如煥

楊士凝 潘其燦

張廷璐 鄭 江

宋 照 王 恪

吳家騏 萬邦榮

厲 鶚 方正瑗

許廷鑑

杜 詔

舒大成

任蘭枝

張 梁

尤秉元

余敏紳

翁志琦

鄒升恆

王懋欵

鄭世元

葉士寬

卷二十五

黃之雋

陸奎勳

馬維翰

李 鍼

邵 泰

魏荔彤

計 默

王汝驥

顧文淵

汪文柏

陳玉齊

儲大文

柯 煜

沈懋華

甘曰懋

儲雄文

王 濤

湯 準

陳奕膺

嚴啓煜

費錫琮

徐 蘭

謝道承

蔣恭棗

魯曾煜

王 恕

蔣 深

李 蓮

徐善建

郭元鈺

汪文桂

費錫瑣

第四冊

卷二十六

沈用濟

毛張健

毛序

陳培脈

張錫祚

蔣廷鑑

殷譽慶

李樽端

張元昇

夏弘

廖燕

劉祖啓

王文潛

黃河澂

翁誥

吳之麟

先著

李崧

周龍藻

周在延

錢良擇

陸蓀

陳鍊

朱經

徐恪

顧紹敏

卷二十七

金志章

姚湘

邵錦潮

曹庭樞

陳祖范

繆曰芭

潘果

尹會一

陶正中

徐以升

金鳳綸

王峻

李重華

俞荔

張鵬翀

曹鑾

劉青芝

吳履泰

曹一士

馬樸臣

張映斗

張一鳴

王時翔

賽音布

劉廷璣

蔣錫震

徐夔

鄭弼

劉震

吳承泰

張安絃

徐洪鈞

卷二十八

朱奕恂

王景琦

侯銓

葉舒璠

宋樂

鄭玉珩

葉永年

方還

方朝

程鳴

顧我綺

周遠

朱厚章

謝芳連

孫宏

吳學濂

劉正誼

曹煜會

張鈺

金義植

尤怡

曹炳會

曹煥會

秦時昌

江聲

周天藻

陳燦霖

周瓚

劉宗霈

沈源

陸文銘

李璧

馬長海

趙關曉

周振采

王應奎

金縉

周京

方肇夔

湯懋統

趙虹

王泌

繆宗儼

洪嘉植

朱瑄

陳倫

沈炯

程簡

周杭

俞玉局

翁格

蔡書升

余京

秦應陽

陸蒼培

殷再巡

華龍翔

徐翔鷗

葉肇梓

汪紹焯

劉瞻榕

馮嗣京

宋匡業

邵錫榮

錢錦城

安期

陳葉筠

張瑄

張嵩齡

卷二十九

錢之青

張若需

包彬

李果

韓騏

高日新

倪承茂

鈕汝騏

舒瞻

馬位

程樊

蕭趙球

張進

夢麟

孫貽武

汪天興

吳瞻泰

計元坊

吳槩

林明倫

張畹

徐志巖

卷三十

高述明 高斌 鮑鈇

李鏞 陳景元 高岑

姚世鈺 姚世鈞 邵岷

謝淞洲 吳定璋 黃子雲

翁照 錢源來 楊濬

李進 過春山 周永銓

周準 盛錦 汪俊

朱受新 王大椿 李薊

卷三十一 以下闕
秀詩

紀映淮 錢鳳綸 畢著

章有湘 錢敬淑 吳琪

吳綉 侯懷風 吳氏

倪仁吉 范姝 熊湄

柴靜儀 王慧 徐氏

張氏 龐晚 吳永和

丁瑜 張令儀 徐昭華

孫淑 金氏 彭氏

王煒 王瑤湘 朱柔則

張學典 張凌仙 顧英

周淑媛 張繫 沈樹榮

瑯琊女子 葉榜 侯承恩

薛瓊 張氏 倪瑞璿

林以寧 陳珮 蔡琬

方京 吳雯華 沈蕙玉

楊珊瑚 姚世鑑 姚益敬

周淑履 吳巽 錢紉惠

毛秀惠 許飛雲 許孟昭

許楚畹

陳奇芳

周巽

汪瑤

吳若華

宋凌雲

許權

尹瓊華

韓韞玉

楊克恭

金順

袁機

卷三十二 以下
僧詩

戒顯

止崑

南潛

實訥

顯謨

海遐

同揆

大燈

大瓠

函可

本源

大寧

成鷲

大成

海岳

天定

僧殘

超遠

曉音

性休

德元

通岸

古芸

智朴

宗渭

願光

溥晚

元龍

大寧

元璟

睿

然修

岑霽

德亮

佛暘

德暉

超源

妙復

律然

元祚

明印

清詩別裁

卷一

慎郡王紫瓊主人。著有花間堂詩鈔。○王勤政之暇。禮賢下士。肅宗元人詩宗唐人。品近河間東平。而多能游藝。又問平所未聞也。

灌花

階砌羅羣芳。宛然如藻績。照日相鮮新。臨風各向背。盱眙忘憂子。淡焉此靜對。榮謝寄流轉。采色看迭代。
體茲造化心。澤物恐不逮。園丁汲井欄。時時自灌溉。題雖灌花。意在澤及庶物。胸次正大。於觸物處抒寫之。

樵歌

不聞人聲。但聞斧聲。寂寂巖響答。丁丁飛鳥驚。得柴換酒。醉歸踏月山歌清。友木石。無衰榮。白雲流水自朝暮。萬山漠漠煙光青。
起手八字寫盡空山伐木神理。

月夜臺上聽友人彈琴

高臺夜色深。月下聞清琴。能使座中客。俱生塵外心。石泉瀉寒碧。霜竹折孤音。曲罷長天靜。忘言一整襟。
只寫琴理。不形容琴聲。與常建江上琴興同一清絕。

村夜

清詩別裁 一卷一

旅舍燈猶在。村人語漸稀。山兼寒月靜。葉帶暗霜飛。廐馬嚙槽櫪。鄰雞唱翠微。煙霞惹殘夢。幽思滿柴扉。

圓明園召看煙火恭紀

銀漢星橋不動塵。斜飛火鳳入勾陳。一聲雷起地中蟄。萬樹花開天上春。太乙高樓燈似晝。未央前殿月移輪。君王行樂新年盛。先使恩光逼近臣。

雙徑

客去自掩關。林深鳥聲靜。徘徊夕陽中。秋烟澹孤影。

秋烟五字。如出賈長江手。

邦均野寺

僧罷夕陽鐘。客懷正孤絕。山鳥下空林。自啄茅簷雪。

五言絕。唐人以古淡勝。此又以清瘦見長。

七夕

銀河脈脈渡雲駟。未擬穿針倚畫屏。獨向閒階風露下。夜深無語拜雙星。

蘊

初名岳端。字兼山。號紅闌主人。安和親王子。著有玉池生稿。○主人禮賢下士。鄒枚之列。時來座下。嘗選郊島詩。以示不棄寒瘦之意。其志趣可知矣。

春郊晚眺次韻

長隄一望夕暉斜。芳樹枝枝待暮鴉。西嶺生雲將作雨。東風無力不飛花。嬌鶯細囀留清晝。孤鶩徐飛帶

晚霞。野客獨扶藜杖遠。柳陰深處覓漁家。

清揚圓轉。元人在。陸照磨宋子虛之問。

題閨秀朱柔則寄外沈用濟畫卷

柳下柴門傍水隈，天桃樹樹又花開。應憐夫婿無歸信，翻畫家山遠寄來。

德

字修菴，號香松室主人，封鎮國公，任宗人府右宗正。

中秋無月

誰道秋雲薄，中宵掩桂輪。姮娥開鏡懶，愁殺倚樓人。於無情處寫情，得唐人三昧。

弘

號思敬主人，任右宗人。

值宿聞鳥夜啼

值宿霜寒夜，蟾光瓦欲流。啞啞聽鳥語，歷歷數更籌。已傍龍樓穩，能銷弩矢憂。雞竿應有兆，計日下皇州。

樂府解題：聞鳥夜啼，明當有故。指宋元嘉時事也。末一句本此。

恆

仁 字月山，原封輔國公，以父失職，并月山亦去公爵。○乾隆甲子歲，月山以韻語來學，授以唐詩，正聲造詣日進，吐屬皆山水清音。北方之詩人也。丙寅冬，予請假歸里，送至江干，明年還。

朝月山已沒矣，詩卷零落，存此二章，志其大概。

玉泉禪院

道人種松罷，傍水開禪關。春風吹不到，白雲相與閒。偶尋林外約，引我過前山。倚杖看奇石，徘徊殊未還。

孟山人風格。

南西門外卽目

澄潭初月影微微。雨過涼生透葛衣。十里亂蟬風兩岸。藕花香送釣船歸。

博爾都字問亭號東臯主人封輔國將軍著有問亭詩稿

送友之粵東

相送粵東去。深憐客舍寒。秋風摧木葉。憶爾下南安。馬首五千里。猿聲十八灘。扶胥海口過。眼界倍教寬。

雁

零露冷汀洲。歸鴻度小樓。秋心齊喚起。不止動邊愁。

塞爾赫字曉亭封奉國將軍任官兵部侍郎○曉亭遇能詩人雖樵夫牧豎必屈已下之固以詩爲性命者也辨唐宋之分如灑灑然身後詩爲夫己氏所編不免以中駟爲上駟矣知詩者惜

之○有佳句云一水明殘照孤村入暮烟宋朝南渡君稱姪周室東遷帝是侯忘其全篇附錄於此

荆卿墓

身入虎狼國。心空百二州。壯懷生死外。易水古今流。白日淡將夕。行人去不留。墓傍誰擊筑。寂寞野花秋。

有如此筆方許作荆卿墓詩

白芍藥

珠簾入夜捲瓊鈎。謝女懷香倚玉樓。風暖月明嬌欲墮。依稀殘夢在揚州。與無情有恨何人見月曉風清欲墮時同一取題之神

李 澄字鏡月。江南興化人。順治乙酉舉人。著有敦好堂詩鈔。

望羅浮歌

我聞博羅一山拔地起。邈絕霄漢橫蒼煙。何年蓬萊卷石浮海至。丹梯翠棧相鈎連。自注。南越志。山本蓬萊。一小學在海中。自

玲瓏員嶠見。鐵橋翠嶺青冥懸。五嶺迢遞不得到。梅花村畔魂夢牽。竭來道上聞玉女。指點金支瓏闕虛。

無間豐隆列缺。手劈坤維水簾千丈。海風倒吹。葱蘢見怪竹。呀啞聽碧雞。更有蛟螭大於牙。五色綸瀾雌。

雄飛。下與三茅通洞壑。上與列宿爭光輝。吁嗟乎。羅浮之勝有如此。只今相望疑足咫。我欲移壘節。裹糧。

偕諸子。手弄羅浮之青霞。口饜羅浮之石髓。伏虎巖前天樂鳴。飛雲搶外狂歌起。三更隆頂見海日。滄溟。

一片浮紅紫。李白平生最好奇。浪傳失足墮蒼耳。何似青鞵布襪萬里遊。矯首扶桑接瀛水。望羅浮。情無。

已。羅浮本仙人宮闕。寫此。題自應有飛仙之氣。

登五老峰

灑霍岩巖漫比倫。自注。黃帝以灑霍二山為南岳副。漢武帝以衡山遐遠。乃徙南岳之祭於廬山。灑山。五峰拔起劈崑崙。泉流峭壁虹蜺挂。石壓枯。

藤虎豹蹲。下界鴻濛疑未闢。太空星漢欲高捫。讀書頭白匡山後。怪爾青蒼萬古存。

楊思聖字猶龍。直隸鉅鹿人。順治丙戌進士。官四川布政使。著有且亭集。

入棧紀行

極望峰巒稠。雲飛常沒頂。空翠霑衣裳。墮作澗溪影。花鳥亂聽聞。心眼細細領。晞陽射碧潭。石粼碎光炯。蒙籠草成陰。樹老身戴癭。山鬼時一嘯。肅肅毛髮冷。前行隔後行。後嶺迷前嶺。

暮投黃牛宿。荒垣洩炊煙。樹柵防虎過。昏黑燈火連。旅食敢求餘。菽麥性所便。屋角枕巨壑。水石聲潺湲。勞生驚物役。憂心中夜煎。起坐當語誰。仗劍淚潸然。

棧雲易爲雨。朝行蒙霧露。崖樹架連橋。奔流澗石怒。攀緣爭一隙。時防馬足誤。山禽鳴翠屏。幽陰衆壑赴。始知所歷高。下見夜來路。壯懷在馳驅。漫自賦感遇。

客子悲遠道。旅途未遑安。整裝凌晨發。帶雨度柴關。灘石相舂激。雲生暗峯巒。步滑屢欹仄。衣濕何時乾。強顏慰僮僕。談笑輕波瀾。中情默自傷。何能駕羽翰。胎原少陵入蜀詩而不襲其面目

魏裔介 字石生直隸柏鄉人順治丙戌進士官至大學士補諡文毅著有兼濟堂集 ○國朝諸大典也。公也。

薤露歌

波流湯湯逝不竭兮。出日入月景不滅兮。人命無常遞相閱兮。用意高於原辭

將歸操

河之水兮波洋洋。我不濟兮非無梁。迴車東望涕沾裳。

送宮紫玄歸廣陵

秋盡寒山出。羈人不可留。劍光衝暮雨。霜氣冷征裘。薊北黃金貴。淮南桂樹幽。送君從此去。濯足大江流。

魏象樞字環極山西蔚州人順治丙戌進士官至刑部尚書諡敏果○公爲本朝直臣第一彈劾必

任都御史時特命巡察畿輔攘除尤見風力歸田後書數千卷外無長物警笑曰尙書門第秀才家風又可想其清節矣

哭友

昔年乍去身猶健。昨夜空傷萬里魂。海上鱷魚驕白日。庭前鵬鳥下黃昏。遺書暗灑孤臣血。垂死仍銜故國恩。最是聖朝容直諫。許君骸骨葬平原。此貶官海南歿於戍所者

趙賓字錦帆河南陽武人順治丙戌進士著有學易菴詩

海口柬李芳洲

積水流天外。茫茫萬里秋。估船經島國。潮響到城樓。浩蕩乾坤小。奔騰日月浮。蓬萊君咫尺。果否有滄洲。

長安喜逢彭禹峯

湖海元龍氣未除。雄心寂寞付樵漁。鱗開北海新桑落。膝抱南陽舊草廬。倜儻指揮天下事。才華驅使古今書。含香朝罷門庭冷。掃逕同君賦子虛。

送孫九畹僉憲蜀中

畫省人空鳥畫啼。使君持節漢江西。驛亭虎鬪驚鄉夢。棧道蛇盤怯馬蹄。荒服舊傳鹽井遠。烽烟近報雪山低。蠻方萬里歸王會。漫向甘泉說碧雞。虎鬪蛇盤十四字。刻畫寫之。而一歸於穩。

贈巢梅峯候調旋里

此日纔聽故國鐘。風吹石岸冷芙蓉。河魚曉進高堂膳。蠟屐晴登少室峯。十載還鄉人老大。三春伏枕夢從容。草堂暫臥仍須出。未許香醪醉菊松。十載還鄉。巢之旋里也。三春伏枕。己之懷巢也。

李

爵字坦園直隸高陽人順治丙戌進士官至大學士謚文勤

舟發浦城

地形下東南。灘溜如箭疾。客行衝霧雨。扁舟僅容膝。粼粼沙痕高。齒齒石鋒密。礪礪中流。鉅細狀非一。狹逼驚濤飛。深沸漩渦溢。舟楫巧紆避。簸盪神先忱。篙師一失手。勢與洪流汨。眩眼雜卉稠。送客奔崖峯。駭奇豫初覽。過險怕縷述。乘流怪浮生。坎止私願畢。

初發都門

六年束吏舍。所向困局迫。出郊茲晨始。豁若樊籠釋。望山懷故棲。遵途感新陌。回首魏闕高。塵沙黯將夕。微軀墮世罟。拮据事行役。豈無四方志。悲與親愛隔。曠寂均苦樂。浮生安所擇。起滅情無端。沉思莫能擲。

宗法選體不流入於
剽輕猶得謝公遺意

楓嶺

楓嶺與黎嶺南北相拱揖石脈固潛通蟠峙各獨立林木互糾紛亂峯森巖巖其巔判閩浙風土隔邦邑
躋崖俯絕谷轉道僅微級凌空危橋滑束澗鳴溜急負擔盡游估攀緣如蟻集傷哉營微利走險詎夙習
下見稻畦人驚客舉簑笠馳驚違所性邇迴增憂色

喜晤孫星衡社丈述贈

昔判長安袂烽烟障薊邱窮交惟我在遠道爲君愁豈意三年別同爲萬里遊晤言如夢寐於邑豈能酬
一體一氣

送楊賢甫副憲祀華嶽江濱

聖代懷柔秩典章首嚴岳瀆奠金方中丞暫假祠官節宗伯親頒御府香挺秀三峯連漢時安瀾萬里下
瞿塘新秋莫訝無殘暑驛路風清白簡霜

王紫綬

字鑿航河南祥符人順治丙戌進士官翰林出爲浙江糧儲道著有知咫堂詩集

送潘世衡內陟少宗伯

從龍仗策自關東江上頻行御史驄錢穀暫煩蕭相國儀文終藉叔孫通百年禮樂方開闢一代車書欲

混同天子垂裳問民事。入朝應奏未央宮。

馮

字孔傳山東臨朐人順治丁亥進士官至大學士謚文毅○文毅力薦魏環極為名臣在閣不詭隨不矯激詩以雅正為主不爭長於字句之間

漢文帝幸代圖

漢帝當年歌大風。歡留父老樂融融。誰知將相和調後。更有君王賞讜同。每飯未嘗忘鉅鹿。故居猶是念

新豐。旌旗十萬雲中駕。休擬登臺出塞雄。

從高帝歌風一氣直下第六語又復回環結意見異於武帝之耀武此種篇法惟少賤有此變化入神

宋

琬字玉叔山東萊陽人順治丁亥進士官浙江按察使著有安雅堂集

先大夫諱日

墜葉豈更榮。流波無重回。哀哀古孝子。痛哭嗟瓶壘。喟余少薄祜。賦無凌雲才。側聞過庭訓。愛惜如瓊瑰。弱齡把鉛槧。慈顏為之開。乾坤當百六。梁木忽然摧。譬彼玄鳥雛。巢傾雕梁災。譬彼松下草。霜落成枯荄。自我歌鮮民。星紀凡屢該。況乃忝符節。隴山崔以巍。松阡渺何處。莫翦蒿與萊。飄蕭生素髮。膝下無嬰孩。緬想夜臺內。惻惻傷其懷。誓言守遺教。敢令官方乖。庶以清白風。稍酬罔極哀。敘述生平而警守庭訓以

者知循吏即是孝子

贈蜀中李鵬海進士

昔君射策明光宮。騰驥燕市驂騑空。誰遣妖星逼天闕。鼎湖竟墜烏號弓。小臣攀髯死未得。重繭萬里還

鄉國劍閣嗟戰血腥。豺狼竊據昏巴熒。八口淒涼何所歸。窮途邨免寒與飢。長鑣作伴拾橡栗。短褐不完歌采薇。清渭灘頭釣魴鯉。誅茆結屋將已矣。亭邊呵止故將軍。驢背誰知前進士。青鞵竹笠秦川來。登高懷古義皇臺。酒酣拔劍鸚鵡舞。夢回巫峽秋猿哀。達人自古嗟飄蕩。鼓刀而屠太公望。天子宵衣問隱淪。徵書旦夕礮溪上。鵬海歸於蜀亂之後。於其行也。作詩以憐憫而慰勞之。

從軍行送王玉門之大梁

有客有客髯而紫。左挾秦弓右吳矢。自言家本關中豪。黃金散盡來江沚。年來倦上仲宣樓。裹糧且訪侯嬴里。腰間匕首徐夫人。河畔荒邱魏公子。懸知弔古有深愁。慷慨登車不可止。自從盜決黃河奔。大梁未有千家村。烽火但增新戰壘。塵沙非復古夷門。短衣聊向將軍幕。長劍終酬國士恩。落日驅車臨廣武。春風試馬出轅轅。丈夫佩印乃恆事。安能鬱鬱老邱樊。王郎顧我深歎息。一見歡喜如舊識。此行不但爲封侯。人生貴在抒胸臆。江上楊花白雪飛。梁園芳草青袍色。盾鼻猶堪試彩毫。鶯聲聊爲停珠勒。醉後狂歌氣若雲。軍中教戰容如墨。春風拂地車斑斑。起看明月攬刀環。平臺賓客久零落。至今汴水空潺湲。憐予偃蹇風塵際。年來磬折凋朱顏。已知苦被雕蟲誤。強弩欲挽不可關。待爾他年分虎竹。相從射獵終南山。棧道平歌爲賈膠侯尙書作

君不見梁州之谷斜與褒。中有棧道干雲霄。仰手可以捫東井。下臨長江浩汗洶波濤。大禹胼胝恐未到。

帝遣五丁開神臯。巨靈運斧地維圻。然後南通巴蜀西羌髩。虵盤縈紆六百里。千迴萬曲緣秋毫。懸車束馬弗可以徑度。飛騰絕壁愁猿獠。漢家留侯眞婦女。烈火一炬嗟徒勞。噫嘻乎。三秦之人困征戍。軍書蠶午如蝟毛。銜枚荷戈戟。轉粟窮脂膏。估客爾何來。萬里競錐刀。須臾失足幾千仞。猛虎蝮虵恣貪饕。出險灑酒始相賀。燐燐鬼火聞呼號。泰運開。尙書來。恩如雨露威風雷。一呼集畚鍤。再呼伐薪柴。醇醪澆山萬夫發。坐看巉巖削盡爲平埃。噫嘻乎。益烈山澤四千歲。火攻莫救蒼生災。昔也商旅魚貫行。今也不憂狼與豺。昔也單車不得上。今也康莊之途足以走連轡。夔童巴舞貢天府。桃笙寶布輸邛峽。歌豳風。擊土鼓。賈父之來何晚哉。豐功奕奕垂萬禩。經濟不數韋臯才。中朝袞衣待公補。璿璣在手平泰階。西望劍閣高崔巍。側身欲往空徘徊。大書深刻告來世。蛟龍岌嶮磨青崖。金穿石滂陵谷徙。我公之功不與伏波銅柱同塵埋。賈中丞名漢復。平險爲夷。因作歌以頌之。歌勒於觀音彌崖石上。

喜表弟董樵書至

數枉山中信。江湖問逐臣。憐予常作客。知爾尙依人。刀俎驚前夢。漁簑老此身。故園風俗薄。猶有葛天民。

馮唐墓

馮公昔未遇。執戟歎淹留。一薦雲中守。能寬漢主憂。古碑荒薜合。高柳暮鴉秋。自笑爲郎拙。蕭蕭欲白頭。

送傅介侯督餉寧夏

賀蘭西望鬱嵯峨。使者乘春攬轡過。三輔征輸何日盡。二陵風雨至今多。邊城楊柳樓中笛。羌女葡萄塞下歌。君到坐傳青海箭。不妨草檄倚瑠戈。七子遺賢。尤近滄溟。

夏瑗公先生廿載淺土門人盛珍示卜地葬之以其夫人祔焉詩以誌美

幾年松檟缺經營。負土荒原賴友生。曾賦國殤哀翟義。竟無傭保付王成。月明大鳥來華表。劍合雙龍捲素旌。二陸冤魂應共語。雲車風馬笑相迎。使事典切。六語見夫人祔葬。結但取冤魂及同爲雲間人意。機靈身分地位不必同也。

賀曾庭聞舉孝廉。庭聞江右人。易名中秦榜。

誰言才子竟蹉跎。天馬西來萬里過。名姓在秦張祿貴。文章入洛陸機多。漢廷佇奏凌雲筆。羌笛爭傳出塞歌。隴上梅花憑驛使。好將雙鯉下黃河。

同東雲雛玉心古諸君登華山雲臺峯

丹梯千仞倚嵯峨。萬轉盤紆出薜蘿。少華西來朝白帝。太行東望走黃河。欲從玉女窺蓮井。須向仙人借斧柯。樸被同君星漢外。方知天上白榆多。

華嶽

遙遙青黛削芙蓉。此日登臨落雁峯。霄漢何人騎白鹿。天門有路跨蒼龍。流沙弱水眞杯勺。太白終南盡附庸。卻憶巨靈開闢日。神功橐籥費陶鎔。

松風謾謾步虛聲。杖策高尋衛叔卿。星近祠壇光欲墮。月臨仙掌夜偏明。扶桑萬里天雞曙。箭括三更石馬鳴。誰信揚雄擅詞賦。不將綵筆記層城。舉頭天外。綽許落墨。不愧五岳起方寸語。

報唐采臣戶部時自寧夏還朝

使君書札勸加淪。又報征車發賀蘭。秦地關山留庾信。漢家鹽鐵問桓寬。飛鴻夜度朱弦冷。邊馬晨嘶白草寒。遷客隴頭憔悴甚。故人傳語到長安。

登西嶽廟萬壽閣

崔嵬傑閣玉爲寮。白帝離宮倚絳霄。檻外河山三輔小。崑前觴豆百靈朝。明星環佩雲來濕。仙掌芙蓉雨欲搖。會御長風凌絕巘。青鸞背上夜吹簫。

鸚鵡

雕籠萬里托征鞍。辛苦何辭行路難。幽閣恰添嬌女伴。方音猶作部民看。且分薄俸供秬稻。莫遣春風瘁羽翰。流水隴頭相憶否。朔雲邊月不勝寒。

送張蔚生明府之任劍州

棧閣崔嵬涪水西。芙蓉十二與雲齊。幾年漢使迷金馬。萬里江流見石犀。講學文翁今再覲。勒銘張載有新題。相思愁殺峨眉月。山木蒼蒼杜宇啼。

九日同姜如農王西樵程穆情諸君登慧光閣

塞鴻猶未到燕城。載酒登樓雨乍晴。山色淺深隨夕照。江流日夜變秋聲。上方鐘磬疎林滿。十里笙歌畫舫明。空負黃花羞短髮。寒衣三澗客心驚。悲壯沉鬱

刀魚

銀花爛漫委筠筐。錦帶吳鉤總擅長。千載專諸留俠骨。至今七箸尙飛霜。

舟中見獵犬有感

秋水蘆花一片明。難同鷹隼共功名。橋邊飽飯垂頭睡。也似英雄腓肉生。

蔣

超字虎臣。江南金壇人。順治丁亥。賜進士。第三人。官翰林院編修。著有綏菴集。

金陵舊院

錦繡歌殘翠黛塵。樓臺已盡曲池湮。荒園一種瓢兒菜。獨占秦淮舊日春。極濃麗地。偏寫得荒涼如許。感慨係之。

文殊院

紫玉屏風敞佛筵。諸峯如笏上青天。偶來山寺空無主。驚起白猿松際眠。

王

熙字子雍。直隸宛平人。順治丁亥。進士。官至大學士。諡文靖。

春日扈從南海子觀大蒐

上苑回春馭，傳呼夜漏催。六龍雲裏下，八陣日邊開。細草鳴鸞地，雄風買駿臺。應知宸算遠，不爲詰戎來。

宋徵輿字韓文，江南華亭人，順治丁亥進士，官至副都御史。

參軍行

檀州軍敗洹南陷，鐵騎西山逼雲棧。九門辛苦坐公卿，按兵不動有高監。玉堂美人胡不平，上書北闕苦論兵。參軍新命一朝下，單騎夜出長安城。是時主將盧司馬，獨將西兵兵力寡。不教國士死黃沙，別遣參軍向城下。參軍不行司馬嘆，參軍既行軍伍陳。北向再拜謝至尊，曰：臣象昇死國恩，鼓聲闐闐軍出壘。司馬一呼創者起，三萬邊兵夜合圍。孤軍雖勝終鬪死，朝廷頗輕死事功。翻疑訟疏多雷同，司馬幾受斲棺慘。參軍一官成轉蓬，嗚呼權臣報復有如此。疆場誰肯據孤忠，此紀賈莊之敗也。高監名起，潯參軍楊廷兵高起，潯擁兵坐視，忠烈與大軍戰，重創死。嗣昌誣以降，又誣以遁，幾至斲潯時樞輔楊嗣昌，賊盧忠烈正直，不與棧梢。廷麟力辯其寃，得免。忠佞顛倒如此，明社所以屋也。後參軍亦以守城死。

下灘

孤舟瀉石灘，雙槳下雲端。浪湧分花落，濤驚濺雪寒。亂山皆曲向，飛渡卻迴看。千里無諸國，天南自鬱盤。

一起如觀巴船出峽圖

古意

碧玉堂西紅粉樓，樓中思婦憶涼州。咸陽橋上三年夢，回樂峯前萬里愁。秦地烟花明月夜，胡天沙草白

雲秋離魂不識金微路。願逐交河水北流。酷似楊升菴塞垣鷓鴣詞。

冬閨夜怨

落盡飛雲暮色寒。黃昏北斗照闌干。可憐一片如霜月。惟有深閨獨自看。

鄧

旭字元照江南壽州人順治丁亥進士官翰林院檢討著有林屋詩集

錢塘看潮

夜發富春江。午纜錢塘岸。不見當時射潮者。天際煙波空浩瀚。須臾海門走疋練。白虹蜿蜿吐長線。漸看鯨背負山來。洶湧頓令天地變。龍吹笛。鼙擊鼓。馮夷天吳江上舞。萬斛舳舻如敗葉。怒濤一捲送平浦。伊昔惟聞東流之水無盡期。沃焦瀕洞爲漏卮。云何已逝壑。而有還源時。應是伍胥文種恨不滅。無路叩天氣填咽。故教雪浪排長空。古今噓吸無時絕。

贈鳳凰山咸菴禪丈菴名鳳巢

萬綠藏深壑。苔龕路幾層。側身同蟻進。牽臂學猿騰。累重綠留髮。栖幽欲妬僧。半生遲引退。應悔鏤春冰。

李

敬字聖一江南六合人順治丁亥進士官刑部侍郎

清明泊瓜步阻雨

愁思如芳草。春程不斷生。停雲連野色。過雨挾江聲。瓜步新添水。清明遠送行。強從吳客語。歸計羨朱櫻。

停雲十字流洋賞之謂其不減古人

讀水經注懷洞庭

坐倚巴丘俯洞庭。君山一十二峯青。不聞修竹來仙吹。但有孤鴻送客舲。欲辨水天惟北斗。若當風雨卽南溟。舊遊浩渺如春夢。兀看酈元注水經。

繆慧遠

字子長。江南吳縣人。順治丁亥進士。官壽陽知縣。○經義推巨手。韻語亦復雅健雄深。

雉子斑

雉子斑兮其羽煌煌。雄雌朝飛。阡陌相將。十步一啄。載飛載藏。誰爲甌樞。體負文章。南山媒翳。北山羅張。樊籠旣入。形容無光。恭承嘉惠。食以稻粱。爾雖小物。耿介莫當。局促一世。生不如亡。微命旣釋。感恩未央。遲遲春日。膏澤徜徉。願同黃雀。銜環君旁。

友人過訪

茸城愁絕各風煙。傾倒今朝倍黯然。坐上清歌聞子夜。人生行樂及丁年。三春會面常多阻。百罰深杯且共傳。舊事淒涼言未盡。簷花落久雨纖綿。

曹垂燦

字天祺。江南上海人。順治丁亥進士。官遂安知縣。

插秧詞

桔槔未動商羊舞。老農出社迎貓虎。薰風靈雨及時來。秧水齊添土膏腴。針苗翦翦綠初齊。如卦行行立。畛畦隴畔柳濃斜。挂笠農歌聲裏鵝鳩啼。自辰至午不停手。廚下炊羹并翦韭。老翁提盃餽田間。甕中更有新釀酒。日晚水田聚糾笠。移時火耨農功急。寄語食租衣稅家。莫忘辛苦盤中粒。如卦句所謂立苗欲疏也。

沈永令

字聞人。江南吳江人。順治戊子副榜。官高陵知縣。初知韓城縣。時湯文正爲潼關道。以循良重之。其政治可知也。詩亦宗仰唐人。不染竟陵習氣。

再次淮上對月

半年沙塞月。今夜映長淮。砧杵深閨夢。關山旅客懷。遙知燈下卜。敲斷鬢邊釵。何日花前影。清光共玉階。今夜鄜州月。念閨中之懷遠。此寫客中之念家境地相同。深情宛合。

咸陽寓中

老應甘棄世。壯已不如人。楚越燕秦路。東西南北身。鏡中俱是雪。塞外不知春。何日滄江返。磯頭穩釣綸。

秦中

深秋沙草馬長嘶。塞柳千條覆曲隄。水落渭河諸派合。天圍華嶽萬峯低。舊遊金谷雲烟散。故國銅駝枳棘迷。紫氣近來東望滿。函關何用一丸泥。顧茂倫稱此詩沉雄瑰麗。可追盛唐其氣象然也。下章亦然。

登華

歷歷星辰尺五懸。洮雲隴樹望相連。天高西北長空盡。勢控燕秦大地偏。烟杪一丸關百二。河流如線路

三千此身托足知何處。仙掌擎來霄漢邊。

分水龍王廟

南爲吳水北燕雲。結伴登臨喜得羣。七十二泉從此合。三千餘路恰平分。安瀾已下襄封詔。沉璧無煩草檄文。惟有仲宣行役苦。登樓久已悔從軍。
引汝水合七十二泉之水。注於南旺。平分南北。以利轉漕。此宋禮從白夷之議也。三四語真寫得盡。

贈葉菴禪師

師爲楚嘉魚人。天啓乙丑進士。筮仕吳令。晉吏垣。崇禎壬癸間。建言廷杖詔獄。滄桑後遂爲僧。康熙乙卯。駐錫江城。距作令時。閱五十寒暑矣。永令以昔年童子。受知門下。感賦是詩。

浮生閱盡幾滄桑。獨臥寒雲擁竹牀。百鍊身猶餘鐵石。萬言字尙挾風霜。列朝文獻徵遺史。一代天龍護法王。士女爭來瞻瑞相。使君故是宰河陽。
葉菴卽熊開元也。以彈周延震廷杖。後爲僧。門下士感慨賦之。如體本傳。

卷二

施閨章字尙白。江南宣城人。順治己丑進士。官江。西參議。康熙己未。召試博學宏詞。官翰林院侍講。又各自擅場。○王漁洋云。門人洪昉思。同詩法於愚山。愚山曰。子師言詩。如華嚴樓閣。彈指即現。漸義也。今觀兩家詩。此論確不可易。

漸義也。今觀兩家詩。此論確不可易。

警志詩

洋洋景運六轡徂流爾征爾邁不我眷留維帝賚予靡德不具既具既完逝不我顧拾穗雖利不如躬耕東炬夜馳不如早行鷗爭腐鼠鳳餐竹食翔視千仞下罕雛匹懿我祖考爭道策驥腹我目我遑敢隕墜昔遊東魯攝衣孔庭俯仰瞻聽實邇儀型匪哀匪慕泣涕如雨愴如亡子初見父母軌臻回賜文企姬秦不慚爇火持照千春隕霜警木世難厲德懷璧負途智士不惑獲則穴果懶則祭魚誰為令人不勤是圖皇皇朝夕望暑心慄如岸斯崩如虎將啣再苦抱疴顏不待耆敬爾良時并宵作畫步步實踐歸重下學不落宋人塵廣是日

詩品

升天行

丹鳳一雙垂雲上翔俯視八極中路徬徨一解下土小臣心思太古言叩天門手擊天鼓雷雨晝迷噤不得語二解天闔高高高不可即但見羣仙玉女侍側貨財千億自注黃金既成貨財千億役使鬼神玉女侍側見陰長生仙詩小臣昧死頓首言天闕清虛安用貨財千萬億願丐下土小民作衣食三解仙人持節問汝何所求小臣不願富貴願假赤螭遊戲十洲山無崩徙河海安流天子萬年兵革罷小臣魯鈍但當貧賤長優游四解

浮萍兔絲篇

李將軍言部曲嘗掠人妻既數年攜之南征值其故夫一見慟絕問其夫已納新婦則兵之故

妻也。四人皆大哭，各反其妻而去。予爲作浮萍兔絲篇。

浮萍寄洪波，飄飄東復西。兔絲附喬柯，裊裊復離披。兔絲斷有日，浮萍合有時。浮萍語兔絲，離合安可知。健兒東南征，馬上傾城姿。輕羅作障面，顧盼生光儀。故夫從旁窺，拭目驚且疑。長跪問健兒，母乃賤子妻。賤子分已斷，買婦商山陲。但願一相見，永訣從此辭。相見肝腸絕，健兒心乍悲。自言亦有婦，商山生別離。我戍十餘載，不知從阿誰。爾婦旣我鄉，便可會路歧。寧知商山婦，復向健兒啼。本執君箕帚，棄我忽如遺。黃雀從鳥飛，比翼長參差。雄飛占新巢，雌伏思舊枝。兩雄相顧詫，各自還其雌。雌雄一時合，雙淚沾裳衣。狀古來未有情事，以比興體出之，作漢人樂府讀可也。無書無筆人，不敢道一字。

過暈嶺

崇岡陟峻嶒，鳥道繞山腹。仰探白日短，俯瞰陰霞伏。魚貫度行人，疲馬躑躅。春晴多好風，吹我巖壑綠。農畊嶺上雲，婦飯溪中犢。羈心曠登陟，瘠土見風俗。華陽靈蹟闕，杖策尋石屋。

早春三天洞至仙人巖

寒巖斂衆妙，惠風蕩疎木。洞穴無人居，玲瓏闢華屋。春陰香乳流，谷溫瑤草綠。出戶見前峰，重雲無斷續。乘輿復杖藜，行歌散煩促。古樹含丹葩，餘雪長靈瀑。僧扉鑿陽崖，茶臼入深竹。采真客安往，悵望空山曲。

臨江憫旱

瘠土嗟薄穫。歲豐長忍飢。戎馬況疊跡。田園成路蹊。荷鋤代牛力。播種良苦疲。朱火肆燎原。禾稗同一萎。民亂如恐後。況乃驅策爲。徒跣呼百神。嗚咽致我辭。政拙未敢苛。召災今則誰。雲漢何皎潔。箕斗正參差。心知閻闔遠。側向高天啼。明日急芻餉。吞聲重涕洟。歲豐長忍飢。卽所云樂歲終身苦也。防民亂。懼召災呼天而訴如讓雲漢正月諸變雅。

悲野雀

行經沂州。有餉鵲鴿者。哀其義。不忍食。或曰。州人捕雀爲業。嗟乎。蕪田不耕。羅及野雀。作詩示

州人

粉榆繁羽族。瑣細無定名。所謀非稻粱。不與雞鶩爭。張羅始何日。遂使風俗成。機發盡掩覆。一羅殲羣生。持此飲啄具。充君鼎俎烹。苦慚託體微。不足一杯羹。同類爲啾啾。失侶長哀鳴。君輟筵上箸。請聽簷外聲。讀末二語。雖老雙亦應動心。

祀蠶娘

華燈白粥陳椒漿。田家女兒祀蠶娘。願刺繡裙與娘着。使我紅蠶堆滿箔。他家織縑裁羅襦。妾家賣絲充官租。餘作郎衣及兒襖。家貧租重還有無。蠶時桑遠行多露。好傍門前種桑樹。比張王樂府轉見性情之正。

牽船夫行

十八灘頭石齒齒。百丈青繩可憐子。赤腳短衣半在腰。裹飯寒吞掬江水。北來鐵騎盡乘船。灘峻船從石

窟穿雞豬牛酒不論數。連檣動索千夫牽。縣官懼罪急如火。預點民夫向江坐。拘留古廟等羈囚。兵來不來飢殺我。沿江沙石多崩峭。引臂如猿爭叫嘯。秋冬水澀春漲湍。渚穴蛟龍岸虎豹。伐鼓鳴鏡畫艦飛。陽侯起立江娥笑。不辭辛苦爲君行。挺促鞭驅半死生。君看死者仆江側。火伴何人敢哭聲。自從伏波下南粵。蠻江多少人流血。繩牽不斷腸斷絕。流水無情亦嗚咽。木幅歸咎新息真無可奈何之辭

另削峯

危峯矗立鼓山頂。目盡閩天萬山影。磨崖上有紫陽書。光芒倒射扶桑冷。雙江會合蛟龍遊。三山滅沒人煙浮。島嶼東看入海氣。空青一髮指琉球。洪濤忽起天地動。羲和返駕寒雲愁。吁嗟乎。白日苦短。青鬢已斑。天風何泠泠。吹我骨珊珊。念欲乘風揮手去。八表萬里何當還。鸞驂鶴馭良不遠。鯨吞蟻鬪誰能開。回首大笑哀人間。

射鳥樓行

自注爲周櫟園先生紀事

越王城邊烏啞啞。射鳥樓頭烏不下。周侯破寇此城頭。到今殺氣城烏愁。先皇丙申歲七月。寇來海畔盈山邱。疾如長鯨吞巨舟。城中號哭聲啾啾。侯方解官聽吏議。推守要害來烏樓。抗言立功須宿將。使貪使過皆保障。中有健手王老虎。陷陣摧鋒氣偏壯。羣凶爭踞豹頭山。咫尺烏樓正相向。蟻附蜂屯頃刻間。何人敢立女牆上。周侯清嘯決戎機。誓師慷慨裹鐵衣。指顧中堅發大礮。須臾萬骨黃塵飛。紫袍戎首正糜

爛一軍氣盡與尸歸。總戎援兵適繼至。三山是日解重圍。當途方略固多有。功成乃出閒官手。烽煙既息鳥樓空。烏樓壯績在人口。他年再集頭白烏。射鳥還有周侯無。記事詩不嫌詳盡此覺勃勃有生無以防亂作結慮事尤爲周詳

亂後和劉文伯郊行

斜日照荒野。亂山橫白雲。到家成遠客。訪舊指新墳。戰地冤魂語。空村畫角聞。相看皆墮淚。風葉自紛紛。

慈仁寺松

直欲凌風去。翻從拂地看。摧殘經百折。偃仰鬱千盤。老閱山河變。陰兼日月寒。支離爾何意。不厭臥長安。

谿漲

谿漲全無岸。沙田又可哀。舟航浮郡郭。荇藻冒樓臺。過雨重雲黑。奔雷動地迴。蛟龍橫得意。白日向人來。

懷侯韓振藍山

貧苦日相共。宦遊天一涯。有官真似水。無夢不還家。五嶺來山瘴。孤城接塞笳。別離春已暮。多恐鬢將華。

舟中立秋

垂老畏聞秋。年光逐水流。陰雲沈岸草。急雨亂灘舟。時事詩書拙。軍儲嶺海愁。游飢今有歲。倚棹望西疇。

叔父同弟阮遲予蕪關次日予北發

小泊聚江干。帆開淚未乾。路長催老易。家近恨歸難。長大看吾弟。浮沉付一官。今宵渾不寐。倍覺夜漫漫。

家近難歸。老於宦途者。知之。神明杜陵。乃有此種。

錢塘觀潮

海色雨中開。濤飛江上臺。聲驅千騎疾。氣捲萬山來。絕岸愁傾覆。輕舟故溯洄。鳴夷有遺恨。終古使人哀。
氣捲萬山來。五字千古。

顧寧人關中書至

舊蹟滿西京。高談就友生。書曾搜孔壁。詩已變秦聲。多難餘身健。新編計日成。別來頭並白。望遠不勝情。

過湖北山家

路回臨石岸。樹老出牆根。野水合諸澗。桃花成一村。呼雞過籬柵。行酒盡兒孫。老矣吾將隱。前峯恰對門。
野水十字。令穠松年亦不能畫。唐人時有落花至。遠隨流水香。同一自然。

雨後

歸田復多病。寒雨送三春。高柳不藏閣。流鶯解就人。道心看物變。時論薄官貧。無限扁舟意。澄江滿綠蘋。
三四不讓劉隨州漁洋取愚山五言近體。爲摘句圖。爲學者式也。

淳湖尋邢景之

四海倦遊後。始知泛愛非。寸心如落木。逢爾復春暉。移榻連蔬圃。烹魚出釣磯。清歡成信宿。不是醉忘歸。

江行雜詠

鼓枻隨漁父，乘槎老客星。鶯聲花嶼暖，龍氣雨潭腥。波綠澄湘浦，天青合洞庭。誰知漁子飯，絕勝五侯鯖。

望衡嶽

衡山絕頂祝融峯，獨峙天南抗岱宗。水國風雷虛岫出，炎方冰雪半巖封。斜陽欲辨煙中樹，昨夜遙聞岳麓鐘。好駐星軺看日出，臥翻雲海盪心胸。

登岱

日觀晴光榜午開，茫茫東見海爲杯。九州積氣峯前合，萬里浮雲杖底來。鄒魯山靈真莽蕩，吳閩練影漫徘徊。崑崙不到終遺憾，欲駕蒼龍首重回。

見宋荔裳遺詩，凄然有作。

自注：君按察四川，會滇蜀反道梗憂憤死。

好客生平酒不空，高歌零落痛無窮。西川終古流殘淚，東海從今少大風。國士魂銷多難後，離人望斷九原中。張堪妻子應誰託，巢卵長拋虎豹叢。西川句謂蜀人懷其政教，東海句謂山左失一雅宗也。○王漁洋此篇結語亦復云然，猶見古交道焉。○張堪卒於官，無託妻孥事，此約略語。

至南旺

客倦南來路，河分北流。明朝望鄉淚，流不到江頭。過南旺分水，水俱向北，淚滴水，中不復到江也，宛似唐人聲口。

送李萬安罷官歸里

歲暮歸舟一葉輕，歌殘酒罷淚雙傾。灘聲不是無情思，嗚咽隨君爲送行。

季開生

字天中，江南泰興人，順治己丑進士，官給事中，著有出關草。

尙陽堡卽事口號

新燒懸崖淨積莎，遠隨甲騎渡柴河。虎頭在客休投筆，雞肋從軍漫荷戈。骨肉書傳遼塞少，林泉話入故園多。邊城老將秋霜下，夜半聞笳起自歌。

五雲長繞舊皇畿，萬里孤臣寄翠微。極塞有山皆北向，重邊無水不西歸。雞鳴夢訝參朝晚，烏哺心傷進膳違。寧惜熒熒沙雁影，陽回未得入關飛。忠孝之人，其言藹如。

送左大來先生葬

重關不禁旅魂過，夢裏看君渡塞河。白日總悲生事少，黃泉翻羨故人多。荒臺啼鳥圍松柏，廢苑寒雲鎖薜蘿。未遂首丘須淺葬，好留枯骨待恩波。宋韓文時異靈均死亦難，以死爲幸，此云黃泉翻羨故人多，以死爲樂，皆刻骨入髓語。

董文驥

字玉虬，江南武進人，順治己丑進士，官侍御，著有微泉閣集。

真定客舍對雪

窮陰滿太虛，積雪凍庭除。鴉點埋雲樹，童依宿火廚。君恩狐白厚，老病酒杯疎。江國寒梅早，垂垂已待予。

紙上俱
有寒意

復過井陘口淮陰侯廟

背水千年廟。登壇百戰功。至今思赤幟。何處弔藏弓。春雨王孫草。靈風古木叢。淮陰年少子。終自笑英雄。
漁洋極稱五
六語自然

庚戌元日移家惠山舟中作

東風自信片帆斜。百里鄉園路豈賒。愛聽山泉因煮薺。並驅雞犬是移家。未聞春鳥來樵燕。已見寒梅笑岸花。萬國朝正看北極。十年拂霧馬歎沙。

去年元日棄孤臣。趙北燕南滯病身。八口一舟遷易散。自注家
人先歸吳山楚水信難真。卽看妻子還疑夢。高臥江湖又早春。只恐鶯花饒笑我。拂衣斑鬢已如銀。

十月初六發榆中夜抵魚河驛

振野涼沙撲馬飛。孟冬絕塞已風威。王程中夜魚河宿。客路衝寒虎節歸。邊月黑時防失道。胡霜白處欲侵衣。南州此夕微暄暖。滅燭聽鴻坐竹扉。

王廣心字伊人。江南華亭人。順治己丑進士。○先生經義。雕鏤鑿績。時作駢體。而韻語疎暢條達。不以一律拘。賢者故不可測也。

送董蒼水遊楚粵

先朝直節董侍郎。鋤奸拜杖投南荒。百粵山川恣唵嘯。至今巖壑垂光芒。康樂登臨千載絕。蒼梧踏澹灘。江咽鐵城桐柱漫。雀窺木客山猿自清切。侍郎之後君也才。文章早壓黃金臺。時無孔融不薦士。天人三策空歸來。丈夫壯志凌八極。越水吳山傷偪仄。瀟湘萬頃九疑煙。我有愁心蕩空碧。興來還看鬱林山。八桂堂深客思閒。葦蕙曉風啼翠羽。枕榔殘照落烏蠻。其間仕宦都賢者。酌酒論詩袖堪把。銅鼓峯前意慨慷。綠珠渡口人瀟灑。勸君莫過柳侯祠。少年失足良可悲。勸君勿謁伏波廟。七十據鞍遠者謂。人生功何必勒昆吾鼎。貴何必入中書堂。淋漓翰墨飛夜郎。如君侍郎名亦章。采罷丹砂好歸隱。與君谷口話農桑。
非貶柳州伏波勸其勿躁進勿戀勛名也前輩立言每不以頌而以規

大梁行送林平子

燕山四月槐雨涼。酒徒擊筑官道旁。驪駒欲鳴慘將發。爲君慷慨歌大梁。大梁昔當全盛日。裂土苴茅建宗室。魏殿旌旗北斗翻。汴宮花石城東密。定王憲王皆好才。樊樓窈窕東堂開。誠齋舊帖龍文寫。樂府新題鳳管催。黃河如帶縈天闕。舞榭歌鐘幾時歇。兔苑賓朋白雪樽。鷓絃士女金梁月。中原千里接神京。叔父勤王更勒銘。雞犬願隨淮桂老。魚龍忽厭蔡河平。一朝風雨金隄決。殺氣蒼茫鼓聲絕。龍章十葉赤帝孫。卻並銅人水中沒。滄桑變易八九年。我來欲渡愁無船。宮闕崩頽半深澤。狐狸跟跳空荒烟。偶逢遺老驅豚出。端禮門中招共入。銀樓藻井荇帶穿。玉殿螭頭土花澀。因言此殿西北隅。飛廉九仞凌清虛。濁河

波浪埋不得。依稀繡栢臨椒除。我登蘭雪軒。更倚端清閣。空梁天矯墮盤龍。古柏陰森少調鶴。下尋石洞風。翛然黃塵不到秋光先。雲英既死梵燈滅。誰從此地求神仙。嗚呼此景當年識。近日傳聞更蕭瑟。華棟都輸少府錢。碧蕙盡入空王宅。河山君到莫重論。良嶽吹臺總不存。但得晴天看少室。短衣落日過夷門。
大梁自流寇。決河灌城後。王孫俱爲波臣。臣民可知矣。登高眺覽。百感茫茫。而以看少室。甲侯羸作結。想見作者胸次。

懷友

昔日燕臺側。相爲踏雪歌。君恩移白日。鄉信斷黃河。蘭蕙秋偏歇。風霜晚較多。短衣吹鷓鴣。獨奈歲寒何。
夏日邀陳昌箕魏惟度許九日周釜山小集依韻酬陳昌箕

偶與仙翁草閣期。清尊碧簞畫樓遲。才名不忝三君後。人物能談萬歷時。綺季行藏巖桂老。少陵家國杜鵑知。可堪日暮山陽笛。淚落江城自詠詩。

送向西崑使蜀

廿年不到西川路。捧詔今看使者行。亂後草堂江燕在。春來劍閣杜鵑鳴。橋邊舊蹟懷司馬。山下新祠弔孔明。尙有焚香諸父老。相持杯酒話消兵。
中兩聯俱憑甲古人。前用虛寫。後用實寫。不覺其犯。

直方夜過憶臥子談詩

偶逢宋玉過西鄰。把酒重論故國春。一榻早懸陳仲舉。九歌親授屈靈均。衣冠白社沉秋草。賓客黃初散

洛塵醉裏寒星空自數。天門騎尾竟何人。直方卽宋轅文。見談詩之旨同而立。身立名各行其志也。當於晉外思之。

王

庭字青邁。浙江嘉興人。順治己丑進士。官山西布政使。○五言清絕。如韋蘇州。不欲以學問才力勝人。

棧道中作

人行山上高。天在山中小。圓暉易沉夜。初陽遲報曉。馬走山樹巔。飛鳥出其下。雲連深洞迷。石缺危橋架。七盤非險途。三秋足清景。日夕留泉聲。誰能辨喧靜。

雨後

落日殘雨餘。林樹半昏黑。南山白雲閒。澹然見秋色。冷風何淒淒。微微野烟息。歸巢鳥更鳴。當戶蟲還織。惆悵獨坐時。悠悠思何極。妙在淡然不着痕迹。

潼關

關門高鎖處。飛鳥不能過。雉堞連羣嶂。風標俯大河。代更千戰少。勢在一夫多。入夜聞刁斗。軍聲壯若何。

曉雨

獨鳥鳴南園。曉來雨初息。空庭生秋陰。莓苔長寒色。只此已足。

周禮觀

字伯衡。直隸遵化人。順治己丑進士。由翰林歷官參議。道著有晴鶴集。

秋螢和韻

振羽知無力。疎狂亂客扉。低空不礙眼。違候亦能飛。
違候亦能飛。五字可味。

大報恩寺逢友蒼言別

正爾未能別。相逢暮景斜。久疎因在客。多病欲辭家。夜雨洗山骨。殘春落澗花。祖衣休早付。待我過棲霞。

人日次徐州

泗上逢人日。長亭許更過。春雲回白首。客夢度黃河。舊俗淮南異。前賢沛國多。至今小兒女。猶唱大風歌。

撥棹雜咏

不見當年劉克猷。西風吹淚過黃州。舊時江路能來否。落日招魂古驛樓。
讀此使人增交誼之重。

盧

紘字元度。湖廣蘄州人。順治己丑進士。著有四照堂集。

望遠曲

明知人不歸。日日樓頭望。人尙在天涯。只疑行陌上。陌上紅塵逐日飛。何曾塵裏見人歸。經春歷夏無消息。檢點秋風又寄衣。

周茂源

字宿來。江南華亭人。順治己丑進士。官處州知府。○池北偶談。宿來以刑部郎。刑。駐節雪苑。

答曰。此余好友。山人得無恙。一時推爲長者。

過張文忠故第

賜第松臺麓。元臣主眷優。天章懸廢閣。相印沒荒邱。議奪千官氣。身無十世謀。立談工巷遇。何似富民侯。
此甲張江陵相也。江陵交馮保。逐新鄭。是其罪。鎮服九邊。名實不混。是其功。神廟始則尊如父師。過於龍。後至削籍破家。又過於薄。詩中江陵之氣。賦神廟之回惑。一一傳出。未以張禹之柔媚得君作。謂江陵功罪俱見矣。

雨中諸子集予機山別業

樵採閑時學苦吟。身如越鳥戀平林。偶然花月春江夜。共此蒹葭秋水心。山市酒罇兵後少。草堂詩句雨中深。沈沈鐘梵聲俱寂。橫笛還吹激楚音。

許纘曾字鶴沙。江南華亭人。順治己丑進士。官瀛中。按察。著有寶綸堂集。

遊峨眉山歌

伊昔披山經。峨眉冠五嶽。傑然鎮坤維。蒼翠萬仞削。初疑宇內無此奇。今日所見更過之。乃知天地靈怪不可測。生平遊覽快意無如斯。既躡飛龍嶺。還登歌鳳臺。狂客已長逝。真人不復來。丹鑪火冷鶴駕遠。譚經石榻生莓苔。一步一驚詫。十步一徘徊。上有排空疊嶂翠欲滴。下有飛泉百尺聲如雷。巉巖鳥道崎嶇入。天門一隙雲光白。八十四盤最上頭。婆娑萬樹清陰碧。探帝座。凌丹邱。白雲飛揚。長風颺颺。積雪如嚴冬。凜冽披重裘。俯視岷江萬里蜿蜒僅一線。蜀山千點參差羅列兒孫儔。花為優曇色。鳥作迦陵聲。天香

夜不散。法鼓晝長鳴。金輪忍土震。旦推第一。赤髯白足靈機妙道真。難名。須臾報道佛光現。蒼茫雲海蒸。奇變爛似慶雲暈。若虹林巖五色增。葱蘢金橋突兀駕虛空。彷彿珠眉紺髮容。忽然雲散光亦滅。惟有朝曦蕩漾倒掛金芙蓉。陔此靈異境。神魂欲飛越。遠勝赤城梁。何數蓬萊窟。吁嗟蜀道之難難。於上青天。幾人能到峨眉巔。仙都佛國盡在此。請君莫惜多留連。飛騰滅沒。後半尤爲荒幻。凌空可云善學太白。

睢陽行

大江之南多木客。古樹深篁叢窟宅。禹鼎銷沈老魅驕。野火游光兆形魄。譁譁出出逞神奸。空梁夜嘯霜天碧。年年里巷攘魚腥。逡巡社公常避席。有時幻作美丈夫。烏帽猩袍服御都。山魃按拍斑狸舞。桂棹蘭橈泛五湖。采蓮女兒樊素口。木下三郎求配偶。寶馬雲駢天際迎。傾城顰笑供箕帚。從此民間勤報賽。爐火村村疑鬢鬢。豪門娶婦亦危疑。先奏神絃羞沆瀣。楞伽廟貌更崔嵬。繡幕珠簾霄漢開。蘭堂處處笙歌競。綵鷁朝朝鼓吹來。畫屏廣列夫人坐。清揚妙相垂倭墮。祝史乘機壘斷張。阿母新來口侈侈。三吳今古如長夜。狐鳴篝火騰欺詐。蚩蚩不復畏三章。豚蹄斗酒求神赦。更有紅裙白面郎。踏青拾翠遊芳塘。長吏催科百不應。賣得新絲往上方。數百年來尙奸宄。江河日下誰能止。淫昏性醴罇烝嘗。跛覩妖巫壓羊豕。龍虎真人道行高。檢校功曹山鬼號。頻年尺一到江左。挪揄玩愒如弁髦。睢陽學士金閨彥。夜深常侍明光殿。金符大旆挾風靈。冰心苦節綏南甸。長空朗月照江濤。於菟出走蒼狼逃。木石之怪夔罔兩。猶向人

問案五牢中丞飛檄榜通衢。沉其土偶廬其居。故鬼不于新鬼竄。陰霾掃蕩天清虛。君不見狄梁公西門豹。水沈三老焚祆廟。又不見旌陽尹昌黎。伯斬蛟驅鱷服以德。從來忠信孚豚魚。千秋敦史銘金石。公今入朝帶劍履。前席殷勤報天子。璽書赫濯神祇驚。日麗中天民受祉。有道之時鬼不靈。當今海內長如此。敘睢州湯文正公除五通神事。淋漓暢快言之未歸。到有道之世。其鬼不靈。尤極正大。○龍虎真人以法驅之。轉受擲掄。得此一觀。接入湯公倍覺有力。此文章烘觀法也。

沈

荃字貞蕪。江南華亭人。順治壬辰。賜進士第三。官至禮部侍郎。諡文恪。著有充齋集。○明宣德時。雲間有二沈學士。大學士名度。小學士名傑。皆以善書得名。文恪。小學士後也。亦以書

法見重於聖祖。

送雪龕兄任保寧

最憶閩中勝。雲山到眼迷。地從巴水折。天入劍門低。夜月桐花豔。春風杜宇啼。池塘應有夢。鄉思更淒淒。
折字低字。捶鍊得之。

送張箕山學士歸廬陵

襟被蕭蕭出鳳城。觚稜回首重含情。片言豈詔回天力。三宿仍辭去國名。聖德優容逾格外。臣心忠藎本生平。曲江風度應相憶。莫戀空山猿鶴盟。
三四語傳出直臣去國心事。此風人之旨。悻悻小丈夫未喻此也。

湯

斌字孔伯。河南睢州人。順治壬辰進士。康熙己未。召試博學鴻詞。官至工部尚書。乾隆中。補謚文正。有潛菴集。○是集以詩存人。不以人在詩。故有建豎功業。講明理學。而詩不存者。文正

為國朝第一流人。而韻語葩流。溫。溫。藹。藹。洵為德人之言。因亟登之。

夏日詠懷

初夏朝氣清。綠陰映竹閣。好鳥時來集。微風散林薄。養疴豐暇日。坐臥對雲壑。圖書紛几席。茗椀常間錯。偶爾屬篇章。怡情志簡略。採藥支短筇。尋泉踏芒屨。豈曰謝浮榮。明志貴澹泊。抗心懷古人。蕭然有真樂。

贈李映碧先生

蚤年登朝寧。端笏拜彤闈。抗疏表孤忠。旭日麗黃扉。維時甘陵部。南北勢相違。正色兩不阿。嶽嶽世所希。元祐盛名賢。黨論多是非。玄黃未息戰。國是將安歸。唯有哲人在。秉道還識幾。石室留諫草。夢回尙依稀。魯國遺經火。口傳賴伏生。九十秦博士。典謨賴以明。文獻歸靈光。斗杓示景行。著述藏名嶽。大義何崢嶸。虎觀待鴻儒。丹詔下江城。老年難走趨。豈敢抗弓旌。抽書授使者。卷軸滿巨籬。白雲封巖谷。時聞鸞鳳聲。
此徵召而未出者。不言乘高節。而云老年難走趨。卽杜陵聖朝無棄物。老病已成翁意。須如此立言。

送李子德奉旨歸養

薊門疎雨淡秋陰。惟爾斯行重古今。賦就上林纔賜第。表陳東掖早抽簪。關河落照鄉山迥。驛路鳴蟬野樹深。到日高堂應戲綵。御香未散繞衣襟。

飲張爾成少參署中

高齋竹柏漏聲殘。促席停盃興未闌。千里風塵驚短髮。十年供奉憶同官。霜深衛水雲帆壯。雪滿天雄玉

塵寒北斗共瞻新氣象。故人幾許在長安。

贈吳湖州

仙郎起草最知名。幾載褰帷雪上行。按部雨餘香稻晚。課農花發曉雲輕。南宮書畫添新譜。李相亭臺續舊盟。聞道賓朋常滿座。清尊真見古人情。

程可則

字周量。廣東南海人。順治壬辰會試第一。官兵部職方郎中。終桂林知府。著有海日堂集。○
澹濼詩。俊偉騰躡。聲光熊熊。亞於漁洋。品在公馭。玉虬。鈍翁。諸公之右。稱魯衛者。惟西樵乎。
後之選嶺南詩者。祇取
風梁陳。而不及程。何也。

送家立菴太常歸皖山

好爵洵可貴。不貪良獨難。道德五千言。止足爲真詮。漢時二疏志。千載稱大賢。豈不念蒼生。身遂名亦全。象齒何爲焚。膏明將自煎。因君振遙策。懷古心悠然。

昔登白玉堂。文彩何郁郁。胄子承風規。諸儒稟芳躅。出持絕域節。入奉齋宮錄。一身爲千秋。此事亦已足。浩然思故鄉。懸車返初服。浮山七十峯。依稀作湯沐。辭達意足。五言正始。

送邵橫菴之秦中

五月火雲燒幽州。大風驅之雲不流。昨夜雨來不盈掌。山鬼叫嘯農爲愁。遠聞秦中黑霜下。花作蠅蠅飛滿野。秦人瘖畏越人視。君今西去胡爲者。道是終南山色佳。四時衆壑鳴風雷。蓮花百丈青到眼。騎龍直

上昇仙臺君家昔人東陵老種瓜卻解塵纓早我欲隨君問故侯何由共踏青門道

送楊鄂州職方使安南

皇帝在位閱七載九州四海歌太平烏弋黃皮稟漢朔旅獒越雉來周京安南君長處炎徼北面久已輸忠誠前年璽書予封爵吾宗學士曾南征立歸來陳風對宣室爲言此地無兵爭鸚鵡魚遊浪泊水菴羅果熟安陽城今年羽書忽馳至族類不合仇相傾蠻王更制略下邑都尉倔強投昆明憑陵三郡勢莫敵女無繅繭男無耕觸蠻之鬪豈足計祇憐蹂躪憂蒼生相如諭蜀有往事詔旨特簡才臣行職方亭亭起三楚鬚眉如戟雙瞳晶昔年執法昆彌道近襄九伐尤崢嶸大臣推轂立召見至尊御殿親書名天語殷勤勞四牡一時餞送來公卿雙旌翹翹出北闕八座赫赫過南荆乘秋直入交州郡雕題負弩遙相迎憑君片言諭大義調和二氏無佳兵功成上書報天子不用京觀封長鯨伏波銅柱邈千歲壯哉爾與同英聲嗚呼男兒萬里遠遊志亦足不爾蝸廬踟躕虛吾生以天語調和兩氏自應煒燁煌煌蠻禍之鬪豈足計祇憐蹂躪憂蒼生是尊崇國體仁覆無外語

送紀載之備兵肅州

萬古焉支路迢迢欲上天送君持漢節吹角去防邊問俗清西海題詩賚酒泉羌戎羣下拜不敢向居延不必奇編白是唐音

送家立菴學士册封安南

自昔南交地，蠻煙萬里餘。地經和仲宅，人習素王書。
柘鬯分藩舊，苴茅錫命初。須令知漢大，不必問金車。
送徐庾清錢相園歸越

良會竟難永，歲寒人盡歸。誰憐故鄉子，獨采南山薇。
把酒不終夕，浩歌徒攬衣。無能挽舟楫，惻惻拜斜暉。
此種風格最近徐昌谷，不在語句之工。

登虔州城樓

鬱孤臺畔暮煙空，與客登臨起大風。馬耳羣山歸睥睨，
虎頭全郡覽崆峒。江通閩楚三千里，地誇東南百
二雄。十載樓船紛下瀨，兵戈今喜罷虔中。

送魏子存司李成都

誰說蠶叢不易行，春風三月馬蹄輕。銅梁舊枕秦山險，
玉壘新連楚塞平。芳草綠齊過漢水，杜鵑紅盡到
緜城。知君篋底多詞賦，諭蜀文應似長卿。

花朝同林坦菴諸子集王蔗菴誰園餞談蘧懷之京口次留別韻

宿雨連雲擁去舟，送君還典鷓鴣裘。酒香滿座難成醉，
柳色依人欲上樓。偏與花時縈遠夢，豈知蓮社得
新愁。東風萬里憐芳草，一路題詩到潤州。
晚唐佳句。

贈衛醇谷

弱冠登壇已策勛。門多揖客重將軍。高秋賭射盤生馬。靜夜焚香檢篆文。一日君臣真異遇。五陵兄弟自同羣。揮毫試擬鄱陽帖。四座爭傳白練裙。

卷三

曹爾堪

字子順。浙江嘉善人。順治壬辰進士。官侍講學士。○學士性英敏。所過山川阨塞。無不指掌。文頌刻成。同館無與爭捷者。

金魚池歌仿杜樂遊園體

池邊風日足留賞。曲水平隄暗菰蔣。且駐巾車臥綺疏。啓扇拂簾楸枰響。皎月樓開雲母屏。商飈籊動珊瑚網。紺殿凌空青靄間。步虛聲在青雲上。飛汞烟沈道士鎰。落霞閃映仙人掌。晝明金闕翠華臨。馳道清塵畏來往。玳瑁魚斑日應長。恍在江湖盪蘭漿。名園豈似金谷奢。福地真如輞川爽。喜與諸公同賦詩。讀騷痛飲良可師。今朝美酒注深爵。明日殘花辭故枝。仕宦京華得高會。追歡勝景皆恩私。別後星河望渺渺。將離贈遠遙相思。更餘千載悲秋淚。漆髮丹顏非曩時。

宿州

城破空濠在。郊寒木葉稀。數家非土著。一雁向雲飛。曉月疎楊柳。清風老薜薇。年來新戰鬼。汗血幾時歸。

送宋荔裳少參之任秦州

臘雪街亭滿，何時到鞏昌。關山樽底月，斧鉞帳前霜。閣暖調鸚鵡，花濃隱麝香。出門憐舊伴，白首尙爲郎。

顧大申

字震雄，江南華亭人。順治壬辰進士，官工部侍郎。著有鶴巢詩存。○雲間自陳臥子後，詩格漸衰。鶴巢古今體氣足神完，可以接武。

西洲曲

東風吹五兩，憶郎西洲去。門宿武昌船，帆開岳陽樹。去年下西洲，遲日獨登樓。今年桃李花，紅白浮巴丘。花開得結子，作客何窮已。春斷鶯啼中，妝成明鏡裏。朝上望夫山，織手得紅蘭。盛以茱萸囊，結以翡翠盤。鏤刻刀環形，鴛鴦雙偃仰。寄懸腰間帶，銅鞮莫輕上。

飲太白酒樓醉後走筆成篇

嗚呼太白爾何遊，應在飄飄碧落之倒景。芙蓉白玉之仙樓，乘雲抱氣躡箕斗。騖螭泔漢騎長蚪，世人卽之杳難求。但見朱軒繡栢環城頭，岱宗歷歷青撲面。黃河西來淨如練，七十二君等飛電。地老天荒出酒人，狂歌直與天爲鄰。上殿捉筆力士噴，背負鹽鼎誰相存。就中賞音賀季真，獨抱麴蘖看浮雲。登樓日醉忘其身，西風野火衰草死。由來豪貴盡如此，我今把盞揖君起。相與酌酒問濟水，古今醉醒那終始。何不高步窮紫煙，摘取列星當酒錢。斟酌海水常不乾，開襟痛飲樓之巔。醉呼黃鶴迴青天。凌虛縹緲，筆有仙氣。

雪後登歌風臺示沛令

一劍收秦鹿。秋風萬里心。悲歌誰掩泣。壯士已成禽。井邑新豐舊。龍蛇大澤深。殘碑埋野戍。雪後此登臨。
盛唐氣魄。雪後只於宋句點出作法一變。

送沈繹堂編修遷大梁道

鼓角北風涼。雙旌入大梁。十年悲瓠子。萬馬散敖倉。少府新沉璧。中原古戰場。君行能臥治。未許薄淮陽。
大梁。漢淮陽國。卽汲長孺所治也。不同泛然比例。

故關

盡日常山道。雄關此鬱盤。萬山爭一險。絕壁鳥飛難。馬度黃雲合。旗翻白日寒。論兵空有地。誰得更登壇。
自注。井陘縣有淮陰。談兵處石碣。

出平定州

忽爾危關豁。羣然衆嶺低。山連鴈門外。地出井陘西。亂石淹人跡。層冰怯馬蹄。相逢故鄉客。燈下手重攜。
自注。藹陽晤吳秦毓令君故云。

始發良鄉

上馬頻傾惜別杯。薊門西去亦悠哉。地隨督亢依山盡。河控桑乾入塞來。老去尙能持漢節。時清應不重邊才。冰霜漸邇君門遠。東望長安首重回。

秋雨移酌櫟園舟中

雲滿東山急雨霏。移觴對酌兩依依。荒城野戍鳴秋柝。海嶠孤臣冷葛衣。醉後玄黃燈半燼。尊前風雨鴈初飛。君看豐沛笙歌地。昔日高臺今日非。

王士禛

字子底。山東新城人。順治壬辰進士。官吏部考功員外郎。著有四樵集。○西樵。阮亭長兄。阮公詩說并偽書。李維正序行津逮祕書。收之。皆誤也。詩以才情擅長。運古而不見。使事之迹。一時名家。故應敵手。

長平坑歌

虎狼之秦胡不仁。銳頭小兒服振振。劫灰更促括也將。一戰趙壘成埃塵。白骨嶽積四十萬。至今此地無青春。丹塢水遠發鳩籠。指點當年趙兵衄。土人往往坑旁耕。拾得殘戈或斷鏃。鏃頭長以寸。戈頭長以尺。持將磨向丹河沙。古血猶腥土花赤。省冤谷接武安臺。南來遺蹟仍崔嵬。應共憫饑山下月。夜深同對鬼燐哀。視陶中立長平戈頭歌較有魄力。

顧云美八分書歌

斯翁變體古文邈。斯翁李陽冰語。斟酌其間八分作。中郎以還攻者稀。直數開元顧文學。於今苗裔仍東吳。短簿祠邊舊樓託。我從筆陣推波瀾。遠繩乃祖真無忤。爲言向來大有人。躡漢追唐歸宋郭。自注。宋比玉。郭聖僕。妙蹟鄙人惜。少見餘子紛紛資力薄。乞君迴筆書堂顏。鵠峙龍拏腕中落。當年海內無干戈。留都文物尤峨峨。不

獨槐市盛絃誦。兼復桃葉繁笙歌。入看祭酒解散髻。出醉美人金叵羅。雅負辨眼工小字。詩成自寫無偏頗。爾時負販重風雅。人傳片楮兼金多。仙人昨過蔡經宅。清淺茫茫不堪索。蟲刻居然非壯夫。蕭條誰問韓陵石。儒衣僧帽顧阿瑛。老向江湖作逋客。醉書自署頭陀芥。擲筆時時念今昔。此書珍重感君深。歸來高揭南榮陰。臥看渴驥奔泉勢。如見冥鴻避弋心。云美名芥。吳中遺老。志高節堅。不獨分隸篆。刻上追古人也。一結如見其人。并如寫其心。

詔罷高麗貢鷹歌

真人御極臨八荒。百蠻九譯皆享王。西旅之獒越裳雉。貢物各各因其方。海東俊鳥好毛質。鐵爪金眸猛無匹。九都作貢來天家。特受鞬鏃佐罟畢。晾鷹臺上秋天高。乘時驅獸行蒐苗。羽騎驂驪翠華至。星旂雲罕紛周遭。蒙鶚射熊未足羨。跋犀殪兕徒遮邀。是時摘條試一縱。萬人昂首瞻青霄。飛鳥狡兔失巢窟。委身灑血填君庖。至尊往往動顏色。玉虬迴轡鳴蕭蕭。柔遠傳聞勤睿旨。詔罷奇毛自今始。行葦兼存踐履慈。苗段漫賦春田美。聖神舉動殊尋常。此事悠悠古誰比。君不見虬鬚天子真英雄。受諫鶴死藏懷中。推盛德語。特沉摯。末二句。從國雅本音節似勝原作。

裁衣曲

初罷清砧響。還勞素腕舒。殘燈金粟尺。遠道玉關書。白紵纒仍澀。紅綿怨有餘。流黃明月路。何處逐輕車。可入升菴五言律祖。

憶萊雜詩

時復尋春郭。煙光縱目寬。山姿濃大澤。潮勢汨三韓。小立拋藤杖。微吟側籜冠。醉歸還倒載。未厭海風寒。
或疑第四語汨字所出。汪鈍翁曰。吳楚東南。拆。拆字汨字。正以獨造爲奇。見漁洋詩話。

晚晴

鳴雨作還止。蕭然開晚晴。雄風涼大壑。雌霓貫秋城。臺送遙山碧。窗添夕照明。長空聞雁語。悵悵故園聲。
四語貫字。與潮勢汨三韓汨字同一生造。

上黨

雄藩上黨古今名。形勝居然未易京。南眺河山俱在下。宵看星漢只疑平。義陽千載仍祠廟。夾寨當年劇戰爭。足底黑雲天下脊。幾朝車馬赤霄行。

程崑崙招集萬歲樓

千尋江閣引諸峯。多景登臨策短筇。參佐風流如謝朓。樓臺瀟灑似王恭。三年夢裏西津雨。半夜燈前北固鐘。明日芒屨別君去。城中遙望白雲重。

賦得丹鳳城南秋夜長

丹鳳城南秋夜長。關河寒近落微霜。不須錦字論長恨。自有清砧教斷腸。破衲沙頭鴻欲去。拂雲堆上草

初黃傷心卻羨城邊月。猶照深閨玳瑁梁。

末麗詞

冰雪爲容玉作胎。柔情合傍瑣窗隈。香從清夢迴時覺。花向美人頭上開。

金漸皋

字夢鸞浙江仁和人順治壬辰進士官漢陽知縣著有怡安堂集○怡安勝任劇邑大吏方以才能薦而翩然乞身其風高矣論詩謂泥古而拘趨今而廢總期抒寫性情今披其集果

如其言

冬日雜詠

日日愁仍攬鏡看。楚人憔悴尙南冠。力微不任施橫草。論定終當待闕棺。元亮晚途甘石隱。孔明早歲本龍蟠。救時事業須經術。莫遣蒼生笑謝安。一生行藏已見此章

邗江

畫舸南遊錦纜移。垂楊空有萬條垂。二分明月仍今夕。十里珠簾異昔時。回望鄉關迷咫尺。頻年踪跡媿支離。可憐楊子橋邊水。只與征人照鬢絲。此述兵燹後之邗江故語多哀風

李來泰

字石臺江西南川人順治壬辰進士康熙己未召試博學鴻詞官翰林院侍講著有石壘集○先生文不肯一語猶人詩獨以平正通達行之能者不拘一格

中山貢使入朝紀事

卻貢趨朝禮遇殊。碧矚離結語烏烏。已聞聖主方焚玉。何用鮫人更泣珠。環海近添新郡縣。中山已屬舊

疆隅謹將域外名王表添入天家職貢圖輕貢獻而重朝服立誓有體

荆公故宅

十年高臥此東峯出處無端覺已叢洛蜀黨成疑誤國熙豐法敵竟緣公爭墩已賦三山石記里猶傳九曜宮漫向春風尋舊澤生平功過史書中由言利而變法由變法而紹述由紹述而召亂則宋家南渡荆公有以致之也臨川人每多諱言作者自存直道

覺塵余故人子也以僧來謁書以贈之

昔年曾訪王官谷故苑飄零事已非為問故人誰白髮忽驚孺子變緇衣江湖遠道難通問邱壑終身不療飢太息廿年塵土夢鈍根未解箭鋒機

黎士弘字媿曾福建長汀人順治甲午舉人官寧夏副使道

至西昌知周櫟園先生無恙且得手書

他鄉驚喜君還在痛定開函淚更流萬死才回明主顧孤兒猶屬故人收衆中薄命誰能惜意外微生荷獨留誤盡閩南碑下客無端北望哭西州一氣赴題少陵有此章法前代謝茂秦時亦有之

王士正

字貽上山東新城人順治乙未進士由司李入為曹郎改翰林官至刑部尚書著有帶經堂集○漁洋少歲即見重於牧齋尚書後學殖日富聲望日高宇內尊為詩壇圭臬突過黃初

終其身無異辭身後多毛舉其失互相彈射而趙秋谷嘗贊著談龍錄以詆謀之恐未足以服漁洋心也或謂漁洋癩祭之工太多性靈反為書卷所掩故爾雅有餘而莽蒼之氣適折之力往往不及古人老杜之悲壯沉鬱每在亂頭粗服中也應之曰是則然矣然獨不曰惟娛難工愁苦易好安能使處太平之盛者強作無病呻吟乎愚未嘗隨衆譽亦非敢隨衆毀也平心以求錄其最

佳者其有當衆心與否不及計焉。○全集以明麗博雅勝者居多然恐
取之不盡茲特取其高華渾厚有法度神韻者覺流洋面目爲之改觀

定軍山諸葛公墓下作

高密起南陽。文終從高祖。暴繫本見疑。數衄亦非武。堂堂諸葛公。魚水託心膂。二表匹謨訓。一德追伊呂。
視操但如鬼。畏蜀還如虎。嗟彼巾幗徒。與公豈儔伍。紫色復蛙聲。抵隙各爲主。火井方三炎。赤伏更平聲典。
午志士恥帝秦。祭器猶存魯。陰平一失險。面縛忘奔莒。知公抱遺憾。龍臥成千古。峨峨定軍山。悠悠沔陽。
潏鬱鬱冬青林。哀哀號杜宇。耕除拾遺鏃。月黑聞軍鼓。譙侯寧足誅。激昂淚如雨。起四語以蕭何之下廷尉鄧禹之連敗歸侯印
綴形武侯之一德一心未嘗挫衄也。火井三炎謂高祖光武昭烈也。敘述忠義武烈及天命興衰後激昂憑用如有神助此等詩典重高朗即欲使之無傳其可得乎。

朝天峽

朝登嘉陵舟。日出羌水赤。履險倦鞍馬。卽次亦稱適。黢黢雙峽來。突見巨靈跣。嶄巖無寸膚。青冥厲雙翻。
陰崖積龍蛻。跳波畏鯨擲。往往壓人頂。駭此欲崩石。洞穴峽半開。兵氣尙狼藉。蛇豕據成都。置戍當險厄。
至今三十年。白骨滿梓益。流民近稍歸。天意厭兵革。會見寶盧人。燒畬開确磻。慷慨一扣舷。浩歌感今昔。
風便黎州城。茫茫波濤白。漁洋五言俱近所選唐賢三昧一格以不着圈點爲主所謂羚羊挂角無迹可求
龍狀山川奇險愚故舍彼取此

龍門閣

衆山如連鼈，突兀上龍背。鱗鬣中怒張，風雨晝晦昧。出爪作之而，神奇始何代。亂水趨嘉陵，波濤勢交匯。萬壑爭一門，雷霆走其內。直跨背上行，四顧氣什倍。夕陽下岷峨，天彭光破碎。咫尺劍門關，益州此絕塞。子陽昔躍馬，妖夢成倂儻。音態區區王與孟，泥首終一概。李特亦雄兒，僭竊竟何在。王謂王建子衍降於郭從韜孟謂孟知祥

子景降於宋

五丁峽

南窮石牛道，崑崙下雲棧。三日招我魂，足蹕目獨眩。豈知東蒼州，耳目益奇變。始過金牛驛，穆嶠已凌亂。漾水從北來，劣足泛鳧雁。舉頭蟠冢山，峨冠倚天半。大哉神禹功，從此導江漢。漸入五丁峽，譎詭駭聞見。斗壁何瘳瘳，十萬磨大劍。攢羅列交戟，茫昧通一線。亂水殷峽中，蛟蜃喜瀾汗。仰眺絕圭景，俯聆競雷抃。九鼎鑄神姦，到此百憂患。東方牧犢兒，竟使蠶叢判。我行忽萬里，風土異鄉縣。身落大荒西，終賴皇天眷。咄咄復何言，艱虞一身賤。仰眺絕圭景見峽高斷日非圭景所能測也俯聆競雷抃言將聽濤聲如奔雷也孫樵蜀賦云臨千仞之驚流兮波瀾洞而雷抃

天柱山

朝出元武門，雲垂雨忽凍。登登天柱山，千盤墮瀕洞。崢嶸逾巴閬，槎牙過秦鳳。陟嶺如累棋，下谷疑入甕。心俯尻益高，足縮目先送。敢嗟鳥獸羣，稍喜徒旅衆。我有大羽箭，麗龜輒命中。於菟昂其首，飲羽乃不動。道旁松合抱，巨可任梁棟。惜哉野蔓纏，不蒙匠石用。絕頂見岷山，青城亦伯仲。一氣連諸蕃，三州實西控。

太平幸無事。左髻時入貢。念彼松姚戍。坐甲苦飢凍。俯臨陸海雄。仰視天宇空。長嘯千仞岡。出險忽如夢。

海門歌

岷岷東下江水長。遠從井絡來吳鄉。奔濤萬里始一曲。古之天塹維朱方。北界中原壯南紀。魚龍日月相迴翔。中流一島號浮玉。登高眺遠何茫茫。長空飛鳥去不盡。江海一氣同青蒼。山外兩峯遠奇絕。雙闕屹立天中央。左江右海辨雲氣。如爲八裔分紀疆。江流到此一縛束。早潮晚汐無披猖。燭龍曉日出雲海。山光照曜連扶桑。年來海戍未停罷。賊舸大艦來汪洋。胡豆洲前起烽火。徒兒浦上披櫛襠。古聞京口兵可用。寄奴一去天蒼涼。我願此山障江海。七閩百粵爲隄防。作歌大醉臥巖石。起看江月流清光。焦山東北有島並峙。謂之海門。○詩忌直下。須中間一束。江流到此一束。縛二語得此境與詩俱見。關餒矣。以下皆感時弔古。

丹徒行弔宋武帝

曲阿之北京口東。寄奴王者真英雄。新州伐荻殺龍子。大業遂建丹徒宮。桓家小兒亂天紀。投袂勤王夜中起。擣痛百萬皆人豪。龍行虎步非凡理。從茲大運屬彭城。中原趙魏歸經營。破口千軍五龍涸。藍田一戰二嶠平。南北推移幾千載。太息雄圖竟何在。宿麥寒原少昔人。神鴉社鼓成空塞。王氣銷殘帝宅荒。悠悠江水不勝長。忠臣徒歎袁開府。天命還歸蕭建康。從叛建及亡國。言以簡勝。末路匪從苦心搜索而得。是曰神來。

故明景帝陵懷古

景陵在天壽山東峯之下。

金山南臨裂帛湖。荒陵十里鶴鷗呼。奪門事往二百載。行人過此猶歎歎。紅牆剝盡古瓦落。莓苔溜雨生銅鋪。老松離立色枯槁。但穴蟲蟻餘根株。跋塗龍輻禮本殺。矧乃劫火經樵蘇。咫尺天壽雲氣接。坏土猶葬西山隅。洪宣老臣稍凋喪。國成一旦歸刑餘。勃鞞之間史所貶。詎有宣寺千征誅。黃沙慘澹鼓聲死。萬乘一擲成纍俘。國有君矣社稷重。孫申謀鄭無差殊。白登城南翠華返。錢塘司馬功難誣。紛紛南渡議和戰。乃知計左非良圖。同寅之占信奇中。朝衣東市嗟何辜。劍南歸來西內閉。唐家父子輸廐奴。處人骨肉事非易。子臧季札今則無。功罪千秋有特筆。九鼎一髮須人扶。謚同泉鳩理太酷。紀年猶幸無革除。裁令流水良亦足。寧論王匣還珠襦。欲落不落夕陽下。弔古且復留斯須。殘碑滅沒牛礪角。石甍橫臥蒼髯鬚。君臣一代盡宿草。雍門太息當何如。詩凡數陳其事。易於率直。不如引古人事以代之。中引公孫申之另劫。遷西內以證之。又引子臧季札之相讓。以反證之。則論有本而不傷於直矣。然惟多讀書者始能。○金山卽玉泉山也。漂沙金色故名。○北狩後。徐理主南遷之議。子臧痛哭止之。○景泰初。謚曰戾泉鳩。漢戾太子潛匿地也。

戴嵩牛圖

一川莎草煙濛濛。曉來雨過開牛宮。三尺短篋兩殼觶。午陰掉尾嬉涼風。一頭摩角一頭齧。寢訛有態何其工。江干笛材老烟竹。橫吹髣髴穿林叢。絹素慘澹神理在。是耶非耶傳戴嵩。田家風物宛在眼。但有耕作無兵戎。我行峨下躡萬里。青衣江上平羌東。翠藤紅樹亂煙雨。風景略與圖中同。一從羽書急。溟海甌

越秦楚交傳烽，益都迢遙隔天末。舊遊有夢尋巴寶，旄牛徼外阻王會。萬蹄驕馬高纏騷，千村萬落長荆棘。何時金甲銷春農，童牛不牯可三歎。卷圖風雨來長松，以畫牛引起太平時田家風物，至吳耿尙三逆，最不復見矣。末以童牛不牯意作結，層層收束，是何本意。

秦鏡詞爲袁松籬作

熒熒古鏡雙盤龍，流傳本出咸陽宮。秦時明月至今在，剝落泥沙露光彩。當年秦并六國時，後宮閉置千雙眉。守宮注臂鏡照膽，三十六年君不知。華陰道上逢山鬼，輻輳東來祖龍死。美人鐘鼓散如煙，此鏡蒼涼閱朝市。憶昔大收天下兵，十二金人初鑄成。還令餘事作奩鑑，太乙下視蛟龍驚。劉興羸蹶何倉卒，金鑑千秋如一髮。秦鏡虛懸照膽寒，不照長城多白骨。自注：漢祖入咸陽宮，得方鏡，廣四尺九寸，照見五藏。見西京雜記。○只末語另換一意，通體便不平直。

漫興

澆澆荆襄地，當年割據州。營連九節度，星動五諸侯。已共長江險，應關上將憂。郭門傳息壤，不障洞庭流。九節度指郡王貝勒及諸將。○時長沙守臣奔逸，賊遂有湖南六郡旁屬諸蠻。

嗚咽秦川水，秋風入鼓鞞。妖星躔隴右，大將出安西。陸陸將誰附，蒼蒼迥不迷。似聞寬大詔，不忍戮鯨鯢。大將指圖海也。

烽火傳花馬，將軍發賀蘭。天心誅叛亟，國法受降寬。衙帳青唐入，沙場白骨寒。亂臣誰貫死，史筆後人看。

青唐地在黃河之曲

不見離支熟。閩州驛騎來。大農師漸老。使者節難迴。五嶺烽相照。三山瘴未開。冥冥炎海外。目極釣龍臺。

西北和親國。王姬禮數殊。一朝忘甥舅。萬里送頭顱。露布明駝足。軍鋒落雁都。六師信神武。羣盜敢枝梧。

時噶爾嘴亦叛遣端郡王平之故云

海內兵塵滿。乾坤正氣孤。數公明大義。一死激頑夫。關塞青楓晚。英靈白日徂。他年看秉筆。得慰鬼雄無。

此指守土死節如陳丹赤楊三知劉欽鄒徐誥劉士英諸臣。○新城五言律俱追琢工穩。此特取其著莽雄傑者。

苻離弔潁川侯傅公

躍馬千山外。呼鷹百戰場。自注古百戰道在宿境平蕪何莽蒼。雲氣忽飛揚。寂寂通侯里。沉沉大澤鄉。潁川湯沐盡。

空羨影頤王。自注陳涉亦州人。漢高祖為置守冢。○漢高於陳涉猶置守冢。況潁公之平蜀平蕪為功最鉅。而卒以猜忌不免。明祖之待功臣。可云厚乎。用意全在反襯。

潼關

潼津直上勢嵯峨。天險初從百二過。兩戒中分蟠太華。孤城北折走黃河。復隍幾見熊羆守。棄甲空傳犀

兕多。漢闕唐陵盡禾黍。雁門司馬恨如何。雁門司馬謂孫傳庭。孫因天雨備戰而敗。孫敗賊遂長驅入關而明亡矣。故結意及之。

雨度柴關嶺

棧中新漲未歸槽。百丈柴關水怒號。鳥語不聞深箬黑。馬蹄直上亂雲高。天垂洞壑蛟龍蟄。秋老牙鬚虎

豹豪誰識熏香東省客。戎衣斜壓赫連刀。

沔縣謁諸葛忠武侯祠

天漢遙遙指劍關。逢人先問定軍山。惠陵草木冰霜裏。丞相祠堂檜柏間。八陣風雲通指顧。一江波浪急潺湲。遺民衢路還私祭。不獨英雄血淚斑。

晚登夔府東城樓望八陣圖

永安宮殿莽榛蕪。炎漢存亡六尺孤。城上風雲猶護蜀。江間波浪失吞吳。魚龍夜偃三巴路。蛇鳥秋懸八陣圖。搔首桓公憑弔處。猿聲落日滿夔巫。議論格律聲響無一不合在北地信陽詩中定推上乘。○八陣圖有三在夔州者六十有四爲方陣法。

渡河西望有感

使者河源復卻迴。杖藜曾記到雲臺。高秋華岳三峯出。曉日潼關四扇開。星宿海從天上落。崑崙槎自斗邊來。何時更訪茅龍去。東望滄溟水一杯。華嶽東北有雲臺峯。峯上望中原見黃河從塞外來。○通體是渡河後西望故皆作追憶語。未思他日更往有餘情焉。

寄李鄴園尙書二首

閩天烽火達錢塘。太乙靈旗指越疆。文武共推周吉甫。勛名誰並郭汾陽。椎牛五夜千夫膳。射虎三秋百戰場。今日羅平妖鳥盡。早聞憂國鬢如霜。

爛柯山上陣雲低。太末城南月暈齊。飛檄直臨彭島外。織塵不動浙江西。戰袍血濺盤鷓鴣。雄劍霜寒淬

鵬鷄半壁東南功不細。天書頻下武都泥。鄴園名之芳耿逆叛時總督浙江聞變即移鎮衢州扼仙霞關使賊不得踰嶺窺江浙三四皆實錄也彭門島連福建興漳公

和徐健菴宮贊喜吳漢槎入關之作

丁零絕塞鬢毛斑。雪窖招魂再入關。萬古窮荒生馬角。幾人樂府唱刀鐮。天邊魍魎愁遷客。江上尊鱸話故山。太息梅村今宿草。不留老眼待君還。徐健菴時為宮贊為納綬放還此古道交也梅村有送吳季子出塞詩故云

皖城懷古

清水塘邊余闕祠。雲霄浩氣凍鬚眉。英姿颯爽猶橫槊。古砌荒涼只斷碑。鶴化千年非故國。雞鳴十廟不同時。皖江便是田橫島。義士悲歌為涕洟。忠宣死於陳友諒不死於明然存此忠憤之心則化鶴歸來必不與十廟功臣並馨祠祀者也辭令挾議論以行方是知人論世

趙承旨畫羊

三百羣中見兩頭。依然秃筆掃驂驅。渴來清遠吳興地。忽憶蒼茫勅勒秋。南渡銅駝猶戀洛。西歸玉馬已朝周。牧羝落盡蘇卿節。五字河梁萬古愁。三四已見命意矣復以銅駝玉馬一聯作觀詞則凌空意則錄刃而更以蘇子卿之不失臣節足之趙王孫何處生活耶人云詩中有史此則詩有春秋

余澹心寄金陵詠懷古跡卻寄

千古秦淮水。東流繞舊京。江南戎馬後。愁殺庾蘭成。

國士橋

國士橋邊水。千秋恨未窮。如聞柱厲叔。死報莒敖公。公不以國士遇叔。及公被難。叔以死報之。豫讓之不

有補名教。

石城橋示倪鴈園太史

昔作秦淮客。朱樓賦洞簫。白頭故人盡。重上石城橋。不言神傷。盛唐風味。

再過露筋祠

翠羽明璫尚儼然。湖雲祠樹碧於煙。行人繫纜月初墮。門外野風開白蓮。闕揚貞烈。易入於腐。故以題外

蓮。二語得陸天隨月曉風清欲墮時意。

秦淮雜詩十四首

新歌細字寫冰紈。小部君王帶笑看。千載秦淮嗚咽水。不應仍恨孔都官。自注。弘光時。阮司馬以吳綾作

甚關係。故獨取此。

題尤展成新樂府

南苑西風御水流。殿前無復按梁州。飄零法曲人間遍。誰付當年菊部頭。自注。展成新樂府。順治中曾進御覽。

猿臂丁年出塞行。灞陵醉尉莫相輕。旗亭被酒何人識。射虎將軍右北平。
千金七首土花斑。兒女恩讎事等閒。他日與君論劍術。要離塚畔買青山。

自注。題馬。白衛傳奇。

灞橋寄內

太華終南萬里遙。西來無處不魂銷。閨中若問金錢卜。秋雨秋風過灞橋。

馬嵬懷古

巴山夜雨卻歸秦。金粟堆邊草不春。一種傾城好顏色。茂陵終傍李夫人。

傷其不得傍金粟堆也。以李夫人形之。便曲而有餘味。

秦中凱歌

新開麟閣賞元功。頗牧重看出禁中。此去西人須破膽。將軍昨日下午遼東。
天上黃河萬里來。巨靈高掌抱雲臺。遙看丞相行營去。日射潼關四扇開。
涇原西北駐王師。尺一無煩介馬馳。共道皇恩天浩蕩。不教京觀築鯨鯢。
袞衣照路有輝光。班劍威儀出尚方。大將囊鞬迎道左。萬人鼓吹入平涼。

河西三將氣如虹。百戰功名次上公。詔下一時齊虎拜。漢朝爭羨竇安豐。

自注。將軍張勇。進雷靖。逆侯。提督王進寶。進奮威將軍。總兵孫

思克。進涼州提督。

三月軍鋒次渭橋。旋看飲至紫宸朝。空言韓范威名大。五路何曾制曩霄。

此爲王輔臣。卽馬鶴子之叛。秦隴震動。大學士圖海。靖逆侯張

勇奮威將軍王進寶提督孫思克討平之因作凱歌也前明徐文長沈嘉則諸凱歌非不鋒利然皆書生之習未除對此知爲廟堂之作

蠟磯靈澤夫人祠

霸氣江東久寂寥永安宮殿莽蕭蕭都將家國無窮恨分付潯陽上下潮

此昭烈孫夫人祠也潯陽以上爲劉潯陽以下爲孫夫人之恨

眞無窮矣

謁文忠烈公祠

精神如破貝州時晚節猶能動四夷天遣不同韓富沒姓名留重黨人碑

如此作詩纔許不廢議論○黨人碑以司馬光第一文彥博次

之原本留冠黨人碑疑易重字諱流洋亦不以爲妄也

馮雲驤

字訥生山西振武衛人順治乙未進士

雲棧

山腰萬仞露下臨不測淵俯身窺棲鶴舉手接飛鷲山頭舊冰雪閃閃挂飛泉溪中萬古石跳珠濺潺湲忽驚仄路絕空行駕危椽峯峯自迴合藤蔓束荒煙盤盤綠石壁磴磴捫青天遙看來往人縹緲訝飛仙更聞猛虎嘯當我踞層巔勞臣有定限豈敢憚艱難匹馬千山外迢迢夕照前

鳳嶺

鳳嶺行來欲上天此行無異作飛仙紅霞白日回頭近鳥道蛇盤獨馬穿未斷崩崖愁瀑水半欹懸徑仗

危椽側身萬仞峯巔過。秦蜀遙看兩點煙。得鳥道絕句。上句亦覺不平。作詩者宜知此法。

邱象升字曙戒。江南山陽人。順治乙未進士。

清遠峽

委折江如線。鋒稜勢益增。曉昏雲氣變。雷雨石痕崩。洞古空猿跡。菴荒暗佛燈。客心愁入暮。高峽尚層層。

苦竹渡

夕陽殘影沒。衰眼翳長空。樹暗驚人語。溪寒避虎風。戒心齊擊柝。野火亂燒叢。前路津門是。星華望未通。

連上章能狀奇險之境。

嚴

沈字子餐。浙江餘杭人。順治乙未進士。官戶部侍郎。○司農斂退謙抑。雖踐九列。不殊寒素。有譏彈其詩者。應時改定。遠近稱爲德人。

送吳謹侯同館謫廣文還里作歌

擊筑且斟燕市酒。浮雲富貴吾何有。巖前碧樹吐朱華。天上白衣幻蒼狗。風翻易水橫素波。送別聊爲暇。豫歌松皮屈鐵老山雪。鵬翻擊浪凌溟河。轡龍吐鳳留華省。授經博士官偏冷。夢迴輦道記鳴珂。坐聽輓轡初轉井。西風冥冥吹白沙。尊前細雨開簷花。杜老乍簪青瑣筆。鄭虔本愛赤城霞。奪我鳳凰池。未妨彭澤醉。興來拄笏西山翠。自有哀吟動鬼神。長將詩卷留天地。不知壁水沉金門。見說移官亦主恩。但看臥坦邊韶腹。有日槎迴博望源。夢迴道二語。寫其玉堂天上之感。末并望主恩之賜。褒而出以微婉。不傷直致。得立言之體。

田凝只索畫久不得報歌以代柬

我昔平湖弄秋水，酒酣最愛羣峯青。興來落筆寫山色，泉石出沒雲冥冥。一日十紙不厭速，貴取繪意非傳形。三春索米長安陌，馬足涔泥滯行跡。西山玉河在眼前，神昏甯強真意隔。案頭細素委零亂，貴遊尺一相催迫。必逢好友情性諧，吮墨含毫始光澤。首秋暑退風簾開，疎雲細雨滋綠苔。玉盃烹茗泛香雪，十指拂拂神初來。故舒直幹筆一放，試疊層嶺煙齊迴。須臾脫手天宵森，此事原堪一朝了。不噴滯滯嗜我真，相遲霜前看雲嶠。意得寫神，人力不與，速則片刻，遲積歲時，不以日月計也。作詩作文亦然，然可與言者甚罕。

春日漫興

吏隱淹微尚，棲遲帝里春。虛名慙諫草，薄祿慰慈親。馬度垣松直，鶯啼苑柳勻。主恩殊未報，不敢慕垂綸。補袞瞻天近，斑衣愛日長。生成看燕雀，戰伐剩豺狼。紙筆兒誰好，柴桑婦不忘。閉門焚草畢，歸夢五湖傍。三語冀物各得所，四語憂干戈未靖，報國空懷養親餘願，直覺百端交集矣。

懷季天中遊左

萬里邊城問謫居，躬耕遼海意何如。龍沙更作投湘賦，鳳闕長懸諫獵書。鳴綠流澌春水下，醫閭積雪暮寒餘。柳條漸識陽和近，未必君恩雨露疎。

汪

疏字，著文江南長洲人，順治乙未進士，授戶部主事，康熙己未，召試博學鴻詞，官翰林院編修，疏著，有堯峯詩鈔。○鈍翁，官部曹後，與王西樵昆弟，諂人，稱詩都下，風格原近唐人，中年後，以

劍南石湖爲宗，後則類然降格矣。茲擇其矜貴有餘者，著於卷中，不使擄竊字面者，以鈍翁爲藉口也。生平穿穴經史，議論俱有根柢，雖被其齟齬者，終稱許焉。

泊石湖有懷

江風逗餘涼，輟棹自成賞。谷口霞已開，洲心月初上。遙聞欸乃曲，知是漁人唱。獨樹影蕭條，孤鴻色惆悵。不見故人來，時向煙中望。

此章近孟山人是鈍翁中年作。描摹晚景，令讀者如置身其間。

遊鄧尉山遇徐生

夙齡瞻名山，抗志事遊衍。葛弱容屢捫，梁危許孤踐。風泉渺難尋，空翠紛莫辨。去美惜已遙，來奇望猶緬。餘霞互明滅，微雲忽舒卷。裊裊薜蘿衣，之子來何晚。道與寂寞會，志向崇深展。倘秉偕隱心，結廬詎在遠。

去美來奇二語，深於尋山者領之。○作者五言古過於直白，二章猶有言外者。

玉鈎斜

月觀淒涼罷歌舞，三千豔質蕪荒楚。寶鉤羅帔半隨身，蹋作吳公臺下土。春江如故錦帆非，露葉風條積漸稀。蕭娘行雨知何處，惟見橫塘蛟蜺飛。

有客言黃魚事紀之

三吳五月炎蒸初，棟樹著雨花扶疎。自注：吳諺云：棟樹花開黃魚來。此時黃魚最稱美，風味絕勝長橋鱸。憶昔東南全盛餘，海舶銜尾張網踞。公然滿載返吳市，市中雜選誰擔夫。柳條貫鰓冰貯腹，數尾僅直千青蚨。豪門膳宰

善烹治劑以醃醬芼筍蔬芳鮮頓覺溢几案。主賓下箸爭歡噉。自從洲島阻兵燹。鯨鯢竄逸稽天誅。詔書尺一禁航海。漁師安敢驅揚蒲。蛤蜊海母尙難致。況望此魚供客需。老饕雖患食指動。畏觸禁令生他虞。吳儂日夕歎且吁。有司束溼嚴錙銖。何當小醜就拘執。舳艫往返如通衢。趙趙風中販蠶至。此魚復得登庖廚。吾儕口腹詎足授。但願海晏波濤除。廟堂日俟羽書捷。戈船諸將令何如。此海氛未靖時作也。食物羽書之捷望之。識小題覺大有關係。

送再從姪處默

又向長安別。淒然動客愁。秋風吹遠道。落日在孤舟。雁逐江烟下。潮衝楚樹流。何時復相見。與續竹林遊。賈長江詩以古戍落黃葉。浩然離故關爲上。以其格高也。篇中三四語亦然。

計甫草至寓齋

門巷何蕭索。惟君步屣頻。青雲幾故舊。白首尙風塵。身受才名誤。文從患難真。耦耕知未遂。相顧倍傷神。十字爲千古文人道之。

送人南遊

長路應難問。君行況及秋。不知葭葦外。何處泊孤舟。遠嶼連雲起。殘潮漾月流。可憐南去雁。并作客中愁。

寄贈吳門故人

遙羨風流顧愷之。愛翻新曲覆殘葦。家臨綠水長洲苑。人在青山短簿祠。芳草漸逢歸燕後。落花已過浴
蠶時。一春不得陪遊賞。苦恨蹉跎滿鬢絲。三四工絕秀絕如此何礙宋詩他如白蚨蝶飛芳草畔紅蜻蛚
立藕花中柳條細似千行綠荷葉圓於半兩錢景盡句中不敢

同聲
附和

賦得宮人入道

翻因薄命愛長生。羽氅雲冠再拜行。曾被玉皇教按曲。忽隨金母學吹笙。顏逢鍊液重疑豔。身爲持齋轉
覺輕。從此幽棲如野鶴。萬年枝上月空明。五六語妙
於雙關

自乞天恩下玉墀。宮中女伴鎮相思。羞題紅葉傳塵世。願守丹鑪事本師。垂手只攜禳斗訣。點唇初習步
虛詞。此生無復昭陽夢。猶爲君王夜祝釐。結意傳出忠愛合
溫柔敦厚之旨

送魏子存之成都同西樵周量貽上

鳳城垂柳爲君攀。西去高軒指散關。望帝愁魂春樹外。臥龍故壘夕陽間。天懸鳥道連三峽。地入蠶叢控
百蠻。到日不妨頻弔古。訟庭草長簿書閒。此猶近唐
人體魄

和李退翁侍郎讀水經注憶洞庭之作

曾持使節遠揚舲。落木層波共杳冥。澤畔有人哀郢客。雲中何處降湘靈。雨過斑竹千叢綠。潮落芳蘭兩
岸青。回首舊遊今阻絕。不堪寂寞對遺經。

阻風

獨臥孤篷底。長途此夜窮。殷勤解留客。惟有石尤風。

姑蘇楊柳枝詞

臘盡寒威尚未消。淺黃輕碧影迢迢。費他煙雨知何限。只替東風染柳條。

白玉堂前發數枝。粧成每自下階墀。中庭不是無花看。獨爲清陰立少時。全以韻勝。

過石塢

主賓無語似相忘。淨掃青苔坐夕陽。乳燕飛飛蛙閣閣。楚萍謝絮滿池塘。分甘餘話中。新城獨取此詩。豈風神氣味與之相近耶。

卷四

曹申吉 字澹餘。山東安邱人。順治乙未進士。官貴州巡撫。兄升六。長於詩。二曹齊名。時爲安邱增重。吳逆反。公陷賊中。庚申夏。蠟書赴關。密陳機宜。爲賊所覺。劫歸遇害。

武昌雜詩

隔岸晴川影。帆檣觸浪奔。禹功江漢大。楚俗鬼神尊。地濕陰常盛。天低日易昏。荒洲猶寂寞。詞賦擬招魂。

禹功二句。已盡楚中之天。

人日貴陽作

故里今年別，殊鄉昨日春。看雲遙愛日，紀歲乍逢人。澤國湘沅外，山城魍魅鄰。野梅初應候，寒雨幾經旬。赤帖千門換，雕題百帳馴。綵幡迎楚雁，銅鼓賽苗神。瘴癘崎嶇地，艱危老大人。已甘淪井鬼，無復繪麒麟。冀莢重開子，椒盤屢薦辛。牂牁天更遠，屈賈弔何頻。暖律迴窮谷，浮生託大鈞。友朋偕棘道，詞賦勸芳辰。鬢好觀青鏡，心期理白蘋。鳳樓歌舞處，望斷屬車塵。懷鄉戀主句烹字鍊出之體源應在老杜

楚南

偶向瀟湘聽斷猿，斑斑千載泣龍孫。楚南近日蒼生淚，不是當年帝子痕。

劉體仁

字公誠，河南穎川衛人。順治乙未進士，官吏部考功郎。著有蒲菴集。○公誠詩出以生新，每近於澀，嗜好應在東野。王漁洋屢稱之。池北偶談載公誠友某素喜琴，沒數年，公誠一日挾姬過其墓，停車酌酒使姬各操一曲，其風致如此。

送戴務旂遊華山

夜談太華奇，朝來理輕策。似子獨往意，自然生羽翮。我無濟勝具，心懸神仙宅。椽壁聞蟻綠，索度或猿擲。卽至玉女盆，蓮花豈堪摘。頗窮造化由，能識巨靈擘。一身出天地，笑看培塿積。歸來毛髓異，定跨茅龍脊。起十字寫探奇之勇，通體刻削不肯猶人。

寄阮亭司理

離居才幾日，蘭葉春風生。門外卽流水，片帆東下輕。野處寡新友，良辰多遠情。思君如草色，迢遞向蕪城。

卽事

西湖小閣多延月，好友同舟半是僧。寄語江南老桑苧，秋山紫蕨憶行藤。顧華玉訪孫太初時，湖中所見景象如是。

秦松齡字留仙，江南無錫人。顧治乙未進士，入翰林，罷歸。康熙己未召試博學鴻詞，官諡德。先生初入翰林，賦白鶴詩，應制中云：高鳴常向月，善舞不迎人。上重其有品。

金陵司馬行

宿遷旅次，何子曰鴻述其先世遺事，請作是詩兼送之別。

汝祖金陵小司馬，移家始傍梁溪居。不事毛錐好說劍，男兒塞上當捐軀。襄陽法曹年少日，貂璫盡屈諸司膝。唯公倔強殺其奴，脫走京師歸請室。請室朝朝復暮暮，手把陰符自箋注。百年興廢摠瞭如，九邊阨塞能指數。溫旨重寬直節臣，芙蓉湖上幾垂綸。援邊忽奉勤王檄，應詔還留報主身。萬金散盡耐死士，死士曾無一人死。偏師纔出復回旋，西風淚落桑乾水。破耗軍需罪不宥，權奸在路天無晝。鍛鍊誰當楊魏先，覆車幾作熊王後。信邸龍飛再赦還，還家常憶玉門關。壯心未展英雄死，孫子飄零衣食艱。送君東行在岐路，努力功名莫返顧。濁酒今朝贈一觴，宿遷城外瀟瀟雨。權奸在路，天無晝，煮廟之時，何時耶？小司誅奸，訣發潛德者，我有取焉。

上熊雪堂先生

正繫蒼生望，先生未合閒。累朝看赤舄，兩疏乞青山。直道安危後，深心去就間。盈盈章貢水，爲照老臣顏。

潞河寒食

浮雲北望恨何依。寒食餘威未減衣。柳色獨隨行騎沒。桃花仍見釣人歸。青烟禁燭誰家散。紫燕春泥到

處飛。自別帝城多歲月。西山朝爽尙暉暉。此語官出長安詩。予心猶速言下可思。

和吳弘人見贈之作

頻年蹤跡混樵漁。舊友還過慰索居。白首更逢多難後。青山重憶定交初。詩篇寂寞茆齋雨。懷袖蒼涼絕

塞書。自注：弘人出示令弟漢棧塞上書。尊酒共君秋夜醉。滿庭清露濕芙蓉。

于忠肅公墓

定策當年奠帝京。墓門遙見半湖明。傷殘松柏啼新鬼。寂寞祠堂臥老兵。宗廟有靈存社稷。英皇無意殺

先生。古來遺恨錢塘水。又繞台山氣不平。英皇無意殺先生。殺之者徐石也。天順異日之悔可見。

雜感

烽火章江警急多。滕王樓閣轉嵯峨。雕鞍曉日明珠玉。列帳秋風泣綺羅。坐算幾開黃石略。戰酣誰奮魯

陽戈。司農日夜憂財匱。擊鼓椎牛氣若何。

授鉞親賢廟算強。旌旗萬里作巖疆。周家同姓盟爲長。漢制非劉爵不王。當日酌勛原異數。至今除患屢

分防。堪嗟諂諂將功成後。不肯歌鐘會未央。

關隴車書此日同。相公拜命領元戎。屯邊戍久推充國。納土功寧比寶融。詔出中朝心獨厚。恩頒西土慶何窮。聖人威德原兼用。干羽虞廷舞未終。時三逆連結而鄭寇亦復出沒徵兵轉餉紛紛未定故作者壓形於言。

荆南春日感懷

聖主崇文雅化新。天書初下訪儒臣。漢廷有意尊經術。宣室何妨對鬼神。喜說圖中求駿馬。還看席上得奇珍。上林春色應如舊。憔悴當年獻賦人。此爲詔求鴻博而言。

把酒臨江感慨多。西南天地正橫戈。登樓有客依劉表。使粵何人下趙佗。浪接三巴聲激壯。觀名一柱勢嵯峨。偶逢春晝無烽火。聽得琵琶幾曲歌。時南粵猶未平。故中懷有憂。

滿目

滿目紅旗載米船。西南何日罷戈鋌。輸軍未盡蕭何策。憂國空思卜式賢。薄海偏供兵革費。羣公莫濫水衡錢。焦勞尙體君王意。救亂無如儉德先。

閔

敘字鶴臚江西南江都人。順治乙未進士。官廣西提學。

輯廣西志略漫述

莫擬浮湘續楚歌。雲山渺渺意如何。三唐遷客南中盛。兩宋移官嶺外多。人萃英華承雨露。天留碑碣寵巖阿。卽今有士能耽隱。猶自青山臥薜蘿。

捲甲曾聞捷若風。軍威久鎮百蠻中。如何債帥皆徵貨。多事中涓獨總戎。經術籌邊原理學。權謀制勝亦膚功。呼庚誰復蒐軍實。府海司倉自變通。

王

揆字端士。江南太倉人。順治己未進士。有芝廬集。

送懶雲道人還滇中

干戈未定欲何之。萬里還家一衲隨。湖海班荆無姓氏。風塵面壁有鬚眉。身當持鉢飄零日。魂憶投詩慟哭時。故國魚龍秋寂寞。不堪憑吊向昆池。

偕伯氏周臣過織簾先生故居同顧伊人訪陳確菴夜宿

草堂人去薜蘿存。洒淚空招未返魂。猶見康成遺故籍。忽思元亮老孤村。青浮稻色秋間路。白照蘆花月裏門。感舊愈難今夜別。追維生死對黃昏。
織簾先生顧麟士也。康成故籍。指麟士言。元亮孤村。指確菴言。確菴名瑚。兩先生皆志節士。求句追維生死。死謂麟士。生謂確菴。

菴一語總收二人。

丁

彭字飛鴻。浙江仁和人。順治乙未進士。官禮部郎中。有扶荔堂詩。○嚴瀨亭云。祠部少有白燕。白燕樓詩流傳吳下。士女爭相采撫。以書衫袖。婺州吳之器有句云。恨無十五雙。養女教唱君家。

傾倒如此。

題曾青藜尊人傳後

莫為信陵土。寧作韓陵石。子昇碑記存荒烟。杯酒不澆公子宅。不見曾公古俠者。十歲能文兼躍馬。賦就

欲奪雲夢田。劍擊長凌武安瓦。灌夫弟畜朱家奴。乾坤何處容腐儒。豎子成名何足齒。天下英雄君與孤。干戈鼎沸若飛電。江南黃犢如席捲。慷慨談兵尊俎前。草檄特膺公府薦。片紙能勝十萬師。一身恥爲三語掾。登牀自許捉刀人。帳中莫使孫郎見。此時樓船橫楚州。朝議不敢申同讐。指揮泣下袁開府。信誓直折寧南侯。功成不賞蹈滄海。魯連遺風至今在。歲月俱因戎馬馳。壯心不與滄桑改。徐庶還家爲老親。江湖把釣足閒身。少微星邊憂處士。秋風原上動旁人。有子青藜與我厚。是父聲名滿人口。飲泣再拜前致辭。乃公佳傳煩下走。猗嗟韓陵信陵掩秋霧。烏雀啾啾白楊渡。千古之名何有哉。貞珉長傍松楸樹。予爲此歌君莫悲。聊作阡銘表其墓。

送王山長還楚南

地盡三巴接。將歸南雍州。天空一雁斷。何處岳陽樓。橘樹侵寒雨。猿聲入暮秋。仲宣仍作客。更切望鄉愁。
詩取其格

慰李琳枝侍御詔獄

抗疏今何事。身危直道難。忽聞收北寺。不敢問南冠。草莽臣無狀。朝廷法屢寬。聖明知汝戀。頻取諫書看。
慰臣直望主恩也。執政方持法。明君無此心。一種立言之體。

初至靖安寄邱中諸舊友

萬里從戎路崎嶇正此行。雁聲孤斷磧。虎氣撼空城。淚盡慚兒女。身危仗聖明。刀鏗何日約。回首玉關情。
虎氣五字如見獻賊破成都後景象。

東岡

信是興王地。城郊古木穠。鶴鳴三殿雨。猿挂二陵松。疎拙違明主。胼胝愧老農。吾廬荒徑近。時見白雲封。
送趙錦帆比部歸汴州

攜酒青門送客多。相看無奈別離何。漫愁關塞疲征馬。從此乾坤有荷蓑。藥鼎千年藏日月。雲山一路少風波。天寒大澤行人斷。獨向夷門叩角歌。
言錦帆歸去後草野方有耕鑿之人推重之至也。

送孫九畹備兵保寧

萬里炎方向枕戈。旌車八月下牂牁。猿聲苦霧城邊急。虎迹荒原戰後多。粵道生豬能漢語。羌西諸將半渝歌。休言割據蠶叢遠。滌滌秋高起白波。

見燕

杏葉新陰拂女牆。風吹小燕過池塘。相期定似逢寒食。乍見爭如說故鄉。弄影不教沾柳絮。銜泥何惜點琴囊。雙栖並翅真憐汝。愁殺盧家春晝長。
一語中燕之多情與已之多情皆見可云善作情語。

度嶺見長城

嶺坂風迴樹鬱盤。長城如帶霧中看。隨陽雁斷天疑盡。背日峯高夏苦寒。滄海不沉秦女石。浮雲欲動楚臣冠。伊川一曲先揮淚。況是親經行路難。登高臨深自有此種眼界。此種心胸奇警之語。自然湧出。

過長洲吳瑤如郡守招飲漫賦

悲歌燕市意何窮。汝向南行我向東。十九年歸蘇屬國。二千石重漢吳公。他時苦憶松江鱸。此夜愁聞塞北鴻。休傍姑蘇問麋鹿。荒臺空鑲白楊風。三語謂已從靖安歸。四語謂吳郡守也。酬應詩能浪酬應之迹亦復可存。

送汪舟次檢討奉使册封琉球

孤懸鼉嶼海涯間。襟帶窮荒控百蠻。已奉春秋知正朔。何年南北併中山。自天宸翰龍鱗動。繞日珠旂豹尾斑。底事皇華念將母。乘風歸路指刀環。康熙戊戌歲徐激齋太史出使琉球歸省侍母時作詩送行者及殊失輕重也。此詩將母於結處一點。見前輩位置之妥。

送徐徵君電發辟召之京

此去朝辭林屋峯。布衣疏屨倍從容。眼中吾老非衰鳳。足下人稱是臥龍。應詔趨由丞相府。封章辟自大司農。知君芸閣詩成後。苦憶西堂舊植松。

塞上曲

百戰洮河西備羌。合黎山外月如霜。白頭老將沙場臥。尙說彎弓從武皇。

王日藻字印周江南華亭人順治乙未進士官湖南巡撫

潘山人至自遼左

匹馬南歸道路長相逢畫閣話遼陽
寶家錦字詩難寄蘇氏河梁雁幾行
秋盡隴雲寒欲雨陽回邊草白
於霜漢廷亦下金雞使誰念當時折檻郎

董

舍字聞石江南松江人順治乙未進士著有藝葵詩集

旅窗讀漢書

提兵十萬擁元戎斬帥湛船意氣雄
戰鬪八年能獨霸殺降三戶竟無功
秦軍已破漳河上漢社初移渭
水東諸將膝行齊稟命莫因成敗笑重瞳

登穹窿謁句曲行宮

山勢巖巖欲到難玉真宮殿擁千官
香飄下界青冥近磬入諸天碧落寒
洞口斷雲朝放鶴石根晴樹暮
棲鸞金門羽客龍泥印夜禮星辰上醮壇

彭

襄字子贊四川閬中人順治乙未進士

書屈陶合刻後

變風以後數靈均彭澤天然見性真
對酒不忘書甲子懷沙空自歎庚寅
滋蘭九畹心偏遠采菊東籬句

有神五柳三閭異醒醉何妨千載德爲鄰分分合合律細語工與鄰湛若屈原賈誼一章莫能甲乙

沈自南字留侯江南吳江人順治乙未進士官蓬萊知縣

同韓倬次雪聲遠登快風閣兼寄懷釋堂

秋來傑閣共登臨極浦遙山入望深吳苑弟兄欣聚首梁園賓客最關心兼葭拂浪渾如雪橘柚垂煙半似金指點江鄉盡圖畫遲君墨妙一題襟

王澤弘

字涓來湖北黃岡人順治乙未進士官至禮部尙書著有吳廬集○吳廬辭官後移家金陵既考屹屹風雅遠近奉爲摠持者也繕稿本未鐫漸次散失故所收止此

送陳心簡之遼東

驅車獨旅向三韓九月秋風已漸寒繞道玉門生入穩誰知鐵嶺故歸難長天積雪寒何處絕塞嚴冰路幾盤鴨綠江深終古恨南來鴻雁報平安

留侯祠

穀城山下草離離追憶高風繫所思漫道留侯如女子每看楚帝只嬰兒報韓志願蓬萊石翼漢功成賴紫芝身退拂衣還辟穀神仙原是帝王師

易州使院詠松

去年手植新松樹碧葉青枝取次陰榦長凌雲應有日後人誰識歲寒心果抱歲寒心後人自有識者

買花

賣花擔上露纔乾，野老移來滿藥闌。拋卻故山花事盛，翻來燕市買花看。

陸鳴珂 字次山，江南華亭人，順治乙未進士，官學使，著有使蜀詩草。

七盤上雞頭關

北棧行將盡，雞頭勢轉雄。七盤蟻旋磨，百折馬行空。天險關山壯，人謀斧鑿工。十年轉戰地，故壘動悲風。

山川之險，須得奇警一聯寫之，此老杜遺法。

方兆及 字子詒，江南桐城人，舉人，官山東按察司僉事，著有天文官制諸書，詩稿散佚，茲於龍眠風雅中採取二章，等於吉光片羽。

劉生

劉生可是高皇裔，任俠由來重漢京。六郡良家輸浩氣，五陵豪士屬荒飢。雕龍雄辯金張館，獵騎橫穿衛霍營。死難報恩如飲食，一言投合此身輕。
劉生未詳何代人，辭始於梁元帝，是六朝時樂府也。後人相沿，咏之篇中，狀其任俠縱橫已云曲盡。

銅雀妓

漢室金甌非改步，曹公銅雀已成臺。名姝俱匹英雄去，豔質惟邀妓女來。瑤席冷餘無霸氣，繡帷空後有微哀。卻憐疑塚紛如埽，欲望何從心早灰。

錢陸燦 字湘靈，江南常熟人，順治丁酉舉人，○湘靈為牧齋族子，然其詩不為虞山派所縛，別調獨強，憂憂自異，毗陵學詩者多宗之。

牡丹花下集同袁籀菴唐祖命方爾止張瑤星余淡心黃俞邵諸君子長句一首

前歲花時渡江去。去歲吳門三月暮。三度花開一度看。今年恰在金陵住。金陵舊是帝王都。歲歲花開如畫圖。此花又殿春風後。朱衣王謝相傳呼。一筵醖費中人產。一花千人萬人眼。金盤綵籃共貽贈。招邀名士分折柬。永和蘭亭金谷園。月落檀板催金尊。百尺烏絲長到地。清辭豔句爭飛翻。得所穠花易消歇。子規啼血棲宮闕。無復天彭百馱花。王孫五勝埋香國。花殘人散可憐春。十處園林九處塵。欲往城南訪耆舊。酒徒零落空芳辰。太史園中花百種。紅歌綠捧花頭重。花神有意洗粧遲。要勒詞頭固君寵。諸公同日看花來。鄧生酒甕還重開。廿年無此好事者。無詩不醉那能回。酒醉詩成花欲語。明歲花開待予汝。春雨春風作主人。鸞飄鳳泊同羈旅。於一花之榮落。傳國步之盛衰。中後跌宕淋漓。有對此茫茫百端交集之感。○天彭山名。陸游有天彭牡丹記。五勝猶金木水火土五德。言迭相勝也。

計

東字甫草。江南吳江人。順治丁酉舉人。○甫草風奇氣過鄆下。見謝茂秦墓圯瑣。盡藥中金爲稱門生於黃孝子向聖人共賢之詩不苟作時露胸中抱負。

宣府中元夜卽事

邊月新秋夜。哀音四面齊。戰場多舊鬼。野祭有遺黎。柝亂愁人聽。風驚倦鳥棲。遙遙天漠上。河鼓漸垂西。

宣府逢立秋

是歲閏七月。

秋氣吾所愛。邊城太早寒。披裘三伏慣。擁被五更殘。風自長城落。天連大漠寬。摩霄羨鷹隼。健翮爾飛搏。

鄴城弔謝茂秦山人

鄴中懷古正秋風。詞賦深慚謝氏工。生欲移家辭白雪。沒隨疑塚對青楓。諸王禮數何常絕。七子交期竟不終。自是貴游無遠識。布衣未必歎飄蓬。王季始推茂秦爲盟長。後稱眇山人而黜之。見交道之不可也。寒後苦飄零。後來誰吊荒墳者。只有吳江計改亭。改亭甫草別號也。

答雲間蔣馭閔

西陵原上憶經過。屈首從君學九歌。豈意邊書驚御宿。遂令複壁老山阿。破家張儉飄零久。質保王成辛苦多。今夕相逢還道故。數聲鶴唳起庭柯。

田茂遇字歸淵。江南華亭人。順治丁酉舉人。

貧交行

古人不貧才不老。今人貧乃傷懷抱。古人結交重青雲。今人棄置同秋草。今古人情何太殊。我來仗劍邯鄲道。邯鄲城中遊俠多。邂逅相逢意氣好。腰間脫劍且按歌。尊中有酒復傾倒。上堂拜母下揖嫂。與子縫裳復剝棗。君不見古來英雄不用爲傭保。叩角行歌石皓皓。作者負氣抱奇。于此一詩見之。

孤兒行

孤兒啼聲何淒然。問汝啼何爲。長跪答言。父爲南海太守。居官清廉。不枉取一錢。鳴騶吹角。大吏巡邊。前導到部。勢喧然。晨報謁不得前。夕報謁不得前。急從販繒者。貫縑百聯。獻之幕府。大不歡。曰。此邦舊有百斛珍珠船。大吏朝去境。夕拜牋。守此海邦。另擇名賢。烏白鷺黑。上下茫然。父羈南海。不得旋。客死歸黃泉。兒負鰥母。跋涉山川。乞食路間。望見大吏。鳴騶吹角。仍巡邊。猗嗟。父骨歸何年。音節全從古樂府出。乞食路間。後復望見大吏。巡邊。痛絕在此。誓絕亦在此。

曾

晚初名傳燈。字楚田。後更名晚。字庭開。江西寧都人。順治丁酉舉人。○有學集序。庭開詩。謂朝主。晚而紫塞夕。而朱邸涼州之歌曲。與凝碧之管絃。繁聲入破。奔赴交作。令觀者回易而不能自

麻平寺逢友人自楚至

空山留一寺。下馬忽逢君。蜀道無長轂。征衣有棧雲。秋邊鳴細雨。谷口上斜曛。客自瀟湘至。猿聲似慣聞。

雞頭關

南山忽已盡。納納褒城春。漢水原通蜀。巴山不過秦。燒荒熊出壩。樹密虎窺人。銘德昆吾者。還應問釣綸。

同僧登赤嶼

看碑尋赤嶼。采菊到黃州。雁氣回秋渚。江聲撼酒樓。兵戈雙眼淚。吳楚一孤舟。蕭瑟匡山客。應隨慧遠遊。

章在茲

字素文。江南吳縣人。順治丁酉副榜。○我吳操選政。其盛於楊忠文公之同風。素文先生繼之。每一部成。其序文。文目老嫗僕人。匿而不出。坊間演劇。予金始付之。此吳中佳話也。事載

實亡
集中

將出金陵

昔日秦淮渡，高歌舊酒樓。今來江上月，獨對帝城秋。壯志銷投牒，微軀賤旅遊。干將鋒盡折，眞悔覓封侯。
以古詩體行律
詩，斡然筆力。

郟中雜興之一

入洛誠多事，遊梁亦已頻。半生歡結客，一刺肯依人。不遇鍾期聽，何慙原憲貧。倚閭終日望，只是負慈親。
喜結客而不傍門戶，其品可知。一結藹然仁孝。

漢武

調遣天兵過月支，葡萄新發上林枝。初聞使者巡三輔，又命將軍號貳師。越嶲樓船通屬國，朔方烽火照征旗。羽林無數孤兒在，獨向高臺泣望思。

陳廷敬

字子端，山西澤州人。順治戊戌進士，官至大學士，謚文貞。著有午亭文編。○澤州居館閣，典文章，經畫論思，密勿之地，幾四十年，故其吐辭可上追燕許，茲特取其典質朴茂者著於卷中。

平滇雅三篇

岳湖逐寇也

岳湖洋洋。我武洸洸。謂南有藩。無敢撼我疆。岳湖滔滔。我武囂囂。謂南有藩。無敢闕我郊。章一我疆大矣。我

圍溢矣。芽蘖其間。棘棘合蝟。昔我南藩。化爲異類。章二帝如兩大。以覆以載。推食以食。解衣以衣。遷之善地。

勿翦勿拔。三章。拔音佩。彼惟狂昏。狡焉生心。肆爲誅首。啓戎于南。如螭奮臂。如蚋決背。首仰臆張。如豕斯驚。章四

惟帝咨嗟。惠威是崇。薄往禽之。孰佐予功。予矜下民。救此一方。取其殘凶。是類是造。禡于臨衝。章五楛矢敦

雕弓。我弓我矢。靡旌靡壘。兵無遺鏃。耕無失耜。天塹茫茫。限此江水。旣斷其趾。且斬其類。章六盜負險阻。距

趨躍跟。黜飛飢獻。羽翹以張。侯在太白。占於天狼。我涇我隴。是震是驚。章七維彼閩粵。波蕩海垠。帝屢下顧。

哀此墊昏。盜往連結。倚以父母。乃餌乃誘。乃爲盜守。章八帝援天矛。鏖羽截鱗。嶺海革面。蒙羞來臣。禽虺于

威。柔肌于恩。盜失厥助。飛魄殞命。章九老雄野死。梟雛棲棲。巢湖飲海。傾搖於波。爾居艱脆。我步逶遲。大祖

高驥。賊焉遁逃。章十洞庭湯湯。岳陽峩峩。載驅載馳。爰拔厥家。章十一惟人歸德。惟帝之謨。窮經窟宅。是翦是

屠。我武燁燁。式廓鬼區。百蠻萬國。僉我來蘇。章十二。章。謂三桂既死。賊勢漸衰。而我師以神武臨之也。

湘東克衡也。衡盜倚爲巢克之武功將成也。

師淪于江。于湘之東。師如雷馮。震衡岳以攻。一夫爲逆。多方則病。播虐抗有德。我人斯奮。卒歸厥命。章一歸

命伊何。衡人之災。衡盜所家。追奔逐北。犀甲雕戈。虎旂龍節。天威所加。章二帝臣如虎。帝師驅武。烈烈旂旌。

淵淵金鼓。嶷嶷綬章。暉暉戎路。莫我敢拒。章三右刈武陵。左掃星沙。磨崖岫嶽。我功孔嘉。戎馬晨服。候烽夕

遮剿絕惡本，敢遺萌芽。章四其恃楓木，其恃辰龍。震之拔之，自西自東。陟嶺踰嶽，于山于川。遠招邇歸，囚豪

解顏。章五東西合師，進次于沅。孽童日蹙，怙兇忍頑。左擣其虛，右攻其堅。載闢載拔，會于中權。章六既克于沅，

沉人嬰嬰，如日之昇。如霖遇暵，以肉其枯。以勅其羸，式歌且舞。以樂我師。章七南訖羅施，來迎壺漿。鳴鞀銅

鼓，洗兵盤江。彼寇與屍，晝匿宵奔。滇人荒荼，待我于門。章八凡此滇功，惟天子乃成。古者推轂，相外以行。今

者決勝，一乘廟廷。孰是遺孽，而廡睿明。章九師徒渾渾，漸集于滇。惟天威式監，官臣恪守。乃獲其醜，保大定

功。流聲焉窮。十章○此專爲克沅言之，沅克而諸蠻歸化，遺孽退歸于滇，不敢復出矣。

滇池盜伏于滇師受聖策平之武功成也

滇池洶洶，帝乃平之。匪彼元戎，惟帝之功。高居北極，洞視下方。惟仁智勇，克靖萬邦。章一帝命臣塔，汝從西

粵，急擣其窟。塔拜受命，銜枚束刃。環滇其來，龍駭鵬騫。軍聲轟然，如墜自天。章二帝命臣里，汝往巴蜀。橫翦

側入，里拜受命。量沙追蓐，有疾其驅。無暴我邦，踏柵躡壘。言壁其東。章三帝命臣泰，汝從黔趨。惟此蝨賊，數

載曠誅。汝將士用命，賊其敢逋。泰拜受命，于皇之訓。章四我旄我旗，于苗于蠻。度幕輕留，彌險蔽關。奪其阻

隘，掀其籬藩。獸窮負嵎，我師固以完。章五帝命我師，勢爲犄角。麾城撕邑，萬里手握。維彼殼麕，敢抗喬嶽。維

彼萌枿，敢傲霜雹。章六彼枿繁矣，于焉蟠根。雨露旣濡，忘帝力之勤。聖人神武，施設芟夷。斲彼梟鷲，張我能

螭。章七倭鏢批亢，下甲陷堅。箕張翼舒，合圍于原。獸窮于阱，人或獸哀。快彼凶醜，覆卵毀胎。章八帝曰吁嗟，勞

我人師。日費百萬。大農不支。滇人望拯。如舖療飢。載礪載攻。天策攸宜。九章孟冬月杪。師薄于城。降旛夕豎。逆駭縱橫。林野塗腦。郵驛遞顛。滇人歌舞于屋于衢。十章夜半捷來。天心惻楚。閔憐下民。罹此荼苦。我將我師于野。暴露。布惠。齎功。急疾如火。十一章于廟于郊。其儀孔熾。華俎膺牲。永言昭事。都人士女。白叟黃童。歎呀嘻笑。祝我聖躬。十二章帝曰歸來。予開明堂。制禮興樂。登賢拔良。孩養無告。施厚仁滂。熙我庶績。綱舉目張。永萬斯年。率由不忘。十三章○此篇爲遺孽既平。武功告成而言。○平滇雅三篇。平吳逆作也。康熙十稟承廟謨。以次進討。十五年耿逆降。十六年尙逆平。至二十年。章泰貝子。賴塔二將軍。下雲南。吳世璠自到死。雲南平時三桂已前死矣。三篇爲吳逆言。而述及耿尙詞氣典重。與柳子厚平淮夷雅相埒。未歸本天子好生。仁武不殺。猶柳雅意也。事詳平定三逆方略。

贈孝感相公

十有四年春。惟三月日吉。枚卜擇近臣。學士登密勿。搢紳賀於朝。處士慶於室。僉曰帝知人。吾等夙願畢。公無得志容。庭館轉蕭瑟。公誠王者佐。生平學稷契。致君慕堯舜。自此見施設。銅屏半夜開。沙隄帶月出。暮讀書百篇。朝入語移日。勞瘁咫尺地。欲使萬國活。時方事南征。戎馬久未歇。黎元尙瘡痍。原野恐騷屑。晴風卷旌旗。三農乍起甍。況我仁義師。忍此田間物。公爲民請命。聞者感心骨。數日政事堂。絲綸慰飢渴。中朝相司馬。姓字及走卒。身當晝凌煙。名其懸日月。昔時同學人。翹首望回轅。勞瘁咫尺地以下。見兵戎未停。瘡痍滿野。而以爲民請命。望之相臣。得古人贈言之體。

施愚山見寄長歌和答

闌珊夜雨雞鳴號。關山夢回心魂勞。我所懷思渺天末。涼風一起秋蕭條。美人昔贈相逢篇。吳綃三尺森瓊瑤。今晨曉窗坐展翫。我欲報之情鬱陶。憶昔相逢客京輦。城南華徑紛招要。酒酣惆悵秋燈紅。羨我鬢髮漆黑同。卽今倏忽別四載。頭上已有霜枯蓬。眼前諸子幾人在。浮雲溝水馳西東。萬事回頭淚沾臆。人生朝露誰能必。楚澤難招宋玉魂。緱山不返王喬舄。自注指荔西樵二子歌詞自絕塵。聲華爛漫今何益。男兒七尺良可哀。生存華屋終黃埃。儒術用世行已矣。浮名寂寞何爲哉。不如放意遊八極。掃除文字棲淵默。未斷塵情憶遠人。茫茫江水分南北。康熙初公與西樵漁洋荔雲愚山顧菴擇堂諸公時爲文酒之會說到掃除文字。栖心淵默。所見又高一格矣。

東山亭子放歌

東山望南山。百里墮我前。山亭橫絕浮空翠。闌干縹緲臨無地。我來氣與霜天高。風塵歸後寒蕭騷。拂衣枕石每獨往。埤蟻羣笑滄溟鰲。百事回頭如舊否。一片青山落吾手。倦客重尋岡上廬。童時舊種門前柳。盡掃西風萬古愁。且傾落日三杯酒。君不見謝公高臥東山時。起爲蒼生已白首。昔時絲竹轉淒涼。美人黃土今安有。百年我亦一東山。日夕樵歌動林藪。

分流水送人北歸

分流水。流濺濺。行人到此寂無語。別淚滴作分流泉。我行南來幾千里。多情送遠北河水。北河相送去茫茫。南河相迎客路長。與君相別分流處。春草春花易斷腸。命意遺詞。如出唐人手。

渡江見焦山有作懷林吉人

江流近海迎朝暾。焦山蒼蒼當海門。憶君焦山古鼎簫。勢凌海日傾江源。金山樓觀特瑰麗。撞鐘伐鼓風濤喧。我行再過焦山下。海雲堂中空夢魂。茲山不到屢惆悵。懷慙竟踐蘇公言。惟我與君亦如此。知禰不薦昔人恥。只有思君日夜心。長江湛湛東流水。結另用意。而以不能薦賢爲恥。相思不斷如水東流。猶見相臣心事。

三月三日同楊松谷泛舟沁水

始得方舟穩。滄波轉路迷。濤聲春晝外。寺影夕陽西。楊柳橫橋暗。桃花夾岸齊。十年江海興。與爾手同攜。

晉國

晉國疆天下。秦關限域中。兵車千乘合。血氣萬方同。紫塞連天險。黃河劃地雄。虎狼休縱逸。父老願從戎。予少時。尤滄澗宮贊。以午亭詩見示。讀晉國一篇。愛其近杜。後讀漁洋詩話。亦謂其獨宗少陵。前輩先得我心。不勝自喜。

關樓

壁壘高樓壯。旌旗古鎮尊。塞風春不斷。邊日晝長昏。悲角關樓動。孤城海氣翻。往來憑吊意。辭賦欲銷魂。

山關門百里宿沙河站

關南滄海浮天白，漠北連峯拔地青。一片山河圍鄣塞，幾家烟火接邊庭。遼歌調苦風還斷，蘆酒愁多夜易醒。卻喜皇威臨絕域，鎮東門戶不須扃。

山海關東門曰鎮東

邯鄲道上

炊熟黃梁已是遲，海門歸路幾人知。卻憐朝市紛紛客，怕說蘆生夢醒時。蘆生之夢，終有醒時，怕說殊無謂也。此等詩，可當禪家棒喝。

鄒祇謨 字許士，江南武進人，順治戊戌進士，有遠志齋集。

中秋京邸

此夜中秋月，清光十萬家。吳歌聞隔院，邊調入征笳。北闕橫秋色，西山隱暮霞。故園叢桂樹，應發昔年花。

清河縣

客久歸程近，鄉心益不禁。春波高泗水，暝色下淮陰。漠漠寒林樹，蕭蕭枉渚禽。黃河流不到，禹德歎彌深。

高 暉 字玄中，山西襄陵人，順治戊戌進士。

目則山

削出目則山，矗起阿剌部。舍馬從步入，路仄足跡聚。泥濕苔如鏡，石銳勢若拒。攀援斷藤行，數起而數仆。山腳霞未明，山腰日已午。曲徑從今日，草木自萬古。叢叢迴寒風，霏霏染翠羽。彷彿露崇岡，疊疊列山塢。廢竈留殘煙，道傍拾遺弩。冷然泉聲落，似猶雜金鼓。盤頂雲霧開，秀峯若可數。恍惚見吳山，懋此行路苦。

未敢舒鸞嘯。恐驚豺虎怒。

極形山之險削。而兵戎未平。意卽於眺望中見之。字字峭拔。不肯輕下。

寄答桑楚執見懷

短髮空餘老大悲。三年一讀故人詩。竹間殘局完公事。塞外新編是宦資。自笑子長牛馬走。誰憐杜甫鳳凰饑。何時煮石青峯下。共跨黃羊侶鹿皮。

李念茲

字祀瞻。陝西涇陽人。順治戊戌進士。官景陵知縣。○有學集序。秦人詩。自李空同文太清。皆有車鄰駟驢之遺聲。祀瞻行安節和。一唱三歎。有藜藿白露。美人一方旨意。非秦聲也。

登浮山

絕頂憑誰引。蒼藤乍可攀。偶然臨險地。不信在人間。古洞遙通棹。江光日浸天。東南百戰後。登眺淚潺湲。

不信在人間。登高時實有此想。

螢

不自慚微照。秋宵款款飛。乘陰稍騰上。化腐暫光輝。月暗時依砌。風生亂點衣。時危妨誦讀。乾死舊書幃。

立春夜感懷

聞道花門信。甘州今尙圍。城分猶拒戰。兵久未成歸。刁斗連邊動。軍書入塞飛。客懷無一可。愁絕盼春輝。

雲

片片浮雲去。愁人正望鄉。東風吹送汝。幾日到咸陽。懷歸之作。自是唐音。

徐文烜字又章江南青陽人順治戊戌進士

浙東別友人

歲晚催孤客。鄉心逐小舸。來隨江水遠。去繞越山高。寒日淡霜野。陰風亂夕濤。感君多意氣。不必贈綈袍。

張一鶴字友鴻江南華亭人順治戊戌進士官滇南司李

辰龍關

天地金湯險。由來王氣鍾。五丁開絕塞。二酉抱神龍。亂眼奇峯過。驚心暑瘴重。興亡千古在。立馬倚長松。

懷人

西南諸國瀆爲大。六詔新開瘴道平。應憶松江蓴菜好。卻將老眼看昆明。

卷五

李天馥字湘北江南合肥籍河南永城人順治戊戌進士官至大學士謚文定著有容齋集

明景帝廢陵

張段走靈帝。程魚奔代宗。喪亂有其漸。式微丁數窮。總無全盛時。一旦嬰愍凶。異哉王闔奴。挾帝出居庸。土木試一擲。舉國紛相從。親征竟蒙塵。身殉觀軍容。爾時微郟王。誰爲奠寰中。八載修戰守。廟社安鐘鏞。

虜心絕要求。塞外歸重瞳。嗟嗟奪門徒。甘心爲首戎。復辟亦天意。羣小冒奇功。忠良旣誅鋤。謚戾良非公。窳窳荒山麓。大禮斬樹封。悠悠二百年。壞道餘喬松。皇仁念前朝。慨焉愴宸衷。置守禁樵採。魄毅安幽宮。傍陵三十戶。戶戶野花紅。隧道寒潭靜。繚垣芳草空。獨恨魏璫墳。東西峙龍嵒。議論正大。足破奪門之姦。末有憾於魏璫之墳地。相

迎也。後祁門張御史疏請削平。天下共快之。

俠客

年少悲歌客。秋原落日情。快逢燕大俠。羞學魯諸生。問世都難合。論交每不平。懷中三尺鐵。風雨夕常鳴。

樓桑村懷古

衰草寒煙望裏孤。樓桑遺跡未全蕪。帝鄉恥屬黃初歷。王氣猶延赤伏符。國士風流曾據蜀。宗臣魚水失吞吳。啼鴉舊恨蠶叢遠。此地惟聞叫野烏。

美人曲

花氣惹陽春。晴窗晃鏡塵。畫眉啼徹曙。愁殺畫眉人。唐詩

孫一致字惟一。江南鹽城人。順治戊戌。賜進士第。官至侍讀學士。著有世明堂詩集。

贈唐陶菴先生

蚤投簪紱遂幽襟。偃臥蓬蒿足醉吟。衣履尙存蒼舊色。鬚眉眞見老成心。天涯故國憂方切。自注。時吳寇未寧。夢

裏華胥感自深。開道欲歸仍遠適。雲山何路許追尋。

錢中諧字宮聲。江南吳縣人。順治戊戌進士。康熙已未召試博學鴻詞。官翰林院編修。

讀武帝內傳

漢武求仙日。危樓四望開。漫傳青鳥至。空候白雲來。玉露虛芝館。金風冷桂臺。茂陵終寂寞。誰與望蓬萊。

白鴈

白鴈初臨楚澤來。孤飛正值葦花開。影迷積雪望難極。聲入曉霜清更哀。閑共雲烟相掩映。偶逢鷗鷺不驚猜。卻疑玉塞辛勤久。歷盡風霜毛羽摧。四語不刻。畫而自佳。

許

虬字竹隱。江南長洲人。順治戊戌進士。官紹興知府。著有萬山樓集。

折楊柳歌

柳條三尺長。明日清明節。江南小兒女。采作流蘇結。千樹宮牆柳。萬朵道旁花。折柳在儂手。花飛到誰家。居遼四十年。生兒十歲許。偶聽故鄉音。問爺此何語。竟是齊梁間北國歌辭。

河西關

去國何曾隔絳霄。幽燕襟帶古迢遙。尾箕斜綰星千里。恆衛中分水二條。鐵笛漫驚龍塞月。玉釵春怨鳳

城簫。還將清嘯憑。對對南北音書任寂寥。

登黃鶴樓

黃鶴仙人不少留。洲名鸚鵡更堪愁。三湘登眺還吾輩。千古江山獨此樓。漢口夕陽銜遠岫。武昌寒郭浸春流。燒痕滿地閒生感。回首烽烟野戍秋。

如此襟抱如此手筆。何不可作黃鶴樓詩。

攜壺憑檻塞雲橫。懷古荆門鎖重兵。春柳久荒陶侃壘。寒潮直上呂蒙營。滄桑盡付邯鄲枕。煙月全銷玉笛聲。唯有芳洲春草色。年年還傍大江生。

將發荊州招李劬庵秦對巖話別次劬庵韻

荆蠻忽聚四方豪。睥睨城西幕府高。蹴踘攜蒲方合陣。竹頭木屑有分曹。清商莫奏湘君曲。濁酒堪酬屈子騷。南北往還誠萬里。百年物役一何勞。

和答錢宮聲見懷

吳閩惜別雁書稀。春樹春江雨色微。遊子誰憐親漸老。無家止有國堪依。青萍嘯夜中原在。白日流空兩鬢非。還憶長安同躍馬。極邊憔悴攬征衣。

王又且字幼華。陝西郿陽人。順治戊戌進士。官給事中。有黃湄集。○王漁洋謂幼華詩每變而益上。足以傳世行遠。又謂遊太華羅浮詩尤爲警策。惜未得全集。於選本中采取故所收止此。

蒼龍嶺

削壁突斷絕。微逕始躋攀。長虹馳遠影。飛落青冥間。迅飈兩崖起。獵獵雲氣還。連峯若動搖。我行亦孔艱。天色撲蓮花。瑤草何爛爛。陟危千萬慮。曠望忽開顏。璇宮應不遠。從此排天關。連山雲合而風鼓動之。真有動搖之勢。予遊黃山觀

雲海親見之作。者先已寫出。

自千尺嶂緣獼猴愁行

清晨杖輕策。入谷二十里。傾崖驟合杳。梯棧空中倚。無翼如何度。艱難方此始。萬狀石磴磴。紛垂縹緲。攀縋踏危石。足頓不能起。巖屋照頽陽。曾岑倒松梓。養力憩烟靄。乃知崎嶇美。東南得高壁。路隘不任趾。亂峽無全天。坤軸忽崩圯。猿狖怯方啼。吾生悵何恃。太息展遠眺。前途尙嶮巖。亂峽無全天。十

夜坐仰天池

窮日凌峴嶸。我行亦云疲。散髮臥絕頂。疎星下清池。峻絕五千仞。晦翳何可窺。白雲上下飛。深松羅四垂。欣無職事縲。得與山靈期。延佇不知反。風林露華滋。高視但青蒼。一氣回坤維。鸞鶴如可馭。終焉謝磷淄。

古鼎篇

自注。鼎中一馬一鼠。引呂氏春秋爲證據。知周鼎也。

夜坐金景流房櫺。一南一北雲逢逢。誰爲此者驚愚蒙。戴氏之鼎來河東。子水母土木火功。古色不辨貫。與崇翡翠青。間玫齊紅。饜饕怒張雜。夔龍蜿蜒之勢。何其工。中有一馬方雙瞳。其下隱約憑社蟲。或云乾與艮相從。不然子午識。夏冬紛紜衆說胡能同。魯真齊贗空懵懵。何人博雅爲譚宗。考圖論世自鎬豐。憶

昔神廟稱時雍。斯器原出蓬萊宮。天球河圖與大鏞。雖敦紀顛爭春容。金耶張耶椒房雄。乞而有之作清
供。大梁左右興兵戎。豪門散盡隨霜蓬。零落不復求亡弓。嗚呼治亂何匆匆。使我感歎填心胸。大烹杳矣
難繼蹤。此物合依蒲葦叢。主人有閣名丹楓。閣之前後花纖茸。兩耳三距位當中。玩視聊寄疎且慵。王生
作歌紀始終。慙無長管搖白虹。焦山古鼎爲殿分宜取去殿敗仍歸焦山此從亂離
後失而復得所感尤大也前半刻畫亦見造句之奇

曉渡望鄂州

曉霧壓城頭。蒼茫古鄂州。風烟盤赤壁。波浪下黃牛。星動連江鎖。旌高隔岸樓。由來征戰地。不忍問東流。
三四
神勇

贈梁峒樵水部

幾載常含晝省香。知君例作水曹郎。久辭請謁草侵戶。近著河渠書滿牀。舊業六盤秦北地。臣軀九尺漢
東方。那堪塞上烽烟暗。升斗朝朝問太倉。

送家叔季鴻先生游隴上謁后土祠

綠楊連岸曉風斜。東渡汾陰泛客查。天際兩崖馳竹箭。春流三月湧桃花。黃雲寶鼎淪衰草。絳氣靈壇落
暮鴉。舊事於今無可問。市樓酌酒是生涯。

故陳忠愍公挽詩

福

陰風獵獵陣雲低。雪滿靈州動鼓鼙。絕塞名應傳屬國。前軍星已落安西。五原未復精靈在。百口無歸道路迷。蕭颯惟聞哀痛詔。城門月出夜烏啼。

太史祠隔河望孤山

絕巘連雲出。秋風隔水多。韓原中缺處。山翠壓黃河。

嚴允肇字修人。浙江歸安人。順治戊戌進士。官壽光知縣。著有石樵詩稿。○石樵以同官累去官。後與同官遇。益厚禮之。人服其長者。詩古今體兼善。斐芝麓尚書謂其春容大雅。近代作者亦不多見。蓋不妄許云。

古風

世路真險巖。泰山起方寸。要盟矢天日。咄嗟不相信。耳餘劓頸交。禍機起奪印。武安傾魏其。杯酒遂成釁。睚眦按劍怒。磨牙雪餘恨。兩虎不相下。報施理亦近。爲國忘私讐。千秋思廉藺。交道之險巖爲己私也。能如廉藺之爲國則公而忘私矣。主意全在一結。

送宋荔裳按察四川

驄馬出薊門。駕言赴岷峨。前驅負弩矢。乘傳相經過。劍門天下險。錦江翻白波。近代厄銅馬。西川血成河。至今勞生聚。人少豺虎多。大夫秉邦憲。兢兢志靡他。外臺持風紀。霜雪變陽和。文翁寬匪弛。武侯嚴不苛。蜀道易平地。巴渝起新歌。琴臺與卜肆。古蹟猶未磨。追從訪揚馬。道遠將如何。極亂後宜以寬嚴相濟處。文翁武侯其前事也。贈

言之盡
如是

洗象行

長安六月車塵颺，都人傾城觀洗象。黃門鼓吹前導行，玉河響閭流奔放。怒蹄蹴踏蒼山頽，岩峽靡腫難爲狀。蠻童赤身跨象背，游戲波濤覺神王。須臾牽挽出水濱，長鼻一噴飛雪浪。吾聞此乃瑤光精，西域南荒配利兵。雄姿幾耐身毒戰，猛力可代蒼梧耕。遠人來朝貢天闕，含元仗下隨簪笏。豆芻飽食三品料，劍珮班陳百官列。黃鬚健兒不敢騎，拱立閭闔生威儀。莫言材大難爲用，馴擾聽受諧職司。開元天子奏衆伎，金羈錦纏舞玉墀。他日重逢祿山宴，努目不拜竟死之。近聞螳賊陷京室，象房踰闕鳴嗚悲。渠雖雄長亦獸類，君臣大義猶能知。嗚呼！君臣大義偏能知。前半形容洗象，人皆能之。後以獸類亦知君臣大義，見臣道之不可頃刻不明也。讀末二語爲之凜然。

述哀

母之生我日在角，絡緯鳴機夜深作。歌成黃鵠不忍聞，大孤啼飢小孤弱。亂離伏莽乞餘命，十口流離竄叢薄。朝呻夜吟不暫休，骨肉幸免填溝壑。長養衆雛畢婚嫁，慈幃未省含飴樂。當時奉檄心獨喜，今我窮悴至於此。俯仰無因供菽水，衾影之間媿人子。去官無祿，不能供母氏菽水，猶爲抱慙，況有祿而無母可供者乎。此種詩不忍作，亦不忍讀。

觀繩妓作

長繩罽竿高百尺，楊花雪落城南陌。美人冉冉化行雲，細縠輕紈望空擲。冶袖雙開舒錦臂，婆婆往來若

平地盤中小試飛燕舞。樓上驚看綠珠墮。迴眸顧盼無限情。空裏忽聞環珮聲。天風吹入碧雲去。始覺仙骨珊瑚輕。輕軀上下無斷續。舞罷腰肢新結束。燕斂墮地悄無聲。背立當窗鬢雲綠。抱得秦箏寫春怨。歌唇宛轉吳趨曲。吳歌楚舞絕可憐。誰家笑擲珊瑚鞭。唐人此題以身輕一縵中五字盡之妙于用簡此又妙于用繁

白下

白下援師聚。鍾山薄伐新。三軍隨庾亮。一戰走盧循。虎旅屯江岸。鯨波靖海垠。論功諸將在。哀此亂離人。
諸將雜感

建國行師自古今。千秋理亂事相尋。雲龍勢合攙搶掃。汗馬功成帶礪深。不信蒯通能相背。可無孫武善攻心。山頭廷尉空凝望。星拂招搖白日陰。

仙霞烽火照龍山。玉甌金庭棄草間。慷慨孤臣提漢節。指揮諸將出雄關。蒙茸壘嶂潛師度。鼓角嚴城振旅還。勞苦西平功第一。江東坐鎮羽書閑。三語范忠貞之不風。四語李文襄之命將。

天彭井絡望中遙。劍閣重關似建標。白帝城空王氣盡。金牛峽險霸圖銷。漢廷卻悔封雍齒。巴郡終須殄隗囂。邛僰西南重置吏。不煩檄使下星軺。

歎塞諸戎擁節旄。大開屯種刈蓬蒿。戴牛佩犢經營苦。畫井分疆部署勞。豈爲流移增國稅。卽看荒穢長田毛。戈船下瀨今無事。壯士休論戰伐高。大概爲逆藩時事。次章指耿逆。三章指吳逆。末章言宜屯田守禦。永固疆圉也。風格從杜詩中出。

顧

字泰瞻，江南無錫人。嘉定籍。順治戊戌進士官贛州府丞。

奉委進江背洞駐軍赤坎招安賊三萬有奇

匹馬臨江背，前旌近賊營。由來皆赤子，何忍作長平。地險歸畊少，民頑入法輕。撫綏誠不易，先軌是陽明。
梁心如此。體天地好生之心者也。彼白起、阮長平卒至七十萬人。項羽阮新安卒至二十餘萬人。李廣殺羌亦八百餘人。三人不全首領。天道然也。陽明破賊勦而兼撫，故引以爲先軌云。

徐元文

字公肅，江南崑山人。順治己亥。賜進士第一人。官至大學士。

登芳巔峯

高峯直上勢崔嵬，閩越雄州一柱開。路轉千盤隨石筧，崖臨百丈聳丹臺。鳥飛天外山如鏡，人到雲中海似杯。便欲凌虛生羽翼，翛然綫馬閱風來。

春日閱武召百官詣南苑

逶迤上苑帝城東，御輦巡臨振武功。甲鎖鍊金寒白石，旗翻翠羽動春風。龍驤萬騎軍麾轉，鵠立千官拜舞同。莫以清時忘戰伐，至尊親爲挽雕弓。
本朝王業基於武功，一結得安不忘危之旨。

葉方藹

字子晉，江南崑山人。順治己亥。賜進士第。三人官至禮部侍郎。加本部尙書。謚文敏。

關隴平

關嶺茫茫隴流湯湯，紆徐逶迤，崢嶸嶮巖。面蜀肘涼，輔車相將。狡焉啟疆，震驚我一方。
一章。關嶺兀兀，隴流

滔滔彼涇啓戎。乃蠢茲蝨賊。爲虺爲蜴。爲螟爲螽。叩首張臆。助逆抗有德。如蝟之集。如豨之突。二涇原既

清。羣賊大震。睢睢盱盱。延旦夕之命。帝命臣海。爲隴民徙災。帝命臣勇。師出自西陲。三帝詔臣海。汝速涉

坂。出彼朝鄜。爲勇軍援。掎之角之。沓之蹙之。除民之慝。俾婦子恬適。尙嘉乃績。四海涉河涇。言騰灞滻。秦

山轟突。嶽崎隴坂。踰邠越涼。飛旆揚旆。扶輿猗靡。雲罕綵繡。雍部阻長。敢憚痛瘡。式遏寇虐。以寧爾室家。

五勇自河西。銜枚疾指。來從酒泉。轉戰天水。矯矯虎臣。一乃心力。摧堅挫鋒。盪彼蝨賊。兵車百萬。洶洶雷

震。橫會方州。爲行爲陳。六東西合圍。賊在釜底。七其智斯竭。其魄斯奪。勇率其麾。崖誅谷討。曰臣思克。曰

臣進寶。赳赳奮武。爲王干城。勇實帥之。桓桓于征。八于征何所。于鞏于臨。道阻且長。蔽虧岑峯。深入其阻。

禽獮草薶。申用三驅。根株斷刈。餘賊竄蜀。游魂猶悸。西夏以綏。賀蘭其乂。九脅從蚩蚩。亦孔之哀。寬其誅

鋤。予以惠來。維海維勇。剛克柔克。勇也帥師。爲關爲被。海也救民。爲揉爲活。北地上郡。稽顙歸命。如旱望

霓。海實綏之。十義威戢武。奠我西陲。剖蝟斲蝟。人畏以懷。秦民噓呵。化爲謳吟。殄熄暴悖。克廣德心。經戰

伐區。蠲除租賦。問孤弔死。起迺沉痾。廓我皇恩。義聲先路。十一帝德振振。隴山既平。隴流既清。維天子之禎

隴山既伏。次黔粵滇蜀。敢不嚮伏。如翰如飛。萬里來威。十二維臣之力。維師之武。繫縛巨憝。爭荆膾脯。塞

神人之怒。黔首喁喁。式歌且舞。億萬斯年。篤我皇景祐。十三○紀平王輔臣之亂也。輔臣本名馬。鷄子

三藩之變。輔臣叛。據平涼。秦隴震驚。特命大將軍圖海討之。時靖逆侯張勇奮威將軍平進

寶提督孫思克會討。累戰皆捷。惟平涼一城腹背受敵。因請降。檻送入京。死於道。關隴乃平。

海氛清

巨浸稽天滔滔如何。天吳惘像倚以爲家。有鯨有鱈。有蛟有鼉。摧幢決帆。血人于牙。中國有聖人。爾獨揚其波。章一蠢茲鼃貍。亦雜此處。曰子勝國後。誕敢繼其緒。藉瑕蹈釁。伺窺肘腋。結連蜂蟻。載逞兇慝。離間我臣僕。盜據我疆場。章二于興于泉。于汀于漳。乃揚沸湯。乃噪蝸蟻。我有城郭。倏爲沮洳。我有民人。倏爲鱗鱗。忍死須臾。後來其蘇。章三恭承帝命。建大將軍旗鼓。我冠帶之國。忍鱗介是伍。據我上游。張我罟罟。與子偕作。與子同仇。悉率左右。殲此羣醜。章四暨暨藩臣。一心一德。討賊自贖。不叩已恤。塹山堙谷。馬騰舟駛。親董其旅。以臨濠汜。陛下曲赦臣。臣敢不效死。章五將士和睦。有鳧在藻。既獲賊師。如飢斯飽。或拔其角。或脫其距。或斧其吭。或截其脅。賊窮見窘。無地自處。章六彼強者跳。我攘我逐。彼黠者窮。我殄我戮。神碁之毒。鬼速其覆。如探殼烏。如振槁木。非我黷武。取彼殘已足。章七前徒既奔。兇渠束手。計無復之。狼奔鼠走。茫茫烟島。爲逋逃藪。仁無必取。義不盡殺。屏諸窮髮。無汚我王鉞。章八四州士女。來迎王旅。君子維何。玄黃在筐。小人維何。喪殮在篋。復爲王人。以耕以仕。章九歌帝之德。誦王之武。章十皇帝溥將。涵負吐納。百谷來王。天與地杳。何人不綏。何物不懷。何戾不蠲。何善不嘉。皇仁熙熙。云何不來。章十一皇帝在位。受天之籙。東西湖南。無思不服。其有不服。自嬰顯戮。獻馘于泮。獻俘于廟。武功既昭。文德用紹。史臣奏雅。來哲是詔。章十二芝龍子成功。結連殘寇。爲東南患。王師討之。黨逆者歸順。成功死。子荒於酒色。勢窮遠邁。後歸誠海氛乃清。○漳州平瀛三篇似柳雅。此二篇似韓碑。各有得力。

弔鐵崖墓

先生不可見遺塚自斜暉無復攜紅袖還聞葬白衣才銷明主忌老幸故人依鐵笛吹雲起猶疑踏月歸
明太祖召鐵崖至旋放歸有白衣宜至白衣還句用來恰好

撰西樵考功誌文畢寄阮亭戶部

恍惚相隨把袂時幽明難問兩心期敢云下筆不加點差喜臨文無愧辭比似東駕應恨薄即同挂劍已
嫌遲請逾歲始報 友生投契猶如此況爾連根荆樹枝
三語用禪術語意四語用蔡邕語意

授職翰林學士感恩述懷

麻衣席帽滿塵埃親荷先皇霽沐來敢道齊賢留異日屢稱蘇軾是奇材
自注戊戌充貢士入都先皇帝試拔第一八月舉南宮九月禮傳日親諭朕知汝久特拔汝為一甲進士又數對臣下稱道文學 身離牛口驚還在夢挽龍髯恨不迴今遇吾君重拂拭

孤桐果否爨餘材
如此屬對脫口而出無引用典實之痕

彭孫遜
字駿孫浙江海鹽人順治己亥進士康熙己未召試博學鴻詞第一官至吏部侍郎○奕門詞和氣平在唐人中最近大歷十子在十子中最近文房

雨中過白芒村寄高山人儼

春雲生驟寒溪上無人迹石筍清相羅煙翠紛可摘欲持三尺絹寫此春山碧卻憶山中人遠在龍池宅
惆悵不同遊白芒風雨夕

魚梁灘下泊

暝色起何處。忽然雲水昏。春燒如新月。遠挂山一痕。寒禽呼木杪。暗蟲沸草根。遙見冥際火。知有林外邨。
孤舟欲棲泊。石溜濃雲奔。鷗旅一無托。菀結難自論。矯首眺天末。躑躅勞神魂。寫晚景入神

彭蠡夜泛

清淺宮亭水。濺濺百道流。殘春風送客。終夜月隨舟。野火沈葭葦。遙天挂斗牛。相依有鷗鷺。任意宿汀洲。
四語在人人意中。而脫口新鮮。渾然無迹。

登湖口縣城

一望烟波萬頃明。女垣高與石根平。湖光盡日依樓堞。山色終朝滿縣城。寒嶺無人孤鳥下。秋林欲雨數蟬鳴。何當便作移家計。終臥滄洲寄此生。領聯語身親其境者。知其寫照之工。

秋日登滕王閣

客路逢秋思易傷。江天煙景正蒼涼。依然極浦生秋水。終古寒潮送夕陽。高士幾回亭草綠。梅仙一去嶺雲荒。臨風不見南來雁。書札何由達豫章。

金陵懷古

杜宇啼殘百感生。西風建業舊神京。詩成狎客遺簪會。酒泛諸郎按曲聲。江外羽書空絡繹。禁中刀勅正

縱橫大官別有長生藥。不假天台刺史行。二章皆言南渡時事。遺簪按曲。祕戲除官。而置兵防於不問。事勢至此。不亡何待。

萬里山陵萬古愁。南司北部總悠悠。屠沽自立宮中市。竈養爭除關內侯。肯向人間求故劍。誰從闕下問

全鳩。姑谿幕府空貔虎。一夕龍車不可留。董妃王之明事。迄無定論。詩人歌咏者俱以爲真。

豫章城下送春有懷故園兄弟

城下煙波暮可哀。扁舟日夕更滌洄。一春又向他鄉盡。千里曾無尺素來。野鷺孤飛煙裏沒。江帆相背雨中開。故園風景今何似。池草春花夢幾回。

黃與堅字庭表。江南太倉人。順治己亥進士。康熙己未。召試博學鴻詞。官詹事府贊善。有忍庵詩集。

辰龍關

鬱盤鳥道中。忽覩巉巖削。雙聳若天門。神工斧斤鑿。攢刺劍戟橫。摩厲成鋒鏑。青冥杳無垠。怪雨從空落。一徑折霄光。絕壁盡倒卻。千仞蹙孤危。不敢棲猿獍。攀躋坂益峻。數武困行腳。嗤彼銅馬餘。持鑊倚木闕。狼竄嶮一隅。俄就官軍縛。於今走輕車。亭午氣頽索。白日景蔽虧。一步一瘳惡。瞬息度層關。鬚鬢恐非昨。

聞砧

萬井西風下。城高一葉飛。可憐今夜月。重搗去年衣。聽亂情交切。聲疎力漸稀。異鄉刀尺冷。多少客思歸。

悲愴之作。遠客人幾不能讀。

金陵雜感

勅選良家降墨封。玉車輕轡進昭容。花開並蒂鴛鴦煖。酒醉同心琥珀濃。蕭寺鼓鼙驚翡翠。蔣山風雪葬芙蓉。飄零故劍秋江上。回首長干冷暮鐘。

言勅選良家而置故妃於謬辱也。叔寶無心肝不至於此。

龍虎鍾山百戰雄。朔風吹浪下鱗鱗。彫戈壓陣黃沙斷。鐵鎖沈江赤燒空。鷓鴣觀消春雪裏。鳳凰臺冷暮雲中。由來帝業終荒草。銅狄何曾戀漢宮。

言神兵北下而長江無備以至亡國也。

沂州客店遇同鄉友人

江郭蕭條尙苦兵。訝君北走得班荆。地懸淮海艱消息。人歷冰霜倍老成。同話寂寥皆逆旅。兩經離亂卽餘生。故園風物那堪問。但說梅花已繫情。

人歷冰霜倍老成。卽杜老艱危氣益增意。少年柔脆人應知之。

田

雲字綸霞山東德州人。順治己亥進士。官至戶部侍郎。著有山靈詩選。○山疆詩才力既高。取

山靈有知恐亦以後生爲不妄也。

病愈早起成詩

雨過庭翠滋。一鳥發清籟。披衣趁朝曦。新晴滌埃壒。西軒青嶂疊。縱目收罨靄。曉廊取次行。心神頗融快。佳客時過從。絺袍迎戶外。憑几理素琴。焚香誦梵貝。

起二語寫病起入神。

晚投臥佛寺宿

峯銜新月黃雲擁山容變深谷一鐘響蔽虧烟樹斷樵人語前浦古寺隔幽澗翠滴衣衫重松黑黐黐竄疎燈出深竹依微露紺殿井欄摘莢葵僧廚供茗饌偶來訪支遁吟棲有餘戀夜半大壑鳴風雨四山亂

翠微寺

詰曲歷石齒沿溪樹溟濛招提門何向陂陀無人蹤峭崖立萬仞惆悵林路窮豈知披榛莽紆迴流水通一僧出汲水竹屐行相從長綆下深澗剗豁驚潭龍淅淅石湫雨泠泠葛花風前循略約去木杪聞清鐘

山腳晚行

水樹色相映淨綠生衣裳日薄無倒影石髮有冷光前入翠微寺已過黃花場貪行夕忘返纖月吐東岡

古髻喬松下疊疊如北邙林昏叫寒鴟風颼響枯桑俛仰今昔人千載心徬徨作者五古每以才勝人此四章錄其清微幽遠有逮

者音

綠車辭

朝飼蠶暮飼蠶桑樹葉大蠶眠三初長如蟻今成蠶乙乙上簇黃白滿綠車啣軋風中轉女十五當戶織桃夭期聞消息簾幙半垂雙燕飛打疊新縑作嫁衣

登采石磯太白樓觀蕭尺木畫壁歌

太白樓上秋風寒采石磯下波連山長康不作僧繇死何人攬弄秋毫端力挽萬牛嘯兩虎袒衣跋扈青

冥間四壁四山拔地起。直從十指生煙巒。峨眉匡廬兩對峙。西華東岱同躋攀。巨靈夸娥日月走。坤位乾寶神鬼盤。屋角雷雨勢飛動。牆根澗壑聲潺湲。牛渚白沙如蟻蛭。天光破碎滄溟寬。藍陳蕭惲稱大手。前追董巨凌荆關。尺木老人更奇絕。身駕大海騎虬鸞。秋來放眼忘遠涉。憑陵萬里開心顏。寺徑濛濛松杉雨。蘆花漠漠黿鼉灘。顧盼無人相娛賞。高呼太白騎鯨還。可匹流洋作一結。迥顧倍覺有力。

碧曉書院歌弔楊升菴先生

塚風蕭露哀牢疆。山川瘴癘難禁當。新都公子老戍客。孤臣萬里堪悲傷。當時世廟議大禮。械門痛哭千夫強。仗節抗疏言矯矯。干觸螿尾投蠻荒。程朱正論臣所執。今昔濮議誰掛量。大禮未定大獄起。批鱗折檻空激昂。逢君首事有瓊萼。議論附會來豐坊。明堂秋饗復聚訟。分宜餘毒爭拍張。嗚呼先生遂不返。簪會峒獠羣相將。木弩含沙火雲熱。天教老叟紅檳榔。吳粉傅面兩丫髻。簪花擁伎何徜徉。都盧倒吹潑醉墨。焚兒觀者如堵牆。羈魂漂流夜郎地。何異屈子沈沅湘。海莊故墟碧雞麓。猩猩白晝啼書倉。巾杖逍遙鬚眉古。圖畫遺像生光芒。竹槍一徑夾流水。菊乾楓落寒雲黃。潮州僮耳同一轍。祠廟最屬摩青蒼。小子夙昔慕高節。況值奉命來黔陽。竊願升階更翦紙。招魂歸送蠶臈鄉。高吟死去誰憐句。令我涕泗徒滂滂。張桂議禮始猶近情後則漸流險惡矣篇中寫諸姦之附和升庵之轉軻跌宕瀉瀉神道氣王應推稿中歷卷之作

泊舟吳門寄汪茗文

渺渺太湖水，遙遙光福山。梅花一萬樹，窈窕非人間。思與堯峯叟，扁舟數往還。煙巒七十二，坐嘯聽潺湲。

律體可作古風讀。

董俞 字蒼水，江南華亭人。順治庚子舉人。有淨湘度嶺諸稿。

落花篇

東風綠徧芳洲草，春晝落花啼鴉早。片片朝縈上苑煙，氤氳夕覆長安道。長安美人惜落花，落花飛去墮誰家。曉看青鏡愁紅粉，暮掩珠樓泣絳紗。珠樓紅粉須臾變，帝里繁華君不見。一夜飄飄長信階，數枝零落昭陽殿。長信昭陽月影低，邊笳橫笛紫煙迷。渭城倡婦承歌扇，粉社遊人拂馬蹄。願為舞蝶棲芳墅，願作流鶯隱翠隄。金隄玉墅幾千里，黯黯餘香沉綠水。玳瑁筵前雪亂飛，珍珠簾外風先起。舞雪迴風可奈何，春閨少女歎蹉跎。此時攀條垂玉筍，此時掩袂蹙雙蛾。別有征夫淚霑臆，鴈沙龍塞無消息。金谷園中不見人，玉門關外長相憶。落花落花誠可憐，尊前一曲篋篋絃。花茵醉臥不歸去，明日重來應泫然。唐初詩全

於纏聯旋轉處取神卷中似一存之。

曹真吉 字升六，山東安邱人。順治庚子舉人。官禮部員外郎。著有珂雪集。○商邱宋公極推作者。游黃山詩，謂此山名作寥寥，向推虞山。今被實菴壓倒矣。惜未能多見，祇存文殊院一篇。

文殊院觀鋪海歌

蓬萊閣外海作山，文殊院外山為海。神物由來不易逢，天為吾徒澆塊磊。白雲一片湧空濛，眼底千峯皆

杳靄只疑天。一生水開窮荒。江漢朝宗。此間匯。鼉身一抹映天黑。鯨波萬里連渤海。天都直可作員嶠。蓮蕊蓮花餘蓓蕾。須臾長風吹散碧琉璃。澈溪茫洋竟何在。仙人游戲太神奇。我欲直上高空問真宰。得此起結。

乃見作手。

花朝得家弟過江消息

使者乘秋泛畫橈。重來不覺斗回杓。花明故國初啼鳥。人渡空江欲暮潮。萬里山川供筆札。一天風雨過金焦。孤帆搖曳垂楊裏。知在燕城第幾橋。

登望海樓

杯勺滄溟望裏收。百年觴詠幾登樓。尊前忽覺來三島。此外猶聞更九州。斷岸雨晴天倒影。海門風急氣成秋。搖搖坤軸渾難定。曾否金鼉背尚浮。

崔

華字不雕。江南太倉人。順治庚子舉人。○漁洋詩話。摘其名句云。溪水綠於前渡。日桃花紅似去年時。又有丹楓江冷人初去。黃葉聲多酒不辭。人目爲崔黃葉。

擬宋如意和歌

羽聲旣凜冽。陰飈吹大荒。驅車過金臺。目已無咸陽。余亦從此逝。無人燕市傍。目中無人。

許墅舟中別相送諸子

溶溶月色漾河湄。曉起頻將玉笛吹。同上郵亭忘別緒。獨行驛岸解相思。白蘋江冷人初去。黃葉聲多酒

不辭此路三千今日始。薊門回首雪霜時。

原本丹楓江冷人初去。丹楓黃葉不無合掌。擬易白蘋。崔黃葉以爲可否。

趙

雲

字山子。江南吳江人。順治庚子舉人。著有雅言堂詩。

喜弘人聞夏南還并憶漢槎

綺里由來有二難。無端相對作南冠。輪臺詔下龍髯迥。華表歸來鶴語寒。月夜一尊歌棣萼。春風雙騎渡桑乾。何年恩到窮荒外。還向藜牀問幼安。

卷六

馬世俊

字章民。江南溧陽人。順治辛丑。賜進士第一人。官翰林院侍讀。○狀元對策。隨題敷衍者多。先生獨侃侃直陳。不負所學。制義皆有根抵。何義門學士云。我朝狀元。前劉後韓。公居其間。鼎足爲三。非妄許也。

詩品亦清正不凡。

吳季子挂劍處

公子歸吳去。故人知此心。死生同白日。然諾豈黃金。一劍竟何往。高臺自古今。君看碑上字。苔蘚不能侵。

不須名句。風骨自高。

古意

紫塞三千里。征夫去不還。簾前新月上。似爲寄刀鐮。

陸賈

莫問尉佗裝，千金豈在眼。請看馬上公，何曾事生產。

張玉書

字素存，江南丹徒人。順治辛丑進士，官至大學士。諡文貞。○文貞古今文俱以風度勝，詩品亦然。令讀者如飲醇醪，自然心醉。

謁項王廟宿遷縣

項王祠枕長河水，拔山氣沸驚濤起。陰森白晝啼鼙鼓，蕭瑟西風黯菰米。座傍烏騅伏不鳴，餘怒猶欲乘雲騰。想像悲歌出垓下，可憐遺恨迷陰陵。英雄坎壈識天意，失路東歸亦何濟。萬戶輕身贈故人，一死何顏見義帝。往事東流逝不回，雌雄壁壘空塵埃。君不見下相城頭望豐沛，樵歌暮上歌風臺。項王事業不於自刎時提醒之，筆下有風霜之氣。

息浪菴夜坐別叔敦讓木諸子

短棹攜樽觸浪過，將離莫問夜如何。最憐帆遠浮天闊，始信江空得月多。隱隱鐘聲千佛唱，星星岸火一漁蓑。荒雞促曙行人去，回首雙峯護薜蘿。

寄李厚菴學士

幾年烽火斷江春，萬里無諸戰壘新。一自蠟丸通帝座，始知嶺嶠有孤臣。山城躍馬荆榛滿，書劍臨戎涕淚頻。迢遞九天優詔下，清宵回首憶楓宸。表其進蠟丸，陳破耿逆之功。然蠟丸更得之友人，也時文貞未以理學名，故不之及。

大閱恭紀

鑾輿曉出傳宮漏。萬乘春蒐控玉鞭。十二羽林雕輦後。三千犀甲幔城前。招搖色映長隄直。華蓋香凝禁樹妍。脫臂饑鷹霜距疾。嘶風駁騎雪花拳。龍鱗乍晃雲霄上。虎旅同趨日月邊。褒鄂宗臣張左纛。薛岐帝胄領中權。銜枚受律連營肅。射柳分弓七札穿。鑿策聲中看隊列。鏡歌曲裏促觴傳。丁寧諸將投戈日。長憶先皇講武年。駟介踏雲還紫禁。六飛扶日下青天。威馳塞北名王壘。風靖滇南漲海煙。指顧銷兵資廟略。兩階舞罷譜虞絃。中間警句。摸之有棧。應制中之指南也。七言長律。本非正聲。存之以備一格。

送邱曙戒前輩之武昌

猿聲夾岸聽斜陽。江樹蒼茫接故鄉。卻較長沙歸路近。行吟何事怨瀟湘。即聖主恩深漢文帝意。是爲溫柔敦厚之遺。

輓馬章民年丈

東廬舊築翠微間。望裏煙霞日夕還。幾度欲歸歸未得。空餘遺恨滿青山。辛苦中閨罷錦機。白頭曾未識宮衣。可憐風雨寒燈夢。猶是書堂夜讀歸。

葉映榴字炳霞。江南上海人。順治辛丑進士。官湖廣參議。道死。夏包子難。贈工部侍郎。諡忠節。

庚申夏至日起武威至張掖

武帝功成吏守邊。傷心天末是居延。人家板屋風聲裏。思婦寒衣淚眼前。目斷燕支愁見月。槎浮銀漢渡

經年。慚余不作征西將。藥裏書囊信一鞭。

榆次道中

路出榆關西復西。荒原白草怪禽啼。經行百里無人迹。惟有秋風送馬蹄。

孫

字樹百。山東淄川人。順治辛丑進士。官給諫。著有笠陽詩草。○給諫爲令安宜時。撫字心勞。董領河務。上官謂苛令。濬河將中以非法。士民感憤。不呼而至者萬餘人。負眷餉築隄。環兩月之工。六晝夜成之。上官無以難也。士民繪圖紀其事。志石中云爾。據此。可入循吏傳中。

秦川懷古

內史新豐不可求。長陵王氣已全收。千盤鳥道歸隆準。百戰鴻溝割沐猴。風雨滿天來渭北。麒麟遺塚自南邱。幾經汗馬勞諸將。紫塞黃榆起暮愁。

爲姜勉中兄弟題諫草樓

杖血曾聞濺漢廷。孤忠旅望海雲青。難回國步逃吳市。易了家緣問敬亭。失序雁鴻天漠漠。經時薇蕨雨冥冥。空餘十二封章在。夢繞銅駝幾涕零。諫草樓詩成集。二章爲最。以其無一字不典切也。結意尤微婉。可思。

聞鼓山絕頂可望海外諸國欲登不果

自注。上有天風海濤亭。朱文公題。共說鼓山高出羣。半天巒翠畫氤氳。島藏諸國晴時見。風捲洪濤靜夜聞。未得肩輿隨度鳥。何時蠟屐踏層雲。晦翁亭子空相憶。絕頂松篁望不分。三四瀛洋極賞。

于忠肅公祠

出狩天王竟北征。烽煙已逼鳳凰城。有君定國真長策。奇貨難居始罷兵。南內邀功爭復辟。西曹枉殺患無名。最憐一事公遺恨。不使前星羽翼成。以宋和議之失對照于公功在社稷真再造矣詩中有史擲地當作金石聲

吳

光字長庚浙江歸安人順治辛丑賜進士第三人官翰林院編修有南山堂集

泊湘口二妃廟是瀟湘二水會處

泛槩楚江曲。輟棹瀟湘涯。天水互澄廓。矧逢清秋時。霜明沙渚淨。露寒岸草滋。芳蘅被長薄。修篁映素漪。月華臨夜空。青山窈多姿。帝子渺何許。嬈娟遠水湄。透靡迴翠旌。彷彿睜文狸。蒼梧白雲去。洞庭丹楓衰。美人期不還。日落愁參差。睠彼湘竹吟。躊躇有餘悲。點綴九歌自足遠神遠韻

遊招隱山六洞

自注洞曰朝陽夕陽白雀嘉蓮南華北牖

攀陟情忘疲。洞壑洵迴遶。朝陽開霏微。夕景映澄鮮。茵萑不可見。白雀徒空傳。窈窕北牖室。演漾南華泉。虛寶顯向背。隱磴潛互綿。蔽虧欺日月。藏納杳雲煙。削鑿太華小。澹瀨神島連。偶然二儀剏。遂奪萬古妍。寓真賞非一。尋異懷屢遷。浩蕩觀物化。聊謝區中緣。作者五古胎源二謝然自能造句不徒得古人之形

遊虞山韶音洞

自注在粵

探奇尋古嶠。巖竇臨清瀨。空谷響易奔。萬竅咸竽籟。苔蘚映崩壁。竹柏翳叢蒼。冬夏鳴瑟商。昏旦變明露。

瞻邈蒼梧巡，透遲翠華邁。驂虬紛鸞嘒，羽旂森旄藹。攬袂南薰亭，天風動衣帶。月皓清湘流，雲空九疑外。抗緬千載前，躊躇發深慨。

登昭州城樓卽事

兩江穿石壁，疊嶂倚孤城。舟向猿邊下，人於鳥上行。巖幽谷霧暝，野曠戍煙平。薄暮樓笳發，棲栖旅客清。
千里江陵一日還後，復得此奇險之句。

晴川樓

萬古山樓對黃鶴，一身楚塞吟清秋。羲娥平向窗中過，江漢交迴檻外流。深窟鼉鼉時隱見，盤渦鷗鷺靜沉浮。禰衡李白今何處，日暮空悲芳草洲。
江漢交迴的是此處，得此句不嫌上句之泛。

王維坤 字幼典，直隸長垣人，順治辛丑進士。

寄慰乾一落第

當年交臂許雲龍，太息名高未易逢。我輩都非食肉相，古人常作酒家傭。三巴二月鶯千囀，萬里雙魚淚一封。何處相思不相見，梓江迢遞劍門重。
諸乾一，松江人，時幼與在蜀中寄詩。

除夕

眼底年光盡，家人真不來。西川兵火後，無復望鄉臺。

順治朝科目止於辛丑此下皆文人才士山林野老之詩

徐延壽

字存永福建閩縣人有尺寸集○存永與公燧之子錢牧齋序其詩盛稱許之

建州符山寺別楚黃樊山甫

共借僧寮一榻眠。離家愁說兩經年。斷雲古驛過樵水。涼雨孤舟憶楚天。千里別情芳草外。五更殘夢落花前。城南歌舞今消歇。又見關山月上弦。

新淦縣拜周公瑾墓

水畔巴邱古縣開。周郎祠宇傍泉臺。霸圖當日成何事。才士無年實可哀。荆楚干戈終古恨。小喬環珮幾時來。天涯孤客逢寒食。特為停舟酌一杯。霸圖不成。蘇公瑾之早沒。哀之深矣。

褚

篆字蒼書。江南長洲人。邑諸生。○蒼書天爵自尊。浮彌古學。韓文懿公以父執敬禮之。康熙己巳。聖祖南巡。召見於行在所。命書牋二幅。御書海鶴風姿。賜之時年已九十六矣。越歲卒。生平詩稿散佚。祇存此篇。

歸度仙霞嶺

匹馬勞勞蒼翠間。千尋古棧度重關。天南氣象開蠻府。嶺上風雲動越山。徑走黃狐荒草合。村連紅樹夕陽殷。生民苦憶無家別。煙火蕭條何日還。

趙士喆

字伯潛。山東諸城人。有觀物齋集。○伯潛去家不歸。著建文年譜。董樞目中無人。然師事之。可以覘其品矣。

五平詠懷

陽春風初和。驅車游皇州。平原明朝暉。層城如雲浮。高陽緣長川。丹霞棲瓊樓。驪駒誰家郎。翩翩臨清流。雕弓飛金丸。銀鞍懸吳鉤。從禽平陵東。還歸倡家游。燕姬顏如花。琅玕為搔頭。留君調新聲。哀歌彈箜篌。清宵華燈張。輝煌羅衾稠。人生當為歡。誰能長憂愁。嗟嗟元經儒。窮年無時休。創格卻極自

劉獻廷

字繼莊。廣陽人。繼莊於天官地理。農田水利。刑名錢穀。以及兵陣刀槩之類。無所不能。韻語其餘事也。然豪氣颯馳。逸情雲上。讀其詩。可以想見其人。

懷古

古之兵皆農。農富兵亦強。古之士皆農。農朴士亦良。兵農一以分。甲冑無餘糧。士農一以分。耒耜無文章。分之則兩傷。合之則一理。請語當途人。治亂實此始。經生家安能為此言。即此可以規其抱負。

泛溪

白石何粼粼。清流自混混。信舟漾前溪。兩岸饒蒲葦。日落秋風生。停橈弔山鬼。

題暉草齋

誰將堂上春。得比春日暉。日入光更出。親老無重歸。誰將人子心。得比庭前草。春風日日吹。草色年年好。從東野意翻進一層。詩到此纔有關名教。

水仙操

天行海運旋宮音。萬象回薄由人心。移情易性琴非琴。刺舟而去留深林。海水汨沒鳥哀吟。余心悲兮無古今。援琴而歌淚淫淫。

留別張鴻伯兼懷張非文和韻

舟楫吾將老。詩書世所輕。誰知天下士。漂泊亦無成。放眼空今古。虛懷向友生。北歸心已足。不復悔南征。
一氣鼓盪
律體最高

贈行西上人

鐵騎穿雲舊拓邊。大江歸去浪連天。五更夢醒荒祠下。百戰人酣繡佛前。風急鴈行排遠岫。秋高鷗影落寒煙。與君共望中原路。衰草離離倍黯然。
應是戰將而
隱於僧者

臥病

風塵泉石兩蹉跎。歲月催人委逝波。萬事無成心力少。一生有幾別離多。夢回弟妹依然失。病久交遊誰更過。剩把新詩消永日。空牀獨坐強吟哦。
古之傷心人
乃有此言

幽居

王孫學賦小山招。意氣崢嶸耿未消。燕市酒酣聞擊筑。吳關人去憶吹簫。功名夢醒玄駒國。卜築門臨白馬潮。回首故園千里外。江鄉隨地老漁樵。
一肚牢騷借幽居發
出此豈幽居人語耶

贈向語可

天半峨眉落照邊。漢川東與蜀江連。萬金散盡猶存骨。一劍長留豈學仙。秋水欣逢東海若。馬蹄難遇九方歎。窮途我自憐空手。洒淚相看大別前。

詠史

朝橫而夕縱。志本在温飽。弊裘先自媿。何論妻與嫂。足以服季子之心。
七首西入秦。生死在眉睫。秦政非齊桓。如何欲生劫。明人有論。已暢言之。此括於二十字中。尤見明快。
治國與治軍。臥龍豈兩事。陳壽亦何知。還問司馬懿。掃得痛快如此。作詩何妨議論。

王昭君二首

六奇已出陳平計。五餌曾聞賈誼言。敢惜妾身歸異國。漢家長策在和番。答在陳平盡敬。此正論也。○元帝時匈奴已弱。帝不欲失信。非長其強。此意詩家未曾道及。

漢主曾聞殺畫師。畫師何足定妍媸。宮中多少如花女。不嫁單于君不知。若故為自幸之辭。不怨深於怨矣。
題閨秀雪儀畫嫦娥便面

素箋摺疊塗雲母。黛筆清新畫月娥。莫道繡奩無粉本。朝朝鏡裏看雙螺。

徐振芳字大拙。山東安邱人。

海陵寄李子微

澹澹長河落日愁，美人芳訊到滄洲。
猶龍久矣逃塵世，牽犢公然飲上流。
赤水有珠歸罔象，碧天無際泛虛舟。
班荆擬在雲深處，一醉青蓮海岳樓。

沈道映

字彥徵，江南華亭人，著有鴻跡軒稿。

訊髡淵水西

幽人谷水耽高臥，江邨長夏看雲坐。
清夢心隨鷗鷺慵，獨醒跡向風塵左。
草閣蕭蕭六月寒，窮探學海傾波瀾。
千秋自取性情足，一編歌哭來無端。
與君成別忽已久，不向西郊頻握手。
聞道驚濤沒釣磯，爲問漁竿無恙否。

送霄客南還

聚首無多日，天涯袂忽揮。
苦將遊子淚，灑向故人衣。
落日河流急，寒楓驛路稀。
與君俱作客，爭奈不同歸。

遊子淚，故人心極平，語耳合用之。頓傳出至情，知詩人所費點化，不專求新。

野泊

野渡夕維舟，寒潮正急流。
雁聲沙際月，帆影笛邊樓。
獨客難爲夜，孤心易感秋。
百年同逝水，不盡古今愁。

登泖中潮音閣眺望有懷

峯頭雲氣晝冥冥。蠟屐憑高試一停。湖面日翻荒岸白。海門天入亂山青。孤帆是處隨漁網。長笛何人起鷺汀。谷水崑陰俱在眼。可憐二陸久凋零。

舟泊富林謁陳大樽先生墓

富林溪上一盤桓。墓道春陰泣漢官。未見豐祠傳俎豆。空留皎日照衣冠。當年碧血青燐散。此地銀濤白馬寒。回首平陵松柏路。子規啼徧朔風酸。甲大樽先生祇傳其精衛填海之節而學術詞章概從闕如此立言得體處。

陸元輔字翼王江南嘉定人。翼王爲黃陶庵先生入室弟子。學術志行不媿師門所爲詩亦復相似。鍾譚習氣不能染也。

送袁重其歸吳門

青眼滄桑閱逝波。百年世事足悲歌。尊前故舊凋零半。亂後文章感慨多。鱸膾正堪淹客棹。驪駒無奈向關河。憑君一寄昌亭淚。江左風流更幾何。自注時聞葉聖野之訃。

送文介石學博歸滇南

滇客頻年賦式微。今朝纔見理征衣。三江日月孤臣老。六詔風煙萬里歸。山過碧雞多戍鼓。星窮朱鳥近親闈。好音爲寄東來驛。莫道南天少雁飛。三詩值悲歌感慨之境無志微噉殺之音可以規其所養。

陸宗濂字維水江南嘉定人翼王姪。

維揚舟次遇鄉人南歸

忽聽鄉音喚阿蒙。月明橋畔此浮踪。乘君下水歸帆便。寄我平安第一封。與復恐匆匆說不盡。行人臨發又開封。同一天籟。

陸元泓字秋玉。江南常熟人。○秋玉無家。圖已像於水墨中。自稱水墨中人。

過河北劉賸菴先生墓

曾云歸去總天涯。三尺荒墳萬古家。若個年年弔寒食。半瓢清酒滴桃花。

徐波字元歎。江南吳縣人。○元歎少年任俠。後工詩。之楚中。交竟陵鍾譚二公。晚歸老落木庵。以枯禪終。生平詩近鍾譚體。牧齋痛貶鍾譚。而於元歎獨許之。

落花

花意寒欲去。登樓送所思。將分春雨恨。似與故人期。野水斷村路。孤煙生竹籬。吾徒從此逝。忍見豔陽時。

落花習徑以生新之筆。滿除之。李義山高閣客竟去。一首後復見此詩。

侯涵字研德。江南嘉定人。

送別鷺賓感家朝宗往事

闔闔門邊酒共傾。依依酬勸忽分征。卻愁此別成南北。誰道他時隔死生。十載黃墟豪士骨。千秋青史黨

人名。白頭太傅腸猶熱。手把家書倍愴情。自注。出朝宗遺札。多隔世事。

劉逢源字津逮。直隸曲周人。

郭泰

博帶雍容七尺身。遨遊郡國擅人倫。如何下士相撫倣。只愛先生折角巾。

補鍋匠

高隱昔傳磨鏡客。奇踪今見補鍋人。若將姓字留天地。縱使巢由亦外臣。
非薄巢由。要見不留姓字爲最。高耳必求其人以實之。毋乃鑿乎。

吳兆寬字弘仁。江
南吳江人。

寄懷小脩弟

萬里江濤接郢城。上游節鉞坐論兵。風清鼓角秋開幕。月照旌旗夜勒營。海內功名多難日。天涯兄弟別離情。只今漢上烽煙滿。慷慨中流憶祖生。

閔麟嗣字賓連。江南歙縣人。著有臥雪詩草。○賓連喜遊蹤跡。遍天下。所遊皆有詩。而廬山一集尤膾炙人口。緣未見全集。止錄二篇。

空水閣

欲窮瀑布源。峽東忽無路。上有蛟龍居。下雜古今樹。數石何漸漸。飛動令我懼。側身入空冥。盤曲審跬步。陰森鬼搏人。日月如未曙。一閣踞其巔。青蒼於此聚。山僧不常栖。終年白雲住。雙扉風爲開。倚檻時一顧。晚來山雨晴。豁見湖光露。留連空明中。恍惚若有悟。
起步得此。下信手寫去。無不入妙。

玉淵潭

纔過三峽橋，豁壑駭聞見。吁嗟此奇觀，曲盡水之變。石忽不受水，水怒如激電。其勢必斜飛，下與蛟龍戰。淵深不敢窺，蕩滑試一踐。我有悠然心，六虛任周徧。對之神益閒，瀕洞增餘眷。高歌扶杖歸，習習風吹面。
向遊天台石梁，見瀑布激石，勢怒迴轉，斜飛亂下，如萬斛明珠噴灑。跳擲時有語，不敢輕吐，讀此詩，石不受水數言，恍置身石梁間也。

吳嘉紀

字賓賢，更字野人，江南泰州布衣。著有陋軒詩。○野人居泰州之安豐鹽場，瀕於海，刻苦成以學問勝，選用典實，而胸有爐石，故多多益善，而不見痕迹。陋軒詩以性情勝，不須典實，而胸無

查泮故語語真朴，而越見空靈，然終以無名位人，予持此論，而衆人不以為然。然其詩具在，試平心易氣讀之，近人中，有此孤懷高寄者否。

送吳眷西歸長林

孟夏雨初霽，海村桑葉肥。小麥蘗蘗秀，雉來麥上飛。悵然遠遊子，顧盼思巖扉。十年困馬足，四體懸鶉衣。世態已閱歷，長策莫如歸。藥樹無甘蔭，冰壑無炎暉。從來高蹈士，不厭寒與飢。去去故山中，努力餐蕨薇。長林何處所，泉潔山秀峙。曖曖人煙際，灌木四五里。枝上老鴉多，春來各生子。子幼含哺勞，子大雌雄恃。恩勤雖已極，骨肉一巢裏。此時垂白母，望遠間自倚。行路稍欲稀，夕陽半山紫。兒今遠歸來，無米親亦喜。
宋語非至性人誰能道出

贈汪秋澗

秋澗九尺軀，雙腕最有力。自稱草野臣，提刀能殺賊。家破讎未報，亡命走江北。黃金買紅袖，將身委聲色。

荒淫不得死，聊復弄筆墨。歐虞及顏柳，生氣盈丈尺。時賢慕絕技，他鄉且謀食。懷中一片心，到老無人識。
秋澗奇人，惟此奇筆，足以傳之。末語終莫定爲何等人，所以爲妙。

哀羊裘爲孫八賦

孫八壯年已白頭，十年歌哭古揚州。囊底黃金散已盡，箇中存一羔羊裘。晨起雪霏霏，取裘覆兒女。亭午號朔風，兒持衣而翁。風聲雪片夜滿牖，殷勤自解護阿婦。裘之溫暖誠足珍，不得衆身爲一身。吁嗟乎，長安天子無故人，羊裘冷落對邗水。他年姓字齊嚴光，今日飢寒累妻子。

朝雨下

朝雨下，田中水深沒禾稼。飢禽聒聒啼桑柘，暮下雨，富兒漉酒聚儔侶。酒厚只愁身醉死，雨不休。暑天天與富家秋，檐溜淙淙涼四座。座中輕薄已披裘，雨益大。貧家未夕關門臥，前日昨日三日餓。至今門外無人過。

我昔三首效袁景文

我昔客途逢敗兵，弦聲旆影魂俱驚。殘騎如狼散草莽，居人雜兔奔縱橫。漁船貪利夜賣渡，金多方許載人去。暝色潛行曙則隱，口乾腸飢我能忍。

我昔攜家亟逃難，海雲漫漫晝昏晏。野空蹄響賊馬近，我船欲速行轉慢。須臾燔燒閭里紅，風漂船入蘆

港中蘆葉菰葉蔽男婦。引衣掩塞啼兒口。

我昔兵過獨還家。畦上燭燼多似瓜。空村無聲雞犬盡。籬菊自放霜中花。天南伯兄天北季。驚魂棄絕故

園地。夜寒鬼語聚稍稍。細雨還聞九頭鳥。效景文而體源出於杜老全以質勝。

勸酒歌贈喬功借

蠟梅開花醞香發。親戚攜罍造門闕。造門闕來勸翁。念翁遯跡楚雲東。皂帽布裙臨大海。蘆花蒲葉多清風。清風蕭蕭塵起奈何。未若蟻浮鸚鵡螺。繇來酒鄉可避世。請翁聽我勸酒歌。

燭花漾漾酒滿瓢。雪飛入檐見酒消。瓢與杓引翁嘗。念翁辛苦容貌蒼。汾河恆岳家鄉遠。吳樹淮隄歌思長。長歌復短歌。古調清泠泠。不如濁醪注瓦瓶。繇來醒者多智慮。勸翁一醉安性靈。

桑田變易城市改。翁家書卷年年在。東壁卷西壁書。中間惟應置酒壺。萊衣芟裳膝前侍。偉節慈明天下無。門戶須開。明月欲來。甕中又漉新熟醕。有書有子願已足。翁不痛飲胡爲哉。三章音節劇佳。

僻壤

僻壤無春至。安知春已殘。海雲千里黑。寒鴈一聲寒。老去謀生拙。時危作客難。直西是鄉路。日日出門看。

落葉

枝上曾幾日。夜來秋已終。又隨天地意。亂下戶庭中。不靜月斜處。偏驚頭白翁。何須怨搖落。多事是春風。

小小題傳出天運自然不怨霜露而怨春風見盛之始已伏衰之機也小家但工刻畫粗得形似而已

送周雪客遊新安

三秋尋老友千里去新安地主雲中候天都馬上看蓬生黃帝竈鶴唳呂公灘登眺須扶醉深山瀑布寒

輓鮑念齋序

念齋諱輝祖父夢斗乙酉客蕪城四月兵屠城輝祖在宛陵聞父訃時方九歲往蕪城尋父屍不得筓中得父敝衣抱歸歲時泣祀奉母守節母死哀毀成疾因卜地以敝衣置棺中招父魂同母厝于南梁栽樹左右日夕攀樹枝哀號洒泣躑躅年死聞者莫不悲之

獨遭傷心禍應爲早死人魂招衣當骨淚盡子隨親孤稚遺天末三棺客海濱手栽原上樹鬢鬢野陰新

新僕

語少身初賤魂傷家驟離飢寒今已免力役竟忘疲長者親難淡新名客尙疑猶然是人子過小莫輕管

內人生日

潦倒邱園二十秋親炊葵藿慰余愁絕無暇日臨青鏡頻過凶年到白頭海氣荒涼門有燕溪光搖蕩屋

如舟不能沾酒持相祝。依舊歸來向爾謀。三四寫清貧之況五六狀瀨海之景末點化熟語脫口生新莊子所謂有道妻子皆得快樂可以想其高風焉

玉勾斜

莫歎他鄉死。君王也不歸。年年野棠樹。花在路傍飛。

沈

磐字石均江南吳縣人諸生

陳靖獻公祠。自注名迪宣洪武時禮部尚書靖難兵入不風磔死

強幹謀成禍亂紆。漁陽突騎竟長驅。運籌不少黃羅漢。堅壁難逢周亞夫。司馬豈聞嫺將略。秩宗何自縊

兵符。宮車赴火君臣盡。一寸丹心逐鼎湖。歎齊黃之無謀而鐵尙書之外無能堅守者

分茅蒞北控巖疆。鼙鼓誰教動范陽。自有長君圖社稷。不勞叔父佐成王。丹心願化千年碧。弱息難迴百

鍊剛。自注子六人俱被禍。縵經何人輕慷慨。忠魂總赴白雲鄉。

六月霜飛殺氣中。收孥令下市朝空。生無面目湛三族。死念君王哭兩宮。精貫白虹隨落日。魂歸丹陛起

悲風。宛溪舊接秦淮口。嗚咽流澌水不東。

采石磯望開平王戰處

咫尺江陵王氣浮。東南根本治揚州。關中早勸高皇定。河內先從世祖求。狐鼠依山還背水。將軍破釜更

沈舟。只今寂寞長干路。楊柳蒹葭滿目愁。

蔣平階字大鴻江
南華亭人

禹陵

搗輦逢堯祀，垂裳拜舜年。剖圭開日月，瘞玉鎮山川。南幸遊方豫，東巡駕不還。衣冠辭岳牧，劍舄步神仙。寢廟春常閉，宮車夜自懸。千秋明德遠，萬衆寸心虔。海闊滄江外，星臨斗柄前。金莖留曉露，碧殿鎖青煙。罔兩猶留鼎，蛟龍想負船。秦碑荒草合，漢時白雲連。蒼水書難得，玄狐錄可傳。按圖通百粵，淚盡九疑天。
舖絨有倫，不蔓不竭，此長律體也。陳杜沈宋，素稱擅長。元白酒滔百韻，才有餘而律不嚴矣。作者隊仗自然，淺深合度，猶可畧見初唐。

送李分虎之滇黔

萬里南中路，春風入五溪。地分銅柱北，山險桂林西。樹酒尊堪泛，箴船棹自攜。關梁莊躋設，碑字武鄉題。水出滇池倒，天臨瘴嶺低。鳥言通八部，繡面接諸黎。聖武初經略，征南振鼓鼙。三軍持畢節，一戰下和泥。荒服開州郡，窮邊走寄鞮。闌干紅鬪入，歌舞白狼齊。漢使難重問，磨崖不可梯。烏蠻新幕府，屬國舊朱提。君聽南征曲，能令鄉思迷。山深鸚鵡語，花老杜鵑啼。河外青蛉縣，關前白馬氏。還將碧雞賦，遲爾到金閨。

李鄴嗣

字杲堂，浙江鄞縣人。諸生。平生以著書爲事，著漢語南朝續世說，語中寓筆削予奪，鄙人多師事之。詩品刊落凡庸，不肯一語輸人。浙人中獨開生面者。

繡州孝女

女李氏，志在事親，遂終身不嫁，年四十七。

遠我父母事人父母。誰無父母。誰有父母。解一少慕事親十年不字。長慕事親終身不字。解二謂我女子謂我男子。宛然孝子。宛然處子。解三有父子倫。無夫婦倫。嬰兒子後。惟此一人。解四暮雨梨花。年年寒食。麥粥一盂。父母之側。五解○古音古節。作者所擬。可以當古樂府讀。

出烏石山後失道

習僻厭平阡。岐道入榛莽。竿足不肯回。牽拂堅初往。稍進不見天。竹葉大踰掌。隙處迷煙雲。日腳不落壤。直躬礙枝幹。漸偃安得仰。兩袖競翅張。冒棘先用穎。導者未識誰。後趾蹴前網。人獸盡無音。但聞碎籟響。三里幸出叢。目光久矚勝。始見樵子行。寸心翻惚恍。字字刻削。極苦乃得極甘。孟東野後見此一人。

得杖

既出賀險盡。瞻前乃復陡。小憇對古松。支離類此叟。策足恥言疲。恐落僕夫後。山人指爪彊。折竹等蒲柳。憐予進一莖。茲意感君厚。忽若當顛危。倚仗得奇友。山魃不敢爭。空潭戲勦髻。翼足漸以輕。影逐孤雲走。笑謂同行人。騰嶽等培塿。承上一首來。詩格亦從苦得甘。

自大嵩上二十里至福泉精舍

舍舟上樵徑。晴眺分織毫。循塗凡屢盤。獲奇隨所遭。崩崖露雲根。長風勢漸饜。諸巒徐束體。始識身已高。在輿尚苦疲。何況昇者勞。斗上復稍垂。豁然闢林坳。老松得成鱗。巖土抽春毛。梵僧構幽棲。人龍同一巢。

入門氣得蘇。豆筍羅山庖。到此慚浮名。徒爲猿鳥嘲。諸體徐束體四語少陵手筆亦是少陵心事。

王猷定字子一江西南昌人選真生著有四照堂集○于一遭亂居廣陵以詩古文自負書法亦在晉唐之間

螺川早發

月落秋山曉。城頭鼓角停。長江流剩夢。孤棹撥殘星。露濕鷗衣白。天光鴈字青。蒼茫回首望。海嶽一孤亭。

大江流漢水。孤艇接殘春。漁洋賞費此度詩爲十字千古三四寫舟行早發亦復入神

戴本孝字務旂江南和州人布衣著有前生餘生詩稿○池北偶談載務旂性情高曠在京師時夜與友人談華山之勝晨起即襆被往遊新城贈詩所云洛陽貨畚無人識五月騎驢入華山

是也詩近平直茲錄其集漢魏集陶數章

漢魏集律

秋殘

良時忽一過。阮瑀白日半西山。王粲哀彼寒霜厲。馬明空令蕙草殘。無名微歌發皓齒。嵇康時俗薄朱顏。曹植奄若風

吹燭。無名人生一世間。徐幹

送別

遠送新行客。孔融中心摧且傷。徐幹寒蟬鳴我側。曹植孤雁獨南翔。曹丕努力加餐飯。無名隨時愛景光。蘇武勉哉脩令

德。鐘植別後莫相忘。曹植

律陶

贈野人

樂與數晨夕。區區諸老翁。貧居依稼穡。繞宅自蒿蓬。懶惰故無匹。箴規嚮已從。閒居三十載。鄉里習其風。

課農

所營非近務。相命肆農耕。井竈有餘處。林園無俗情。酒能祛百態。菊爲制頽齡。遂令介然分。不爲好爵榮。

田家

少無適俗韻。甘以辭華軒。但道桑麻長。而無車馬喧。服勤盡歲月。守拙歸園田。終曉不能靜。雞鳴桑樹顛。

集陶勝於集漢魏諸作。以陶有名句。漢魏惟在氣骨也。此章尤極自然。

菖山中田廬

素襟不可易。性本愛邱山。懷役不遑寐。躬耕非所歎。敝廬何必廣。虛室有餘閒。歲月相從過。吾生夢寐間。

卷七

曾傳燦字青藜。江西寧都人。著有止山集。○青藜。選本朝詩名。過目集。所選純不勝雜。而人才略備。余于此竊有取焉。兄名碗。並以詩名。有雙丁之目。

將立春同友郊外眺望

羣動各有息。茲遊成我閒。氣交寒煖候。春到有無間。寒石自流水。夕陽多遠山。離離林下屋。時見鳥飛還。
蕭 詩字中素江南松江人。○中素隱於梓人中。人以工役之。往役受直。待以詩人。則行朋友之禮。古人賣漿儉牛之伍也。惜其詩未能多見。

答董子紹詩

南村有遺叟。寂寞居河濱。一褐常見肘。數椽聊寄身。所志在不苟。食力甘苦辛。閒來把魚釣。終日無纖鱗。晴霞映眉宇。野火光燐燐。坐久發清嘯。怡然全我真。於此頗有得。勿謂原思貧。詩即自道生平。所志在不苟。意。

毛會建 字子震。江南武進人。

回鴈峯

山到衡陽盡。峯回鴈影稀。更憐歸路遠。不忍更南飛。

董以寧 字文友。江南武進人。○文友與陳太史其年。鄉進士。許士。並有才子之目。生平急友朋難。奮不顧身。亦豪士也。

席上看弄丸歌

臨淄卽墨天下聞。鬪雞走狗紛如雲。我來作客喜結納。脣舌不減樓君卿。銀花之脯八帶魚。主人邀我飲。半醺當筵少年擊鼙鼓。更一少年袒臂舞。足下紅錦鞵。腰間五色組。手持一九摩雲端。一九未落復一九。雙丸將落承以頂。須臾重入雲中看。更出七丸在肘後。兩手承蝸左復右。旁有少年拍手嗤。大言此技安。

足奇。摩頂至地身倒懸。以足弄丸目不施。七丸上下聲相擊。擊聲一依鼓爲節。是時我醉不欲眠。紛紛羅袖屏前列。

渡淮

黃河經北徙。千里背淮流。遠樹煙中暝。荒城天際浮。人歸二三月。南去一孤舟。何處王孫釣。傷心古渡頭。
讀荒城天際浮五字爲淮人傷心今更陡高於城矣。

閨怨

流蘇空繫合歡牀。夫婿長征妾斷腸。留得當時臨別淚。經年不忍浣衣裳。
詩人寫淚者多。無寫到此者。

陳子升 字喬生。廣東人。縣諸生。以薦舉官給事中。○喬生詩麗而有骨。原本義山。近代中可儷楊升菴。

昔昔鹽

鴛鴦樓外烏欲棲。瑤瑁梁間燕吐泥。月暈圓隨漢東嶰。天河傾向汝南雞。萬方儀態華鐙出。一笑橫陳翠帳低。愁見曉鴻征塞北。不知天將定遼西。

何嘉延 字奕美。浙江山陰人。

燕子樓

極目古徐州。斜陽睥睨愁。黃河聞改岸。紅粉尙名樓。芳草長埋恨。悲風不待秋。尙書遺墓在。可有珮環遊。

地已變遷樓名長在一女子
之真亦足不朽可以風世矣

張可度字嗣篔江
南江寧人

廬山懷古

父居黃閣女崆峒流水桃花石室中無限炎威竟何在成仙卻讓李騰空自注林甫女也李白有送內
廬山訪女道士李騰空詩

沈欽圻字得與江南長洲人邑諸生贈內閣學士兼禮部侍郎○後學周準填諱○國初詩沿明季
餘習多宗景陵先大父往復陶杜自懣胸臆未嘗求工而自中繩削陸起頑太僕謂鍾譚之

風流毒天下不能濡染沈生大是豪傑之士
太僕先大父師也不輕許人當時以爲篤論

春日招諸生

春風來融融好花自爲開好鳥林間鳴求友聲喈喈我心適無事觸物俱和諧鳥尙求其羣人豈無同儕

花下設杯酒願與諸子偕中心諒有得各自抒我懷元化本大公何用分形骸春風沂水
無非天趣

生祠

虎邱七里塘生祠何纍纍檉棟高入雲丹牖紛陸離連牆與接牖屹然豎豐碑下承以最風上蟠以龍螭
華文表德行大論抒猷爲某公居官日曲折行其私析利如秋秧忘卻民膏脂文中頌清節飲水邁伯夷
某公居官日斷獄無矜疑五刑任喜怒罔卹童與耆文中頌仁愛臯陶爲士師周覽諛悅文一例慚惡辭
舊有遺愛人行政介且慈行如打包僧蕭然去官時士民走相送各各涕漣洏誰爲建祠宇惟留後人思

好官無生祠。墨吏有生祠。好官與墨吏。行人知不知。傾吐出之。如白傳秦中吟。辭氣風骨無一不肖。

除夕書事

匆匆歲欲盡。有客過我廬。云有急難事。強梁禦諸途。一身惟赤手。何以還里閭。君能急人患。哀聲爲君呼。援手實我分。焉敢辭有無。所愧生計薄。末由足君須。傾囊贈之去。餽歲無留餘。恐乖家人意。歡顏對妻孥。妻孥知我心。笑言倍怡怡。依然煨榾柮。聊復換桃符。入夜四壁清。此心真晏如。

童奴石義託身於阮懷寧府中。頗用事。招家五弟。衷赤往。謂微官可得。既至。弟識亂徵時遊倡樓。示荒嬉不可用。乃放歸。乍歸而留都不復守矣。喜其能識時。自汗以免。因贈以詩。

都督滿街走。職方賤如狗。自注。時童謠。此時乾坤入醉鄉。君臣嬉戲同披猖。剪伐連枝折故劍。一網盡欲羅鸞凰。僕隸招邀吾弟去。人頭畜鳴日相遇。寸心陡觸大廈傾。厝火積薪難久駐。自荒於色耽倡樓。是鄉足樂真溫柔。香濃魄醉不知返。一笑似欲三年留。懷寧謂是妄男子。收拾行裝子休矣。歸來三月陪京亡。子嬰奔竄繼於枳。沙蟲猿鶴總消沈。大地旋看換塗軌。吾弟依然把耒耕。閒中常話小朝廷。從今永斷冠纓夢。抱憤眠雲無限情。

贈徐元歎波

少年爲俠客。萬金散盡不少惜。中歲爲詩人。遠之楚澤哀靈均。歸來慕隱者。脫棄浮榮如土苴。晚歲依空

門菴名落木歸本根。我來訪君荒山裏。留客晚餐烹菊杞。夜寒襖被擁繩牀。月滿空堂疑積水。不是尋常話箭鋒。生平披豁見心胸。卅年無限悲涼事。付與晨鐘暮鼓中。贈詩竟作元歎小傳起手八語立格甚奇一結蘊含可思

秦良玉遺像

纓纓銀冑垂紅綬。柄襜耀日風前披。滿月粉頰揚青眉。繡旗飄翻擁長鉞。誰人結束整隊伍。知是石砮女土司。英雄自古出巾幗。投石戰場壯顏色。當年平靖奢崇明。一騎紅裝萬人敵。手持長繩入賊陳。縛賊歸來向空擲。思宗季年紛戰爭。勤王誓師萬里行。至尊一語表英武。桃花馬上請長纓。自注思陵賜詩中句後來獻賊入巴蜀。齟齬不遺橫殺戮。勤王兵殘勢窮蹙。子喪弟死一身獨。連斬六賊力已殫。拔刀自刎身不辱。忠勇義烈兼有之。女中張許誰能續。卽今遺像餘桓桓。摧激人間壯士肝。願將效死沙場女。追配從軍古木蘭。千古奇人詩亦極力寫之。○明史謂良玉壽終於家。然先大父同時人亦似有據。豈所云所聞異辭者耶。

梅

冰霜磨鍊後。忽放幾枝新。獨立江山暮。能開天地春。自然空色相。誰與鬪精神。野客閒相對。如逢世外人。脫盡窠臼。籠罩前人。

送楊曰補南還

去年春盡同爲客。此日君歸又暮春。最是客中偏送遠。況堪更送故鄉人。四層曲折。一氣傳寫。又脫口而出。略不雕琢。是唐人絕句品格。

梁

逸字逸民江南崑山人著有紅葉村詩○逸民人與詩俱不入時葉文敏序而傳之卷中意味稍薄而氣塊俱備翛然自遺

把酒桃花下

茅屋水聲裏。面面桃花紅。深杯獨淺酌。花落盈杯中。今日向花醉。明日枝頭空。開落固有時。何用嗟春風。

泊舟古渡

渡頭楓葉正飄零。驛外空傳舊有亭。兩岸雲封千嶂白。五更霜落一燈青。濤聲入枕愁先覺。寒氣侵人酒易醒。莫向洞庭悲木葉。恐驚瑤瑟怨湘靈。

阮旻錫

字疇生。福建同安人。

還家

盡室遯江村。乍歸未識路。卻問路旁人。爲指門前樹。癡兒各長成。有弟亦同住。病妻久臥牀。淹淹迫歲暮。獨客苦思鄉。還鄉如客寓。二親掩重泉。淒清感霜露。回首望禾江。舊廬杳無處。信宿不遑安。又復出門去。
向於京口見無名氏詩有萬里是鄉家是客三冬披葛夏披緇句寫盡作客情事讀此詩尤覺黯然

七忠祠

遺廟淒涼落照餘。諸公抗節竟何如。可憐苦戰平都督。不及臨戎鐵尙書。風雨孤城猶黯淡。河山故國已丘墟。峨眉亭上題詩客。千載傷心論革除。

陶澍字昭萬，江南寶應人，著
有湖邊草堂舟車等集。

將進酒

白日黯黯容易過，春風玉顏當奈何。君能忘憂我和歌，重傾迭酬金叵羅。鵬鳳脂，劈麟脯，炊珠羹，流玉醕。憂來填膈不能食，何如交歡及爾汝。君不聞閉關沉酒稱達生，又不聞大呼狗竇千載名。人生不飲空獨醒。

苦雨詞

鄱江瀾瀾吹雨天，五月無禾成白田。桔槔雖具下力難，可憐來日無朝餐。辛勤終歲不得息，昨夜傳聞羽書急。君不見東鄰向壁哭未休，長男輸役中男囚。

曹舍人寓齋聞搗衣作

廣庭月白秋漫漫，主人有酒留客懽。誰家思婦罷織素，坐調清砧當夜闌。砧聲斷續露華濕，還聞門外莎雞泣。同是天涯離索情，感時最有閨中急。力盡回房淚點多，遙憐此際蹙雙蛾。西風入懷奈獨何。

贈陳藹公

往者曾讀邊令傳，云是保定陳子作。才雄法贍有根柢，菁英滿前氣旁魄。我嘗彷彿思其人，千里停雲阻河朔。今年得遇恆山陽，斗酒論文慰蕭索。憶余爲客西復東，門前車轍無一同。高曾規矩久蕪沒，後人不

識般僮工。君今著書已踰尺。況復身親見兵革。一嘖一笑皆有由。豈是尋常老逢掖。莫言上策不見收。長安少年多微侯。君才如此合貧賤。且醉醇酒吟清秋。君不見江河之勢原東流。邊令米脂令邊大受也。曾發李自成祖塋。謫公作傳

蠻觸行

秋林濕盡土花碧。蝸牛延緣不踰尺。角中兩大安如山。胡爲相尋日相戾。東帝西帝齊與秦。當年自謂英雄人。一朝黏壁竟槁死。沛公出爲漢天子。橫覽古今何非蠻觸。借齊秦以發其大凡。

陳思王墓

斜日下高樹。秋風生細塵。可憐衰草地。猶是建安人。白屋更新主。青山結故鄰。童童雙檜在。風雨各千春。三四語爲時所稱。

題康郎湖忠臣廟壁

草昧龍爭日。風雲得武臣。乘時元赤幟。奮跡豈黃巾。羽檄綏南服。天垣動北辰。斷蛇先識楚。逐鹿後降秦。建業王居正。洪都戰血新。旌旗迷過鳥。矢石賊潛鱗。借箸應無匹。焚舟若有神。陸危社稷重。仗節死生均。日月躔雙壁。羌戎奠九垓。君恩五等錫。士氣一朝伸。孫子圭璋在。春秋俎豆陳。白波吹浩蕩。蒼瓦覆嶙峋。往事今爲烈。編人感自真。臨流獨橫涕。蕭瑟對秋旻。視李北地作較典切兼有骨力此種全從杜陵得來。

趙與楸字楚材，福建龍溪人，有珠谷刺草。

九日雜詠

寒食弔之推，端陽悲郢客。如何重九日，不祀陶彭澤。

董

字隱僧，江南吳縣人。

歲杪送青來遊滇

遠遊當歲暮，爲養反離親。貧士千秋恨，依人萬里身。丹崖盤鳥道，黑水暗龍津。嗟我猶羈旅，離筵倍愴神。

郁

植字大本，號東堂，江南太倉人。諸生。○東堂八歲應試，作五倫論，吳梅村祭酒見而奇之，既長，研窮古學，爲王新城尙書賞識，康熙己未，以博學鴻詞薦，未應試卒。詩體裁盛唐，不落元和

以下讀悲歌六章，可以見其生平。

烏夜啼

碧梧墜露驚秋早，羅幃輾轉愁難曉。乳烏啼斷井欄西，閨中一夜青絲老。只可閨中伴我愁，烏啼切莫向邊州。盧龍磧裏征人在，多恐聞時也白頭。

猛虎行

猛虎突出勢恆怒，不住深山踞當路。風高月黑聞嘯聲，四野行人盡回步。一虎之猛尙可當，羣狐假竊牙爪張。豈無壯士欲手搏，出門四顧心徬徨。眈眈爾威誰養就，昔猶昏暮今白晝。瞑目從教凡獸驚，肥身那

管飢民瘦。虎兮虎兮。知懼無。灞陵亭下秋草枯。飛將猝發金僕姑。石猶飲羽況爾乎。

韓侯釣臺

王孫昔釣長淮流。釣竿一擲重瞳愁。赤龍得水上天去。鍾室酬功付刀鋸。漢家青史兩釣臺。千秋獨爲韓侯哀。何如客星早歸釣。一別東都更不來。兩釣臺意思陳矣。作者既來偏見其新。

悲歌

男兒三十尙貧賤。土室低頭事筆硯。落魄恐遭厮養辱。苦吟畏被妻孥見。冬日不鑪夏不扇。坐穿一榻破萬卷。西行發策獻至尊。致身不受將軍薦。由來絳灌讒賈生。胡用若曹弄柔翰。齊門挾瑟嗟徒工。獨立荒郊淚如霰。

我欲歸種襄陽田。背依高山面大川。婦媿男耕自怡悅。伏龍雛鳳相周旋。不爾亦是桃源仙。桑麻雞犬別有天。誰知此樂難再得。商羊旱魃迭弄權。東鄰輸租鬻小女。石壕夜呼橫索錢。西家老翁徒壁立。惟忍凍餓長安眠。

旁人勸作洛陽賈。鮮衣如雲馬如虎。大兒羽林充宿衛。小婦邯鄲善歌舞。明珠白璧家盈箱。晝攬鏹銖夜勾股。嘖嘖猗頓獨何人。卻笑黔婁徒自苦。吾曹意氣恥阿堵。揮斥黃金賤如土。安能跼蹐屠沽伍。六章相連而下。

古人篇法起手甚健。

脫身從軍向絕域。大食烏號懸兩腋。部中不滿五千騎。百戰沙場盡辟易。尉佗繫組明光宮。樓蘭懸首長安陌。凱歌入關報天子。始信書生萬人敵。一朝坐失幕府歡。縛下都船對刀筆。衛青天幸輒有功。李廣數奇竟何益。

流沙北去弱水東。琅玕作樹珠爲宮。藐姑仙子冰雪容。導以翠節雙青童。我欲從之問丹訣。直與天地同無終。秦王漢武皆英雄。樓船浩蕩乘長風。獰龍吹水作山立。三千嬌女沉淵中。驪山茂陵空白骨。不死之藥何時逢。設想愈幻。愈幻愈妙。

學仙學劍兩無成。爲賈爲農安足道。中心不羨黑頭公。貧賤何妨鄧禹笑。有琴恥向貴主彈。有門恥爲丞相掃。流行坎止隨所如。入世那能量柄鑿。鄴侯架上皆吾師。吾將終焉從吾好。此章總收。結穴在此。○不步趨少陵七歌。而風骨神合。味白。

觀燈行

新年半月雨不歇。連巷春泥馬蹄沒。差池已過賞燈時。金尊玉管花空發。婁東刺史趁新晴。特促然燈照夜明。珠箔舞殘初見月。紅窗歌轉乍聞鶯。六街九陌燈光曉。海城今夜春生早。不是官衙恣宴遊。爲民預祝秋成好。對景翻教憶去年。此時聽雨正高眠。華鐙卻掩春層寂。誰道秋來更可憐。九月十月風雨惡。到處田疇盡蕭索。賣男鬻舍僅供糧。那有餘錢更行樂。聞說言官特疏求。減租詔下可無愁。不辭徹夜笙歌

沸。及此風光樂未休。樂事無多憂轉續。書生迂願何時足。乞取蟠螭玉九枝。攜來遍照流亡屋。點綴太平。忽憶去年。

愁慘波瀾層疊。哀樂無端。宋二語可云歌以當哭。

東顧亭林先生

驚喜相看問阿翁。少年連袂各頭童。家從十五年前別。身在三千里外同。且注蟲魚潛硯北。任教車馬過牆東。鄉關耆舊多蕭索。閱歷如公道未窮。

客曉

欹枕荒郊鳥亂啼。漸聞人語板橋西。愁邊覓句天難曉。夢裏還家路易迷。兩岸菱蘆千里鴈。五更霜月一村雞。吳儂到此腸先斷。況復高城急鼓聲。

讀史偶感

兵壓邯鄲氣欲吞。時危公子下監門。滿堂珠履三千客。朱亥從來未受恩。與毛遂定縱同意。

勛名盡室少齊肩。翻爲椒房受禍偏。萬乘不能求一女。當年最有日磳賢。霍氏功高不及金之謹密。拈出兩家爲千古鑒戒。

徐

字貫時。江南吳縣人。此文靖公次子。侯齊逸民弟也。始則風流跌宕。繼歸和光同塵。詩中半入溫柔鄉語。與侯齊各行其是。豈所云首陽爲拙。柳下爲工耶。在詩二章。以志崖略。

早春園林感興

已典春衣盡。還驚春色來。百花南向拆。一雁北飛回。濁酒從兒醉。輕羅任婦裁。平生蕭瑟意。身世幾悲哀。

欲雪限韻

慘淡庭松色。喧啾檐雀聲。有苔封玉砌。無露到金莖。已厭浮雲重。還看颺絮輕。應知隴上者。此際輟深耕。

有寄小婦詩中云。香能損肺。蕭宜少。露潮活花摘。莫類一時傳誦。摘錄于此。

文

點字與也。江南吳縣人。○與也先生。為文肅公孫。隱居竹塢。城市罕見其跡。工寫山水。不輕許人。有貴介多方求之。已寫就矣。聞其人戀官職。不願堂上。即隨手裂破其耿介如此。

呈苦齋先生

天寶開元事已陳。風塵宇內老遺民。偶談先世頻揮涕。為破家園只負薪。訓子八行文不滅。自注。忠介

冤一疏血猶新。自注。苦齋為父訟冤血疏。衣冠古朴人誰識。認是林宗墊角巾。苦齋即忠介公冢子。子佩先生也。一門忠孝。於贈答中傳寫盡之。得立言之體。

渡江

青山如故人。江水似美酒。今日重相逢。把酒對良友。

陳

珏字比之。廣東海陽人。

冬日同友人遊南巖精舍留宿次達上上人韻

一路霜風落葉深。偶逢知己入空林。雲停似欲依禪定。鶴立居然有道心。古洞燈微涵冥色。夕陽鐘動出

寒音。十年宰相渾閒事。聊與山僧和苦吟。

陸

進字蓋思。浙江餘杭人。

題宋高宗六字碑

自注。硃書傳忠廣孝之寺。

雲門野寺古禪關。片石義義煙靄間。一自翠華來勝地。常留宸翰紀名山。丹文不變千年色。碧蘚難侵六
字斑。堪笑花宮稱廣孝。君親當日幾時還。宋高不報父兄之讎。稱臣稱姪。其罪擯髮難數矣。一結譏笑之中。嚴于鉄劍。

朱爾邁

字人遠。浙江海寧人。○此亦王新城所賞識者。雖欠精警。而氣體自不落小家。

葛洪丹井西尋唐顧逋翁讀書臺舊址

陰陰澗底花。落落嶺頭柏。蒼蒼雲霧重。渺渺人家隔。相傳葛稚川。燒丹此中宅。至今丹井間。紅泉漱白石。石上臺何高。栖遲合騷客。新藻灑芙蓉。英辭動金碧。千載人讀書。余也忝後席。學仙仙未成。知音懷夙昔。獨自抱琴來。慨焉終日夕。

鐵陵廟

弱冠雅負奇。矢志凌雲表。匹馬佩弓刀。出自三關道。報恩功未酬。獨立傷懷抱。歸臥南山南。荒林跡如掃。更上鐵陵關。往事尤悄悄。浮雲捲大旗。落日耀空堡。嗟哉明武軍。一往亂飛鳥。戰血鬱未消。化作山頭草。枝枝帶征魂。遺恨何時了。

韓純玉

字子邁。浙江歸安人。著有邁虛詩。○子邁係求仲子。求仲爲湯霍林所累。不無失身之譏。子邁終身抱憾。時時飲泣。

題李營丘風雪運糧圖

自古嘗稱蜀道難。百步九折縈巖巒。何況嚴冬深雪裏。寒氛曉靄踰千盤。前峰峯嶺聳天起。後峰連綿勢未已。猿狖不度鳥不啼。懸崖無根谷無底。峨眉劍閣雲萬重。捫參歷井摩蒼穹。蛟龍蟠拏古木偃。蟬螻脆脆飛梁通。此時何處來徒衆。運糧千里輓輪重。僕夫股慄泥沒脛。車輪欲摧馬蹄凍。誰能畫者李營丘。秋毫細晰天爲愁。心神自與元氣合。筆力直與造化侔。營丘本屬唐宗系。邦家正值凌夷際。隆準王孫泣路隅。紆干凍雀遙飛去。天寶以降傳乾符。車駕幾度留成都。漢陰饋餉騾背負。百官始得充朝餽。蜀道之難難若此。危途數困唐天子。當時寫此非偶然。後來題者趙承旨。承旨亦是宋天潢。筆墨神妙真相當。徘徊歎賞最珍惜。似因弱宋悲殘唐。唐郊宋社久荆杞。又曾再閱滄桑矣。書畫還從世上傳。乾坤舊事隨流水。此卷經今八百年。卷中陵谷猶未遷。收藏印記亦屢易。令人對此情惘然。君不見自有書契來。陳迹悠悠皆可觀。空將哀樂感興亡。憑弔環州一抔土。嗚呼豈必王孫心。獨苦弱宋殘唐遙遙相應。見畫與題畫者無限經營苦心。不止筆墨之工也。人君尙德不尙險。焉於言外見之。

漢陽渡口作

漢陽窺鄂渚。夾岸走長虹。小艇雙飛燕。中流五兩風。一江分二郡。三國鬪羣雄。多少興亡事。銷沉向此中。

自注。楚江小艇一人。掉兩槳。名雙飛燕。

魏際瑞原名祥。字善伯。江西寧都人。○此叔子長兄也。魏氏兄弟工古文。韻語非其所長。伯子雖多敗闕。然時有生氣。韓侯釣臺云。曾說婦人偏隻眼。空傳霸主是重瞳。贈人云。天地有時餘爾。

我英雄無主笑曹
劉可以見其氣概

諸葛公墓

定軍山下柏蒙茸，曠古精誠在此中。
三尺孤墳猶漢土，一生心事畢秋風。
孫曹未滅成何世，天地無知喪此公。
千載傷情惟杜宇，年年啼血樹頭紅。

三顧頻煩兩朝開濟，舉其在生時言。此舉其既沒後言，立論各有所主。

金山

大江東下海門寬，萬里奔流激箭湍。
不信山從水底出，卻疑身在畫中看。
龍窩燈火千株動，蜃氣樓臺一點寒。
誰道風波不可涉，風波危處卻平安。

江頭別

白石山過紫石山，鷓鴣灘下鯉魚灘。
山山連接灘灘急，遊子南還何日還。

竹枝遺響

王遵坦

字太平，山東益都人。隨肅王平蜀，以軍功得官，至四川巡撫，著願學齋集。

雪浪灘

午枕不可竟，醒此驚湍聲。
堆雪耀昏夜，殷雷喧夏晴。
譬諸磊落士，所鳴恆不平。
笑彼清冷潭，泯泯含微明。

朱

徵字遂初，江西進賢人。

舟行零都道中

春日既已暮。山溪水亦長。緣越殊未極。茲焉復理榜。川原靄迴鬱。觸目紛萬象。鳥啼山木暗。人語灘石響。雨外峰明滅。風前花偃仰。岫轉失來蹤。沙明得前朗。魚跳碧潭中。猿引蒼藤上。壁隙鬼神劒。石皴仙人掌。時或遇平曠。茆屋兀三兩。予本倦遊人。取次愜心賞。逢山擬便登。遇水欣長往。只此區中跡。已深靈外想。何時縱所如。悠然息塵鞅。

舒忠讜

字魯直。江西新建人。

滁州遇避寇人過江

半夜頻呼起。寒風送我行。英雄消馬跡。天地感雞聲。壘破纔添戍。村空又避兵。始知班定遠。不肯作書生。

陳恭尹

字元孝。廣東順德人。著有獨漉堂詩。

日本刀歌

白日所出金鐵流。鐵之性剛金性柔。鑄爲寶刀能屈伸。屈以防身伸殺人。星飛電激光離合。日華四射瞳瞳濕。陰風夜半刮面來。百萬愁魂鞘中泣。中原歲歲飛白羽。世人見刀皆不顧。爲恩爲怨知是誰。寶刀何罪逢君怒。爲君晝盛威與儀。爲君夜伏魍與魎。水中有蛟貫其頤。山中有虎抉其皮。以殺止殺天下仁。寶刀所願從聖人。

與藥亭作用意各別。而尊崇中國。指歸略同。勿但賞其能作驚人語。

贈余鴻客

蜀犬不識日。羣吠聲狺狺。越人賤章甫。不以易文身。中原龍戰二十載。萬事反覆如朝昏。我行驚懼伏草莽。舉國大笑爲愚人。何來年少金陵子。肯道相思滿人耳。三年覓我二樵間。一夕逢君五羊市。傾山倒海見胸臆。白日照耀肝腸裏。羈貧無酒留君歡。對坐江樓飢不起。是時積雨江上晴。丹楓亂落寒蟬鳴。長風駕浪作邱壑。蜃樓海市相崢嶸。趙佗朽骨爲黃土。陸賈詩書亦何補。朝臺空有漢家名。浩歎今人不如古。今人古人間容髮。舉足之分邈燕越。眼前得喪等雲煙。身後是非懸日月。怪君茂齡懷抱奇。嚴君風義兼能詩。曾窺一二每心折。安得天馬無龍駒。荒城氣黑落日短。強爲吾子停斯須。如君意氣復何道。所願故心終不渝。

柏舟行爲區母陳太君賦

柏舟兩髦猶可儀。陶嬰黃鵠曾雙飛。夫人爲婦已頭白。眼中未識君光輝。自言生長大夫女。經史胸襟炳如炬。父母有命兒有心。縱不言承已心許。心期韻類同一林。天教殊絕同辰參。人生意氣貴一諾。妾寧負天不負心。妾父有男妾有姊。君家大夫只一子。有妻於俗得孤立。無妻爲殤終已矣。素車白馬入君門。繇來爲義非爲恩。身安分命甘若齋。半生衣枕無啼痕。當年十五今五十。嗣子成立皆有孫。嗚呼。男兒陷胸絕脰死容易。就義從容人所畏。青閨冉冉盛年徂。寸心一矢終不渝。千金之劍贈墓樹。至今談者猶區區。何況贈以千金軀。乃知未仕報韓者。古今所以爲丈夫。夫天不負心。天指母氏。本共姜母也。天只句。區大。夫止一子。無妻不立後。則後絕矣。此陳太君能見。

大義處詩中
曲曲傳出

邊草

勿論榮與悴。今古恨無窮。雪散燒痕上。青歸戰血中。
青歸戰血中。五字驚人。

秋戍

漢皇猶自將。率土敢言勞。共命惟良馬。餘生託寶刀。侵霜秋柝冷。占氣夜天高。未見功成日。還家已二毛。

蜀中

子規啼罷客天涯。蜀道如天古所嗟。諸葛威靈存八陣。漢朝終始在三巴。通牛峽路連雲棧。如馬瞿塘走浪花。擬酌昔賢魚水地。海棠開遍野人家。
王漢王於巴蜀漢中。漢於此興。後主不能守蜀。而漢亡矣。四語可與論古。

鄴中

山河百戰鼎終分。歎息漳南日暮雲。亂世奸雄空復爾。一家詞賦最憐君。銅臺未散吹笙伎。石馬先傳出水文。七十二墳秋草遍。更無人表漢將軍。
表揚才華。魏奪。袁曉論最平允。

隋宮

穀洛通淮日夜流。渚荷宮樹不曾秋。十年士女河邊骨。一笑君王鏡裏頭。月下虹蜺生水殿。天中絲管在

迷樓繁華往事邗溝外，風起楊花無那愁。

虎邱題壁

虎跡蒼茫霸業沉，古時山色尙陰陰。半樓月影千家笛，萬里天涯一夜砧。南國干戈征士淚，西風刀剪美人心。市中亦有吹簫客，乞食吳門秋又深。極熱題須一洗，策白此爲得之。

送姜山上人遊南岳

送師西去重低徊，會上衡山絕頂來。夏帝碑蕪蟲篆徧，楚天峯斷雁行迴。燈前鬼芋穿沙出，霽後僧門鑿雪開。正是到時二三月，上方明月下方雷。奇景得奇句寫出。

發舟寄湛用啮鍾裴仙湛天石

扶胥古渡水淒淒，雨後移舟望轉迷。數口寄居秋草外，一身爲客楚雲西。家無兄弟依朋友，地夾河山畏鼓鼙。知己片言應不負，亂離妻女藉提攜。如面訴友朋宛轉關生情文並至。

讀秦紀

謗聲易弭怨難除，秦法雖嚴亦甚疎。夜半橋邊呼孺子，人間猶有未燒書。

董道權字秦雄，浙江鄞縣人。○秦雄詩丁於言情層出不窮，有長袖善舞之態。

雪中答李杲堂

鄴陵孝廉重然諾。約我今秋醉桑落。先人有友官并州。我欲從之客雁丘。高堂有母缺甘旨。負米何辭數千里。臬堂李子憂我閉門飢欲死。告以遠行爲色喜。酌我黃金壘。贈我青銅錢。低徊不忍別。此別須經年。袖君之錢醉我酒。城東城北頻回首。歸來兒女候柴門。笑指瓶中不盈斗。牽衣問我欲何之。今年豐熟仍苦飢。耶未出門共耶語。耶旣出門啼向誰。示兒袖中錢。故人佐行李。移與易米薪。且以救妻子。量米數薪堪作數。日食買舟無資行不得。他日仍登李子堂。李子爲我作歌聲。蒼涼曳履依然守蓬華。得酒且與傾壺觴。昨夜雪花如掌大。草閣嚴寒只僵臥。午餘日色照西窗。起把君詩讀幾過。窗前冰雪消有時。故人顏色長相思。友人贈錢爲遠行資。乃歸易薪米。仍守蓬華。實有此苦也。仍復登友人堂。賦詩飲酒。絕無羞澀。猶見古人交道。

王麟友同宿客舍志感

廣陵城中夜擊柝。廣陵城頭啼烏鵲。爾我相逢語正繁。僮僕無情睡先著。微風忽起搖燈光。輕寒稍覺侵衣裳。鼓聲坎坎下三四。解衣滅燭眠匡牀。與君展轉各無寐。細數年來不得志。爲惜天涯此日身。轉憶先人舊時事。君家曾祖大司空。清名文譽聞江東。神光兩朝焚諫草。燕齊百郡銘河功。聞訃朝廷倍惆悵。特命春官子祭葬。卮酒分出天府漿。墓道築就東園匠。此時萬國來車書。至尊別殿夢華胥。潼關烽火起倉卒。延秋龍鬪爭歛歔。若翁司空家孫子。自拜國恩心國恥。策馬請監丞相軍。守城遂同丞相死。此時君作懷中兒。何處尋來馬革屍。今踰二十善詞賦。蓼莪開卷徒傷悲。吾翁若翁交最好。吾翁賢書年獨早。七篇

屢下南宮第一裘。敝盡長安道。負囊簪筆越王臺。角弓鐵騎吳山來。白眼世上誰共語。散髮江湖祇自哀。閉門著易忘暮年。把酒讀史呼蒼天。嗟我三十尚失意。山高著述何時傳。若翁遊魂歸未得。吾翁買土葬無力。相逢此地喜欲狂。相看今夜愁如織。披衣起坐聞荒雞。檣槍在天明月低。客舍相遭。追述累世交誼。忽悲忽喜。百感茫茫。自是意動神隨之候。

任元祥

字王谷。江南宜興人。諸生。○王谷與陳其年善。時其年著聲藝林。王谷規其詩。有才無情。以倉卒取辦爲才好。何李雲間而不師杜老。持論如此。不獨詩品之高。其直諒從可知矣。

寄侯朝宗

雪苑春陰度玉珂。大梁公子倚彫戈。市無朱亥經過少。客有於期忼慨多。落日千家翻白羽。桃花三月走黃河。風流江左遙相憶。潦倒尊前有放歌。可作羽聲讀。

柳

字長在。四川遂寧人。

送施又黃還吳門

親老遊何遠。長安羨爾歸。西風悲落葉。征馬戀斜暉。詞賦無今古。煙霞少是非。淵明三徑菊。留待護柴扉。

夏熙臣

字無易。湖廣孝感人。

施州衛寄所親

環衛皆君長。東南盡笮邛。流官乘小駟。蠻婦織花寶。刀劍生睡管。衣冠列附庸。不煩司馬檄。尺土亦王封。

蔣 注字嚳來江南吳縣人著有三徑草堂稿文

登岱

天門千丈立崔嵬。鐵削雙峯一徑開。山界魯齊盤地軸。禪隆秦漢剩仙臺。黃河北繞青丘出。碧海東依紫塞回。欲倩盧敖九節杖。晴披闔闔望蓬萊。

吳祖命字郢衣江南吳江人

詠史

天祿高然太乙藜。玉堂東畔石渠西。君王讀罷賢臣頌。偏遣王褒訪碧雞。譏不能用賢也。咏史詩自應以議論行之。

卷八

姚文焱字彥昭江南桐城人著有楚遊詩

赤壁

天空木落石崔嵬。懷古憑軒倦眼開。山勢欲奔吞浪住。江光不斷抱城來。英雄氣盡三分業。詞客名高兩賦才。只有文章傳勝地。簫聲鶴夢摠塵埃。

吳 綺字蘭次江南江都人由選貢生官湖州知府著有林蕙堂集。○蘭次守湖州擒治豪猾喜賓客四方名流過從賦詩遊讌無虛日卒以是去官梅村贈詩云官如殘夢短客比亂山多可

以愜其
風趣矣。

程益言邀飲虎邱酒樓

新晴春色滿漁汀。小憩黃鱸畫槳停。七里水環花市綠。一樓山向酒人青。綺羅堆裏埋神劍。簫鼓聲中老客星。一曲高歌情不淺。吳姬莫惜倒銀瓶。三四語寫山塘風景如畫。

贈趙尊客

閩客浮家泖水湄。孤踪不許俗人知。春衣典盡緣沽酒。晨突無煙獨愛詩。晞髮未忘文信國。論心長憶鄭當時。何來忽作思鄉曲。擷采幽香絕妙詞。

見人扇頭是友沂絕句愴然和之

歌版當年出絳紗。綠腰紅袖盡鉛華。只今便面春風在。曾向章臺拂柳花。

入署

平明初下紫宸班。錦署無營晝掩關。閒拂案塵思往事。一杯涼雪祭椒山。兵部有椒山題名故祭之。

友人納姬戲爲催粧姬汪姓南人也

軟蝶輕羅押蒜金。燈前小立倚瑤琴。桃花潭水兒家住。只問郎情深不深。

題畫

怪石頽雲勢不平。西風捲出大江聲。漁郎醉臥蘆花裏。笑指何人觸浪行。

黃

字仙裳。江南泰州人。著有悠然堂集。○仙裳負氣。慷慨。人以俗語俗事相嘲。輒設罵之。羣目爲狂生。

江村春日

門前芳草路。春到有誰過。曙鳥喧寒樹。條風動綠波。性迂求世少。親健得天多。莫訝將強仕。猶然隱澗阿。

經落帆亭是癸巳春與陳澹仙先生別處

故交十載散浮萍。橋李風煙此再經。今日獨齋磨鏡具。當時相送落帆亭。東門蟻酒春猶綠。南浦絲楊晚更青。只有寢園生宿草。鷓鴣啼處不堪聽。

婁東修復前觀察馮留仙先生祠宇

憶昔驚心丙子年。誰將隻手獨扶天。舉朝半醉烏程酒。名士拚沉白馬淵。黨禍清時公又死。奸謀用後鼎俱遷。寧知宗社丘墟日。廟食東南肅几筵。明思宗朝烏程溫體仁當國。戕虐善類。小人多附比之。社之所以屋也。三四爲記實語。

梁谿舟宿聞吳歌

雞唱煙中亂槩鳴。夢回酒醒未天明。江南風景彫殘後。纔聽吳歌第一聲。

宗元鼎

字定九。江南揚州人。著有芙蓉齋集。○定九愛潔。不減倪高士。爲詩最重風調。而性情因之以出。非漫然語也。集中七言絕句尤近中晚唐人。

早秋

我行初出郭，新月似蛾眉。幾夕望舒圓，今復蟾兔虧。匪獨此朝夕，百歲亦如斯。懷情不能寐，徘徊向中墀。側聞草蟲鳴，仰望繁星垂。人言秋漏長，已覺衡漢移。千念未夜息，萬感與朝期。長卿恆有疾，子雲終何爲。引領還躑躅，淚濕衣裳縑。

題郊居

茶竈聲清響竹廊，小亭新構面橫塘。漁夫晚唱煙生浦，桑婦遲歸月滿筐。一嶺山花燒杜宇，滿池春雨浴鴛鴦。籬邊犬吠何人過，不是詩僧是酒狂。

冬日過甘泉驛

記得當年來古驛，馬鞭帶雪繫樓前。雙柑香澱佳人手，半臂寒添酒客肩。忽見荒隄摧暮草，空傷衰榭沒寒煙。風塵滿目深惆悵，卻望誰家寄醉眠。記得忽見上下半篇自成章法雙柑一聯流澤謂似才調集中語

百尺樓

素鞵翩翩月一鉤，凌雲風致想高樓。江南歌舞尋常事，便遣曹彬下蔣州。連下章用意遺詞神似玉溪絕句

吳音曲

璧月庭花夜夜重，隋兵已斷曲阿衝。麗華膝上能多記，偏忘牀前告急封。

留鄒訢士

新開蘭蕙正芳菲。初到鱒魚入饌肥。最好流光是三月。如何拋卻渡江歸。

潘

高字孟升。江南金壇人。著有南村集。○南村詩古淡生新。絕無雕飾。而自然合度。金壇詩人。無

奉獻。潘有寒食一絕云。黃鶉穀穀雨。疎疎云云。今讀其稿。格高者甚多。此篇止風調可聽。恐非上乘。

初春有述

我生無他長。所耽惟種樹。樹中尤愛梅。爲其能守素。守素有同心。相將老巖穴。花時犯清霜。坐到將殘月。家園興未足。尋梅過太湖。梅花如白雲。茫茫路欲無。入山不忍盡。下山元獨宿。鐘清何處寺。花隱誰家屋。願言寄吾友。一枝折寒林。微物何足貢。將此歲寒心。能守素。守此歲寒心也。一驚大旨如此。

送友人之中州有懷同社并陳子其年

臨觴送君發。正值榴花時。雨過風蕭然。空山浪遲遲。行行君所經。冉冉予所歷。若宿伊陽村。爲望嵩山月。致我平生友。寄我一行書。相看成契闊。鬢髮復何如。陳子未相識。相思亦已久。爲我一問之。知有南村否。歸雲帶雁飛。清霜點客衣。且晚有題字。應報溪南扉。

憶幼子

少年曾有役。辛苦何足言。四十今過二。向後多衰年。撥棄悠悠情。當從予所便。夜分偶感觸。顧影心悄悄。憶我去冬時。種麥來溪田。小兒纔五歲。叱叱揚耕鞭。隨我至溪畔。背我弄溪泉。日暮徐來歸。持鋤趨我前。

今春忽假館，僻近西山偏。牽衣頻送我，正傍溪田邊。溪水亦活活，溪麥亦芊芊。自從別家來，歲月如流遷。麥今已可刈，兒今誰共憐。我意欲反櫂，遇事苦迍邐。懷鄉方竚立，東望惟雲煙。慈愛至情，委曲傳出，無心學陶去陶公未遠。

晚上焦山絕頂至暮歸宿山莊

初日江荒荒，曉煙不可罷。稍行見青螺，漸次辨蘭若。人行穿鶻巢，路窄盤石罅。逾時攀險絕，早已驚衰謝。樹古巖就穿，樓高雲許藉。一盡巔崖趣，旋從別徑下。落木響蕭騷，寒潮勢奔瀉。欲歸路非遠，問渡風稍借。可憐江上月，先我在茅舍。酌酒勸影形，嗒然坐清夜。此首又近李頎常建。○本朝五言古，李果堂每首刻峭，潘南村每首清真，求參立者，或難其人。

古意

跨馬塞北地，百戰封一侯。釣魚江南天，一竿占十洲。此事孰不知，大白爲我浮。醉起唱銅斗，此樂君知不。能存此樂，散人勝萬戶侯矣。

留別

水落溪田出，霜清下種時。煙中送人早，雨外到村遲。松隔誰家屋，花明是處籬。君今荷蓀者，吾亦在東菑。

寄梵川諸友

柳暗溪南路，柴門第幾灣。人隨春水遠，鳥帶夕陽還。綠過孤村雨，青浮隔縣山。徘徊芳草意，不盡暮雲閒。

雜感

陰山沙磧捲雲飛，戰罷秋風咽鼓聲。隴上空歸都護馬，城南盡哭羽林妻。蕭關明月悲笳動，遼海孤煙雜部齊。遠戍議添新介冑，不知獵騎過安西。

秦淮曉渡

潮長波平岸，鳥啼月滿街。一聲孤櫂響，殘夢落清淮。金陵詩社諸名流或在賦秦淮曉渡，爭勝者多長篇，斂手服，甚有袖詩不出者。金壇虞東臯云。

春感

江水悠悠泛畫橈，東風何處不魂銷。春歸萬里無消息，又過垂楊舊板橋。

寒食

黃鶉穀穀雨疎疎，燕麥風輕上紫魚。記得去年寒食節，全家上冢泊船初。

暉日初

字仲升，江南武進人。

觀王石谷畫山水圖歌

琴川王郎年正少，放筆往往稱神妙。靈想寂與造化通，幽襟獨寫溪山照。看君得意時，意若旁無人。抽毫欲使羣峯奔，躊躇顧盼久不下。素練忽破青山痕，誰翦羅浮煙。驚落華陰碧，勢偃研北松。欲墮壁上石，冉冉嵐氣蒸。轉目無留迹，營丘洪谷不可攀。人間久矣無青山，此時窺圖發清賞。高興半落雲沙間，何處覓

丹梯何方種瑤草，煙霞四壁吾將老。撥琴待掃十丈綃，坐我雲邊弄仙島。

方膏茂 字敦四，江西南桐城人。

歸家

此身拚永別，那意得生還。征騎才門外，喧聲已戶間。心含他日淚，眼認去時顏。嚙臂知非夢，今朝真入關。

喧聲已戶間，即少陵鄰人滿牆頭，意工於脫化。

張

宸 字青瑠，江南華亭人，官部郎。

楚中秋思

日落長沙楓樹紅，斷猿啼處暮雲空。可知昨夜鄉關夢，身在寒煙萬點中。

路鶴徵 字湘舞，江南華亭人。

籠中鸚鵡

縱有雲霄志，其如鍛羽何。語言徒自巧，文采累人多。隴坂關河杳，雕籠歲月過。翠衿渾短盡，愁絕少陵歌。

文采累人，一篇主見，補正平後，柳柳州劉連州皆其人也。故君子有取於爽白。

范

超 字同叔，江南上海人。

雪灘釣叟歌

雪灘釣叟人不識。持竿日坐灘頭石。渭水遭逢事有無。英雄老作江湖客。問爾垂綸定幾年。笑而不答鬚飄然。知君原乏求魚志。擊楫還吟秋水篇。垂虹橋門七十二。君家恰在橋邊住。茆屋斜開白板扉。釣船橫繫枯楊樹。日落沙頭增暮寒。江天風雪正漫漫。朝來凍合無魚釣。好脫簑衣當酒錢。此爲吳江顧茂倫作。

柴紹炳

字虎臣。浙江仁和人。○西泠十子詩選。虎臣與毛稚黃爲主。憫詩教陵夷而

顯茂倫作。

酬毘陵劉慶雲湖上見贈

劉生纔把臂。幾載客錢塘。一見如相識。重遊卽故鄉。春陰桑葉白。日暖柳花香。未遯湖山興。高歌那斷腸。
桑葉非白。柳花無香。然古語云。杏花盛。桑葉白。太白云。風吹柳花滿店香。詩人引用皆有所本。

喜陸大景宣歸河渚

征途幾歲竭歸來。庾信江南重可哀。春雨草連村市沒。曉風花傍戰場開。我思賣藥仍無地。君定垂綸何處臺。總是他鄉成浪跡。故人相見且銜盃。

沈謙

字去矜。浙江仁和人。著有東江集。○朱竹垞云。去矜少喜溫李。後乃循漢魏之規模。得初盛之風致。其意貞而不溢。其聲和而不流。

引聲歌

外極莽蒼。內保精粹。至人不言。四時咸備。理不出身。道不在智。形體塊然。神明所寄。虛心實腹。抱道守真。大化迴薄。與仙者鄰。運斡圓象。敷匝廣輪。陰陽不害。庶得平均。可參子欲無言章。及老子守其環中等意。

樵歌行自注。祖望自號西山樵夫。嘗以漁父詞贈予。故有此答。

西山樵夫方壯年。手持樵斧西山邊。朝向西山石上坐。暮向西山雲際眠。行人過者問樵夫。願君共坐語。斯須美髯如戟好。身手虎狼不顧千金軀。深林杳杳白日落。請君且去住城郭。豐貂錦衣不識寒。肥肉美酒供大嚼。暫時俯仰誰復嗤。恐隨霜露填溝壑。樵夫不答自微吟。東江漁者知我心。

送人之山東

君去遊齊魯。誰憐泣路隅。沙深埋馬足。風利斷人鬚。鼓楫河流隘。瞻雲嶽色孤。蘭陵多美酒。愁絕更須沽。

晚眺

川原望不極。孤客自登臺。落日大荒遠。平沙秋雨來。青門生事渺。白石壯心哀。歸思西風後。空憐作賦才。

送友人北上

嗟君此行役。把酒一沉吟。驅馬河冰滑。聽雞夜雨深。鼓鼙孤客淚。書札故人心。念母歸應早。天涯弗滯淫。

虞黃昊字景明。浙江石門人。

楊柳枝辭

楊花如雪撲征衣。馬上征夫苦憶歸。曾向曲中回首望。而今真在路旁飛。清。清淺淺。自足風神。此辭體也。

陸

圻字麗京。浙江錢塘人。○漁洋詩話。謂麗京晚年。遠遊不歸。或云在嶺南爲僧。名今龍。而朱竹垞太史。謂其入武當爲道士。終莫能定也。總之不知所終云。

七夕有感

萬里晴雲澹素秋。海天東望更生愁。黃姑鵲通斜漢。明月嬋娟照戍樓。剖核誰當來阿母。吹笙何路問浮丘。可憐攜手闌干淚。空擬歸來尙黑頭。

與歌者陳郎

落日橫江老白蘋。同鄉停問一相親。未嫌李尉翻新曲。偏喜何戡是舊人。玉管漫吹秋月白。紅牙曾按綺筵新。坐中恐有傷心客。莫唱伊涼水調頻。

送朱生之秣陵

華館張燈酒共斟。清霜朔雪晝陰陰。上方請劍高名著。廣柳容人俠氣深。醉後難忘公瑾曲。愁來獨抱蔡邕琴。秦淮渡口花爭發。莫負當年桃葉吟。應是俠士而爲直臣者。

毛先舒

字稚黃。浙江仁和人。有東苑詩鈔。○漁洋詩話。余喜毛稚黃四廬絕句。云別有深恩酬不得。對君歌舞背君啼。此意未經前人道過。

孔北海融述志

炎炎當路客。奕奕朱門開。雄雞無三號。冠蓋紛沓來。志士大所營。漂漂窮無依。結根在累世。安能灼餘輝。歷觀古俊民。功成道何微。子牙尙陰謀。管仲器小哉。人生履國步。周道自我夷。猛虎扼其項。何況狐與狸。此身勤君父。安得慕夷齊。曲士矜一節。度外寧所希。寧爲白玉碎。不爲長伏雌。北海目中。直無曹瞞經營國難。不慕夷齊。其素願然。

也。寧玉碎而不為瓦全，故卒被禍。擬古詩，須設身處地為之。

裁衣曲

剪征衣，親手作。君身長短何須度，肥瘦定然不如昨。新衣為君裁，舊淚為君落。還將銅斗細熨灼，莫使衣上沾猩紅。君見淚痕不肯著，思路音節，近接青邱。遠接文昌仲初。

張

丹一名綢生，字祖望，浙江錢塘人。有從野堂詩集。○此西陵十子中，矯矯者，向共推其七律，而五古生辣結轉，終以比體擅長。

白竹村

路盤白竹村，崎嶇探窮谷。居人八九家，林杪構破屋。下惟四柱立，亭亭不附木。仰視如鳥巢，夕暝梯雲宿。樓動晚風吹，萬竿如戛玉。已防虎豹害，復懼麋鹿觸。我行多彷徨，不敢岐路哭。從者俱飢色，清潭聊手掬。吾語勿苦飢，餐松毛羽足。寫竹屋荒陋如見。

涿州城

曉霜不在地，微白生牛背。遙望涿鹿城，隴然沙磧內。控縲走其下，壁立皆土塊。此地古范陽，甲兵天下最。側耳聞啼飢，傷心自我輩。野狼遇人嗥，蒼鷹攫雉碎。生涯底如此，浩歎茲行邁。天下之險，可使有飢民耶。誰謂山塹人，不留心經國。

晏城

小小古晏城，西對華不注。昔之晉卻克，逐馬匝此處。我行實已嬾，解鞍歇薄暮。鷗臯嘯其羣，老烏守枯樹。

不見古人迹。斷碑委樵路。手摸苔蘚痕。字句讀未誤。平仲之采地。緬然起思慕。奈何千載後。蕪沒如野戍。相望有遠山。恐是齊朝附。

登城西南隅次毛馳黃韻

野闊天高楓葉丹。鳳凰城下倚樓看。苔深玉馬秋逾靜。露澀銅駝曉未乾。南浦雲屯千騎合。西陵木落萬家寒。愁來鼓角霜前動。莫聽征鴻去渺漫。

陸嘉淑字冰修。浙
江海寧人。

蕪城感舊

花影鶯聲句偶傳。無端真得玉人憐。劉郎前度身猶在。杜牧三生事惘然。銀燭夜闌分險韻。畫欄春半響么絃。玉鈎斜外傷魂處。落盡桃花叫杜鵑。

郭襄圖字阜旭。浙
江平湖人。

贈鮑子韶卽送別

看君心事欲凌雲。客裏悲歌日易曛。每笑成名皆豎子。翻因長揖重將軍。焦桐未盡留知己。白鳳時吞只賣文。憶向五羊同叱石。燕臺相見又離羣。

顧萬祺字庶其。江南
吳江人。諸生。

鬪雞坡

紅粉宮中小隊齊。花痕凝碧草萋萋。一從孫武歸山後。不教三軍教鬪雞。武備不修意借鬪雞想出可云潑發巧心

盧元昌

字文子江南華亭人。諸生。○文子衙門兩版下帷著書選定古文不脛而走為詩少權娛之詞多愁苦之言由生平遭際使然而頌法常在少陵故憂傷感憤不知其然而然也上海陳

生龍岩為余述其梗概如此

哭李在涖

汝書黏在壁。三載字依然。薄宦嗟無祿。投荒竟各天。老魂霑旅雪。客夢叫孤鳶。誤汝真升斗。泉臺恨肯捐。
薄宦天涯客。頻年幾箇回。挑燈搜鬼錄。把酒話泉臺。後死青山在。餘生白髮催。羊城李少府。丹旆早歸來。
第一章哭少府此章痛逝者而行自念也。

北塘晚棹

悠悠北塘棹。落日轉蓬科。留滯無安土。東南病把戈。江寒魚罟靜。月上虎蹤多。去去勿復道。蒼生可奈何。
第五語經所云三星在留也。

登吳六益藻野閣次韻

凭欄極望思蒼茫。南北關山鴈幾行。萬里故人偏海角。十年兄弟一匡牀。欲謀土室真成狷。便哭窮途未是狂。愛爾灌園能樂志。樓前長種百株桑。

羣忠祠

徐海樓船捲土來，角聲吹落暮雲哀。將軍臥鼓空城閉，國士褰旗戰壘開。五尺汪童能破賊，三千瓦氏浪

銜枚。自注明世廟徵瓦氏兵禦倭甚暴。先朝祠宇還香火，蕭瑟寒鴉夕景催。此死倭寇之亂者。

哭箕兒

舉目伶仃欲斷魂，汝生惟此藐孤存。翻教衰祖為嚴父，休道無兒幸有孫。白首未拋苦海累，黃昏孰問寢

門溫。牀頭零落殘書卷，幾度青燈屋漏痕。

胡渭生 字融明，浙江德清人。

吳山觀潮

扶桑東極水雲昏，溟漲連天入海門。白鷺千羣沙際影，青螺數點雪中痕。石當羅刹聲偏走，風折西陵勢

益奔。徙倚胥祠下望，鷗夷信有未招魂。白鷺千羣，用枚乘語，意青螺句，即蘇詩所云越山渾在浪花中也。

吳 字修齡，江南崑山人。○修齡著正錢錄，又著圍爐詩話，揮斥諸家所為詩，摹倣西崑，然重重

大概

秦

質子妖姬貨可居，六王未畢已邱墟。鞭橋東去無靈藥，驂乘西歸有鮑魚。黃犬淚中慚廢立，白蛇醉裏報

驅除當時早爲秦非計。牧地爲封食有餘。

蜀漢

季世唐虞只此時。泗亭天壤哲人違。三交城下波聲急。五丈原頭日色微。西國無煙生火井。東鄰有女落蟻磯。不關鍾鄩能緣險。黃皓譙周盡識幾。落蟻磯落字未妥

譚吉瑄字舟石。浙江嘉興人。

弔戰場

祈連山下草寂寞。少人煙。魂魄千年後。還思渡酒泉。言故鬼猶不忘歸也。前人以可憐無定河邊似。猶是春閨夢裏人爲善作苦語。此篇正復相似。

朱克生字國植。江南寶應人。太學生。著有秋厓集。○王漁洋贈詩云。海內風塵調未孤。故人才筆妙珠湖。卽此可以想其詩品。

送陳子壽往河南

四馬遊梁出帝鄉。贈鞭重集酒罇旁。那堪旅舍逢離別。正值家園作戰場。汴水月明沙雁過。薊門霜動夜

砧涼。傷心去住同搖落。不獨悲秋淚滿裳。分寫河南薊北而未以一語總承格律甚細。

俞南史字無殊。江南吳江人。諸生。○無殊山人安期字羨長。之子。羨長以博雅勝。無殊出以清空。父子各擅長也。

過顧茂倫村居

境以居人重。情因遇故深。酌泉偏愛淡。看竹共分陰。草木山中歷。桑麻世外心。閒吟忘永夜。明月照披襟。

黃九河字天濤江
南泰州人

北上於袁浦發家書

丈夫志四方，不受兒女羈。苟懷萬里志，勞勩何足辭。昨發海陵城，今宿淮水湄。附書於送徒，援筆中心悲。親亡兩弟弱，支戶惟中閨。水旱歲頻仍，全家常苦飢。官租宜早辦，西疇勤耘耔。幼弟學易荒，肅恭承明師。回首望螺山，先壘草離離。遠行戀所生，貧賤無歸期。苟能行直道，何懼路險巇。長安多親舊，音驛日夜馳。紙短苦意長，挑燈重封題。欠伸啓篷窗，月落村雞啼。直寫八行中語，歸到戀所生，行直道，即所云明發不寐，鬢貂可行也。

王孫晉字左公，江
南實應人

南閩

久客欲歸去，翻愁行路難。極天圍萬嶺，平地落千灘。水立驚蛟鬪，風腥哭虎殘。悲歌烽火夕，流落恨儒冠。

韓

昌字經正，直隸宛平人。著有天樵子集。○朱太史竹垞序云：石耕終身不娶，比之牧犢子，五言清穩，自足名家。予轉取其七言，以其情韻纏綿，尤足動人也。

夜

出門寒輝看，向圓清宵白。雲多在天歸，人已絕四鄰。靜老樹葉隕，風淒然。門前卽是寒溪路，坦步徐吟過古渡。長橋立，久人不知。明月相隨自來去。

九日登雞鳴山

精詩別裁 一卷八

一百六十九

聞道東籬菊已黃。無因移向酒尊旁。西風忽起野煙暮。落葉亂飛山樹蒼。雁帶寒聲歸渚急。江涵秋水與天長。浮雲遮盡登高眼。不許愁人望故鄉。

雨中送春

綠草疎籬映水濱。清溪寂寂四無鄰。一簾細雨仍飛燕。幾日殘花又送春。多病翻愁今夜酒。傷心如別故鄉人。明年寄跡知何處。早向天涯慰苦辛。第六語非古之傷心人不能道。

王邦畿字說作廣東番禺人。貢生。

春郊

閉門日已久。出郭尚鳴鶯。爲愛清溪色。春風百草生。雲低滄海樹。潮上夕陽城。何處山中叟。猶聞伐木聲。錢劉遺韻。

過易水

地入幽州白日沉。寒雲莽莽水陰陰。亦知七首無成事。只重荆軻一片心。劍術之疎。中心之義。盡於十四字中矣。綱目書荆軻爲盜。未爲允平。

梅

磊字杓司。江南宣城人。著有響山齋集。

秋日

秔稻朝初熟，荷花晚更香。螢飛過竹暗，牛飯就松涼。斯世多充隱，吾徒半醒狂。愛從田父飲，雜坐亦何妨。

王漁洋見田家飯牛，中有所感，因賦牛飯就松涼句。

蝶

曲廊迴處正斜曛，弄影隨風自作羣。曾特粉衣欺艷雪，幾緣香夢惹行雲。斜穿簾幕深深見，飛過池塘故故分。送得南園花草盡，正教愁殺杜司勛。

吳物榮 字愷庵，江南吳縣人。諸生，著有錦峯樵稿。

山居

世事山居盡，衰年嬾更加。鳥啼方夢覺，酒熟正梅花。天地容雙鬢，漁樵共一家。溪邊聊晚眺，倚杖數歸鴉。

卓爾堪 字子任，江南江都人。○子任系靖難忠臣諱敬之後，代傳清白，壯歲南征，遠近爭高其行。

源口

旌旗源口出，萬馬度沙頭。山月開昏路，烽煙警素秋。前林圍已破，斷壑血能流。何日銷征伐，春原看牧牛。

黃堉 字子厚，山東即墨人。康熙癸卯舉人，著有夕霏亭詩。

清詩別裁 一卷八

一百七十一

短歌行

龍蟠於泥。蛇其肆之。虎處於柙。爪牙安施。委巷之犬。吠聲如豹。廩倉之鼠。口厭梁稻。太行居後。孟門居前。僉夫之心。君子畏焉。方寸之中。乃有五嶽。磊砢嶙峋。五丁焉鑿。精衛填海。愚公移山。爲之在人。成之在天。

送杞公周邑侯南歸

君從西郊來。旌旆光如電。父老遮道左。爭欲識君面。君從西郊歸。雪壓荒邱樹。獨有春風發。送君千里路。

嚴我斯

字就思。浙江歸安人。康熙甲辰。賜進士。第一。人官翰林學士。著有尺五堂詩刪。

十峯草堂歌爲錢礎日作

九龍之山環九峯。一峯一態如一龍。興雲出雨氣磅礴。鱗甲欲動凌蒼空。別有一峯伏而起。神奇天矯爲龍尾。世人咫尺不知名。古來畸士都如此。中有草堂繞煙蘿。峯峯迴薄青嵯峨。左圖右史安樂窩。猿啼鶴唳山之阿。草堂主人抱龍德。或潛或見人不識。時時掉臂弄雲霞。往往歌聲出金石。曠懷雅好遊名山。往來齊魯盡躋攀。有時夜半登日觀。雙騎白鹿青雲間。去年把臂歷山麓。清詩萬首酒百斛。今年款段走長安。不使緇塵浣素服。手持尺幅字琳琅。乞我題詩寄草堂。予本風塵落拓者。青鞋布鞵思徜徉。安得投簪尋泛宅。五湖之曲煙光白。與君拄杖聽鳴泉。夜向松窗讀周易。一起神來。以下便一筆掃去。

閒砧曲

長安八月秋風起。長安門巷秋如水。閨中思婦罷鳴箏。一夜傷心千萬里。前年蕩子去從軍。消息關山摠不聞。黃龍塞上愁雲斷。丹鳳城邊落葉紛。平沙獵獵吹枯草。碣石霜飛寒信早。鐵衣銀燭苦思家。紅粉空房愁遠道。烏啼啞啞風淒淒。日暮寒砧到處迷。玉筯暗隨聲斷續。涼蟾故逐影高低。青漆樓頭雁初度。天寒夢斷金微路。龍堆戰士幾人還。馬革遊魂竟何處。城西一帶素車歸。白骨沙場半是非。昨夜深閨猶記憶。開箱還擣舊征衣。

周

弘字子重。江南無錫人。康熙甲辰。賜進士第三人。官侍讀學士。

己未二月二日午門聽宣岳州大捷遇雪恭紀

荆南奏凱達神京。曉關天閭瑞雪明。朱鷺鏡歌翻郢曲。玉龍銀甲灑春城。貂裘尙憶軍前賜。鵝鴨曾喧夜半聲。自此江湖空戰壘。豐年有象課深耕。奏捷遇雪。語語合寫。

湖南諸路大捷和寶坻杜相國韻

覆巢殘孽剩遺難。坦腹緋衣合讖符。士行高牙麋子國。岳侯奇捷洞庭湖。烽煙一夜天兵掃。湯火頻年我后蘇。橘渚楓洲初戰定。關山片月笛中孤。

曹

禾字頌嘉。江南江陰人。康熙甲辰進士。己未召試博學鴻詞。官至國子祭酒。○余識其孫全倫。清門零落矣。既全倫旋沒。訪其詩不能多得。爲之慨然。

秋夜述懷

空林葉撼撼。野犬聲狺狺。徬徨忽四顧。中夜感古人。鴻濛詎不樂。烏用施經綸。才賢既當權。造化辭苦辛。雷雨亦待治。雲物非空陳。自有濟世功。千古勞其身。牽犢者誰子。高蹈遺斯民。君子出而用世。則造化以得也。千古聖賢心事。昭然若揭。

送友人還金陵

層巒秋風送客裝。蕭條木落更神傷。滿天欲雪尊虛酒。昨夜初寒鴈叫霜。馬足遠衝黃葉路。吟聲徐入白鷗鄉。江南景物關情甚。煙雨秦淮夢裏長。

勞之辨

字書升。浙江石門人。康熙甲辰進士。官至副都御史。著有醉觀堂詩。

眺玄武湖歌

雞鳴十廟衰草多。誌公遺塔高嵯峨。遠望大江千里之雪浪。近俯晴湖萬頃之煙波。湖形北向稱玄武。錦纜樓船鬪歌舞。結綺臨春跡已空。惟有澄泓一片無。今古聞說龍蟠王氣真。徐常偉伐圖麒麟。共球受日歸天府。戶冊登餘藏水濱。周遭沆漭中臺樹。澗瀾游魚通港汶。仁民愛物本相兼。罟於淵者爵無赦。自注。置黃册於其中。禁人遊玩。兔葵燕麥搖春風。細柳新蒲發故叢。鴛瓦已銷金碧外。漁歌時起荻蘆中。自古盛衰如轉燭。六朝興廢同棋局。君不見鍾山陵樹來樵牧。射生收得銀牌鹿。今古盛衰之感。借題發出。見有總易以興無德易以亡也。

趙士麟

字玉峯。雲南河陽人。康熙甲辰進士。官至吏部侍郎。○雲南遠隔萬里。風詩難采。少寧詩亦不多見。故所收止此。

過安莊至鎮寧

帶綰輕裘上偃坡。棲霞尙近鬱嵯峨。名通上國由莊嶠。威鎮諸侯自伏波。溪谷至今多瘴癘。人煙到處雜藤蘿。爲欣氣候如秋杪。華蓋橋西試一過。

黔陽懷古

羅施聲教阻遐方。漢置牂牁達夜郎。天入炎荒時苦雨。途經冷驛夜無霜。馬鞍觀側藏雲塢。銅鼓山頭祀竹王。千古猶思丞相澤。祠堂松柏自蒼蒼。

盛符升

字珍示。江南崑山人。康熙甲辰進士。官御史。著有誠齋詩集。○侍御少從夏考功彝仲遊。與雲間諸先哲相切磨。既出王新城尙書門。所詣益進。徐司寇健菴評其詩謂原本少陵詩外。別有事在。非溢分語。

同阮亭先生遙和李侍郎讀水經注憶洞庭韻

聞說巴陵倚洞庭。君山如畫見圖經。岷峨雪盡寒潭碧。雲夢波連湖草青。九派微茫看楚澤。數峯彷彿擁湘靈。知君回首曾遊處。遠思蕭然入杳冥。

中秋岱頂卽事

身入雲端雲下垂。風雷南去日西馳。青霓斷續斜陽外。碧海澄鮮子夜時。天柱獨晴依上界。冰輪乍滿半秋期。茫茫俯視皆塵霧。一片空明對玉池。

南征

太白山明井鬼旁，兵占早已在炎荒。
養成歲月營三窟，岨負西南擅一方。
莫遣金沙留蜀漢，豈容清浪接湖湘。
由來制勝資全策，銅柱依然緬水陽。

時尙逆有連結吳逆之勢，頌聯慮及之，非尋常經生家語。

冬日渡彭蠡過廬山下

幾經滙浦惜幽尋，重向宮亭望遠岑。
雲臥石門思北澗，花開蓮社憶東林。
三人一笑誰賓主，五老千秋自古今。
惆悵吾衷勞夢想，幾人遊跡未銷沉。

劉梁嵩字王少，江南江都人，康熙甲辰進士。

天險關

旋折初驚大壑雷，凌空復上劇崔嵬。
白雲無際疑天盡，翠巘何年倚劍開。
一路水從汾曲合，千層山抱鴈門迴。
中原地勢經西折，眺覽重增庾信哀。

清詩別裁

卷九

方殿元

字蒙章。廣東番禺人。康熙甲辰進士。官知縣。城江寧縣。著有九谷集。○九谷者。環書。自成。一子欲究天人竅奧餘事。乃作詩人也。然高華伉爽。依傍一空。品不在嶺南三家下。

廬山玉淵

高峯入青冥。中斷忽雲樹。屏風九疊間。飛泉半空注。奔騰過萬山。至此陡欲住。憚赫侔雷霆。一旦失憑怒。有似千古憤。投入靜者慮。兩崖青翠映。空色交相寓。淡淡與天空。冥冥寫秋素。窈窕散餘波。疑作江漢雨。幽光留人心。不覺白日暮。皎月上澄潭。此身在何處。極形奔泉陡住。比之填胸憤怒。忽入達士靜觀古今辭人未開此口。

褒斜道

褒斜道。三載烽煙令人老。嵯峨雲棧四百里。其下黑龍江中水。北走三秦南走蜀。長蛇猛虎盤深谷。張良一燒不可測。顧盼從容得秦鹿。諸葛艱難數出師。大星夜落三軍哭。英雄成敗且有數。況乃區區一狐兔。黃塵瀕洞入秦川。風雪關山勞遠戍。鐵馬回頭望壘山。斷腸家過秦川路。更有子午與黃金。十里百折傷人心。懸崖峭壁日月黑。使爾戰魂招不得。此為竊據者言。見英雄尙難成功。況孤鼠輩耶。警誠亂臣。可補劍閣銘之缺。

秋夜長

淒淒者風。胡不自東。不自南。不自北。吹我井上雙梧桐。梧桐昨夜飄孤葉。夫婿從軍入窮髮。兩地相思不相見。愁雲共掩關山月。飛鴻不我顧。海燕辭巢去。空房蟋蟀鳴。長夜漫漫誰與語。緘情含淚向天訴。蒼蒼無雲復無雨。西有牽牛東織女。

愛妾換馬

噴日嘶風紅叱撥。目似火齊汗似血。屈膝金屏出美人。邯鄲下蔡皆稱絕。英雄有事在烽烟。紅粉生離未足憐。願將妾織鴛鴦錦。裁作銀鞍滿月韉。

征怨

怯把金錢卜。春殘不道歸。昨宵看月暈。根觸幾重圍。古意

吳元龍字長人江南華亭人康熙甲辰進士官翰林改工部郎中已未召試博學鴻詞擢翰林院侍講著有問月堂詩鈔

賜緞絹恭紀

爲郎冰署客。亦得荷恩私。恐負緇衣好。慙無黃絹詞。稱身安且吉。出笥卷還披。機杼需民力。艱難二月絲。

上六語稔順寫題一結乃見作手

九日偕貴陽諸使君東山登高得初字

萬里登高日。千峯縱目初。天長迷近遠。雲合失崎嶇。邊徼蠻歌起。荒城落木疎。鄉心付征鴈。可許達音書。

起步似出
唐人手

繆 彤字歌起江南長洲人康熙丁未賜進士第一人官侍講

送醫士方際泰歸茅山

賣藥長安市。超然寄一身。摺驢偏識路。破屨不生塵。入世性情古。還鄉面目真。自慚留滯客。對爾歎勞薪。

假歸南下欲遊五臺山

排空歷歷五高臺。想像先教眼界開。客路風光隨馬去。家鄉樹色渡江來。探奇亦自安禪味。濟勝須誰作賦才。莫道上方鐘磬杳。此身今已出塵埃。

渡江

涼月漾中流。金山隱隱浮。尙餘殘醉在。和夢到揚州。只清曉渡江耳。寫得渾然無跡。末五字。何減唐人聲口。

東臺望海峯

層層峭石擁高臺。就裏藤蘿百道開。身在雲中天水合。更於何處見蓬萊。

張

英字敦復江南桐城人康熙丁未進士官至大學士謚文端著有存誠堂詩集○本朝應制詩共推文端入詞館者奉爲枕中秘而風格性靈不係此也特取高贖數篇以著公

之風
檄

擬古田家詩

柴門擁溪水，溪響無朝昏。農夫荷鋤倦，獨倚秋樹根。顧我田疇好，念我桑麻繁。脈脈不能語，感茲風雨恩。風雨歲時熟，古俗今猶存。遙指煙生處，親戚滿前村。稚子驅雞犬，夜來忘閉門。何以醺清時，努力從田園。昔愛誦豳風，亦常歌小雅。桑柘棲雞豚，結廬在中壑。春菑方扶犁，秋禾條盈把。野老樂時和，高枕瓜棚下。田家老瓦盆，新醪月中瀉。擊鼓賽先農，調瑟娛方社。何必桃花源，此境足瀟灑。風塵久誤人，我豈悠悠者。新晴土膏動，原上春草生。陂塘引礮壑，活活春水鳴。桑陰悅好鳥，布穀時一聲。夜來飽飯牛，朝來從耦耕。耦耕一畦畢，澹泊心無營。偶然召隣叟，索取壺觴傾。高談視天壤，把酒歡平生。面無憂喜色，胸無寵辱情。始知於陵子，灌園逃公卿。

讀漢書

壯哉霍子孟，易置多英風。離席按劍時，發議驚羣公。走馬杜鄴間，曾孫方困窮。手挈天子璽，授之咸陽宮。海枯石可爛，孰能訾其功。珠襦黃金匣，甫葬茂陵東。狐鳴尙冠里，妻子煙塵空。稔侯殺弄兒，累世亢其宗。子孟庇阿顯，九族罹憫凶。割愛與殉私，延促霄壤同。臣術惟敬慎，庶幾保厥終。博陸稭侯功業懸殊，而一世由殉私與割愛異也，指出敬慎。則身後族誅，一則賞延於以昭臣道事君者其知所法誠焉。

讀元道州賊退示官吏詩慨然有作

我愛元次山，詩篇獨簡質。短章如長謠，仁心自洋溢。至欲委符節，甘心就魚麥。昔人志康濟，豈云耽暇逸。

置身君民間。無能澹憂恤。汗顏拖長紳。不如腰帶銜。賢者恥曠官。斯義久蕭瑟。誰無湖畔山。浩歌撫遺軼。嚴陵江

千嶂桐廬道。清風幾湖洄。不知天子貴。猶是故人來。垂釣本無意。披裘亦浪猜。翻嫌人好事。高築子陵臺。

王真白詩後賦嚴陵者俱落坑塹此篇不著議論籠罩一切可以追蹤古人

張玉裁字禮存江南丹徒人康熙丁未賜進士第二人官翰林編修

七夕立秋

旅榻當筵臥。西風拂小欄。秋從今夕到。月向異鄉看。有巧輸人乞。因貧得夢安。曝衣問僮僕。預戒早霜寒。

結意七夕立秋雙到

憶橘

朱實垂垂葉尚青。故山千樹未凋零。相思不隔長淮水。一夜鄉心落洞庭。

魏麀徵字蒼石江南溧陽人康熙丁未進士官翰林出爲邵武太守有石屋詩鈔

送兒彪之沅江

我已無親侍。兒行又遠親。蕭疎千里外。去住一家貧。水闊風颿健。霜高候雁新。沅蘭芳可佩。極目楚江濱。

少陵令節成我考他時見汝心起十字同此筆墨

于忠肅祠

當年天子已蒙塵，中外安危寄此身。首建一言存社稷，獨鳴孤掌定君臣。丹心縱死還如鐵，碧血長埋未化燐。千載湖山留正氣，不須涕淚灑松筠。不填故實，不著泛語，是作家手段。

汪懋麟字季角，江南江都人，康熙丁未進士。官刑部主事，著有百尺梧桐閣集。

題顧符真畫

昭陽顧生畫樓觀，絳闕瑤房生白雲。如蜺宮人三百六，丰神都似李將軍。此詩漁洋詩話中震之。

顏光敏字修采，山東曲阜人，康熙丁未進士，官吏部考功郎中，著有樂圃集。○時震下稱詩有十子公井叔考功其一也。詩品端厚正大，不輕佻，不板滯，於十子中為雅音。

白雲峯

三峯信靈造，巍巍司寇冠。磊砢不盡洩，蚴蟻復北盤。結空出瑤几，前對香鑪寒。大道望如髮，豁然見長安。我行採山蕨，蔥蒨被岡巒。秋色何時來，萬里霜林丹。三川富陳蹟，八水無停瀾。玉女悵不顧，目斷雙青鸞。磊砢十字，寫盡造化之奇。老杜入蜀詩中，每有此。

青柯坪

我從華陰來，秋懷苦悽愴。一登十八盤，嗒焉如盡喪。手拂岫幌開雲關，峯巒變滅無停狀。狸狽嘯雨猿晝

啼咫尺但愁失歸向。蒼藤幕歷穿危棧。高下冥迷那得辨。石稜澗道僅數尋。渭水秦山幾迴轉。舉頭忽訝青天開。垣屋鱗鱗綴晴巘。長松挂壁森蓬藿。細霧綠扉曩烟篆。吁嗟青柯坪。壯觀真崔嵬。三峯高造天。於我何有哉。安得巨靈咆哮重壁裂。二十八潭傾帝臺。手挽鐵船入天漢。仰攀十丈蓮花開。迴頭卻笑羨門子。坐看東海生黃埃。後中放筆爲之。蒼巖雄快遂成偉觀。

鬪鶴行

高堂邃宇入罕過。錦囊高挂珊瑚柯。乍聞人響軒勇氣。空中跳躑常僬僬。何來賓從皆禿袖。入門豪氣聲誰呵。服膺拳拳疑印綬。朝餐廢箸猶摩挲。三尺寶牀正中設。鄭錦齊縷金盤陀。兩鶴出囊已脫手。盛怒似欲尋干戈。朱目紺趾豈得辨。疾如激水旋雙渦。注目良久三歎息。爲官爲私理則那。戕伐固皆爾儔類。崇朝百勝何足多。磔毛啄血供一笑。誰當與爾同癢疥。瞥然一敗竟菹醢。爭如朱鷺傳鏡歌。田中偃鼠飫草實。自注。月令。田鼠化爲鷺。即鶴也。徐行不避虞人羅。乃知羽翼反爲累。嗚呼奈此微生何。爲同類。殺害者戒。後言田鼠無身也。用意微矣。

望華山

潼關西上見嵯峨。路入雲臺佳氣多。萬壑深松寒白日。三峯積雪照黃河。天雞曉徹扶桑湧。石馬宵鳴翠輦過。擬向青冥銷永夏。蓮花玉井竟如何。七言近體。俱在本地信陽之問。

昭君曲

一辭宮闕出秦關。長得丹青識舊顏。為報君王休愛惜。漢家征戍幾人還。悲憫征人。用意忠厚。

喬

萊字石林。江南寶應人。康熙丁未進士。己未召試博學鴻詞。官翰林院侍讀。○聞先生詩稱極富。曾與賦草並行。茲獨得其使粵一集。故所收從略。

過應山縣弔楊忠烈公

嗚呼有明神宗之季。國脆艱。光宗繼之更短折。維時先生官給事。顧命乃與大臣列。防微肩鉅定大計。選侍移宮一朝決。再起中丞赴雙闕。大柄已被閹人竊。乾兒義孫滿廟廊。二十四罪憤所切。赤縣爭高宦者祠。彤庭徧染中丞血。詎有焚賊楊大洪。舍人寧死心如鐵。或言漢之廚顧潔其名。唐之牛李營其穴。宋之洛蜀明東林。黨禍紛紛蹈覆轍。封疆已被門戶誤。遂譏先生太激烈。我謂此言殊不然。藉口保身附明哲。假使當年稍嫁娶。張禹孔光更何別。君子豈能誤國家。目為黨人正氣絕。嗚呼正氣絕。國乃滅。解嬰之徒。每持明哲保身之說。以備貴直臣。正氣所以喪也。此等詩關係名節不小。○予過忠烈公祠。作詩弔之。中云。人之云亡。邦國瘁。明社沉淪。等兒戲。只有孤臣一片心。地下可訴高皇帝。讀喬公詩。偶然節錄。

下灘

湘南三月湘水生。馳波跳沫空江鳴。礧礧亂石亘江面。險如瞿塘灑瀆誰能撓。我聞就下水之性。豈樂與石相排爭。清流何為輒暴怒。鼎沸勢欲蒼厓傾。其如灘石太嶮巖。橫排曲扼真難平。筇竿之船薄如紙。左旋右折中流行。柁師自許識趨避。到此亦覺神魂驚。十里五里在俄頃。回頭不見丹峯橫。一灘纔過一灘

至到耳總作奔雷聲。縱然賦命果窮薄。毋乃太視波瀾輕。

湘口

鴈叫猿啼不可聞。零陵風雨正紛紛。三巖明滅瀟湘合。二水滢洄楚粵分。縱目好看靈嶽樹。落帆猶帶隱山雲。探幽更向愚溪去。野性偏宜鷗鷺羣。

方象瑛字渭仁。浙江遂安人。康熙丁未進士。己未召試博學鴻詞。官翰林院編修。著有健松齋詩集。

龍洞背

神龍穿石飛。洞壑晝常晦。人乃捷於龍。盤旋出龍背。躡衣入重雲。勢與風雨會。危崖千萬狀。不知始何代。突兀浮圖高。縱橫屏障大。鱗鬣樹千章。泉流吐飛沫。下注不測溪。沉沉氣冥昧。倘燃牛渚犀。百靈宛然在。羌山多靈奇。策名此爲最。何必御風行。曠然天地外。

七盤關

雞頭關前七盤嶺。蚓曲蛇蟠纔見頂。氏中又復度七盤。詰屈紆迴勢相引。層崖邃谷路轉通。拾級忽見雲霞空。卻怪頂觸前人趾。不知舉膝當心胸。寧心息魄詫奇絕。萬里山川風氣別。一關中斷隴蜀分。羌笛渝歌乍相接。遙望川巴萬點明。白雲紫霧還縱橫。鱗鱗彷彿峨眉雪。不知何處錦官城。北望京華南望越。懷人兩地情偏切。今朝身入大荒西。涼風古驛中秋月。昔遊平靖關。關頂爲荊州豫州分界處。曾作詩記之。篇中一關中斷二語。服其辭之能達羌笛承隴渝歌。

承蜀尤見脈理之細。

望雪山

自注在咸州距會城二百餘里曉起登樓望之九峯皆白。

未是峨眉境何來入座看。蠻中晴亦雪。徼外暑偏寒。雲散千峯白。霜凝萬壑丹。鱗鱗望不盡。指點是松潘。

陳玉璣

字養明江南武進人康熙丁未進士官中書舍人。

聞董文友已在山東

竟作十年別。何無一紙書。傳聞在東魯。早晚下南徐。客久才逾老。思深夢轉疎。靈光遺殿在。問爾賦何如。

眉眼最近而眼不見眉。卽思深夢疎之謂。

同友登京口避風館高閣望江題壁

袞袞登樓興。披襟坐上頭。果知天地大。不盡古今愁。孤塔烟中斷。諸峯波面浮。憑欄一長嘯。明月夜橫秋。

落葉

木葉驚微脫。相看惜故枝。一秋今古夢。萬樹別離思。入水飄無定。隨風下每遲。始知天地意。搖落總無私。

離形寫意。便覺超然。一結所見尤大。

與濟寄懷家兄其年

同君擊楫大江干。共把離尊未忍乾。一自風濤愁裏聽。眞憐兄弟別時難。雲連滄海鴻邊度。月落滄沱馬

上看爾在家鄉定回首。幾時書札到長安。

傅昂霄

字龍翰。江南吳縣人。康熙己酉舉人。○吳中詩人。無道及龍翰者。然卽此三篇。非浸淫唐賢者不能。

飲馬長城窟

君不見長城之北青海邊。平沙直上黃雲天。沙中白骨堆何年。陰山九月風怒號。風吹戍火連雲高。雲中五原軍出幕。左賢右賢心膽落。軍中大將聞姓霍。鼓聲如雷笳聲死。冒圍脫走天驕子。烽煙一掃萬里秋。漢家天子恩未酬。男兒何用言封侯。太白蝕月旄頭沒。歸來飲馬長城窟。

涼州詞

九月霜高塞草肥。征鴻無數向南飛。深閨莫道秋砧冷。夜夜寒光滿鐵衣。溫柔敦厚。可與唐賢絕句並讀。

江行

白雲明月漾微瀾。空外秋聲落遠灘。燕子磯頭中夜起。一天星斗大江寒。

徐乾學

字原一。江南崑山人。康熙庚戌。賜進士。官至刑部尙書。著有澹園集。

感遇

汲水辨澗溜。染絲別黑白。古人傾蓋間。流品先已擇。寸心苟相投。薄軀非所惜。寶劍解贈君。出入耀光澤。分手去路衢。萬里無間隔。結交不須多。噂沓亦何益。寧聞管鮑家。堂有珠履客。

隴山歌送許天玉之官新安

隴山高高隴水流。隴西六月如清秋。蕭關朝那近北地。酒泉張掖連涼州。諸葛戰爭餘故壘。隗囂宮殿成荒邱。繡衣按部求名馬。都護行營擢錦裘。數聲羌笛落梅怨。一曲秦箏邊月愁。許侯分符萬里去。曉發青門擁騎御。虞翻成名在此時。王尊叱馭看前路。京華故人折楊柳。欲行不行日漸暮。我歌爲作隴山詞。目極輪臺鳥飛處。高岑風格。步趨者罕。此歌在燕歌行胡笳歌之間。

送萬季野南還

霜花醪酒送君還。邸舍相依十載閒。慣對卷編常病眼。與談忠孝卽開顏。折衷三禮宗王鄭。泚筆千秋續馬班。薄笨獨驅驚歲暮。凍雲寒雪滿江關。

王

揆字藻儒。江南太倉人。康熙庚戌進士。官至大學士。著有西田集。

望岱

山色周遭信馬蹄。岱宗高峙絕攀躋。龍嵒未許兒孫並。巔另渾疑星漢齊。風定天門懸日月。雨收石角挂虹霓。他年定擬窮遊屐。秦觀峯頭倚醉題。

王士禛

字子側。山東新城人。康熙庚戌進士。著有古鉢集。○計甫草云。子側爲西樵之弟。阮亭之兄。才堪頡頏。而四樵阮亭早發聲望。先布不必視爲蜂腰也。

和李退翁侍郎讀水經注兼憶洞庭之作

相思何處折芳馨。望斷黃陵舊日亭。自注水經注湘水又北徑黃陵亭西。秋水依稀聞落葉。楚天彷彿見揚靈。洲邊子戍三春綠。樓外君山一帶青。太息雲中君在否。不堪重問道元經。

渡揚子江

長江不盡來荆蜀。天塹平分控五州。地近沉舟悲戰伐。人從擊楫想風流。波開雲日諸峯出。浪湧魚龍夾岸浮。況值丹楓搖落盡。三山縹緲欲忘憂。有吞雲夢搖五嶽之概。如此方許作渡江詩。

孟亮揆字釋來江南長洲人康熙庚戌進士官翰林侍講學士。

于忠肅墓

曾從青史弔孤忠。今見荒丘岳墓東。冤血九原應化碧。陰燐千載自沉紅。有君已定還鑾策。不殺難邀復辟功。意欲豈殊三字獄。英雄遺恨總相同。徐石實忠肅罪謂其意欲召外藩也。意欲二字與莫須有三字正復相類。一經拈出舊事頓新。

李振裕字維鶴江西吉水人康熙庚戌進士官至戶部尙書有白石山房詩稿。

祠闕里雅有序

皇上文德武烈。震揚域外。海隅宴安。民有禮樂絃誦之習。蒸蒸嚮風。迺循覽徭俗。還過闕里。以太宰祀孔子。禮儀致敬。賫予有加。臣躬逢大典。懼忝踴躍。不揣固陋。竊效唐臣柳宗元雅體詠歌盛事。爲祠闕里雅一篇。謹拜手稽首以獻。

大山巖巖遐邇具瞻。登封受命。上帝是監。鍾靈岱岳。篤生尼父。大道昭明。炳然終古。章一於皇時清。繼天立

極。累洽重熙。與民休息。苞蘖既除。干戈永戢。偃武觀文。風行四國。章二歲維甲子。歷起上元。翠華南指。旌軒

八屯。秩祀東嶽。禮舉柴燔。頽臨日觀。旁矚天門。章三泰山之陽。曲阜之宅。萬乘回鑾。里門是式。奕奕本支。恭

迎清蹕。升堂陟降。祀典攸秩。章四軒縣輳矣。樂具奏矣。尊壘既陳。饗禮侑矣。俎孔碩矣。天子獻之。豆孔庶矣。

天子薦之。章五祝史有辭。我皇黼藻。曰萬世師。揭此顯號。華蓋九旂。爰飾于廟。姬公孟子。亦越奠告。章六皇曰

噫嘻。相予肆祀。濟濟臣工。誥誥胄子。布席橫經。披陳奧旨。園橋肅聽。辟容有喜。章七陟彼泉林。厥流孔滂。維

茲楹文。厥枝孔虬。萬年不凋。聖人所樹。皇心愉愉。爰記爰賦。章八帝恩優渥。零露瀼瀼。流根潤葉。受社無疆。

匪曰賚之。孔氏之光。斯文丕顯。邦家之慶。章九泗水湯湯。孔林蒼蒼。文草靈蒼。輦路之旁。樵蘇有禁。舊不踰

頃。今也廓之。數兼常等。章十奎畫有煒。垂象神宮。取彼琬琰。是琢是礪。豐碑百尺。峯嶽在東。歷年億萬。與岱

比崇。章十一維山有岱。維天有漢。皇德是峻。帝文是煥。大道彰矣。治化翔矣。日月星辰。慶重光矣。章十二○
祠聖人與

奏凱告成功不同。彼取古典。此取和平也。古典近禱。和平近柳。作者最得體裁。

許孫荃 字四山。江南合肥人。康熙庚戌進士。官翰林院侍講。陝西學使。○激昂悲壯。多燕秦之聲。

出門

出門必春初。入室必冬暮。豈無兒女情。終歲不暇顧。揮手從此辭。夕陽渺煙樹。作客苦況。全在兩必字形出。

五丈原次大復韻

荒原淡斜日，古戍黯層陰。五丈空留跡，三分不死心。地隨營壘沒，星與陣雲沉。薄暮秋風急，如聞梁甫吟。

潼關

百二初經得大觀，嚴關高峙碧雲端。兩邊峽束黃河去，萬仞根連太華蟠。天險西來凌絕巘，地形北折鞏長安。如今聖德能懷遠，猶作當時要處看。與兩城中分蟠太華孤城百折走黃河幾於魯衛一結得設險守國之意

武功春日謁后稷祠

當時教稼無先聖，萬世黎民定阻飢。詞客古今瞻廟貌，村農伏臘走軒墀。郃封麥秀垂垂徧，禹甸氓歌處處隨。文德配天真不忝，獨從含哺有餘思。起手如高峯墜石循行數墨家那能辨此

萬里

萬里驅車亦壯哉，西征咫尺是輪臺。無邊晴雪天山出，不斷風雲北極來。關到玉門中土盡，槎浮博望使星迴。猶看定遠封侯道，卻憶嫖姚佐漢才。

莊浪趨張掖

酒泉張掖近天山，大漠風雲指顧間。莫道行邊人萬里，最西還有玉門關。

葉

變字星期江南吳江人康熙庚戌進士知寶應縣著有已畦集。○先生論詩一曰生一曰新一曰深。凡一切庸熟陳舊浮淺語須掃而空之。今觀其集中諸作，意必鈞元，語必獨造，寧不諧。

俗不肯墮俗。夏夏於諸名家中。能拔戟自成一隊者。○先生初寓吳。時吳中稱詩者。多宗范陸。究所獵者。范陸之皮毛。盡於千手雷同矣。先生著原詩內外篇四卷。力破其非。吳人士始多警警之。先生沒後。人轉多從其言者。王新城司寇致書。謂其獨立起衰。應非漫許。

度大庾嶺

千里連峯匝。紆迴出萬尋。險分南服界。雄見越王心。鴻鴈謀何苦。熊羆氣轉深。高松陰夾路。風過助長吟。
三四語沈雄蒼鬱。

送王阮亭宮詹祭海還朝

使節天邊轉。韓碑讀罷還。挹泉醕主眷。探袖出民艱。飄沒依依樹。裝輕箇箇山。南枝留不住。高詠過重關。
瘞璧恭成事。祠壇異碧雞。蠻方留雅樂。玉陛返桓圭。激水從天上。扶桑向使西。聖朝嚴俎豆。到日拜封題。
尋山

二月花爭發。尋山一逕冥。峯迴常抱影。雲斷半銜青。柳露沿溪屋。人歸隔嶺亭。桑榆留晚照。尙及渡前汀。
京口作

朔風動地大江鳴。猶說南徐北府兵。鐵鎖幾人籌異代。布衣終古悔成名。江山無限漁樵計。木葉頻驚關塞情。試上高樓憑四望。不禁淚下媿平生。
七言律入手。難得龍跳虎臥之筆。得此以下。便如破竹。

中秋後同人集用亶尙友堂憶五年前秋嶽先生有此集限微字韻興懷愴然仍限前韻

風雨從吾款舊扉。也知荃杜采應稀。敦槃衰鬢驚難再。花月歡場漸欲微。晚藥侵階秋得氣。倦螢入戶冷無依。緣隄衰柳吾憐汝。約略年華兩並非。追舊集感暮年借倦螢衰柳以寫蒼涼之況爲之黯然

括蒼道中

蕭然倦策度重巒。絕壁摩天傍斗看。遊子傷心悲九折。美人遙睇隔千盤。啼鶉花信他鄉到。瘦馬衫痕落照寒。不斷亂雲投北去。生憎回首望長干。三四經險地懷良友也瘦馬衫痕一語寫盡孤客遠行之況

同人夜坐康貽姪齋限人字

意外相逢是故人。衰顏燭影話重新。花殘幾易羅含宅。燕到重沾杜甫巾。無處避愁應擇地。有山送老不嫌貧。吾家二妙欣相慰。嚮向滄江再問津。總無一語平直極眼前事一經點化頓使生新

石門郁曾發遊秦歸賦贈兼示胡圓表徐導柏

十載驚沙積曉裝。龍鍾短策倦遊梁。飢來慣逐長榆月。老去重沾絕塞霜。登嶽何人攜謝朓。入門無女問中郎。曾發歸時要女江波淮浪摧肝日。話比秦川路更長。

去去空山學道裝。難忘情處在河梁。勞生歲月官橋柳。終古人琴斷坂霜。自注故徐次璣人水咽隴頭留苦調。花

然巷口映諸郎。自注圓表昆弟子姪二十餘人秦宮漢殿秋原上。飽贈書生一枕長。勞生歲月以官橋柳況之終古人琴以斷坂霜擬之身世友朋之感兼於

字欲淚

與趙書年話舊追憶其尊人山子

隔世荀陳隔日情。朱顏皓首兩心驚。文章涕淚仍聲價。冰雪關河竟死生。自注：癸卯冬，予與山子許甫重

靚風標。堪和鶴。自憐衰老續鳴鶯。庭梧竹影難忘夕。怕見城西暮色橫。自注：山子故居。

同徐方虎張步青趙湛卿登永嘉江心寺浮圖

鷺宮突兀傍銀河。界破青冥一雁過。名士登高雙淚下。故人回首萬峯多。新傳屨海銷兵甲。若箇魚磯臥薜蘿。尺五去天知不遠。憑君才調問如何。

楊花

小蠻腰瘦不勝情。斷粉飄雲殢舞裙。莫使漫天飛不住。樓中尙有未歸人。

題平湖沈客子燕京春詠後

殘杯忽憶帝城春。曾逐輕蹄十九人。淮上黃蘆江上雪。憑君說是賞花辰。

梅花開到九分

亞枝低拂碧窗紗。鏤月烘霞日日加。祝汝一分留作伴。可憐處士已無家。從九分著意。不忍卒讀。

客發苕溪

客心如水水如愁。容易歸帆趁疾流。忽訝船窗送吳語。故山月已挂船頭。初歸家時。實有此景。比忽驚。鄰樹出。漸覺熟人多。更妙。

盧道悅字喜臣山東德州人康熙庚戌進士官兩知襄武緱氏縣著有公餘漫草○班史稱循吏以文章飾吏治作者以吏治爲文章詩中所云皆從憂勤廉惠中出也勿徒於對偶聲律間求之

阻風

陸行無風波。偶嫌路紆折。中心希所求。水程較直截。鼓棹正中流。陡遇風威振。日行十餘里。毋乃所望缺。欲速適爲累。悔不從迂拙。迎面挂席來。疾行飛鳥滅。帆檣非不同。遲速何殊絕。長年前致詞。前程難預決。萬事貴順天。人力徒勞竭。明月風勢回。遲速又更迭。乃知天下事。安分自怡悅。寄語山中人。待時養明哲。

寄時齋弟

百孔千瘡體。醫來尙帶癥。清貧林下穩。迂拙宦途難。有淚洒荒野。無才事上官。感君相念切。聊用報平安。

五六語包括任延一傳

迎春

律轉鴻鈞佳氣同。肩摩穀擊樂融融。不須迎向東郊去。春在千門萬戶中。

顧貞觀字華峯江南無錫人康熙壬子舉人官中書著有積書巖集○梁汾臨沒時自選詩一卷授門人杜雲川太史雲川付梓人以傳不滿四十篇皆味在酸鹹外者前輩嗜古淡不自足如此

雨止鱸塘書舍抵暮無一人過橋上者

山淺雨亦深。煙光暮如積。窅然清池上。暫與塵土隔。倚杖玩浮漚。憑欄數歸翼。無生復奚滅。有動隨所息。磬響時一來。懷哉巖岫客。願言依此境。共對香燈夕。一塵不起。語可證禪。

春夜大雪念儲汜雲宿舟中詩成黯然兼寄應雲皆人兄也

百里非遠涉。忽嗟行路難。蓬窗半夜凍。積雪摧檣竿。念子擁衾坐。知余撫枕歎。吳中文翰侶。公宴方極歡。暖響迷玉漏。晶輝瑩珠盤。誰持一尊酒。慰此孤舟寒。前路逢二謝。客愁應似寬。平生倦水宿。歷歷經風湍。

開先漱玉亭

壁立雙芙蓉。正臨無底谷。誰揮修月斧。盡削銀河曲。倒灑萬斛珠。翻飛千尋玉。有龍蟠其下。喧極眠更熟。縱橫題石字。但見莓苔綠。洗鉢注軍持。餘生此焉足。

灌園

不自量筋力。求爲人灌園。意惟營一食。跡若避羣喧。誰遣五色芝。服之詫騰騫。奈非塵埃種。移蒔安得蕃。還將理菜畦。膏澤資泉源。黽勉試操作。編籬復插援。早韭和露苗。晚菘凌霜翻。但從采掇便。未覺烹飪煩。心形誠苦疲。既飽亦軒軒。向讀神農書。近聞老圃言。

夜聞梵音

一燈山牖出。隔竹露光炫。坐聽香臺人。法華中夜轉。清泉漱寒玉。細入吳音軟。嚼蠟況橫陳。凡襟何時遣。

去左司
未遺

秋曉登滄浪亭呈宋中丞

初日上東南。林亭空宿翳。草香珠露重。的皪侵衣袂。唱杏曲池菱。吟餘小山桂。猶聞遺翰墨。但惜沉碑碣。望古情已深。懷賢感亦係。由來滄蕩人。別作流傳計。翕絕賤原營。虛徐狎莊惠。誰陪飛蓋遊。屬和高文麗。
詠滄浪亭者俱做蘇梅體此以淡寂行之春花明媚忽遇山礬獨殊風格

卷十

韓

芟字元少江南長洲人康熙癸丑賜進士第一
人官至禮部尙書補謚文懿著有懷堂集

贈江南巡撫湯潛菴先生

於皇啓運惟良應期雲出山川靈雨乃施于潛于躍致身惟時從容講幄道以言資俾贊大政謀謨孔嘉
帝瞻四方念我民依疇若綏懷維汝子材往奠南服往撫朕師此言公以道事君明良一德命其撫綏南服也
時惟霜月戒途惟吉別殿龍行大官賜食何以衣之溫貂重襲何以乘之小環金厄巽命以申莫匪民極
頓首青蒲臣職是力臣學孔孟羞管商術翬翬之思惠此南國此言陸辭寵行也學孔孟羞管商表公生平學術
短車一乘具少于車敬謝供張敢煩薪芻我馬旣羸我僕亦痛莫或寧處將此簡書吳儂遲公自今有家

叶悄悄獨營。攬轡踟躕。此言公簡從輕裝。敬奉簡書。而吳民望之。同於望歲也。

螟蝻食禾。披根及心。飛鴉食甚。懷我好音。嗟爾司牧。下民是侵。素絲惟染。官闕誰箴。其則不遠。公卽砭鍼。

無愧生平。敬影與衾。此望屬吏化積習。歸廉潔。以公爲準則也。

稽古揚州。田惟下下。矧我勾吳。文身而裸。有明戰爭。天降之禍。厥賦未貞。王道爲頗。印給四方。日炙其輶。

脂膏既竭。下民卒瘡。剝肉流血。敲骨及踝。千秋我公。哀此鰥寡。盍謁靈璫。公誠動天。庶幾報可。

此言三吳浮賦。民不能堪。願公之爲民請命也。後屢疏陳請。格於部議。乃止。

眷彼嘉穀。實生其莠。爰有止水。當門置韭。宿猾弗除。愿民誰厲。其衆可容。其魁宜取。如木斯拔。如雛斯乳。

仁者必勇。公維其有。此言除莠。民以安。愿民也。止水。置韭。用龐參訪任光事。

烹魚苦碎。治民苦煩。調急弦絕。汲多水渾。五方殊風。莫返黃軒。去其太甚。不在高論。鈞距不設。鼠雀無喧。

若其性天。起化之源。此言除弊。去其太甚。無煩苛察也。若其性天。即使自得之之意。

奕世歌思。厥有文襄。端毅寬靜。忠介清剛。我公嶽嶽。爲儒者宗。體立用行。攸兼其長。神動淵默。罔不在中。

若嘗膏之。豈惟我邦。佇公報政。倚公辯章。吳儂敢私。以福萬方。此言撫吳大臣。推周文襄忱。王端毅。恕。游忠介。瑞。而冀公之追步前哲也。此種立言。

得吉甫贈人之體。詩亦穠如清風。

送礪巖洗馬移家石公山次梅庵韻

乍脫朝衫賦遂初。青螺一點卜幽居。菜根咬得當何肉。蟲篆窺來半禹書。吞卻五湖無蕒芥。聯將三益有樵漁。此時風月從吟弄。幸惠新詩並起予。石公近包山包山藏禹書處。

挽田間先生詩

跳身黨禍出鄉關。辛苦書生戎馬間。已分妻孥成死別。寧知喪亂復生還。屏王騶駘窮年恨。故土鶯花鎮

日閒。一畝荒涼乾淨地。千秋恐染淚痕斑。先生配死於亂兵故有第三語。

長揖諸公折角巾。頭銜不屈舊詞臣。三千上客曾傾坐。百尺高樓好寓身。自下羊曇華屋淚。自注謂立齋師。每安

杜甫草堂貧。靈牀寂寞琴絃斷。絮酒南州祇一人。自注謂健庵師。

被命修一統志先師司寇公完書也感而有作

澹蕩江湖玉局隨。苦心作者調誰知。戶庭直欲包山海。義例頻煩托寓卮。窮盡異書多逸事。得來妙解折羣疑。最憐樂善通懷處。嘗許門人贊一辭。

青螺一點故依然。草舍荒煙客可憐。萬里張騫曾鑿空。九州鄒衍欲談天。人從生死原輕散。筆到山川不易箋。惟有無情芳草綠。猶鋪書帶舊堂前。

踏紅重到碧山堂。歎息音容未渺茫。佳句壁間枯落墨。小松階下慘成行。少孫敢附龍門末。後鄭常依馬帳旁。猶是舊遊風月地。孤燈夜雨照淒涼。俱從門人續修用意。顯縣悽惻令人增師弟之重。

暮春唐解元墓下作

中丞當代振詞源，弔古憑將風雅論。自昔唐衢惟解哭，祇今宋玉與招魂。人歸黃土三生石，時過清明一酒樽。更闢桃花舊蘭若，鐘聲敲月伴黃昏。
時宋商邱中丞新葺唐解元墓，故從中丞說入其實。墓在橫塘商邱所葺在桃花塢，乃解元讀書處也。

王鴻緒

字季友，江南華亭人。康熙癸丑賜進士第二人，官至工部尚書。著有橫雲山人詩稿。不及見全稿，所錄皆未貴顯時作。

歸來

長缺歸來日，貂裘欲敝時。吾親憐久客，扶杖喜相持。款款談征路，依依問舊知。自朝還至暮，盡室慰離思。吾母倚閭久，風塵望早歸。驚看遊子面，爲浣去時衣。巖筍經冬出，慈烏向晚飛。白華堪志養，不必羨甘肥。
繼衣，送遊子也。浣衣，遊子歸也。舊事翻新，只轉換間耳。

夜

霜風瑟瑟動窗紗，故國音書旅鴈賒。永夜聞砧難入夢，他鄉見月易思家。干戈且喜人無恙，蒲柳應憐鬢有華。獨愧聖朝容棄物，未辭簪紱問桑麻。
善學少陵，不在形似。

閨思

抱得朱絲琴，臨風彈別鶴。愁如江潮生，不共江潮落。
崔國輔小詩，原本子夜讀曲作者近之。

採蓮歌

采采江水濱。荷花照臉新。莫愁西日晚。明月解留人。

徐

倬字方虎。浙江德清人。康熙癸丑進士。官翰林院侍讀。後家居。加禮部侍郎。著有薈村集。

詠水碓

陸州曉放船。江流益清澗。水石相抨擊。湍雪蛟龍走。居民置風輪。隨波轉樞紐。沙石廣場圃。比櫛列杵臼。但看椎聲落。不見誰舉手。精鑿脫糠粃。安閒到子婦。搯搯抱甕勞。拙哉漢陰叟。機巧厭枯棹。斯言誠然否。聖人前民用。神智皆自有。愚民偶得之。役使河伯久。但苦梁鴻貧。何處覓升斗。一結換意。不脫不勝。

騾車謠

車鐸忙替戾。岡騾轉轂尾。禿速路崎嶇。聲獨漉。嗟爾車中人。何不還家抱黃犢。

寶劍金玉裝。少年駿馬馱。車中坐老叟。面皺鬢又皤。騾兮騾兮負汝何。

簸之揚之非藜藿。顛之倒之裂裳衣。騾因芻豆辛苦爲。勞人草草將安之。人與爾騾計總非。

雞初喔。烏再啼。北斗闌干月沉西。滿地冰霜騾足動。踏破千家萬家夢。奇警句。以無意得之。

捶馬勿傷面。捶騾勿傷背。傷背烏啄瘡。後日難重載。八口安食騾奔波。騾若不行誰能那。爲語役夫愛爾

騾。愛及物力。仁人之言。

採蓮曲

溪女盈盈朝浣紗。單衫玉腕蕩舟斜。含情含怨折荷華。折荷華。遺所思。望不來。吹參差。音節聲口宛然齊梁

月

木落川原淨。霜清烏鵲寒。可憐官舍月。強作故園看。老鶴捎雲末。饑鼯走夜闌。朔風偏太苦。吹徹角聲殘。
官舍見月。忽念家園。此云強作故園看。前人無道及者。以下推開不復黏滯。是浣花翁家數。

聞蛩

鄉國三千里。寒蛩總一聲。遙知閨閣內。共此別離情。響入秋砧細。愁先朔雁鳴。銀燈何太苦。起坐到天明。
一氣直下。盛唐人有此高格。

舟中雜感

高秋一葉下梧桐。有客揚帆夕照中。多病百年兼恨別。依人千里自途窮。滄江白露魚龍夜。冷月黃沙草木風。老去休思空冀北。日歸終擬僦墻東。
計欲依人。無有不途窮者。此閱歷有得之言。

雀啄黃花滿眼蒿。雁連雲影下空濠。投人自賤隨明月。無褐空思秦復陶。碣石寒砧催玉露。廣陵秋樹接銀濤。應知雨雪前途盛。歲暮誰憐左伯桃。

項王祠

莫問鴻溝事若何。獨留祠宇枕黃河。故鄉香火情何限。三戶英雄氣已多。零落繡衣生土蘚。欹斜駿馬絡

藤蘿到今吞岸濤聲壯。嗚咽如聞垓下歌。

禾中贈曾庭聞

庾信飄零似轉蓬。江關詞賦老逾工。客程半在青山裏。壯志全消白社中。尙有匡牀分上下。曾無破屋住西東。鴛鴦湖畔輕攜手。孤負桃花爛漫紅。破屋句念其弟青藜無家不能如二陸之同居也。

湖上贈夏鹵均

青絲一騎出長安。明聖湖頭把釣竿。花柳坐催名士老。湖山約與酒人看。好憑酬唱東西屋。莫妬聲名大小冠。昨夜新詩欺白雪。雪兒歌罷不勝寒。

李基和

字協萬。江南丹徒人。康熙癸丑進士。著有梅崖詩意。

登代郡城晚眺

西風落日聲颼颼。風吹沙起邊人愁。黃雲片片下谿谷。雁門木葉零清秋。飛狐句注老鵬窟。健兒習射來山頭。嗟哉紫塞古來險。頗牧爲將人安憂。忽然酸風射眸子。迴看戰骨多荒邱。歸鴉幾點過城去。夜昏鼓角鳴譙樓。

過鶴汀侍讀齋觀董文敏畫

曉雨初晴煙未收。江雲一帶引輕舟。模糊認得南徐樹。不到家山十六秋。因觀畫陡觸家山纔異泛然題畫。

柳絮

孤負當年詠雪人。沾泥糝徑總成塵。卻憐一樣風吹去。偏是飛花墮錦茵。

戊寅中秋初度月下作

光寒於水連天接。色白如霜滿地鋪。誰畫雁門今夜裏。山川別樣貯冰壺。
自注。金魏道元中秋詩。桂子知經。譏寒暑。冰壺別是一山川。

徐元夢 字善長。遼陽人。康熙癸丑進士。官至大學士。諡文定。

送隨義文出塞

君到居庸北。應憐一鴈回。沙平疑地盡。山豁訝天開。落日重關閉。秋風萬馬來。勉旃從此役。莫上望鄉臺。
閱其勞苦。勉以公忠。四章不脫此意。風骨不肯落開寶以後。

兩出居庸塞。憐君當苦辛。風沙隨去馬。雨雪滯行人。地闊軍民少。天寒部落貧。須知柔遠意。率土盡王臣。

登三屯鎮城樓寓目

雉堞連山起。登臨亦壯哉。一聲南鴈去。萬里北風來。苔沒前朝碣。雲寒上將臺。興亡無限意。尙想濟時才。

送友人出使塞外

許國纔年少。胡爲絕塞行。一身憑漢節。匹馬出長城。月色侵裘冷。霜花拂劍明。燕然何處所。石上自題名。

成

德 字容若。遼陽人。康熙癸丑進士。丙辰殿試。官侍衛。著有通志堂集。

擬盧子諒時興

代謝感時序。迭微歎日月。愍彼鷓鴣鳴。忍此衆芳歇。林園無鮮菓。原野飛隕葉。王孫傷歲暮。志士勵窮節。勁莖盪驚飈。貞松翠霜雪。昂昂澤中雉。矯矯韜上鷹。物性不可渝。人寧不如物。努力崇明義。豈爲威武屈。
砥礪志節傳
出子諒心事

再送施尊師歸穹窿

紫府追隨結願深。曰歸行色乍駸駸。秋風落葉吹飛鷁。夜月橫江照鼓琴。歷劫升沉寧有意。孤雲去住亦無心。貞元朝士誰相待。桃觀重來試一尋。

山海關

雄關阻塞戴靈鼈。控制盧龍勝百牢。山界萬重橫翠黛。海當三面湧銀濤。哀笳帶月傳聲切。早鴈迎秋度影高。舊是六師開險處。待陪巡幸扈星旄。

柳枝詞

馬卿苦憶紅泥閣。我亦傷心碧樹村。病骨沉緜詞客死。更誰攀折與招魂。
自注：綠楊天半紅泥閣。朱槿風前翠袖人。亡友馬孝廉雲翎柳。

詞枝

池上閒房碧樹圍。簾紋如縠上斜暉。生憎飛絮吹難定。一出紅窗便不歸。
因柳絮而念征人。人所同也。此妙在未曾說破。

邵

瑣字柯亭直隸大興人康熙乙卯舉人官昌邑知縣

春日雜興之一

春風不媚俗。一例到閒門。新樹移鄰圃。青衫染酒痕。世情浮宦拙。吾道布衣尊。盡日讎書卷。藜牀坐覺溫。
此任廣文時作。

九月十五夜中庭閒步作

鐘傳人定月華明。漸覺新寒夜氣清。露重似宜添羽帔。樹疎何處著秋聲。一鐙舊雨鄉園夢。殘夜西風獨客情。身世不從詹尹卜。流行坎止足吾生。

芙蓉

曾從楚客賦蘭茝。喜見風翻赤玉幢。欲采名花遺良友。還憑遠夢落秋江。盤承雨露珠無算。莖並鴛鴦蒂自雙。此日仙城誰作主。凝眸遙望凭紅窗。
押三江韻。中不著一客氣字。便是到家。六語本杜詩。添入鴛鴦二字。倍覺鮮妍。

題畫

青山一角夕陽銜。隔斷喧囂境不凡。有客空亭閒眺遠。桃花春水送輕帆。
佳景自得佳句。

彭定求

字訪濂江南長洲人康熙丙辰賜進士第一。官翰林院侍講。著有南畝詩稿。

望日謁文山先生祠時予中丞方議重修用杜詩蜀相原韻

信國孤忠汗簡尋。荒祠憑吊劇蕭森。旌旗曾壯吳疆色。絲竹空埋魯壁音。自注。祠爲長洲舊學。斜谷出師原比烈。睢陽仗節本同心。樓崩棟折勞興復。瞻拜遺容一振襟。比以忠武唯。臨恰如分量。

五人墓

偶泛蓬舸繞郭來。摩挲墓碣久徘徊。重看俎豆登鄉社。尙想干旌捍黨魁。白刃爭櫻千載烈。青雲並附九京哀。蕭蕭松柏凌秋爽。遺臭生祠安在哉。自注。墓爲毛撫。建魏逆生祠處。

湯陰謁岳忠武故里廟像

忠武鄉閭駐轍過。柏陰森列更摩挲。辭家壯志憑孤劍。報國先聲震兩河。北塞攀髯魂正遠。西陵埋骨淚偏多。天傾宋社殊難問。可奈乾坤瀕洞何。

胡會恩

字孟輪。浙江德清人。康熙丙辰。賜進士第二人。官刑部侍郎。著有清芬堂集。○侍郎不以詩鳴。然含宮咀商。天然明麗。其品自貴。

書京江先生南苑詩後

御溝楊柳參差碧。夾道宮槐吹綠雪。六飛初幸玉泉迴。南苑春蕪駐仙躡。帳殿涼颺五月寒。晾鷹臺畔簇雕鞍。至尊乙夜開經幄。中使星馳召講官。曲江學士蓬山彥。著作承明侍清讌。每依石室展牙籤。頻直彤闈聽銀箭。當今天子擅聖神。一遊一豫行時巡。上林獸簿不足問。石渠典籍時相親。屬車載書三十乘。特簡儒士隨八駿。先生奉詔有殊恩。郊原寓目多名勝。拳毛躑躅沙路香。平明珥筆紫荷囊。致君一卷虞書

在卿雲復旦。賡陶唐。霏微銅鶴鑪烟細。丹陛從容傳聖意。天苞地符世莫窺。河洛千秋未宣祕。俄傳鑾輅下離宮。羽林七萃依蒼龍。競識相如參侍從。千羣組練一章縫。歸來振筆詩千首。雲霞灑翰蛟螭走。鸞尾淋漓進尙方。岐陽石鼓同不朽。休風盛事載瑤編。不數橫汾宴鎬年。願將茂草虞箴頌。譜入薰風和舜絃。
此紀文端公侍直南苑時事也。表主臣之一德。揚文藻之清華。末語頌箴兼至。悠揚婉轉。可誦可絃。

珠江雜詠

我愛珠江好。風光入嶺偏。帆飛蜃斗水。杖倚鷓鴣天。穗石仙蹤古。花田粉澤妍。扶胥望不極。身在海雲邊。
我愛珠江好。天南接大洋。山家蠓壁峙。海市鬣帆揚。酒雜檳榔醉。茶勻茉莉香。最宜新雨後。炎暑變清涼。
我愛珠江好。駢羅雜卉多。叢篁迷澀勒。異果熟波羅。火米生黎貢。蕉紈細馬馱。木蘭新艇子。溪女唱蠻歌。
我愛珠江好。清娛事事幽。名香散東莞。佳硯採端州。水驛梅花晚。山村荔子秋。新來解蠻語。倚樹聽鈞鞀。
雜入廣南風物。鮮妍軟順。不求工而自工。

題張蓮若侍御疏稿

太阿持節甫。釀禍實烹宗。誰使貂璫魄。猶存馬鬣封。青山無穢骨。勁柏有霜容。我讀西臺疏。清威徹九重。
侍御名璫。祁門人。疏請削逆奄魏忠賢墓。時論共快之。○魏奄死後。墓猶幾埒陵寢。碑稱完吾公。乾兒義孫。列名其末。皆宰臣。璫貳也。侍御奏後。得旨發而平之。以木石充永定河工。用許春明夢餘錄中。

金陵

建業曾傳半壁安。秦淮鳴咽暮濤寒。六朝寂寞青山在。十廟陰沉畫壁殘。禾黍故墟屯鐵馬。烟花南部失雕闌。隔江玉樹歌聲斷。更有哀絃向月彈。

秋曉

銅街列炬簇鳴騶。倦客中宵攬敝裘。曉柝尙嚴人語靜。寒星欲沒露花流。宮鴉影散金門曙。朔雁聲傳碣石秋。擾擾緇塵驚歲晚。江湖迢遞引羈愁。

蘇州送春詞

畫屨蒼苔陌上蹤。一春心事怨吳儂。曉風欲倩遊絲綰。愁殺寒山寺裏鐘。未到曉鐘猶是春。故愁聽寒山寺鐘也。點入寒山。乃切吳地。

翁叔元 字寶林。江南常熟人。康熙丙辰。賜進士。第三人。官至刑部尙書。

病中雜述

邇來有微疾。遂得身閒居。隱几發清思。且復親詩書。夜闌不成寐。落月明前除。漸覺萬慮捐。往往見太虛。多恐疾良已。此念又復初。多病道心生。親歷其境。者能言之。結意自警。

我初亦何爲。無端在陶冶。我身既非真。況乃名氏假。因復被虛聲。從人置高下。微生屬醯雞。世事付野馬。浮雲與電光。於我何有者。此意卽道。心生之驗。

下第出都途中偶成

孤踪寂寞與時違。匹馬荒郊趁落暉。有影自隨還對語。無家可老尙思歸。花當寒谷先秋落。雁叫空江帶雪飛。棄婦可憐身已去。向人猶整嫁時衣。

聞官軍收八閩

三年轉戰苦蒼生。禁旅傳餐滿市城。竇氏已來關右表。令公猶典朔方兵。卻看星象書含譽。自注。司天奏金鑿星見。應有花名賜太平。自注。宋仁宗時蜀地賈名卉。賜名太平花。願得臨邊諸將帥。許教隴畝事春耕。

陳錫嘏字介眉。浙江鄞縣人。康熙丙辰進士。官翰林院編修。著有兼山堂集。

賦得長安一片月

誰領高秋意。當頭片月看。碧空雲自淡。金掌露初溥。柝起街聲靜。砧鳴夜色寒。清輝應萬里。不獨照長安。
送湯西崖歸西冷

馬蹄經歲踏京華。忽逐征鴻去路賒。何物關心歸思急。孤山開徧早梅花。

王頊齡字顯士。江南華亭人。康熙丙辰進士。已未召試博學鴻詞。官至大學士。諡文恭。有世恩堂詩。

魏忠賢衣冠墓

熹宗之朝闕寺亂。不數弘恭與石顯。門下誰非謁者兒。朝中半作貂璫犬。吁嗟氣勢真回天。茄花委鬼相鈎連。楊左諸賢一網盡。鎮撫獄底屍駢肩。門生天子差彷彿。張父趙母何憐然。紛紛祠額徧寰宇。賜瑩特

勅營生前將作起冢同祈連。罽毞門闕踰董賢。一朝冰山忽傾倒。凶骨不得歸三泉。摩挲碧雲舊碑碣。忠賢姓氏猶高揭。侯覽當時旣伏誅。衣冠誰使留空穴。安得雷火一夜仆此碑。更倩龍湫之水洗羶羯。山靈面目還清潔。此詩成於張侍御奏請削平之前。故望水火燒除洗滌之。

喜湖南諸路大捷和學士李容齋前輩韻

降旗千片廩君船。妖婦春澄夢澤天。百粵風烟通馬援。八公草木走苻堅。帝心自切平吳後。廟算真成下瀨先。從此蠻方歌大定。竹筇蒟醬貢年年。

籌邊屹屹建高樓。兩岸灰飛赤壁舟。首惡暫稽軍鼓燮。遺俘難免檻車幽。早擒孟獲趨滇水。急斷盧循入廣州。萬里長江消垢堞。直從楚尾至吳頭。

送李天生歸養

廿年高隱爲承歡。詔趣蒲輪卻聘難。聖主愛才非強志。大儒報國豈須官。鄒枚詞賦清時重。黃綺風流異代看。遙想綵衣歸拜舞。朝恩家慶話團圓。以養母急於辭官。盡子職。即以報君恩也。立言有體。

張榕端 字樸園。河南磁州人。康熙丙辰進士。官至禮部侍郎。

登岱

寰中羣嶽震爲尊。到此真窮造化根。曉日銅鉦升海國。長河衣帶挂天門。下方雷雨晴空見。上界星辰靜

夜捫九點青煙俱在掌。不須更擬上崑崙。

王吉武字憲尹江南太倉人康熙丙辰進士官紹興太守著有冰菴集

重修六賢祠成展祭作自注黃忠端公諱驥素倪文貞公諱元鑑施忠介公諱邦曜周文忠公諱鳳翔劉忠正公諱宗周祁忠敏公諱彪佳皆越人明季殉難

乾坤有傾折。憑誰奠蒼黃。成仁取義間。得爭日月光。末世務苟活。橫流決隄防。不有數君子。何以扶頽綱。明季丁否運。婦寺紛蝸蟻。羣賢共憤爭。杌隉正氣揚。暨暨有黃公。請劍擊貂璫。糜爛北寺獄。冤血流園牆。逮乎思陵末。大盜劇披猖。京城竟瓦解。宮闕屯豺狼。倪周並詞臣。就義何慨慷。賦詩整冠帶。引脰遂絕吭。共志有中丞。仰藥裂肺腸。雲車駕風馬。同日從君王。維時劉與祁。解組各歸鄉。號咷義旗舉。自矢百鍊鋼。未幾湛荒晏。南都復淪亡。兩公竟致命。先後歸帝旁。一甘絕勺飲。僵餓追首陽。一起赴清波。懷石同沉湘。區區於越地。山川靈氣翔。凜凜得數公。勁草卓秋霜。平生所樹立。理學兼文章。末路更完節。浩然還旻蒼。聖朝重褒忠。祀典載輝煌。守土風教責。表揚分所當。立廟傍饗宮。六賢共烝嘗。昨秋大風雨。摧我西廡廊。周垣半傾圯。不能庇堂皇。率先亟修築。勿使沙礫荒。椽桷新丹雘。木門飾倉琅。登堂薦蘋藻。肅然對冠裳。卽事有根觸。霑襟涕浪浪。疇無君親恩。俯仰默感傷。表忠烈詩貴峻警不尙奇僻敘述六賢詳略分合各見筆法韻語中合傳體

釣臺謁嚴先生祠

釣臺突兀千山裏。釣竿獨拂桐江水。藏名遯跡山水間。爲有故人作天子。眼底不知赤伏符。意中安有侯

司徒京華筆札非所慣。自笑故態猶狂奴。變輿朝臨只高臥。伸脚無端驚帝座。中興將相列宿明。不若江湖客星大。千秋片石何磷峴。遺廟江邊棧棹新。左方右謝同縫掖。自注方雄飛謝舉羽且喜不染管纓塵。行人繫棹孤亭下。瞻拜高風心獨寫。紛紛名利獨何爲。堪歎征帆往來者。不著議論自高

許由瓢

瓢挂樹。一葉輕。風吹濩落夜有聲。不若爽之夢亦清。天下非大瓢非細。身外之物總爲累。不可以律有心。下而不與之心。
然巢許心事。盡此二語中。

劉參軍鏞

伯倫沉酣萬古轉睫。解醒五斗。隨身一鐻。塊然土木。委化從之。杳杳冥冥。天方醉時。末語形出典午之昏四字抵什伯言。

郭汾陽

令公來敵壘開。免胄直進胸無猜。花門錯愕拜馬首。遽前譙讓執其手。指天爲誓酌杯酒。願擊吐蕃贖厥咎。此時神策觀軍容。方建大議幸河中。回紇入寇時魚朝恩操白刃宣言於朝。勳車駕幸河中劉給事抗言爭之乃止。

李臨淮韞中刀

大將不能辱於賊。韞中置刀雪一尺。自拚熱血戰場傾。不令衆死身獨生。大旗連颯鼓聲陡。前鋒小卻命取首。突騎陷堅壯士吼。河陽破賊獸獸散。走幸無監軍掣其肘。一掣其肘九節度敗於相州矣。唐時大弊於此指出。

破龍澗

法雷夜響滄江底，鐵井怒裂毒龍尾。空山石破眞珠噴，一夜化作蓮花水。潺湲萬壑聽琴聲，野花落澗春香生。清寒自是瀉石髓，霜液豈染蛟涎腥。火髻電鬣從天下，至今寒泉尙餘緒。千年松老褪蒼鱗，猶似蜿蜒神物化。山僧晚汲風滿衣，洗鉢貯得眞龍歸。膽瓶插花佛前供，雷雨還從鉢內飛。奇傑矣，卻非長吉派。

高層雲

字謨苑，江南華亭人。康熙丙辰進士。官至太常卿。著有改蟲齋詩。

送周紫海遊華嶽

巨靈擘連山，洪河乃東落。峻嶒豁雙華，高天擢蓮萼。千峰列兒孫，供伏類卑弱。少昊揚金精，元氣鬱磅礴。古來避世士，長嘯此巖壑。濟時心孔殷，神化特假托。我觀陳圖南，壯志小寥廓。蒼生本無與，何爲墮驢矐。龍蛻邈千祀，繼者仍寂寞。青齊得周子，有道軌藜藿。不謂猶龍姿，養晦同屈蠖。長風吹孤雲，飄然向京洛。攬秋嘯儔侶，攜手城南郭。言將尋玉井，側帽裹芒屨。到日想躋攀，翠棧飛猿獍。箭括通一門，烟霞任揮灑。仰首問寥天，願偕玉女博。凌空笑退之，爾何有餘愕。濟時心事，托之神仙。李鄴侯其尤著者。陳圖南亦然。鄴侯顯而圖南隱耳。明眼人能見及之。

瞿唐

連山接巴東，地險勢復壯。誰闢鴻濛開，插天列青嶂。灩澦立江門，突兀獻奇狀。摩挲兩鐵柱，越歷幾興喪。驚濤奔紫崖，魚龍不敢傍。衆山自迴合，前行欲何向。初疑水際窮，忽轉天心曠。恍如出甌底，沸釜掀層浪。

赤甲與白鹽，開闢似屏障。丹黃蒼翠間，日色相摩盪。割據慨當年，雄長不相讓。流覽臥龍圖，英姿迥堪尙。探奇自茲始，彌覺心神王。

韶陽道中

滇源出大庾，厥勢頗奔放。況遭峽石束，鬱怒不可狀。南流匯武水，有助氣益壯。上疑建瓴瀉，下乏砥柱障。崖石壁巖岈，灘隴鬪濤浪。既歎沂流險，復經暑雨漲。湍急工倍勞，風弱帆空颺。更當巖巒削，卻苦牽挽妨。翠壁千篙攢，歲久石受創。自注：崖壁間，篙痕深三四寸者，不可勝數。前林日欲頽，暮色歎悽愴。坵塍倚荒茅，孤槎庶可傍。極擬杜陵

雖未入神，已能超俗。

故園

故園渺何處，延眺獨傷神。親老久爲客，囊空長傍人。淚兼花作雨，愁似草逢春。何日還桑梓，商歌原憲貧。

葉舒崇

字元禮，江南吳江人，康熙丙辰進士，官中書舍人。

荷蘭國進千里馬歌

皇帝御宇之六載，負辰致政歸彤墀。大開明堂治六服，萬國會同車馬馳。海波不揚通遠道，紛紛重譯來京畿。九州之外荷蘭國，人物竊停言兜離。一朝稽顙表忱悃，驕驅作貢稱珍奇。雄姿逸態世罕有，奔騰千里猶嫌遲。駟嘶自許邀寵眷，不憚跋涉經險巇。牽來獨立玉階下，遂令凡馬皆驚疑。姬王詎必重八駿，漢

帝安用遣貳師。那知至尊方偃武。端拱南面垂裳衣。詔謂圜人歸廐下。予以銜勒聊鞿羈。鸞旗在前屬車後。朕乘此馬將安之。聖朝豈復畜奇獸。留茲用慰遐方思。

金陵有感

狂來不減步兵愁。行盡清溪古渡頭。極目羣山還繞郭。感時雙鬢怯登樓。桓伊邀笛人誰在。謝傅圍碁豈尙留。俯仰只言天塹險。白鷗紅蓼滿汀洲。

卷十一

毛奇齡字大可。浙江蕭山人。康熙己未。召試博學鴻詞。官翰林院檢討。著有西河詩集。○西河滿深。所以不得爲醇。儒藝林惜之。

打虎兒行

禹州民朱兒。救父打虎。史使君廷桂獎勞之。予識之。禹署。

打虎兒。乃在汴梁之禹州。禹州城外朱家樓。小兒十一。隨父耕。深林有虎斑毛成。颯颯黑風吹草根。乘風攪人誰敢攔。小兒不識虎。疑是狐與狸。陡然見虎銜父肢。咆哮草際風來吹。兒啼向風不得父。把杙打虎截虎路。三尺童子五尺杙。憑空擊去著虎臆。虎驚顧兒舍父逸。深林風草皆無色。禹州太守呼小兒。予之

以帛飽以糜。予時在署識兒面。披髮跳擲真兒嬉。問兒打虎虎何似。舉手張牙作虎勢。假虎隱慢恐小兒。小兒驚避力不支。當時見虎得無怖。此事我亦昧其故。禹州太守省得知。是時小兒知有父。男兒七尺縱復橫。爭名攫利萬里行。高堂存沒總不問。那肯舍命戀所生。我所思。打虎兒。正說小兒之忘身救父。易於平直。得假虎隱慢。恐小兒一 繼則小兒之至性愈出。見此時小兒知有父不知有虎也。此詩有闕名教。西河集中尤爲拔萃之作。○深林豐草皆無色。七字抵他人可數十言。

詔觀西洋國所進獅子因獲遍閱虎圈諸獸敬製長句紀事和高陽相公

古皇慎德開四譯。內被綏侯外蠻貊。貢物區爲王會文。共球載在賓庭冊。河鏐吠翟獻上方。兜離僂佻陳明堂。三靈旣應百神洽。般般之獸皆翺翔。康熙戊午十七載。神武聲名播遙海。五時從教白澤來。千門真見黃龍采。鴉翎習習負矢飛。雞斯之乘歸林支。諸方執贄儼相列。東漸溟渤流沙西。于中有國名古里。曾渡瀾滄作海市。魚眼看波射水紅。鮫絲織浪翻雲紫。地當申未產獸雄。金精傑出毛羣中。銜維飾組獻天子。裁貝作章辭禮恭。從容檻致射熊館。不爲珍禽爲懷遠。虎落時看接上林。鷹房秋到移南苑。廷臣侍從欲賦詩。皇恩有詔徐觀之。圓目昂鼻有筋力。懸星掣電無雄雌。獨憐形髮未卷曲。曳尾緹緹若散絲。衣被欲成鞠色見。牙齧不使鈎形施。爾時羣檻狎諸獸。木壘槍樊列前圍。熊羆避路不敢當。虎豹攀欄有時吼。青鸞赤雀相對栖。豪豬野馬爭游嬉。張昭見此不動色。朱亥在傍何所思。聞之有熊狩陽谷。獲得狡狴比牛畜。漢時安息亦獻斯。形似麒麟但無角。從茲郊祀播樂章。射鳥格鹿非尋常。鐃吹已陳朱鷺曲。徵歌還

及白狼王。何如儲待未完緝。詔遣求賢共來集。東堂甫布網羅成。西域剛逢旅獒入。招搖乍啓禁鑿開。白麟有對皆奇才。請看太保卷阿賦。恍見文王靈囿來。依原布置而編閱諸歌中仍以獅子作主。此分寶主識輕重也。一結尤得應制體。

朔方

天校神兵罷朔方。雙鍵不復挂漁陽。三秋白草綠關斷。萬里黃河入塞長。鐵柱分標滇外戍。金書異姓漢中王。從軍久負匡時略。愁見邊關到夜郎。

錢塘逢故人

西陵咫尺是天涯。喜汝從予江上槎。兩度陶朱思返越。百年張儉竟無家。鄉關恨屈鑽榆節。里巷羞乘廣柳車。壯士不還仍遠去。江東兄弟漫咨嗟。應是避禍出亡而不歸者。玩四語六語自見。

少年

少年仗劍出關中。羽衛新招六郡雄。久許報恩逾品政。平時飲酒笑秦宮。雞鳴曉日黃河動。雁陣秋陰紫塞空。當日粉榆遷欲盡。愁君馳馬過新豐。一結爲少年危之。應是負氣任俠。同於郭解者。

禹廟

夏王四載告成功。別禪苗山起闕宮。玉帛千秋新禱薦。衣冠萬國舊來同。金書瘞井封泥紫。窆石懸花映篆紅。一自百川歸海後。長留風雨在江東。

謁嵩嶽

太室開天表。崇邱奠土中。主名高四域。受秩比三公。日月環區宅。陰陽割渾濛。歌崧揚峻極。望祀體昭融。華蓋標方嶺。金壺啓上宮。翁河承漢禪。卜洛載周工。別觀翔修鶴。層城倚大熊。藏書憑玉女。過澗遇青童。洞閉能圍雪。梯長恍御風。羣山咸拱嶽。萬歲自呼嵩。槐弟封堯爵。萑羊採少翁。浮丘閒駕羽。子晉妙吹箏。石酒龍精白。崑花鳳首紅。煙霏春渺渺。水滴午濛濛。虛壑涵深鑿。空梁拔斷虹。天關應再闢。帝座儼相通。險塞分河內。靈祇屈岱東。神京懷舊服。終古賴攸同。典重齋稷

覽鏡詞

漸覺鉛華盡。誰憐顛頓新。與余同下淚。只有鏡中人。其實無一同心人也。然道來曲而有味。

弔姜貞毅詩

曾披闔闔扣天關。垂死孤臣未賜環。遺命一棺何處葬。宣州城外敬亭山。直書其事。忠義自見。

長門怨

玉殿金缸晚色新。殿前少使繡麒麟。夜來恐索長門錦。要賜平陽歌舞人。自注。漢內職有少使之號。○別便有多。少含羞。

贈柳生

流落人間柳敬亭。消除豪氣鬢星星。江南多少前朝事。說與人間不忍聽。

除夕作

旅館椒花紅欲然。椒盤愁向客中傳。如何纔聽金雞唱。便喚今宵是客年。

李因篤

字子德。陝西富平人。康熙己未。以布衣召試博學鴻詞。官翰林院檢討。著有齋祺堂集。○子德先生。邃於經學。顧寧人先生推重之。以公卿薦。召試當時所稱四布衣之一也。授官後。卽以母老辭。不許。表三上。乃許。情詞懇惻。比李令伯之陳情。則又過之。聖主之仁。人子之孝。字內共稱。不止羨其鴻軒鳳舉也。

紀別自注將往雁門

置酒歲云暮。北堂淡寒暉。飢鳥相與鳴。朔風厲重關。老母閱遊子。欲言先歔歔。不問何日行。先問何時歸。遙遙計往路。歷歷詢征衣。禠身慎自防。兼量寒與飢。長跪聞母言。銘心毋敢違。病妻勉下牀。相視首蓬飛。謂我當行邁。有淚且勿揮。

弟從母側來。再拜投一罌。征駒鳴前庭。擔負已出野。僕夫前致辭。冉冉西日下。要當慷慨去。不覺淚如瀉。兄言勤門戶。弟言慎車馬。

小子復牽衣。岐路含百慮。不知行何方。強欲借我御。念當遠乖離。何忍揮之去。悲哉遊子吟。斯須哀樂具。中懷如懸旌。搖搖不得住。依依天屬親。撫事媿童孺。三章不外一真字

題世冑都指揮使崔公汝明像

高皇養士三百秋。衛帥食恩等通侯。銘鐘書帛列上第。金罇玉案羅羣羞。一朝河上度機氛。虎嘯崑函不忍聞。赤幟無色鼓聲死。嬰城惟有崔將軍。將軍開國世家子。輕裘緩帶談經史。吹篴時過大司農。自注公尚書。北斗西豪俱在此。昭陽之冬月無陽。野鬪豺虎色玄黃。決背不知有鋒刃。疾呼白日生冰霜。臣矢已窮力戰久。側身誓天不相負。已拚先濺侍中血。寧料如生元帥首。紛紛侍衛盡同朝。今何蕤萎昔何驕。朝行出攻暮不返。歲寒松柏乃後凋。後來傳疑未傳信。壺祠蠋墓無人問。長留遺像天地間。勇者成仁懦者奮。崔係嬰城戰死者。後無人表白。故於遺像中表之。此等詩大有關係。

登代州白人巖因飲孫園

高切懸孤嶂。雙厓劃一門。好人多在野。春水自依村。爲野外人生色。春水自依村。五字天然佳景。不在鏤刻。

雨

只覺前厓好。何人並結廬。巖光倚薄。香閣靜含虛。法境清涼外。人煙戰伐餘。因聲寄蓮社。吾志在山居。
積涼乘秋見。鳴蜩滿地生。薄言風有隧。遑卹雨無正。河北多糶食。天南未解兵。十年留滯盡。鄉國意縱橫。經語作對。流連光景者不解道。

邊上

蕭關城堞望中分。鹿苑干戈道上聞。野霧卷蘆吹白日。霜清驅馬下黃雲。征西盡撤三千戍。鎮朔遙歸十萬軍。誰抱遺弓攀鶴表。賜冠空滿鶴鷄羣。

得傅徵君山信

河汾文獻未全空。蠱上乾初有是公。不卜同舟瞻郭泰。徒知中論擬王通。芳期虛訊春來鳥。劇飲猶傳雪後鴻。他日華門相候處。下車應拜采桑翁。以不事王侯重之中寫得信。末訂過從極見篤法次第。

潼關

雲薄關河紫氣長。帝樞曾此撼嚴疆。河經百二開天地。華枕西南鎖雍梁。戍火忽移函谷月。征車多帶灞亭霜。舊京蕭索垂千載。飛輓何繇接巨航。

望嶽

太華三峰列峻屏。晴霄飛翠下空溟。曉雲東抱關河紫。秋色西來天地青。玉女盆中寒落黛。仙人掌上接明星。亂餘林壑饒遺客。縹緲幽棲賦采苓。

尤

字展成。江南長洲人。康熙己未。召試博學鴻詞。官翰林院檢討。家居後。加侍講。著有西堂詩集。先生所著西堂雜俎。傳入禁中。章皇帝稱爲真才子。後入翰林。時聖祖稱爲老名士。位雖不尊。天下羨其榮遇。比於李青蓮云。西堂少歲時。專尙才情。詩近溫李。歸田以後。做白樂天。

流於太易。雖街談巷議。入韻語中。遠近或以遊戲視之。比於王鳳洲之評唐伯虎不知四十五至六十時詩。開闢動盪軒昂。頓挫實從盛唐諸公中出也。

送曾道扶司李漢中

江陵驛路滿梅花。計日連雲出谷斜。大丙山高環二華。五丁峽遠接三巴。蒲鞭寬厚隨羌俗。驄馬威儀近漢家。更上陳倉懷古跡。武侯殘壁起悲笳。音節高亮七子中近李滄溟。

題韓蘄王廟

忠武勛名百戰回。西湖跨蹇且銜杯。英雄短氣莫須有。明哲保身歸去來。夜月靈旗搖鐵甕。秋風石馬上琴臺。千年遺廟還香火。杜宇冬青正可哀。蘄王末路。至託爲浮屠以自免。爲功臣者亦危矣。莫須有。歸去來。一岳一韓。天然隲仗。

生日志感

半百年過意不如。自注。倒用杜句。看雲藜杖倚荒廬。平生最拙惟謀食。一事差強已廢書。蕭瑟江關哀庾信。飄搖風樹泣臯魚。何當燕市尋屠狗。灑酒荒天弔望諸。每於結處用力。故通體俱振。

登天寧浮屠絕頂望海

興至超然到上頭。憑虛蕭瑟見高秋。諸天冥冥人非想。大地茫茫我亦愁。俯聽蒼蠅喧萬瓦。遙看白馬走中流。海神未許探幽窟。倏忽風煙起蜃樓。有此胸襟。有此筆力。纔不負此題。東坡泛海詩。前賢未必不遜後人。

聞鷓鴣

鷓鴣聲裏夕陽西。陌上征人首盡低。遍地關山行不得。爲誰辛苦盡情啼。行不得。愈人所同知。此更翻進一層。便覺百端交集。

陳維崧

字其年。江南宜興人。康熙己未。以諸生召試博學鴻詞。官翰林院檢討。著有湖海集。○陳檢

特表之。○檢討年四十餘。尙爲諸生。有日者謂之曰。君過五十。必入翰林。梅

早發望亭

水宿弭旅情。挂席愆賓餞。洩雲映寒溪。緒風扇輕艫。暝增梁溪深。霽覺胥臺緬。棹歌寫風波。羣動互輾轉。沙鴛佇空明。江菼覆清淺。紅泉雨後流。白露草間泫。周覽雖言煩。幽默亦云闕。遠望姑蘇城。綺羅若在眼。舞基想餘粉。歌梁悔遺囀。餐霞趣未慰。折麻務堪踐。寄謝區中緣。揚舲恣婉孌。

謝公風格。

酬許元錫

嘉隆以後論文筆。天下健者陳華亭。梅村先生住婁上。斟酌元化追精靈。憶昔我生十四五。初生黃犢健如虎。華亭歎我骨格奇。教我歌詩作樂府。二十以外出入愁。飄然竟從梅村遊。先生呼我老龍子。半醉披我赤霜裘。此生闌入銅駝路。可憐老作江南賦。頭上不畏咸陽王。眼前只認了都護。晚交許子懷抱開。看爾不合長悲哀。手提一詩來贈我。十幅錯落紅玫瑰。我年三十餘。清狂愛兒戲。旁人見我笑不休。安知我有填膺事。日間擊鼓夜擊鮮。行樂安得千萬年。何肯齷齪學章句。三日新婦殊可憐。許子贈詩踰一月。念欲報之久不發。昨宵飽看冒家燈。一寸管城老龍渴。掀髯狂作許生歌。食紙春蠶響不歇。明朝歸客正揚舲。海色蒼茫青更青。

嶽嶽歷落。寫自己腹抱言。下并見許子一結闌然。

贈李研齋太史

人云蜀道如青天。君家乃在青天上。蠶叢鳥道不得歸。一度思歸一惆悵。去年石頭城。道遇李謫仙。手持白玉麈。囊乏青銅錢。一言稱意百不愁。邀我直上秦淮之酒樓。城南楊花白如雪。一一亂撲胡姬裘。笑謂金陵姬。何似巫山女。十年枉作劍閣銘。白鹽赤甲奈何許。昔住錦官城。樂事不可當。木棉花發處。斜對碧雞坊。桃笙寶布居民賣。蒟醬江魚過客嘗。此時二月粉水香。巴僮巴女發浩倡。賸錢夜市成都酒。歛歌春賽武都王。別來舊事心茫茫。傳聞李特屠殘疆。臥龍躍馬竟誰是。天彭井絡空蒼涼。前者百丈船。牽過鍾山郭。忽見三巴人。欽然萬金落。諸葛祠堂盡棘榛。譙周子弟俱俘掠。當時婉孌直銅龍。都堂香藥掖門松。自從喪亂著芒屨。飄零已復成吳儂。一身雖在不自保。何況盜賊多於蜂。瞿唐惡浪千萬重。念之祇復愁心胸。安能吹我落天外。蹲鴟飽作西川農。語君且飲勿愀愴。眼前萬事大鹵莽。故里新年棧道開。官軍已縛印笮長。太史蜀人。逆藩之亂。備寓金陵。不得歸。故作詩慰之。中問賤蕩飛揚。波平浪起。得青蓮逸氣。○賤錢變中以錢贖罪也。

得桐城方爾止先生書感賦兼懷密之先生

鯉魚風打江潮利。五月荊州估船至。船載沙門寶月師。附得樅陽故人字。我家聖廬同雞棲。負薪晝夜孤兒啼。開函仰紙未及半。申胡鬢栗聲酸嘶。書亦不能讀。淚亦不能止。憶昔芳華十五時。與君同作金陵子。金陵九門門九重。白靴校尉如游龍。賤子文名楊德祖。先君風表郭林宗。三千賓客遨遊徧。流兔飛英誰

不羨家伎新傳張敞眉。游童暗認王珉扇。桐山諸子盡江蕭。僑寓家家朱雀橋。風暖侯家春擊鼓。月明戚里夜吹簫。櫻桃小幄沉香火。楊柳藏烏門不鎖。密約呼鷹出每遲。私邀盤馬期常左。此日清流氣絕塵。此時修竹彈文新。諸王已見愁籤帥。郡國還聞捕黨人。阿童江上軍船動。毳帳連天馳繡鞚。一載昭陽恨已經。兩朝太學知何用。憐我袁家一慙孫。拾橡蕭蕭歸墓門。君不見孫郎戰沒周郎老。自注孫郎克咸周郎農父龍眠前輩獨君好君家尚有始與公臥看祗園生白草。寫兩家盛時極文酒講遊之樂而小朝廷之荒嬉馬阮之到密之先生。鏗然而止。章法絕佳。

顧尙書家御香歌

獵獵朔風翻毳帳。營門紫馬屹相向。陳生醉拘珊瑚鞭。蹀躞閒行朱雀桁。顧家望近尺五天。顧家父子真好賢。開門揖客客竟入。留客不惜青銅錢。玉缸潑酒酒初壓。秦箏促柱彈銀甲。綠鬢小史意致閒。卻愛微紅添寶鴨。陳生此時聞妙香。欲言不言神茫茫。心知此香世間少。得非迷迭兼都梁。主人重取蘭膏爇。此香舊事還能說。憶昔初賜長安街。金甌天下猶無缺。至尊桂殿日齋居。千首青詞錦不如。綠章夜上龍顏喜。第一助名顧尙書。嵯峨紫塞榆關道。白雁黃沙風浩浩。萬馬奔騰夜有聲。三關蕭瑟春無盜。尙書辛苦鎮居延。絡繹黃封賜日邊。非關小物君恩重。爲許名香國史傳。鏤金小盒宮門出。中涓一騎紅塵疾。親題萬顆小金丸。猶是昭陽內人筆。只今滄海已成田。留得天香幾百年。攜來綺袖人誰問。熏罷銀篝味不全。

白楊已老尙書墓。世間萬事都非故。主人語罷客亦愁。留客牽衣客不住。君不見客衣零落詎堪論。半漬香痕半淚痕。忍看天寶年間物。我亦東吳少保孫。

寄黃黎洲先生求爲先人誌墓

熹宗之朝盜竊柄。國事稠濁由諸閣。刊章告密滿天下。劫火烈烈崑岡炎。忠端骨鯁眞牢戶。少保強項遭髡鉗。三朝要典亂白黑。爾曹病熱徒狂譫。膺滂之後愛名節。翁與吾父均酸鹹。忠泉出井流不涸。孝筭拔地天能參。東都壇墀立名字。西園鴟閣紛桂襜。懷寧亂釐老逾怒。矯尾直拂鐘山巖。我師秋浦魁壘士。便樹頤頰張鬚髯。一呼袒裼暴猛獸。筆陣霍若霜鋒鈇。妖魔得志逞報復。一網盡矣心所甘。王師南下明社屋。人頭畜鳴盡夷殲。四十年來市朝換。曜靈急景奔驚颿。崇天門外黨碑倒。沙石磨治苔紋嵌。平生先子膠漆友。半作黃葉經秋芟。晨星落落只翁在。開元軼事餘誰諳。先朝鉤黨有本末。冰玉礪礪秋陽暹。今人往往咎過激。毋乃醜正叢譏譚。嗚呼吾父沒已久。墓門鬱鬱愁松杉。累翁一片道旁碣。請放健筆爲雕鐫。
寫兩家世誼。而兩朝朝局。一羅列。此絕有關係之詩。

憶貴池吳師

當代論兵會誰人。可擅場。劉琨歸朔北。孫策入丹陽。一諾輕車騎。千言破混茫。靈旗如彷彿。毅魄想飛揚。
師卽吳次尾也。負黨人之魁。懷填海之志。讀此詩。想見其人。

將歸留別練塘諸子

遊子衣邊雪，慈親地下心。都將苴杖淚，并作苦寒吟。此意復誰識，當歌難自禁。勞君霜夜彈，莫打失巢禽。

失巢禽，喻已爲無母兒也。從至性流出，惻惻動人。

捧讀石齋黃公所撰先少保神道碑賦此追感

周侯池畔樹蒼蒼，遺碣岩峴屹此鄉。哀誄南朝顏特進，碑銘東漢蔡中郎。千秋定論歸青史，一夜悲風起白楊。此日躊躇腸欲斷，漳南高塚亦昏黃。時石齋先生已授命，故追憶之。

秋日懷幔亭先生

百二山河極望殘，一門羣從盡南冠。誰憐鸚鵡籠中語，大有琵琶塞上彈。寂寞金雞雙闕迥，飄零石馬七陵寒。銀鐺夜宿昭陽殿，疑作西宮月影看。自注：先生繫處，卽南國大內。

秋色蒼茫上佩刀，故人消息夢魂勞。石城劇報收袁粲，魯國驚聞捕孔褒。雪窖羝羊雙涕淚，錦官杜宇一悲號。好憑萬騎平南將，急趁江風挂戰袍。首章繫獄，次章遣戍，無可奈何，望其平寇以贖罪也。通體警策，無一懈句懈字，那得不傳。

送張若水出關自注：若水，碑恭先生子也。

祖母秦州父錦州，盧家少婦又邢溝。百年骨肉拋三地，萬死悲哀併九秋。欲贈媿無銀絡索，將離怕聽鈿篋篋。漢庭早晚流人赦，望爾歸鞭度隴頭。自傳：一家三處，乃處常之時，此當擄罪出關，劇可悲也。一起直下四語，千鈞筆力。

嚴繩孫字蓀友江南無錫人康熙己未召試博學鴻詞官翰林院檢討遷中允著有秋水集○召試日以目疾止成省耕入觀詩已不錄上素重其名同授官

發維揚

輕舫春流上。煙光淨客衣。岸知綠海闊。山自渡江稀。細路花將盡。空村燕不飛。浮家吾自可。白首共漁磯。

寫盡渡江後一路風景不著繁華明麗詩品故高

春後

九春觴詠等閒過。猶染霜毫寫永和。困懶鶯花經眼失。衰遲風雨不情多。城隅綠水空絲管。天上青雲足網羅。不似柳陰溪上去。自橫艇子臥漁蓑。

煙雨渡江

京江春樹隔芊緜。咫尺神靈意惘然。青壁近迷山寺雨。綠蓑遙入海門煙。江魚水闊難通市。石燕風多不避船。我欲然犀照幽渚。夢魂猶自怯潺湲。

吳王井

銀牀玉甃總成塵。不及軍持汲尚頻。試看一泓清未已。鉛華先老沼吳人。比美人黃土意蘊藉幾許

龐

豈字雪崖直隸任邱人康熙己未召試博學鴻詞官翰林院檢討後出爲建寧太守

喜聞大軍收復川中

天險那得恃。先聲斬劍關。投戈填野水。窮寇哭空山。風獵軍旗動。雲連甲仗殷。將軍須努力。直取夜郎還。
未望其直
取吳逆也。

汪

楫字舟次江南儀徵籍。休寧人。康熙己未。召試博學鴻詞。官至福建布政使。有悔齋集。○悔齋出使琉球。宰臣以下。俱有贈言歸。撰中山沿革志。以備參考。

懷曾庭聞

有客吳江來。傳君忽為僧。不信溫泉中。一朝結為冰。十年騎蹇馬。一氣何驍騰。馬蹄踏白骨。月照光峻嶒。上書雖不報。誰謂君無能。激昂遂出世。夫豈憂繳矰。嗚呼壯士肝。永夜為摧崩。

鐵尙書歌

自注東昌城下作。

鐵尙書。鐵不如。東昌城門朝大開。齊呼萬歲聲如雷。燕王躍馬及門限。霹靂飛空下懸板。不斷王頭斷馬頭。鼠竄猿驚箭滿眼。王怒發礮城摧崩。健兒爭把整弧登。煉石丸泥難作計。一紙公然出埤堦。萬夫辟易不敢前。大書太祖高皇帝。黑夜斫營日堅守。能使英雄還北走。嗚呼神器天所與。一木隻手能齟齬。錚錚誰比鐵尙書。嗚呼尙書鐵不如。敘東昌戰事。毛髮欲動。讀去凜凜有生氣。

劉考功公馘見示夏峰老人書卷屬題長歌

夏峯老人雙眸空。論交只許劉考功。長安隻字不肯入。尺素突出開心胸。上言日讀數行書。衰老以此酬蒼穹。下言劉君世所望。不為韓富非英雄。虛堂披對正六月。滿天赤日來清風。老筆生硬轉斌媚。直欲處

處藏其鋒。良馬識途。惡荆棘。蒼鷹願擊。愁樊籠。江河日下。事日變。世無魯叟。誰彌縫。我聞劉君。昔偕隱。攜琴荷鋤。驚老農。盡散家產。別親串。逝將食力。深山中。若使至今。不一出。人間安用。雙赤松。待汝他日。濟時了。把酒問汝。將安從。

贈別澹公

出世翻多事。生平竟若何。批鱗真給諫。托鉢是頭陀。老驥當風立。冥鴻踏雪過。總無虛歲月。何用補蹉跎。

歡喜亭同玉明上人觀雲海

山與雲俱沒。憑高安所望。人初入混沌。天不改青蒼。撫掌通樵路。飛棉變客裝。松風響何處。澗水下鄱陽。
予於庚午春遊黃山。雨後親見此景。故知三四語之妙。

香鑪峯

奇峯真拔地。一鑊正當門。天近無棲鳥。藤枯有挂猿。白雲浮暮靄。紫氣隱朝暉。鐵屋何年構。風雷萬古存。
自注峯頂有鐵屋。傳聞風雷移上云。

黯淡灘

灘急不聞呼。千軍轉轆轤。神工較分寸。鬼伯待須臾。曲折憑孤櫂。安危仗一夫。會看浮萬斛。大海射天吳。
傳寫過灘之險。字字驚心悚魄。

出五虎門同石來次前使蕭給事韻

長年振柁倚高樓。萬里潮迎萬斛舟。浪打白頭都是雪。衣添六月忽如秋。蒼茫不覺千山遠。混沌真堪一氣浮。最愛乘風同快馬。漫將喘月笑吳牛。對結是結語令讀者不覺其對此法從少陵出

長史鄭弘良以王命請余畫像留國中口占答之

豈是中朝第一流。偶持龍節拂麟洲。大名那得齊諸葛。遺像何勞比益州。稍喜文章堪報國。誰憑骨相取封侯。靈臺一片真難狀。多謝傳神顧虎頭。東坡贈子由出使契丹云。單于若問君家世。莫道中朝第一人。起句蓋用之也。通體不亢不卑。何等身分。

朱彝尊

字錫鬯。浙江秀水人。明太傅國祚曾孫。康熙己未。以布衣召試博學鴻詞。官翰林院檢討。著有曝書亭集。○竹垞先生生平好古。自經史子集及金石碑版。下至竹木蟲魚諸類。無不一一考索。纂述如經義考。日下舊聞。詩綜詞綜。其最著者。又嘗集唐詩爲填詞名。蕃錦疑出鬼工。幾於人力不與。願寧人先生不肯多讓人。亦以博雅稱許之。

雁門關

白登雁門道。騁望勾注巔。山岡鬱參錯。石棧紛鈎連。度嶺風漸生。入關寒凜然。層冰如玉龍。萬丈懸蜿蜒。飛光一相射。我馬忽不前。抗迹懷古人。千載多豪賢。郅都守長城。烽火靜居延。劉琨發廣莫。吟嘯扶風篇。時來英雄奮。事去陵谷遷。古人不可期。勞歌爲誰宣。嗷嗷中澤鴻。聆我慷慨言。時來英雄奮。頂郅都。事去陵谷遷。頂劉琨。有此二語。

方見
結束

大孤山

兩孤去百里。宛在中流半。匪獨形勝殊。氣亦變昏旦。天梯鬼斧開。廟火神鴉散。昭昭雲月輝。歷歷明星爛。空水既澄鮮。浮光亦陵亂。飄飄御冷風。恍惚度銀漢。未有歸與情。空深逝者歎。

送林佳璣還莆田

高樓置酒觴今夕。愁聽驪歌送行客。搖落深知羈旅情。飄零況是雲山隔。林生磊落無等倫。鳳雛驥子誰能馴。一朝慷慨辭鄉里。幾載饑寒傍路人。平生崔嵬好奇服。流離恥作窮途哭。往往詩歌泣鬼神。時時談笑驚流俗。林生林生骨相奇。昂藏不異并州兒。看君富貴當自有。不合憔悴留天涯。高秋別我闔中去。行李蕭條慘徒御。客舍清江萬里船。鄉心紅葉千山樹。九里湖邊倚翠屏。穀城山下俯清泠。寒風江路兼山路。落日長亭更短亭。嗟予分手天南遠。惆悵河橋送君返。遠客休辭行路難。高堂應念還家晚。

將之永嘉曹侍郎餞予江上吳客章二丈爲彈長亭之曲并吹笛送行歌以贈章卽送其出塞

韋郎舊隸羽林籍。曾向營門教吹笛。不聽吳中白雪音。定呼鄴下黃鬚客。平原相見轉相親。置酒誇君座上賓。下若尊罍朝未罄。東山絲竹夜還陳。閒來坐我花間奏。玉洞飛泉響巖溜。古調多傳關馬詞。新聲似出康王授。問我東行到海壖。日斜江上慘離筵。還將北雁南飛曲。催送錢塘楚客船。船人搥鼓津頭泊。紅葉千山富春郭。忽作邊秋出塞聲。江楓岸柳紛紛落。哀絃促管不堪聽。賓御聞之亦涕零。挂席遠移嚴子瀨。看山直上謝公亭。聞君欲問雲中戍。雪消飲馬長城去。廣武營中折柳時。黃瓜阜上題書處。司農舊是

出羣才。此日征西幕府開。試向尊前歌一曲。梅花飛徧李陵臺。

平調中忽作變徵之聲。此高岑體。與李杜

主章二在席是客。篇中客多於主。而結處轉送章二。又以客爲主矣。作法甚變。

逢姜給事塚

黃門先生官左掖。力欲拔山氣辟易。虎豹天關閉九重。孤臣血肉徒狼籍。東萊蜃市易沉淪。南國相逢淚滿巾。青鞵布韉江湖外。誰念當時折檻人。

敘長篇於八句中。猶書家之縮本也。少陵短歌。如婁公不語宋公語。尙憶先皇容直臣之類。往往有之。

玉帶生歌

玉帶生。文信國所遺硯也。予見之吳下。旣摹其銘而裝池之。且爲之歌曰。

玉帶生。吾語汝。汝產自端州。汝來自橫浦。幸免事降表。僉名謝道清。亦不識大都承旨趙孟頫。能令信公喜。辟汝置幕府。當年文墨賓。代汝一一數。參軍誰。謝臯羽。寮佐誰。鄧中甫。弟子誰。王炎午。獨汝形軀短小。風貌樸古。步不能趨。口不能語。旣無鸞之鶴之活眼睛。兼少犀紋彪紋好眉嫵。賴有忠信存。波濤孰敢侮。是時丞相氣尙豪。可憐一舟之外無尺土。共汝草檄飛書意良苦。四十四字銘厥背。愛汝心堅剛不吐。自從轉戰屢喪師。天之所壞不可支。驚心柴市日。慷慨且誦臨終詩。疾風蓬勃揚沙時。傳有十義士。表以石塔藏公尸。生也亡命何所之。或云西臺上。晞髮一叟涕漣漣。手擊竹如意。生時亦相隨。冬青成陰陵骨朽。百年蹤跡人莫知。會稽張思廉。逢生賦長句。抱遺老人閣筆看。七客寮中敢噴怒。吾今遇汝滄浪亭。漆匣

初開紫衣露。海桑陵谷又經三百秋。以手摩挲尙如故。洗汝池上之寒泉。漂汝林端之霏霧。俾汝留傳天地間。忠魂墨氣常凝聚。小小一硯。傳出信國之忠。草羽之義。其實相隨。畢羽乃想像語也。一結硯與信國雙收。是何神勇。

送曹侍郎溶備兵大同

榆關蕭瑟二庭空。烽火平安九塞通。往日連師驚朔漠。只今市馬互西東。黃河天上三城戍。畫角霜前萬里風。知有馮唐論將略。不令魏尙久雲中。此章以下。俱近李北地。應是中年之作。晚歲俱歸流易矣。愚取先生七律。中年者居多。

宣府鎮

高城西北控燕都。吹角清秋落日孤。尙憶武皇巡玉塞。親從鎮國剖金符。宮槐御柳今蕭瑟。虎檻鷹坊舊有無。邊事百年虛想像。誰誇天險塞飛狐。

南鎮

稽山形勝鬱岩巖。南鎮封壇世代遙。絕壁暗愁風雨至。陰崖深護鬼神朝。雲雷古洞藏金簡。燈火春祠奏玉簫。千載六陵餘劍寫。帝鄉魂斷不堪招。

題南昌鐵柱觀

丹臺縹緲麗層城。鐵柱縱橫鍊紫清。陰洞蛟龍晴有氣。虛堂神鬼晝無聲。遊人自愛登高賦。仙吏仍兼濟物情。雷雨忽愁天外至。江湖元在地中行。

雲中至日

去歲山川縉雲嶺。今年雨雪白登臺。可憐日至長爲客。何意天涯數舉杯。城晚角聲通雁塞。關寒馬色上龍堆。故園望斷江村裏。愁說梅花細細開。學北地高入杜陵。通首一氣能以大力貫之而趨。

土木堡

平蕪一簣狼山下。九月驅車白霧昏。到眼關河成故迹。傷心土木但空屯。元戎苦戰翻廻蹕。諸將論功首奪門。倘遣金縉和社稷。祠官誰奉裕陵園。裕陵反國。由於不主和議。而羣姦以奪門論功。忠臣受戮。眞千古不平事也。懷古詩須選出正論。

謁大禹陵

夏后巡遊地。茅峰會計時。雙圭開日月。四載集輜櫜。國有防風戮。書仍宛委披。貢金三品入。執帛萬方隨。相古洪流割。欽承帝曰咨。寸陰輕尺璧。昆命有元龜。自授庚辰籍。寧論癸甲期。清都留玉女。惡狠鑿支祁。荒度功攸賴。平成理自宜。神姦魍魎屏。典則子孫貽。明德由來遠。升遐亦在茲。邱林無改列。弓劍祗同悲。回首亂羣后。傷心隔九疑。鳥耘千畝徧。龍負一舟移。斷草山阿井。空亭嶽麓碑。芒芒懷舊蹟。肅肅禮荒祠。黃屋神如在。桐棺記有之。筵誰包橘柚。隧或守熊羆。共訝梅梁失。因探窆石遺。竭來憑弔處。拜手獨陳辭。長律四章。議論正大。格律工整。俱能步武少陵。

岳忠武王墓

宋室偏安日。眞忘帝業艱。但愁諸將在。不計兩宮還。鄂國英雄士。淮陰伯仲間。策名先部曲。薄伐自江關。赤縣期全復。黃河渡幾灣。龍庭生馬角。雪窖視刀鐃。城下盟何急。師中詔已頒。盈庭尊獄吏。囊木謝朝班。相狡妻兼煽。和成主愈孱。長城隳道濟。大勇喪成臙。舊井銀瓶失。高墳石虎閒。銘功存版碣。鑄像列頑姦。曠世心猶感。經過淚獨潛。傳聞從父老。流恨滿湖山。朔騎頻來牧。南枝尙可攀。墓門人寂寞。江樹鳥緜蠻。宿草經時綠。秋花滿目斑。依然潭水月。終古照潺湲。

生馬角。視刀鐃。見二帝歸國有日。而甘爲城下之盟。不計兩宮還。見殺戮忠臣。固由秦檜而主。自壞長城。小朝廷可勝恥耶。前路明云。但愁諸將在。之者實高宗也。春秋之意。必誅首罪。信夫。

謁劉文成公祠

草昧經綸日。英雄戰鬪年。真人淮泗起。王氣斗牛躔。命世生良弼。卑栖役大賢。一官曾簿尉。千里正戈鋌。記室依袁紹。飛書謝魯連。神鷹思飽掣。威鳳必高鶩。漢祖除秦法。周王卜渭畋。廟堂才不易。束帛禮宜先。遂有君臣契。能令帷幄專。南征頻克敵。北伐旋摧堅。王會收三統。軍謀出萬全。河山分帶礪。冠蓋儼神仙。未辟留侯穀。長辭范蠡船。麒麟當日畫。竹帛後時編。一自邱陵改。重愁歲月遷。隆中猶故宅。綿上少封田。舊俗還祠廟。清歌入管絃。黃金遺像蝕。鐵券幾人傳。古瓦甍甍落。荒庭檜柏圓。蛛絲虛寢腎。鳥跡斷碑眠。想像陰符策。沉吟寶劍篇。前賢餘事業。後死尙連邇。去辭粉梓。栖栖到海壖。空林多雨雪。哀角滿山川。玉帳無遺術。蒼生久倒懸。憑留一黃石。相待穀城邊。

起與當代麒麟開。何人第一功。同一氣概。必如此纒。能鎮壓通體中間。敘完題意。撫躬自傷。飄然有圯下。

自命
之想

于忠肅公祠

昔在狼山下，軍書犯近坳。六師輕朔漠，萬騎失雷霆。土木塵常滿，龍蛇歲不寧。豆田沙浩浩，黍谷路冥冥。濟世須元老，長材總四溟。從容持國計，指顧悉兵形。瑕呂安羣議，劉琨表外廷。嗣王仍歷數，高廟有神靈。旣罷金縢款，無煩白馬刑。北轅旋翠輦，南內啓朱扃。命已甘刀鑊，功真溢鼎銘。春秋隆代祀，俎豆肅維馨。一自輅車至，難期堠火停。遺墟愁戰伐，大樹日飄零。碧草空祠長，黃鸝過客聽。霜鐘沉曉月，風牖繞明星。卞壺誰修墓，巫陽數降庭。讖還思雨帝，碑或墮江亭。遠水澄湖碧，流雲暗壑青。千年華表鶴，哀怨此重經。
四章末路俱敘自己悲
甲各能用意略不犯覆

卷十二

潘

末字次耕，江南吳江人。康熙己未，以布衣召試博學鴻詞，官翰林院檢討。著有遂初堂集。○稼

知錄及詩文集，又以未及刻華城志爲憾。蓋此書關天下利病，卷帙繁富，非大有力不能刻也。此
龍猶近古人。○詩筆直達所見，浩氣空行，韻語可作古文讀。而登臨懷古，諸作尤爲光顯騰上。一
罕與麗者。

卦山

卦山交山陽。孤峰獨崔嵬。下眺一氣中。稜稜露巖崖。森如六爻列。錯若諸卦排。我來正雪霽。寒空無纖埃。羣峯皎練明。萬柏攢疑苔。遠見介山巔。干霄白體皑。近矚交城城。微茫辨樓臺。文峪下西溪。汾川自往來。連山走黃河。屏展卻抱回。誰言萬家縣。形勢亦壯哉。守險在良牧。濟世須雄才。利鐵錮窮巖。健馬嘶風哀。劉淵亦可人。石匣爲之開。蒼天不可問。浩歌舒遠懷。偶然登臨。與懷守險。安得僅以詞人目之。

天都峯

黃山百千峯。茲何獨稱長。大巧不炫奇。尊嚴故無兩。中天開帝廷。萬靈此朝饗。肅穆垂冕旒。森嚴排甲仗。梯空一萬重。拔地九千丈。煙雲升及腰。日月行在掌。羣山自言尊。對之失氣象。譬如見真人。羣雄自頭搶。蒼蒼百里外。孤標已瞻仰。卽之如可親。攀之莫能上。石闕望峨峨。天橋矚朗朗。載肉無由升。徒然結遐想。天都爲羣峯之尊。以其最高。日直上無欹斜也。予嘗有句云。四面繚換形不改。性正直無心。拔衆上。衆自莫敢敵。自謂得山之性情。讓先生詩。更覺籠罩一切。

碧雲寺

自注。寺旁有魏忠賢祠。甚宏壯。

香臺俯鴻濛。羣山四環衛。龍宮豁然開。樓觀湧空際。丹霞夾飛甍。珠樹蔭密砌。崢嶸神鬼工。照耀金碧氣。壯觀何能爾。創此自中貴。坡陀山頭塚。規模更閎麗。黃腸隧道封。玉魚便房閉。丹青儼祠宇。特敕蒙葬祭。豐碑刻鴻文。歷歷元宰製。行人不能讀。識者發歎慨。中官古來有。掃除職微細。念其犬馬勤。帷蓋斯可瘞。奈何濫恩私。王章褻奴隸。官號借台司。封土同帶礪。所以蓄神姦。毒燄流海澨。然臍未快心。誰令此埋齒。

蒼涼金粟堆。寢殿非昔制。茲何尙巋然。石門鎖松桂。誰能手斧柯。千春掃氛翳。

韶州至清遠道中雜詩

滇陽峽百里。兩崖狀如門。江流日漱齧。崩剝露危根。空中頤雷削。骨立龍虎蹲。孤舟出其下。凜然悽心魂。石戴萬篙眼。壁縈千縷痕。溯流行良難。下峽如星奔。灘急波易駛。林深景常昏。奇峰遞迎送。百千互卑尊。或肖天榜挂。或疑鐵騎屯。心賞不暇接。目眩難具論。古來投荒人。鬱結聲長吞。壯觀有如此。何必非君恩。
宋爲投荒者慰。即九死南荒吾不恨意。

韓蘄王墓碑歌

靈巖山前塚壘壘。荒煙野蔓不足悲。巨石峻嶒戛松際。旁人云是韓王碑。韓王蛻去五百載。當年英名至今在。彎弓夜月射奔鯨。拔劍寒沙清瀚海。一朝雄姿爲枯骨。麒麟高塚營山窟。黃腸便房天府出。守冢萬家拜百笏。歲久但見蒿與藜。豺狼入穴狐兔啼。惟留一片石。千古靈巖西。靈巖峯高入雲霓。韓王勛名與之齊。惟王勛名震千古。手奠坤維揭天柱。磨日之戈射潮弩。半壁江山留宋土。可憐後此竟何人。忍使銅仙淚如雨。梅花落盡梨花開。遊人絡繹靈巖來。但上琴臺尋響屨。何人山麓披蒿萊。碑高三丈字如掌。帝製鴻文盛褒獎。縱使碑刊墓盡平。蓋世功名在天壤。君不見錢塘飲馬江不流。鳳山宮闕爲荒邱。張王秦相墓何在。六陵蕭颯冬青愁。
縱使碑刊墓盡平二語。摸之有稜。便覺平調皆振。

贈杜于皇

男兒無家復無國。六合飄然一孤客。客行落落雲出岑。其去無跡來無心。山水佳處便淹泊。偶然相逢不可尋。黃岡豪士世無偶。胸吞雲夢者八九。神鷹鏖翻不能飛。丹霄碧海將安歸。三十年來泛江舸。大塊無塵能著我。商山須眉大澤裘。遊戲人間無不可。往年訪友揚州城。州人喧呼看歲星。如雲冠蓋趨門庭。先生酣眠醉不醒。醒來洗眼焦山青。金焦如螺意不快。一葉翩然下江瀨。青邱方壺不可期。白龍赤鯉遙相待。我亦汗漫之遐方。束髮結交多老蒼。惟翁差池未識面。江雲關樹空相望。錫山葉脫蠡湖朗。散步禪房見邛杖。怪來避地已經年。笑我勞勞逐塵鞅。昆明劫火方洞然。老鰲抃山波接天。土偶桃人莫相笑。久客會有還山年。先生無事但宴眠。大瓢滿酌清冷泉。君不見君家杜陵喪家者。茅屋秋風淚盈把。揮淚高歌洗兵馬。是畸人是豪士是詩老而歸於遺民奔放願性有千金戰馬注波蕩澗之奇一結尤見神勇

華峯頂

崑崙之脈從天來。散作嶽鎮千瓊瑰。帝怒東南勢傾削。特聳一柱名天台。天台環周五百里。金翅孽翼龍分胎。峯巒一一插霄漢。潤瀑處處奔虹雷。華頂最高透天頂。萬八千丈青崔嵬。乘雲御風或可上。我忽到之亦神哉。遊氛豁盡日當午。洞視八表無纖埃。南溟東海白一杯。括蒼雁宕青數堆。千峯簇簇蓮花開。中巖端巖一蓮臺。華藏世界宛如此。醯雞不識良可哀。渺茫誇閬苑。荒忽求蓬萊。何如天台靈異在人境。劫

火不到無三災。神泉自流琪樹不栽。彌山藥草滿谷丹材。應真隱顯混樵牧。飛仙遊戲同嬰孩。羲之乏靈骨。太白非仙才。已住神山卻歸去。空餘石屋寒蒼苔。我已夢覺牆根槐。安能更逐魚龍脍。徑須習定棲峯頂。飽看滄桑三百回。文章最重起手。如張說作姚崇碑。起手八柱擎天數語也。題得崑崙之脈。從天來二語下便縱橫說去。無不中節。中一段眺望山海狀出天台如蓮華之形而華頂又如蓮臺。真是與醜落筆。予嘗登其頂。愈知此詩之佳。

荔支盆

荔支盆來三山。枝頭壅土生根難。荔支盆上建浦。衝波峻灘挽舟苦。短篷愁日復愁雨。荔支盆過仙霞。千夫肩荷百吏遮。汗流骨出愁鞭撻。從此浮江湖河去。嚴程晝夜不停住。焦枯顛頓十存五。寥落猩紅綴孤樹。蓬萊宮中掩露嘗。冰丸入口流瓊漿。寧知一丸數金值。百旬勞擾千村忙。大臣事君自有禮。忠孝不在養口體。爭新作俑彼何人。釋騷煩費無窮已。不貴異物惟吾皇。勤求民隱恆如傷。誰能上書罷貢獻。令人千載思唐羌。東坡洛陽相公忠孝家可憐。亦進姚黃花。猶屬婉諷。此正繼而談歸美君上而望臣下之陳書。尤爲得體。

金山

萬古標形勝。中江一柱尊。水分天作壘。地坼海爲門。鐘磬來波面。蛟龍聚塔根。斬王血戰處。墜馬有驚魂。張祐金山詩。一結不振極矣。此真神完氣足。

峽江

峽江山對鎖。不覺有江來。船向羊腸出。城臨虎穴開。燒畬穿嶺急。水碓撥雲回。客鬢先秋白。何煩一葉催。
一起。峽中形勢寫盡。此下直如破竹。

贈錢飲光

蹠血生還萬里天。土牀樹屋尙依然。箋餘易象研朱細。踏徧雲山著屐便。久矣泥塗書亥字。淒其衰白感丁年。誰憐靈武麻鞋叟。老向空山拜杜鵑。
錢先生一生學問志節悉爲傳出。亥字丁年脫胎飛卿而工力亦可相敵。

經姜給諫墓作

青峰一曲抱愁雲。中有先朝諫議墳。往日兒童識鄒浩。到今野老哭劉賁。山頭樹屋稱殘卒。地下戎衣見故君。埋骨便爲乾淨土。豐碑華表漫紛紛。
給諫臨沒曰。我奉先帝命。遺戍來此。殮我當以戎衣。其子從之。

二姜先生祠

自注。給諫塚。行人塚。

軾轍齊名世早知。百年忠義繫人思。忠傳折檻排奸日。義想銜刀伏闕時。兩地青燐埋宿草。一山紅樹妥新祠。吳門野老多相識。雪涕爭看幼婦碑。

白雪樓

百尺高眼四海空。滄溟文坵夙稱雄。生平婁水塌籬應。死耐虞山玉石攻。盛世才華容傲睨。達人官爵謝牢籠。清嚴標格依稀在。華鵲蒼寒落水中。
四語耐攻而不盡破也。猶劉隨州五言長城。秦系攻之之意。若二袁鍾譚。竟不耐攻矣。於此見下字之妙。

登嵩山絕頂

不辭觸熱上嵩巔。欲遣雙眸盡八埏。翠嶺千重包楚塞。黃河一線下秦川。長安遠隔浮雲外。鄉國微分四
練邊。清嘯一聲鸞鶴應。隨風飄去落何天。聲徹層霄高於王李登岱諸作。

吳聖玉歸自遼左志喜

夢想流人紫塞邊。每依雁候祝南旋。不圖真有珠還日。始信非無瓶乳年。人痛嵇康罹橫天。天哀李燮予
生全。鄉音無改容顏肖。破涕應知慰九泉。數行墨牒隻身歸。歎息家園事總非。門巷凋殘餘燕壘。親朋零落半鶉衣。難尋手澤書千卷。且拜荒阡樹
十圍。野老村童爭擁看。烏頭能白世間稀。

浴日亭

孤亭臨望盡重溟。天水相摩不斷青。日躍半洋皆紫電。潮來大地一浮萍。鵬遊世界原空闊。蜃吐樓臺自
杳冥。何必褰裳慕蓬島。當知此地卽珠庭。

羊城雜詠

一錄

歷山尙住宋遺民。文陸當年事苦辛。窮海不春猶正朔。孤航無主自君臣。忠魂鬱作潮頭怒。浩氣蒸成蜃
闕新。異代流風多感激。草間時有納肝人。弔文陸而并及明末諸忠。按字結響。擲地當作金石聲。

廣武

蓋世英雄項與劉。曹姦馬謖實堪羞。阮生一掬西風淚。不爲前朝楚漢流。嗣宗含蘊意爲作者道。出知人論世正須如此。

天柱峰僧餉黃獨

黃獨分來瓦銚邊。香於紫芋大於拳。笑他懶瓚渾閑事。誤卻長源三十年。借纒芋事比例。巧於立言。詩人之心。比似春蠶作繭。

徐

鈞字電發。江南吳江人。康熙己未。召試博學鴻詞。授翰林院檢討。著有南州草堂詩。○虹亭先才。而虹亭之見重於端毅。端毅臨沒。謂梁真定曰。吾才如徐君。可使之不成名耶。於此見前輩之愛。填詞極工。晚歲成本事詩。遠地購求。比於洛陽紙貴。

送方爾止還金陵

爾從雪水來。片帆不肯住。乘風夜過洞庭西。蘆花瑟瑟滿寒渚。渚清沙白今送君。朔風旅雁高入雲。官司捉船船戶避。津吏前頭不敢行。問君歸思一何切。笑指征衣已百結。旅館朝來花正繁。客愁今去柳堪折。雙槳隨君送君去。莫忘江城離別處。遙指金陵宮闕旁。蔣山夜火烏棲樹。住意盡而不盡。

落花篇

洛陽城外花如綺。洛陽城內歌鐘起。一夜東風吹滿枝。片片花飛逐江水。江水春流暮轉深。江干日暖生紫蘋。參差碧樹波光裏。蕩漾紅潮愁殺人。憶昔郊原全盛日。芳菲千里春如織。香車翠幃掩紅妝。寶勒金羈跨紫陌。陌上遊絲爭繞樹。嬌鶯乳燕紛相度。桃李蹊成白日斜。棠梨院鎖黃昏暮。誰料繁華類轉蓬。紛紛

紛墮紫又飄紅。杜鵑血染胭脂裏。蛺蝶魂迷芳草中。歎息年光空自好。玉顏零落憑誰保。花謝花開無盡期。委地飄階不須掃。別有佳人斂翠眉。翩翩衫袖淚雙垂。明年依舊花爭發。開落庭前知爲誰。春花開謝。歲以爲常。而芳華一去不復返矣。比唐人意轉覺婉約可思。

晚發京口

潮洄泱泱忽聞雞。風飽江帆葉葉齊。瓜步曉鐘寒雨歇。楚天濃樹溼煙迷。已從擊楫悲荒壘。更想沉舟聽鼓聲。回首甕城山色遠。驚濤猶在海門西。

古意

歡從京口來。儂向秦淮住。一夜暮潮生。分離不知處。與君家住何處。一章同一聲口。

十八灘

萬壑千峯送客舟。槎牙怪石水交流。嶺猿莫更啼深樹。只聽灘聲已白頭。極寫灘字之可畏。中夾入嶺猿一語。則險惡愈出。此加一倍法也。

李澄中 字渭清。山東諸城人。康熙己未召試博學鴻詞。官至侍讀。著有漁村集。

題丁野鶴先生魚龍卷

何人懷此跋浪情。下筆快寫滄洲鯨。世間萬事難自料。爲龍爲螭須臾成。荇藻交憂細如縷。小魚瑣屑何

足數中流。忽斷煙波關。乾坤冥冥雜風雨。此時海裂天吳愁。滄江倒立崑崙浮。中有赤鯉閃光彩。金鱗逆水聲颼颼。彷彿疑聽洪濤風。細觀又似蓬萊宮。星海下注積石遠。黃河上溯龍門通。鱣鮪昂藏不知量。鼓鬣搖鬣亦爭上。可憐魚服苦束縛。撥刺泥沙色惆悵。赤鯉力猛陡一穿。雙角突出雷火纏。半身未化露魚尾。半身已入天門煙。嗚呼龍變不可測。畫工具有神明力。雲行雨施徧八極。涸鮒蹄涔淚沾臆。通體精采。一結如讀感士不遇賦。

晚抵襄陽

橋上一鳥啼。燈明兩岸齊。星垂古峴口。月照大江西。地險分南北。時平罷鼓鼙。兒童清夜裏。還唱白銅鞮。

登太華寺大悲閣望滇池作

香臺高擁萬山平。無數煙雲繞澗生。杯底嵐光浮太華。簷前秋色挂昆明。空餘戰壘悲戎馬。似有霜風動石鯨。我醉欲留歸路晚。滿湖鷗鷺權歌聲。三語是登。四語是望。

沅州山中聞鷓鴣

空山雨氣散新秋。匹馬王程不少留。怪爾聲聲行不得。七千里外過沅州。

徐嘉炎

字勝力。浙江嘉興人。康熙己未。召試博學鴻詞。官至內閣學士。著有抱經齋集。

丁巳新秋讌集李客部園亭送李南枝分符之武林

水精簾卷夜光浮。蓮蕩田田梧葉愁。燕市離筵南浦月。吳山歸路驛亭秋。客星已見雙辭闕。鄉夢還驚獨倚樓。醉踏軒轅臺畔草。丁香可解結綢繆。

陸

葵字義山。浙江平湖人。康熙己未。召試博學鴻詞。官經內閣學士。著有雅坪集。

自豐城抵萬安江水大漲

春江灌潦水。百堵沒滄洲。釜已遊魚鼈。涯難辨馬牛。櫓聲來木杪。帆影度城樓。雙劍沉何處。清宵起暮愁。
杜詩寫江漲。未曾及此。

邱象隨

字季貞。江南山陽人。康熙己未。召試博學鴻詞。官洗馬。

贈程穆倩

病後相逢邗水涯。歲寒雪壓客廬斜。縱然淡盡人間事。又寫青山過酒家。
以畫易酒。韻事也。得上句一韻。則倍形其韻矣。詩須如此用筆。

倪

燦字闇公。江南江寧人。康熙己未。召試博學鴻詞。官翰林院檢討。

送喬文衣之劍州

渝峽遠通涪萬水。嘉陵險接閬中山。分符刺史初行部。舊語參軍正解蠻。幢布芋田徵稅薄。青松白鶴訟庭閒。他年更奏殊方績。應在文翁伯仲間。

袁

佑字杜少。直隸東明人。康熙己未。召試博學鴻詞。官翰林院編修。

月夜遊秋水橋岸

藕花短短葦花齊。漁艇秋煙草閣西。出寺溪雲隨意遠。過橋山月趁人低。與誰相對惟孤鶴。何處尋僧信杖藜。砧杵不聞千戶靜。蕭蕭城闕夜烏啼。

玉階怨

玉階無人行。徘徊玉階側。皎皎明月輝。照見妾顏色。未嘗言怨。令人言外思之。

高

詠字阮懷江南宣城人。康熙己未召試博學鴻詞。官翰林院檢討。著有遺山堂詩。

臨江中秋同諸公慧力寺泛舟回遂集愚樓玩月分體各賦

丁丁蓮漏秋宵短。銀屏華燭明高館。瑤席清尊坐不遲。芳洲畫幟歸何緩。入窗花霧香霧濛。珠簾四角垂玲瓏。桂花扶疎玉除冷。菡萏披折金塘空。千家羅幕蘭鐙淡。明月正過寒江東。羣山寂寂鎖蒼翠。碧漢金波光瀉地。揮杯夜醉使君樓。題詩晚出城南寺。美人接座氣堂堂。騏驎腰褭爭騰驤。雄劍荆鐘爍紫電。北斗擢戶森長芒。二十五聲何太早。胡牀坐嘯重傾倒。朱棟華榭倚半空。鳳絲雁柱愁清曉。霓裳仙子歸海宮。沾衣涼露廻天風。桃笙醉臥不知處。東方疊浪朝霞紅。結處得東方漸高。奈樂何意。

宿青溪

青溪獨宿處。遠火出江波。醒酒思殘夢。歸漁聞夜歌。月斜人語定。舟曉棹聲多。九子煙霄外。勞生只暫過。

三四傳出孤舟夜宿之神。

遊青原山寺

青原山半寺，積雨長苔痕。路轉遙聞水，峯回直到門。雲林清磬落，巖屋影堂存。欲問無生偈，孤雲起石根。

過謝臯羽墓

許劍曾傳此地遊，豐碑遺墓尚荒邱。龍髯墮海三宮淚，馬鬣封山萬古愁。處士宅邊寒雨夜，嚴陵灘下暮江流。當年慟哭聲如在，散作西臺檜柏秋。西臺慟哭爲文丞相也，故有第三句墓在釣臺旁，近方干故宅，故頭聯及之。

歸舟作

江上羣山擁髻螺，楚王臺畔榜人歌。白蘋風裏暮愁重，紅藕香中秋夢多。漁火夜殘收別浦，水禽月出叫寒莎。頻年躑躅孤舟客，回首平生空逝波。

馮

字方賓，江南長洲人，康熙己未召試博學鴻詞，官翰林院檢討。

沈莊樗幽居

楊柳塘東更向東，綠蒲紅蓼各成叢。三家村口少人過，獨木橋邊有路通。老屋短垣披薜荔，主人長日注魚蟲。客來彷彿桃源內，雞黍爲歡話古風。此太史贈先大夫者，寫景屬辭，如謹岳鳴集，中長句詩成四十年矣，每一披讀，情事宛然。

王

字惟夏，江南太倉人，康熙己未召試博學鴻詞，以年老授官正字，回籍著有碩園集。○碩園係鳳洲司寇之後，婁東十子中尤錚錚有聲。

日本雙刀歌爲子存叔賦

鷓鴣之膏雙于將燈下拂拭生神光青蛇赤蛟欲隱躍忽令四座驚寒霜雀環色黃犀靶黑積鐵傳來海東國風胡歐冶知何人卻帶千年戰場色婁城斗氣非模糊雄者不飛雌不呼牀頭夜夜肯相守吾家大阮頻摩挲男兒意氣自奇突試脫儒衫舞回鶴莫借他人去報仇尊前且伴封侯骨

鄧漢儀

字孝威江南泰州人康熙己未召試博學鴻詞以年老授官正字回籍○孝威與國初諸前輩遊洽聞廣見所選詩觀共四集雖未脫酬應然亦足備後人採擇嘗度大灰嶺有句云人

馬盤空細煙嵐返照
灑新城王公賞之

平淮西碑

雪夜功成罷鼓鼙昌黎碑版照淮西文章何意開讒妒婦女偏能混品題易代麻鞋爭國寶常牽奮筆掃

鯨鯢只今蒼碣斜陽外頻見遊人駐馬蹄李愬妻唐安公主謂碑文歸功裴度誦其碑語後文昌重撰立碑其實段敘愬功轉至如昌黎之朝也

毀段碑仍立碑
碑千古快事

枕煙亭聽白三琵琶

寒日林園尊酒陳琵琶急響似西秦赤眉銅馬千秋恨譜入鷓鴣絃最感人

北極諸陵黯落暉南朝流水照青衣都將寫入霓裳裏彈向空園雪亂飛自注時正雨雪

白狼山下白三郎酒後偏能說戰場颯颯悲風飄瓦礫座間人似到昆陽

天寶傳頭竟屬誰。四條絃子斷腸時。蠻靴窄袖當墟女。今日公然識段師。盜賊縱橫。沿桑變易。俱於琵琶中彈出。與落花時逢李龜年相

似所感深矣。

題息夫人廟

楚宮慵掃黛眉新。只自無言對暮春。千古艱難惟一死。傷心豈獨息夫人。其用意處須於言外領取。

孫枝蔚字豹人。陝西三原人。康熙己未。召試博學鴻詞。以年老授官。正字。回籍著有漸堂集。○漸堂詩辭氣近塵。然自有真意。稱其人品之高。近有秦人胸無典籍。好為大言。至云作詩先洗去

李杜俗調。庸妄如此。而人羣然信之。云遠勝豹人。不可解也。錄漸堂詩附記於此。

覽古

房瑁隱陸渾。矯矯負令譽。天下為己任。高談頗有餘。一朝將重兵。車戰竟何如。所恃楫與秩。豈知皆豎儒。哀哉四萬人。流血成溝渠。名士苦無用。萬古成歎歔。有愧諸葛公。不輕出茅廬。

同友陪吳園次登多景樓時園次赴湖州任

出城送客共躋攀。萬里煙雲杳靄間。天下江山如此少。古來冠蓋幾人閑。潮頭日午添帆影。樓角風微散酒顏。五馬臨行重回首。知君魚鳥最相關。

遊焦山

風起中流浪打船。秦人失色海雲邊。也知賦命原窮薄。尚欲西歸太華眠。翻用東坡性命窮薄。輕江潭句各有其妙。

盛 楓字丹山浙江秀水人康熙辛酉舉人官安吉州學正

盆花

木性本條達。山翁乃多事。三春截附枝。屈作迴蟠勢。蜿蜒蛟龍形。扶疎巖壑意。小萼試嫣紅。清陰播蒼翠。攜出白雲來。朱門特珍異。售之以兼金。閑庭巧位置。疊石增磊砢。鋪苔蔚鱗次。嘉招來上客。讌賞共嬉戲。詎知芟幹薄。未久倏憔悴。始信矯揉力。託根非其地。供人耳目玩。終慚棟梁器。芸生各因依。長養視所寄。賦質諒亦齊。豈乏干霄志。遭逢既錯誤。培覆從其類。試看千尋松。直幹無柔媚。風折求媚豈棟梁之材乎。通幅比體使人言外思之。

主意在一結。

白洋河阻風

大河流日夜。噫氣北風號。霧影蠶魚市。寒威縮馬毛。客程千里倦。酒價一時高。欲作憎騰計。終宵聒怒濤。刻寫風寒不留餘力。

黔陽

雲壓萬峯低。秋江晚樹迷。籃輿凌木杪。驛路挂城西。有客停孤館。無鷺下五溪。蕭蕭樓外雨。愁絕聽寒雞。

陳王猷字良可廣東海陽人康熙辛酉舉人官連州學正

由方丈右轉上海山門自注海山門丹霞山最高處緣鐵索乃可上

飛樓倚嶽岑，環迴覺路塞。四望窮躋攀，斗絕石痕闢。窺天剛半線，拔地乃千尺。鬼斧鑿何年，儼有巨靈跼。鷗鷺息羽翰，猿猱罕蹤跡。當茲斂形神，直上緩登陟。鐵絙右鉤梯，手腕參足力。左顧眴然深，瀕洞曛以黑。納趾踵外垂，高尻面內迫。神人御風行，中道尙棲息。自注：崖中有御風亭。況在塵世間，寧有次仲翮。我幸及其巔，置身高峯峿。出險憑虛無，茫然蕩心魄。若茫似杜，鏤刻近韓。

趙執信

字伸符，山東益都人。康熙己未進士。官左春坊左贊善。○贊善以譙飲，觀劇去。宣時年尙未壯也。高才被放，縱情於酒。酣嬉淋漓，馮媿四座，借以發其抑鬱不平之概。君子可以諒其志焉。○生平服虞山馮氏定遠稱私淑弟子，而於漁洋王氏著談龍錄以貶之。然責人斯無難，未必服漁洋之心也。詩品奔放有餘，不取蘊釀。茲所錄者，牛屬觀海集中之作。餘略見云。

棄婦詞

兩姓無端合，亦復無故分。昔時鴛鴦翼，今日東西雲。浮雲本隨風，妾心自不同。君心劇無定，見棄如枯蓬。出門拜姑嫜，十走一廻顧。心傷雙履跡，一一來時路。留妾明月珠，新人爲耳璫。不恨奪妍寵，猶得依君旁。寶鏡守故奩，上有君家塵。持將不忍拂，舊意託相親。此生一以畢，中懷何日宣。願得金光草，與君駐長年。

彭蠡湖

顛氣中流轉，煙光四週遭。層波碧離離，秋色寒滔滔。泠然乘風遊，託身任毫毛。仰觀天垂象，旁見林露梢。山移舟向背，目蕩心飄搖。北望千帆走，燦若組紉交。五老雲外笑，人世心魂勞。明當接匡君，舉手爲我招。山移舟向背，五字足抵一篇遊記。覺帆隨湘轉，望衡九面，語猶繁也。

泛海言懷

忽登萬斛舟，如躡長鯨背。寄身入無涯，曠覽乾坤態。潮動風色適，棹急雲光碎。潛通元氣遊，迥出人境外。千山相簸蕩，六合欲橫潰。頓覺喪我吾，何知齊小大。幼安漂泊久，謝傅襟情在。誰發小海謳，迴颿引雄概。

潛通元氣遊十字，應補水元虛之缺。

無風沂江崇朝十里忽得午風快然成詠

欲知舟上漉，譬若魚升木。因循日高春，跌宕水一曲。欹岸黃葉林，時露參差屋。遙數天末山，苦戀篷際目。何來快哉風，徑爲鼓帆腹。有如絕塵馬，或是避弦鹿。奔雲亂鴉鶴，碎浪喧琴筑。列墩爭送迎，願楫不暇矚。榜人嘯閑逸，余亦謝拘束。通塞自有時，結念毋欲速。

主意在末二句，能息人躁進之心。

行十八灘中

灘行日百轉，轉轉山四圍。寒流中屈曲，鬱怒不自持。秋凜肅殺氣，陸發龍蛇機。迴風地底來，雹雨皆倒飛。亂石勢騰攫，獰惡各異姿。似噴舟船逼，列陣前相追。篙師工避就，色授頤指揮。蓄力爭毫髮，險途生坦夷。遊子閱奔峭，驚定翻耽奇。秋雲搖水壁，杉木森下窺。弄波情無極，棹月願猶違。夕陽駐西嶺，爲我延清輝。

極險後寫出清爽景象。

平度州道中望東北諸山

秋風吹倦客。縹緲凌紫霞。赤松仙人要我。去爲駕白鹿青龍車。羽輪飄飛不自制。始計已失齊琅邪。大勞小勞遠相待。雲外如鳥遭籠笈。明霞碧落杳夢寐。玉女有爪羞搔爬。北行度膠水。惟見塵與沙。晴嵐百里豁心目。高望一點青於鴉。衆山肩隨出。戢戢木末爭槎枒。天柱孤標倚蕭爽。下笑兩髻魯始髻。東萊泰岱列首屈。不敢加。譬人名旣成。無事相矜誇。大澤東來獨雄傑。森然列仗排高牙。雲峯飛瀑落千尺。煙光蜃氣無由遮。臺閣嵯峨布空曲。浮金炫碧生谿笈。我今矯首意恂恂。況於抗策窮幽遐。人生能幾何。引領白日斜。海山有約易錯選。此中便可終來家。形容東萊泰岱累幅難盡。以撇爲點。工於避就。

人日韓江歸興

春寒晴壓空江水。山翠雲光蕩船尾。篙師搥鼓作迴颿。萬里還家從此始。人日他鄉人別離。郊原新綠已參差。遙憐沙渚多陽雁。肯向東風更退飛。

中秋與南村泛舟石湖望月

王郎與我能無愁。客中放棹尋清秋。清秋了知在何許。且遠城市辭歌謳。胥江水洗天宇淨。片帆輕駛如星流。橫塘西去見山影。蒼翠豁露霜煙收。楞伽靈巖兩迎揖。此中安得無夷猶。湖光一曲縈我舟。與子呼酒相勸酬。以湖爲酒恣拍浮。須臾湖月忽晃漾。照映天上白玉樓。鬚眉蕭颯風颼颼。飄然疑墜海外洲。卻視人世真蜉蝣。我已一身隨落葉。子亦一官成贅疣。不見吳越俱荒邱。魚城酒城何處求。伍胥種蠡同浮

漚。惟有石湖湖上月。會照石湖居士遊。西施溪畔餘溫柔。座中微笑寒花羞。子旣醉矣我未休。迴颿搗急不可留。夙昔中秋有此不。令我卻憶西湖頭。一湧而出。服其氣盛。

中秋夜與涇陽劉西谷編修吳山對月

東見千里江。西見十里湖。寒光斂合離。蕩此秋月孤。吳山秀接天。月出當其前。登高莽四顧。清輝滿人間。遠心忽飛揚。南北同一圓。我乘白龍越滄海。君亦赤鯉辭秦川。憶昔燕市別。九十度盈缺。寧知來此地。復共今夜月。雄城百萬家。歌吹方闐咽。邈然山顛客。一笑兩幽絕。明日扁舟江上風。思君獨在湖山中。

赴登州留別康海

微雨牽行色。離觴且對君。預愁見何日。不惜手輕分。遠海高於岸。空煙聚作雲。來朝倚仙閣。吟望背斜曛。五六境奇語奇空。烟五字尤入微妙。

寄朱竹垞檢討村居

江村水樹澹秋煙。不見幽人思悄然。往接簪裾三殿側。近聯蹤跡五湖前。老爲鶯脰漁翁長。閑上鷗夷估客船。各有彈文留日下。他時誰作舊聞傳。自注竹垞昔著日下舊聞。○七言律少首尾完善者。傳其佳句。故寧取和平之作。

邨舍

亂峰重疊水橫斜。村舍依稀在若耶。垂老漸能分菽麥。全家合得住煙霞。扶衰地有君臣藥。勸酒庭餘姊妹花。雨玩山姿晴對月。莫辭閒澹送生涯。此寓居吳中南園時作。

寄洪昉思

垂堂高坐本難安。身外鴻毛擲一官。獨抱焦桐俯流水。哀音還爲董庭蘭。昉思成長生殿傳奇於國朝時。演之宮贊在座御史彈劾去官。

事後以詩寄之。但比之董庭蘭未免視爲門下士也。

詠江岸拒霜花

霜裏風翻裊裊枝。可憐閒淡與霜宜。江妃無語空含睇。妬殺天寒獨倚時。

李孚青字丹壑。江南合肥人。文定公天籟子。康熙己未進士。官翰林院編修。著有野香亭集。○丹壑十六歲館選人以黑頭公目之。惜未四十辭世。故流傳詩篇絕少。

雍邱晚行

亭亭落日馬蹄忙。兩岸荆榛過外黃。嵐氣漸逢迷草木。煙村又見下牛羊。鄭當時去誰留驛。范史雲貧尙有鄉。惆悵昔賢遺蹟杳。青山無盡路茫茫。

秋日自遣

金風蕭瑟滿懷春。籬豆花開逐番新。舊業已荒猶嗜酒。秋陽雖熱不侵人。鄭家婢妾如師弟。梁氏夫妻似主賓。我是海邊息機者。任他門外急蹄輪。家庭之樂。無論於此。陸劍南每有此種名句。

稻孫樓

拜石人何在。孤城氣逼秋。郊原禾黍盡。愁上稻孫樓。此米元章樓也。無禾黍。偏上稻孫樓。觸目生愁矣。

早秋送宋又宜由太原歸里

酒場吟地五年同。忽餞青門往事空。三疊歌殘人不見。秋風吹淚古雲中。自是唐人神韻。

王材任

字子重。湖廣黃岡人。康熙己未進士。官僉都御史。著有西澗詩鈔。

和李梅谷選君贈別韻

去歲乘輶出井陘。今朝策蹇返江寧。鬚鬢巴雪添新白。鬢點吳霜失舊青。旅夢都迷南北路。歸程細數短長亭。從今不復看除目。手把神農耒耜經。

魯港夜泊

沙岸維舟近柳條。坐看淺水忽生潮。江湖夜靜逾空闊。星斗風來欲動搖。月下望鄉雙淚落。天涯多病一身遙。雞豚社飲應難與。獨倚船窗盡酒瓢。星隨平野闊。月湧大江流。寫盡江夜景象。此故工於脫胎。而星斗風搖。則又杜陵未道者。

追憶梁益舊遊

梁州秋葉落紛紛。沮水西來沔水分。斜去遙知南鄭路。道傍曾拜武侯墳。長藤婉婉纏秦樹。寒雨昏昏濕棧雲。鄰近墓門誰勒石。征西尙有馬將軍。

黃河

黃河萬里來天上。積石龍門道路賒。已是秋風迴瓠子。更憐春雨漲桃花。怒濤高壓千金堰。急溜初回八月槎。三策至今思賈讓。金錢那可委泥沙。

南昌卽事

章江依舊抱城流。楓葉蘆花瑟瑟秋。南浦閒雲迎故客。西山暮雨送孤舟。一千里外新蓬鬢。四十年前舊酒樓。自注。予十五。卽有南昌之遊。莫上滕王高閣望。不堪楚尾與吳頭。

沈朝初字洪生。江南長洲人。康熙己未進士。官至翰林院侍講學士。著有不遮山閣詩鈔。

過塘西

蘇隄踏遍上吳航。蘋末風生暮色黃。帆影帶歸湖墅月。衣裾留得芰荷香。采菱船過波紋碎。脫網魚跳水氣涼。行到小橋深柳處。人家煙火似橫塘。三四語頂蘇隄踏遍歸造意。造句在章莊羅隱之間。

春興

歸來安穩臥煙蘿。花信風柔春漸過。滿筵白雲人跡少。一簾紅雨鳥聲多。閒來垂釣常忘餌。病後慵書不換鵝。除卻浮家更無事。辦裝先去買青蓑。垂釣忘餌。書不換鵝。可以想其高品。

收復漢中恭紀

魚貫懸崖鄧艾軍。銜枚一夜度連雲。巴渝從此俱安席。莫待相如諭蜀文。
司隸章臨市不驚。鏡歌聲裏慶昇平。只今菑薶仍通貢。合挽銀河洗甲兵。

卷十三

梅

庚字調長江南宣城人。康熙辛酉舉人。

同愚山少參維饒孝廉卽席送位白歸皖

倚棹數歸程。親交次第行。獨憐江月苦。偏向別筵明。背郭魚龍氣。先秋蟋蟀鳴。還家仍客路。更傍石頭城。

落梅

背城花塢得春遲。凍雀銜殘尙未知。聞說綠珠殊絕世。我來偏見墜樓時。不寫墜面。專寫題意。自是絕世風神。

彭寧求

字文洽。江南長洲人。康熙壬戌。賜進士。第三人。官翰林院侍講。

擬古

靜躁殊軌途。人性安可矯。天旣賦吾拙。何用逐機巧。始進苟不正。晚節何由保。所以達人心。立身忌草草。
受恩惟恐多。入仕亦戒早。俯仰懷古人。守貞以爲寶。此即瞻庭先生言志之詩。生平進退。允符斯語。年命不永。未展素抱。朝野共惋惜之。

送大兄南還

重到承明半載餘。匆匆襖被返衡廬。營巢每笑逢秋燕。縱壑真同避釣魚。三徑春風侍童冠。一簾花雨潤琴書。故鄉自足林泉趣。最荷君恩許遂初。

金德嘉

字會公。湖廣廣濟人。康熙壬戌進士。第一官翰林院檢討。

得張師石書卻寄

杜門久與故人違。忽有音書到竹扉。過眼物華雙鳥翼。驚心風雨一牛衣。春雲江樹黃泥坂。秋水漁燈赤鼻磯。日暮狂歌當濁酒。不禁西望思依依。

許汝霖

字時菴。浙江海寧人。康熙壬戌進士。官至禮部尚書。著有德星堂集。

贈湯宗伯潛菴先生

豫州天中央。文星木躔角。靈山拔嵩少。德水交伊洛。鬱爲人文區。名賢代有作。煌煌二程子。千載振絕學。後來漸榛蕪。斯道孰開拓。先生出曠世。日朗螢火燭。蘊蓄富淵源。發揮啓囊籥。本根秋實茂。藻采春華落。圖報秭辭章。中懷諒已薄。初登蕊珠榜。遂入石渠閣。朝廷愛人才。破例展猷略。分藩試敷歷。江右專鎖鑰。蔚州老司寇。許子必斟酌。謂公真清廉。才品並卓犖。薦揚大臣事。彼此兩不忤。適當時右文。設科召宏博。公仍歸禁院。獻賦卑五柞。衡文來兩浙。悉剖荆山璞。還朝品彌高。比岱長羣嶽。東南資重鎮。宵旰切民瘼。簡在撫吳中。民望胥踴躍。吳俗久奢靡。正氣日以剝。大端示鎮靜。積習還淳朴。新圖鄭俠繪。淫祀懷英削。

百事具規模。羣情奉繩約。久困漸以蘇。病夫遇良藥。九重念舊臣。內召藉啓沃。袞衣行有日。里巷驚以愕。
畊樵出山野。商旅闐城郭。臥轍肩相摩。攀轅趾交錯。公去國本端。公留一方樂。計大無曲徇。眷隆有深託。
天子建文華。東宮開講幄。巖巖師傅席。醇儒執公若。禮儀視舉止。恭謹愈盤踞。崇階領秩宗。三禮兼典樂。
生平稽古力。蒙此雨露渥。憶余舊識公。回首事猶昨。初從魏公坐。相見獲酬酢。公貌謙而和。公懷端且恪。
始知賢達意。寧靜必澹泊。儀型儼在茲。小鳥隨鸞鷲。拜獻忝後塵。發蒙仰先覺。近聞媿姻輩。醜正忌磊落。
蠅營玉可點。火燎金欲爍。明良既相遇。衆女任謠詠。願公篤忠貞。襟懷等寥廓。他時明農歸。悠然臥巖壑。

送楊自西少司馬終養歸里

銅柱留名紀壯猷。翩然綵服放扁舟。兩朝養望儲黃髮。八座辭榮奉白頭。客久誰無歸里夢。官高偏忘倚
門憂。先生愛日情何限。手筆陔蘭進膳羞。官高不能養親。戀職有之。畏懼亦有之。然能哀切陳情。聖朝無
不諒其孝思者。王介甫云。古人一日養。不以三公換。居官者
其善。

送張侍御歸里

孤忠原不問升沉。正氣稜稜自古今。已見黃扉傳諫草。何妨青海解朝簪。一鳴終落憑城膽。三黜寧忘報
國心。從此歸田把鋤耒。塗泥終荷主恩深。上章教孝。此章勸
忠。立言自應爾爾。

史

夔字胄司。江南溧陽人。襄熙壬戌進士。官至詹事府詹事。○宮詹公詩。當時不必有赫赫名。然
迄今讀之意。足韻流。無一閑句。閑字。得唐賢之三昧者也。臺閣而不涉。應酬山林而不入。寒

瘦足規
詩品

長干曲

妾家長干住。嫁與里中兒。願同比翼鳥。生死恆相隨。豈知別離苦。郎作襄陽賈。昨夜鄰船開。寄書與郎去。大隄花正飛。歌舞醉芳菲。但言估客樂。誰勸不如歸。郎如白石郎。妾似青溪女。花落板橋南。年年長獨處。何日下江湖。相迎皂莢橋。還憂風浪苦。中道滯歸橈。怨而不怒
是爲雅音

合澗橋步月

門閉亂山高。月出萬象杳。攬衣步巖際。俯視羣木杪。霜黃樹色暗。地白人影小。湖光遠濛濛。巢鶴近了了。猿啼晚更急。虎跡寒覺少。還歸冷泉亭。坐待山月曉。詩思清
入骨

飛來峯

衆壑遞隱現。一峰獨亭亭。怪石煉五色。神功開六丁。秀骨琢天巧。孤根關地靈。花萼破空翠。劍戟攢高青。氣若逼星斗。勢欲凌滄溟。三竺共偃仰。兩高闢瓏玲。木生不假土。泉出還無形。倒垂萬菡萏。側走千雷霆。鳥徑不崩勞。鬼工太崢嶸。萬象歸窈窕。百靈入晶熒。洞門闔雨色。石扇羅秋屏。松雪夜了了。陽光晝冥冥。花塢亂楓木。水泉鳴茯苓。自注山有楓
木塢茯苓泉伏虎衛佛法。老猿守丹經。我欲問寶訣。歸來煉黃寧。極意刻畫讀
者如置身靈

驚峯
問

發京邑

靡靡卽長道，承命發華輶。寒風吹易水，涼月渡蘆溝。河梁霽暮色，驅車登古邱。西望九折坂，南顧江河流。江河多風濤，道路阻且修。欲濟川無梁，引領心懷憂。厲揭古有訓，慷慨懷前脩。慎風波履正軌言中言外均有之

陶靖節故里

淵明居柴桑，日與廬山對。云何詩百篇，未嘗道隻字。乃知作詩者，適然與興會。譬如日陶然，飲酒非本意。又如日鼓琴，無絃更高致。想見胸次間，纖塵無障礙。門柳故蕭疎，籬菊亦蕉萃。徘徊墟里煙，慨焉發長喟。詩以興會成，道盡詩人意趣，而以意不在酒，意在琴，證之陶詩，須如此讀，陶公人品，須如此觀。

無錫望惠山

九峯天半落，一棹夕陽過。客爲遊山盛，船因載水多。溪邊高士宅，月下榜人歌。好趁樵風便，輕船採芰荷。船因載水多，眼前語卻人不解道。

弘濟寺

戍削寒侵袂，給禡樹隱門。石頭依法座，佛足上江痕。山淺容舟入，潮平汲水渾。鳩鵲如有意，飛近水邊村。佛足五字，奇警似岑嘉州。

高郵

三十六陂秋孤城水上浮。魚龍尊窟宅。鴻雁叫汀洲。苔沒高沙館。潮平甲仗樓。片帆何處泊。身世一輕鷗。

淮安

西風下淮泗。潮落見三洲。臺沒空垂釣。詩成獨倚樓。帶刀餘舊俗。聞笛感新秋。寂寞山中桂。誰憐景物幽。
趙嘏山陽人。故有倚樓聞笛之語。帶刀用淮陰侯傳。

鳳凰山弔宋故宮

天目千年王氣摧。海門三日打潮回。繁華欲盡紅羊換。歌舞方酣白雁來。山鬼夕陽迷古路。銅駝陰雨泣蒼苔。當時不悟興亡理。錯怨西湖是禍胎。
紅羊換劫年。見張翥詩。白雁來。當時童謠兆伯顏來也。

涿鹿道中望西山

紅塵雨洗淨秋煙。黛色嶙峋夕照前。七月早歸彭蠡鴈。一山橫斷太行天。乘槎興已江湖外。捧日心猶霄漢邊。策馬高原頻悵望。薊門雲樹尚依然。

贈李解元鶚君

領袖詞場二十年。姓名還向榜頭傳。高才不肯居人下。畏路休教占福先。一甕白雲邀月醉。半牀黃葉擁秋眠。把君詩卷巡檐讀。轉覺飛騰讓後賢。
求占福先。必入畏路。老成易後生之語。高才者正宜書紳。

橫江詞

落日臨滄觀。西風揚子津。峭帆何處泊。愁殺渡江人。

採蓮曲

撥棹裏湖去。連隄種芰荷。折來與郎嗅。香比外湖多。

林處士墓

四壁垣衣絕點塵。茶經酒譜各橫陳。茂陵封禪無遺稿。始信文章到老醇。自注：范文正公贈林君復詩。風俗因君厚。文章到老醇。

塞下曲

明月中天秋氣清。令嚴刁斗最分明。前山夜半雕翎響。知是官軍射虎行。易落唐人白。科此能生新。

馮廷樞字大木。山東德州人。康熙壬戌進士。官中書舍人。○舍人性孤介。不入大僚之門。官閑無事。惟枕藉書卷。所為詩清警絕俗。詠古尤佳。山左中尤矯矯者。

論史

赫赫四公子。賢豪胥籠蓋。賓客久寂寥。餘烈猶未艾。匹夫尚輕俠。氣餒通中外。遂使法網張。豪傑蒙繫逮。關東郭解亡。濟南閻氏敗。庶姓甘屏息。富民徙關塞。大獄忽頻興。奸人弄機械。澆風熾一時。遺禍流異代。傷哉王迹熄。版籍久破壞。世族業摧殘。細民究何賴。根本終動搖。有國當深戒。尚俠之風。起於四公子。而遷徙關塞。非生民之福。亦非國家之福也。歸本於王迹之熄。見四民安業。必無此弊。真拔本塞源之論。

鐵犀行

武都怒特西入水。空舸野牛躡空起。逆潮蹴踏沔江濱。夜吼霜天猶掉尾。驚濤下撼龍宮。腥風促浪打沙觜。羣魚跳波鮫人避。一見凜然懾生氣。乖龍恃勢不受降。鱗間出火光射地。老牛鬪酣兩角折。兀然不動化爲鐵。風剝雨蝕三千年。垂胡猶帶戰時血。卽今江水白於銀。潮平岸穩沙無痕。漁舸一葉飛夏口。龍驤千斛奔荆門。篙工舵師坐收值。豈知鐵犀與有力。事往功成那可說。倒臥寒江千尺雪。只是控馭水勢。路故作奇崛。使入目眩心駭。少陵石犀行。以正出之。此以奇出之。故應各擇其勝。

黃鵠磯

沔江駭浪流淙淙。夾岸屹立雙芙蓉。黃鵠高峙郡城角。倒插石壁當其衝。上戴萬古神仙宅。下踞千尺蛟龍宮。我客江郊百無事。獨著雙屐攜長筇。斜日慘淡山徑黑。窮秋蕭瑟楓林紅。綠崖歷磴到絕頂。危樓突兀臨三重。森然魄動當檻立。參旗斗柄搖虛空。俯看長江一帶耳。翻疑天塹難爲功。迴身欲倚江閣坐。四窗白霧寒濛濛。神仙有無墮荒邈。英雄割據空遺蹤。冠古才人零落盡。感時五嶽排胸中。山雨初來樓角暗。躡級欲下心忡忡。憑高放眼一長望。茫茫八極雲而風。

荆卿故里

一卷輿圖計已蠱。單車竟入虎狼都。縱然意氣傾燕市。豈有功名到酒徒。空向夫人求七首。誰令豎子把頭顱。南來曾過邯鄲道。試問人知劍術無。不獨劍術之疎。直咎行刺之失策。此是正論。

歲暮書懷

我生漸與老爲鄰。虛負鬚眉著此身。范叔漫言天下士。杜陵空望眼中人。蕭條白髮雞豚社。辛苦金門蠟
蝨臣。自分支離本無用。不須彈缺怨沉淪。想見作者胸中無事目中無人。

謁諸葛公祠

壤垣歛徑野花幽。肅肅靈祠祀武侯。紅飯一盂村饗晚。黃桑千樹廟門秋。壁間畫妓遺巾帽。山下征人役
馬牛。太息高廳遊渭上。誰教天末大星流。點染本極見自然。

張華宅

水沒方城蔓草肥。司空舊第滿斜暉。人亡劫火羣書散。屋老秋風一劍飛。廣武勳名憐寂寞。式乾諫事記
依稀。如何少日鷓鴣賦。卻到封侯不解歸。憫其不能退所以受禍。

周金然

字廣庵。江南華亭人。康熙壬戌進士。官左春坊左中允。著有娛暉東觀奚囊諸集。

詠史

今年拜少翁。明歲封欒大。孰謂無神仙。有時見海外。文成食馬肝。五利亦誅死。孰謂有神仙。禁方舉妄耳。
殫骨非仙才。仙才安在哉。大鈞布羣物。修短一胚胎。至人獨不朽。不朽非形骸。世上豈有仙人耶。漢武亦有夢醒時也。但至人之不
朽者安在。試尋求之。

和陶飲酒

種苗荒東臯。種豆蕪南山。勤勤苦終歲。籌車迺空言。安得休糧方。藉以保餘年。不如營一醉。此方竟誰傳。
我思醉鄙人。乃在天地外。此林子羽語也。倘遇其人。可以往求此方。

東方仕代農。柴桑農代仕。饑凍非不切。矯厲重違己。食粟以養肥。食薇以養恥。章綬亦何榮。徒取耀閭里。
學道三十年。奄忽逼暮紀。窮達洵有命。消息隨坎止。萬變了不疑。大鈞吾所恃。
陶公樂天知命而工夫自憂勤惕厲始作者能體會之。

度九龍山

已辭潭柘山。更問他山路。山僧知我癖。好奇導入山中陰絕處。陰壑埋雲虎豹愁。披榛覓徑如有求。側身牽攀不可上。上者股栗神恟怳。一峯歷盡喘未蘇。前峯又復摧憂虞。我生筋力能幾多。諸艱歷試胡爲乎。樵子尋常不肯至。矧乃倦客冥搜強好事。磴危路滑行恐墜。徒旅微聞雜嗟喟。忽來片軸平如掌。相呼藉草狂歌賞。斯時四望覺身高。下視羣山離立皆兒曹。白雲冉冉騰山坳。便欲乘向閭闔隨逍遙。恨不攜將驚人句。搔首問天天亦怖。卻望居庸鳥道回。茫茫絕塞風煙開。燕昭遺烈安在哉。漁陽豪傑多蒿萊。古今代謝復何有。惟有茲山突兀無衰朽。呼取驢背酒一瓢。醉我山神勸我友。須臾雨過捲衣涼。薄醉都忘山路長。前于後唱滿空谷。山下人疑嘯鳳凰。

王九齡字子武江南華亭人康熙壬戌進士官至都御史著有尊香詩稿

竊祿

竊祿成何補。經年柏府居。無聲慚仗馬。有淚對刑書。救世人難跋。攜鋤願復虛。白頭濫朱紱。中夜獨躊躇。

憶沈樂存侍御

萬乘昔臨邊。千軍騁玉鞭。抗章親伏地。叩馬欲回天。難挽窮荒駕。終蒙聖主憐。索居追鯁節。好語汗青傳。

題旅店

曉覺茅簷片月低。依稀鄉國夢中迷。世間何物催人老。半是雞聲半馬蹄。余年老後轉嘗此境。讀是詩爲之惘然。

尤

珍字謹庸江南長洲人康熙壬戌進士官右春坊右贊善著有滄淵詩鈔○滄淵先生心平氣和每作一詩字字求安有鑿彈之者應時改定近人中無此謙抑矣少宗唐人歸田後改誌嘗有句云宗唐祿宋吾何敢前有東坡後放翁晚識自悔仍歸於唐如出遊者之反故鄉也所作滄淵劄記中道作詩甘苦極詳

遣興

春風吹庭樹。漸見綠葉生。衆鳥引雛出。翩翩飛且鳴。鷓鴣及雀蛤。物類善變更。惟人獨不化。感歎誰能平。萬事天所命。達觀息羣營。思遊五岳徧。入海登蓬瀛。浩蕩乘天風。吾將從此行。漸近自然去陶公不遠

東軒遣興

願此明月下。慨然思古人。古人不得見。世遠久失真。獨留詩書在。千載如有神。誦讀思尙友。風期遙可親。

毋爲守章句兀兀徒苦辛。

簡鄭山啓

閉關屏人事悠然習琴書。春色從天來。梅花發庭除。眷言同心友。音塵一何疏。道里豈云遠。咫尺東西居。日暮方停雲。好風吹敝廬。中庭望明月。竚立空踟躕。張籍學古淡作者近之。

題磨崖碑

有客示我磨崖碑。一幅之廣徑丈圍。觀者動色共歎賞。高文大字何瑰奇。憶昔天寶祿山叛。長驅鐵騎蹂京畿。至尊倉皇出奔蜀。太子靈武誓六師。禍亂方殷以權濟。苟不帝制衆志離。乃踐大位命諸將。收東西京不逾時。奉迎還宮就尊養。堯禪舜讓兩得之。漫叟夙推老文學。濡毫撰述中興碑。魯公筆力有神助。大書深刻青山陲。其後上皇在西內。張李交煽思傾危。奠定社稷誠大孝。何乃晚節晨昏虧。碑銘當日紀盛事。惟有揚頌無微詞。題碑後者爲涪翁。其詩未免多刺譏。讀書論世志未逮。摩挲古蹟空嗟咨。靈武卽位天下於安史爲正耶。肅宗之失在西內不朝不在卽位也。涪翁論深刻而牧齋錢氏比之楊廣之墓道深文太甚矣。篇中表禪讓之兩得。譏末節之有污。最爲平允而筆力亦復矯然。

采石磯

李白昔醉酒。曾遊采石磯。磯流一何急。弄月不知歸。山樹色猶古。江濤聲未稀。我來懷勝蹟。招悵對清暉。一筆揮酒人方不與。

寄家信

落日蒼然遠，浮雲天際翔。潮聲何處發，今夜宿江鄉。有客歸吳會，封題寄八行。明朝渡江去，烟水正茫茫。

筆力與前一首同。此種風格，本於齊、莒明人中。徐昌穀亦時有之。

鄴都懷古

風流佳麗魏王都，憶昔雄豪創霸圖。鄴苑人空花自落，銅臺伎散鳥爭呼。五官事業埋荒隴，七子才名付酒壚。惟有漳河東逝水，年年春漲浴飛鳧。

夜坐

花影忽移知月上，樹梢微動覺風吹。不看北斗天邊近，只道家園夜坐時。

吳苑

字鱗潭，江南歙縣人。康熙壬戌進士，官至國子祭酒。著有北影山人詩。○司成性仁孝，讀陽城賞諸生歸養語曰：吾人師也。身教之謂何。即日陳情歸，弟兄侍養，天倫之樂可知矣。諫到

家一章，令人神往。餘亦皆和平，輝綬之音。

自觀音巖過老人峯至天門

奇峯漸延矚，策杖窮登頓。獨怪夏已深，亭午露猶泫。懸崖若廣廈，少憩慰勞倦。情爲艱險移，目因應接眩。琪花不知名，古苔詎忍踐。高磴穿林頂，墜石橫澗面。移徙雷雨夕，云有蛟龍戰。再上老人峯，僂僂青松畔。獨居賓師位，不與羣峯亂。豁然天門開，雲端雙闕見。闔闔通呼吸，象緯可攀援。衣裾盡飄颻，御風冷然善。

何必生羽翰。始遂遊仙願。原本謝公寫老人舉二語能為山靈生色。

望後海諸峯

尋山興難已。理策出烟寺。晴嵐漾朝光。薄霧散空吹。荒塗沒人徑。一石一天地。環海千萬峯。劫初作兒戲。盼左與難盡。睠右賞不置。墜岸千仞青。嵌空一天翠。平生見名山。履險身忘悸。獨此奇無窮。瞠目不敢視。時造奇語令人驚絕。

到家

巷竹猗猗垂。山桂亭亭覆。入門拜慈親。白髮顏微瘦。薄宦十餘年。懽愛類穉幼。款款問中朝。不私及堂構。嬌兒髮垂額。及歸盡婚媾。闔門孫暗窺。茲客曾未覩。憶昔少年時。老屋墳篋奏。樹下共嬉遊。兄弟弟隨後。樹今已成圍。山石還如舊。擬采南陔蘭。相偕飾容臭。匪敢賦閒居。獻母南山壽。可參我徂東山第三章老杜羌村第一章而情事各別。讀者忠孝之心。油然而起。

峨眉山月歌送許時庵使蜀

我聞峨眉山。插天青嶙峋。上有太古雪未化。不知天地冬與春。高懸更有秋空月。雪上清輝尤皎潔。光耀磊落之奇人。西漢馬卿宋軾轍。況君秋水點雙瞳。九天銜命下蠶叢。清無遺照同山月。畢獻珠光錦水中。

宋

榮字牧仲河南高郵人官至吏部尚書著有縣津詩鈔○商邱公官部曹時列十子詩選中撫吳時有瀛洋縣津合刻又嘗選江左十五子詩以提唱後學固風雅之總持也所作詩古體

主奔放近體主生新意在規倣東坡時宗之者非蘇不學矣茲所錄者俱近唐賢諸作公晚年訂定意或轉在是與

蘇門徵君孫鍾元先生

吾道有攸屬。徵君儒者宗。椒山共里閭。少多烈士風。孝廉舉弱冠。懷抱凌蒼穹。傾身救楊左。高義等華嵩。更入賢相幕。談笑籌兵戎。晚值滄桑變。俛首簡冊中。蘇門山水窟。誅茆寄遐蹤。生徒環講席。一代開羣蒙。百泉闡妙旨。濂洛淵源同。豈學鸞鳳嘯。聊以臥雲峯。屢徵不一起。魯齋有婉容。伊余景行切。千里思扶筇。雖託弟子列。恨未接猶龍。雲霄拜短札。薄劣荷陶鎔。迄今二十載。太行仰巖窺。朱絃失遺調。歎息撫焦桐。作詩明嚮往。滔滔水流東。前爲義人後歸理學身親實踐之士非空談道術者也湯文正師事之詩亦列傳體製

和子湘春雪後夜坐效韋左司

梅花半將開。媚此雪後月。空亭耐春寒。坐到昏鐘歇。池光明檐楹。鶴唳激林樾。幽人默相對。詩思清到骨。清到骨三字自評其詩公集中以此種爲上

蓮花洞

嵯峨蓮花峯。中有蓮花洞。撲人蝙蝠飛。沾袂煙嵐重。斜陽倚洞門。清嘯山猿共。

贈太僕卿高公挽詩

高名天爵以建昌守殉難閩中

烏石峯高穴。羆虎赤狐跳。跟黃絨舞。血牙齧炙氣。益蠱紅帕抹。首錦纏股。妖氛一夜連。汀漳盱黎城邊波。

沸湯。太守弓刀夜乘障。不識眞卿作何狀。七尺誓與孤城俱。變生肘腋誰周防。去嗚呼南八眞男兒。壯士
隱忍欲有爲。不成死耳肯作賊。銜鬚茹刃甘如飴。璽書褒忠主恩厚。汗青焯焯行不朽。顏舌段笏今有無。
杏山鐵漢建昌守。

吳漢槎歸自塞外邀同王阮亭祭酒毛會侯大令錢介維小集作歌以贈用東坡海市詩韻

塞外長白橫長空。吳君廿載冰霜中。豈意玉關得生入。雲霄重望蓬萊宮。哀笳聽罷鬢毛改。縱橫老筆偏
能工。魚皮之衣捕貂鼠。曾披榛莽尋黃龍。甫草計寓書感生別。題詩慘絕梅邨翁。歸來兩公已宿草。惟君
懷抱猶英雄。時平好獻大禮賦。少陵遇合無終窮。相逢一笑快今日。俯仰況復當春融。談詩命酒皆老輩。
何惜傾倒玻璃鍾。楛矢石弩誇創見。君之所得亦已豐。夜闌醉眼望天漢。恍惚鵬綠磨青銅。世間萬事一
海市。且看梅萼開春風。

數月來聞汪鈍翁王勤中惲正叔劉山尉相繼謝世灑淚賦此

遠道頻傳薤露歌。人琴此日奈愁何。宋中耆舊傷心盡。吳下風流逝水多。塵篋祇憐餘翰墨。荒墳欲拜阻
關河。黃昏鈴閣題詩處。忍見空梁夜月過。

讀高念東先生瓊花觀詩因懷廣陵舊遊卽席聯句同念東先生施應山王阮亭謝方山

瓊花何意也愁人。念且遣當杯酒入唇。萬事揚州成舊夢。愚三生杜牧失前身。念雷塘螢火猶侵夜。牧

官閣寒梅待放春。阮亭吟罷新詩轉惆悵。愚山三分明月竹西塵。方山

烏江

落日烏江繫小船。拔山氣勢想當年。一間古廟荒烟外。野鼠銜髭上几筵。即一闕茅屋。祭昭王意。

訪葉已畦不值

別浦幽幽境愈奇。春風籃輦爾何之。小山叢桂清陰下。想見蒼茫獨立時。神韻自遠。

高士奇 字澹人。浙江錢塘人。欽賜翰林官。至詹事府詹事。著有扈駕歸田等集。

題盧徵君嵩山草堂圖

神髻在水不入筵。仙禽在野不受籠。達人泥土視軒冕。林巒剝跡偕洪濛。嵩山徵君巢許蹤。高柯百尺龍門桐。召拜諫官臥不起。草堂僻徑臨龍蹙。巖姿壑籟有神會。自寫不假丹青工。墨痕迥出濃淡外。絕境直與虛無通。手書十志字健勁。藤枝薤葉紛相蒙。在昔右丞妙詩畫。輞川舊本留清風。徵君絕藝亦兼擅。藍田少室將無同。弘農好古愜真賞。跋尾小印蟠絲紅。筆法獨啓元祐派。胚渾坡老兼涪翁。開運下迄淳熙代。五閱丁未雲流空。神物不隨陵谷變。浩歎者誰周益公。慶元到今復幾世。暗中呵護頌蒼穹。自注。五代楊少師凝式跋中。止書丁未歲前七月。宋周益公必大跋。以爲丁未乃石晉開運四年。是歲漢祖起於太原。復稱天福七年。又閱七月。故曰前七月。自開運丁未。至宋淳熙已歷五丁未。周益公跋於慶元己未。蓋寧宗五年也。黯然之光久愈發。何啻寶玉搖晴虹。我在修門昔曾見。愛此疊巘藏玲瓏。歸田五載親抱甕。柘湖拓地

芟蒿蓬。石廊洞戶頗幽雅。十指媿未爛皴烘。重來那免猿鶴怨。故園青碧孤芳叢。雲烟一卷快入手。槐根欹枕遊高嵩。因披畫而作夢遊也。

天馬行

蒲梢天馬本無種。渥洼水落神龍涌。旋風八尺雪花飛。玉削雙蹄高耳竦。千里萬里纔須臾。津津細汗流紅珠。天生此馬豈無意。要與皇路供馳驅。瀚海遙遙難自致。絕域荒沙身豎寄。驕嘶圓月蹴層冰。闔闔門前思一試。我皇神武古絕倫。犁庭掃穴來西巡。旄頭迸落狐鼠竄。陣前奪得生麒麟。太僕牽來當帳殿。將士盡驚光若練。寶鞍金勒繡障泥。猛氣驍騰掣飛電。橫行到處勢莫當。塞門面縛看來王。功成偃武海宇泰。會須歸放華山陽。

送孫愷似孝廉

沁園詞客舊知名。曾在楊花渡口行。佳句已傳箕子國。歸心又向闔閭城。白蘋風細扁舟穩。青桂香濃小苑清。吾亦有廬江上好。秋來鱸膾不勝情。愷似曾使高麗采詩故有第三句。

吳興祚

字伯成。遼東清河籍。舊本浙江山陰人。官至大司馬。著有留村詩稿。

電白縣觀海

揚帆同縱轡。咫尺辨滄溟。沙向日邊暖。春從島外青。鯨鯢今不見。樓櫓昔曾經。海若知王化。年年效百靈。

舟次潯州

行盡粵東路，粵西又一天。是山皆瘴氣，無樹不蠻煙。幻語聞獠洞，歌聲出蠻船。遐荒風景異，化俗倚前賢。

連上章總制兩廣時作

謝重輝

字方山，山東德州人，官刑部郎中，著有杏村詩。○比部學陶公，未極自然，而曾慥已高，搢股

山杜清碧其人，定相賞於絃指之外，傾倒至矣。

東臯

投種須及時，大率穀雨前。良農知時節，夙駕來中田。倉庚鳴向我，翔集立南阡。似謂耕耨苦，勸我暫息肩。浮雲從北來，細雨潤前川。富足雖末期，飽食庶終年。

桑

我昔聞諸葛，園林遍種桑。吾宅纔五畝，牆下亦成行。不愛樵子垂，愛此遠枝揚。濃陰日夕佳，常在吾廬旁。五岳老難遊，對此可徜徉。鳴鳩忽高飛，三嗅入斜陽。

萱草

老去恆內省，不懼兼不憂。閒種萱草花，時得覽芳柔。曉看迎露放，暮看逐風收。纔茲旦暮間，已如四運周。孰云忘憂草，遇目轉添愁。不如忘形骸，任彼歲月流。四運猶且暮，即百年猶四運也。感傷實多，未又付修短於大造，而任天以遊，則又進於達觀之識矣。

適野

適野聽鳴禽，輕裝冒朝旭。怡然接春暉，遂縱千里目。迢迢東臯田，蔥蔥北林木。黃鳥忽中出，交交相追逐。側耳慰好音，輕風吹初服。迴顧田舍人，農書老猶讀。無怪沮溺輩，經年事耕牧。我欲叩其端，白雲掩茅屋。

春來

春來何所事，依然耽琴書。親昵稀來往，人事欣無餘。我身既暇癩，我性日益疎。時從池上酌，往往臨清渠。春山到眼前，好風遍庭除。碧柳漸覆井，蒼松鬱不舒。時鳥解人憐，相向各自如。因之坐松下，日暮傾一壺。淡然無意，自足品流。此境最是難到。

過大木宅有感

風掩蓬門舊宅荒，就中何處最淒涼。停車不見吟紅藥，駐馬惟看種白楊。棟宇凋殘嗟向秀，圖書零落感文昌。可憐滿篋雕龍賦，未得生前動漢皇。

孔傳鐸字振路，龔封衍聖公，著有申椒集。

半塘弔五人墓

直是殲兇闖，千秋氣共伸。由來殉義客，何必讀書人。勝國山河改，巍墳俎豆新。三良空惴惴，殊讓爾精神。只十字，已爲五人吐氣。

秋日雜詠

玉露蕭森萬壑幽。淒清天氣獨登樓。三更鶴唳驚回夢。萬戶砧聲送到愁。但使詩書充腹笥。莫悲身世似傳郵。浮生幾個成閒坐。且向花間判酒籌。

山中

山居盡日無膏沐。侍女牽蘿補茅屋。芳草春時深閉門。月明自伴梅花宿。

孔尚任

字季重。山東曲阜縣人。官戶部郎中。

紅橋

紅橋垂柳島煙村。隋代風流今尚存。酒旆時遮看竹路。畫船多繫種花門。曾逢粉黛當筵舞。未許笙歌避吏尊。可惜同遊無小杜。撲襟絲雨總銷魂。名句可采。

憶昔

憶昔春宵傍父兄。故園風景乍承平。城門吏放深更鑰。樓下人聽上界笙。珠履貪遊從雪沍。花燈不息任天明。誰知此夜來爲客。漁火江村照獨行。東塘風流自賞。即演桃花扇劇者。讀此二詩。想象其人於酒旗歌扇之間。

丁

煒 字雁水。福建德化人。官按察使。

臥病酬林澹亭

輕寒腰帶減。窗竹漸離披。未得高眠早。常愁退食遲。青山秋後夢。黃葉雨中詩。酒熟東籬下。君閑可預期。

賈島略

青山名傍古人存。賈島窮居有故村。客舍無烟成獨歎。秋風落葉向誰論。十霜幾墮并州淚。萬里空歸蜀道魂。烟月石樓寒寂寂。夜深疑叩老僧門。通體點化長江詩。便不浮泛。

新淦舟行

城下空江向北流。虔州西上正悠悠。柳邊過雨鷺窺網。花外夕陽人倚樓。漁笛數聲愁欲劇。篷窗孤枕夢偏幽。一川烟景頻來往。每對青山憶舊遊。人倚樓一層。夕陽一層。花外又一層。層折而略無痕迹。所以可貴。

吳秉謙字鳴貞。遼東清河人。

過廬陵觀戰場有感

廬陵昔日建和門。風鶴驚心故壘存。白骨未銷春戰血。青燐空聚夜歸魂。斷烟匹馬迷荒寺。落日寒鴉返暮村。回首贛江三楚外。十年往事總難論。

孫元恆字子常。福建永春人。官漢州知州。

瞿塘

白帝荒城帶雨昏。瞿塘高浪挾雷奔。雙崖積鐵封三峽。衆水排山爭一門。魚腹浦懸魚鳥陣。虎鬚灘變虎

狼邨臥龍躍馬空回首。壯士當關幾并吞。狀險峻之勢。補少陵所未言。

江

闔字辰六。江南歙縣人。官解州知州。著有河汾集。

喜吳天章至自蒲坂

相違冰雪後。相對兩蕭然。有榻留徐稗。無錢與鄭虔。更深重話舊。燭翦欲忘眠。不識千秋後。詩篇若箇傳。

哭外舅吳興公先生三首之一

解組歸來日下帷。拈毫輒與古人期。詩方范陸差相亞。詞擬周秦更勿疑。乏食恥炊同舍釜。罷官孰寄草堂貲。侍兒也爲先生惜。滿腹牢騷不合時。梅村形其好客輕官。就初去官時言之。此形其甘貧厲節。不合時宜。就已去官後言之。

戴

梓字文開。浙江仁和人。佐康熙王平三逆有功。王假以監軍道職。後因能詩。聖祖命直南書房。

烽臺晚眺

獨立俯荒邱。清笳殷戍樓。萬山環塞險。一海抱天流。白骨何年戰。黃雲終古愁。憑高無限感。霜月滿征裘。

出獄口占

已解桁楊困。旋增離別傷。遙憑南去鴈。不死慰高堂。

逢子先上人

鄉語忽驚聞。相看是故人。龍庭二十載。不識故園春。三詩風骨皆不落貞元以下。

孫寶侗

字仲愚山東益都人官都察院經歷著有惇裕堂集

移寓

蕭然襖被瀾江頭。高館移居更上樓。宅是謝公開宛上。人如王粲在荊州。西陵松柏三春樹。南部煙花五夜遊。但使羣公能愛客。慙闌看盡越山秋。

卷十四

周

篋字青士浙江秀水人著有采山堂詩。○青士隱於市然能穿穴古今尤工韻語朱竹垞太史吏勾提將扑撲有士夫救援得不辱至今秀水人猶津津道之。

七歌集句

長吟遣愁悲歌當哭。我思古人實獲我心。集七歌。

十年失路誰知己。擾擾塵中猶未已。恆饑稚子色淒涼。病僕呻吟呼不起。當年意氣不肯平。昨日論交竟誰是。嗚呼一歌兮歌已哀。石田茅屋荒蒼苔。園中有棗行人食。忍能對面爲盜賊。有時長歎獨移時。安知我有不平色。秋風落葉閉重門。白髮如絲歎何益。嗚呼二歌兮歌始放。江客不堪頻北望。

意中索莫與先異。春草青青新覆地。年年歲歲一牀書。不忍見之益愁思。愁心反覆夢難成。天寒鴈度堪垂淚。嗚呼三歌兮歌三發。中天夜久高明月。

北風微雨虛堂秋。昨日之日不可留。四時不得一日樂。朝夕催人自白頭。仰天大笑出門去。安得行歎復坐愁。嗚呼四歌兮歌四奏。傷心不忍問耆舊。

世情付與東流水。窮巷蒼苔絕知己。巖扉松徑長寂寥。東園幾樹桃花死。媿爾東西南北人。欲向何門跋珠履。嗚呼五歌兮歌正長。雌龍怨吟寒水光。

世人結交須黃金。郢中白雪且莫吟。桃花欲開不自覺。千里春色傷人心。眼前好惡那能定。隔葉黃鸝空好音。嗚呼六歌兮歌思遲。一沉一浮會有時。

天寒野陰風景暮。落日疎鐘小槐雨。寂寂寥寥揚子居。惟有幽人自來去。何用年年空讀書。井底看星夢中語。嗚呼七歌兮悄終曲。空庭細雨莓苔綠。以已意驅遣成語。故無濼集之痕。第七句仍用杜陵原本。因無可集也。存此。以備詩中一格。

懷張考夫

契闊張夫子。平生實典型。立言惟布粟。爲政在家庭。上下論千古。東西有二銘。閒階帶草色。幾日又青青。老杜晉宗老孫子一章。錄入十字中。猶書家之有縮本。

送查三容攜家入楚便往滇中

念爾攜妻子。圖書共一船。此行將萬里。爲別動經年。春草迷江渚。秋風落瘴烟。故人崔李在。相望碧籬前。

俞

錫字犀月。江南吳江人。○犀月精心獵古。秀野顧太史選元詩初集。兩人共商推者也。評點文選杜詩流傳。吳下詩稿無從尋覓。故所收止此。

田居

仕宦非吾分。力農恆苦饑。閉門多感懷。出門又何之。散慮南林下。徘徊傍清池。芳春二三月。草木含華滋。澤蘭被幽渚。桑柘低柔枝。輕風颺微薰。坐久不知疲。遙見荷鋤者。行行向東菑。良時旣云爾。人事亦有宜。會須各努力。勤惰當自知。行思耦耕計。無令悔失時。歸來陌頭路。草露方沾衣。

顧有孝

字茂倫。江南吳江人。縣學生。○茂倫居釣雪灘。以選詩爲事。唐律及本朝近體皆有選本。詩稿亦未及見。

寄贈沈留侯借小阮北上

春風楊柳拂行舟。有美聯翩共遠遊。入洛陸機新作賦。依劉王粲故多愁。舊京珠履三千客。荒塚冬青一十秋。湖上好山無恙在。獨持卮酒對羣鷗。

顧

樵字樵水。江南吳江人。○樵水工畫。亦有詩名。

秋夜柬顧茂倫

秋聲無深淺。深淺在人心。但使聞者悲。不辨鳴者音。月落林影翻。夜半驚栖禽。入秋畏夢短。起坐還披襟。遇物悲在昔。事往情更深。安知來日愁。追念不及今。我有萬種恨。并入秋風吟。哀樂境所遇。豈必雍門琴。

境無哀樂惟在所
感起十字道盡

周

肇字子微江南太倉人著有東岡集○梅村選婁東十子詩十子爲周肇子微顧淵伊人王吳惟夏王汴憚民王曜升次谷一時風流文采稱極盛焉

贈陸翼王

君是左徒門下士。竭來相對哭途窮。遺孤袁粲纒囚日。亡命王成質保中。書館三餘淹夜雨。客顏一瘦怯秋風。結交世上黃金滿。四海何曾識此公。翼王爲黃陶菴高弟當日有保全遺孤事故專及之

病中元夕有感

夢入京華怪獨醒。孤舟病客鬢星星。逢年漫媿天人策。涉世寧諳長短經。秃筆賣文差可活。庸醫乞藥總無靈。上元燈火蕭條甚。纔說宣和已淚零。

顧

湄字伊人江南太倉人著有水鄉集○伊人係鱗士長子克承經學梅村稱爲鱗士有子

感懷

石城笳鼓不堪聽。烈士天涯散曉星。伏闕陳東還痛哭。登樓王粲獨飄零。奔濤夜立魚龍怒。戰血春迴草木腥。莫說長江限南北。建康原是小朝廷。福王時馬阮秉政蹂踐名流長江不守作者感慨言之知小朝廷之必亡也

閱江樓

萬里長江一望收。高皇親建閣江樓。雲開蓬島星河曙。月出盧龍天地秋。碧草自生宮寢路。青山仍繞帝王州。憑君莫問當年事。禾黍同歸六代愁。樓在師子山。又名盧龍山。明高皇有詩。又命宋濂作記。

許旭字九日。江南太倉人。著有秋水集。

淮雲寺

石徑斜開路幾層。扶筇攜屐共攀登。花逢九日思兄弟。病阻文園念友朋。南渡白雲悲古寺。西風黃葉哭昭陵。三年遙觸傷心淚。欲訊滄洲媿未能。

過廢園有感

落日蒼茫滿客心。無端興廢愧登臨。到公死後空存石。謝傅亡來久廢吟。一代詞人歸蔓草。百年名苑化祇林。芙蓉金粟知何處。野水瀾瀾自古今。

過弘濟寺

中流遙見雁飛斜。一水蒼蒼起暮鴉。崖罅插江懸棧閣。洞門鑿石走平沙。幾年北望成荒戍。憶昔南巡待翠華。乘興獨來尋薛壁。空階開徧海棠花。懸棧閣一言。能狀難寫之景。

王撰字異公。江南太倉人。著有三餘集。

哭外舅鹿城顧大宗伯自注。丙戌死。難溫州江心寺。

閩嶺衣冠擁殿墀。偏安猶見漢威儀。驅車海嶠看傳檄。拜表江關始出師。萬里弓刀空報主。一船棺槨儘從兒。靈旗夜雨歸何處。指點文山異代祠。自注：寺有文丞相祠。宗伯致命恰在其地。

贈杜于皇

憶自分攜歷變。更訪君曾過石頭城。人驚夔府貧來句。世重樊川亂後名。此地溪山千里夢。今宵尊酒廿年情。西陵放櫂乘秋漲。好待荒郊泛月明。

王

抃字釋民。江南太倉人。

送友還蜀中

山塘綠酒浮芳菲。楊花作團如雪飛。花前沽酒送君別。別淚簌簌沾我衣。蘭橈欲發鼙鼓急。感君握手須臾立。把盞長歌曲未終。月光如水鬢眉溼。君今掉頭萬里行。紫紆蜀道多不平。石鏡銅梁連劍閣。況復江山阻甲兵。願君努力長途去。舊住岷江發源處。岷山雪消岷水清。望見錦官城裏樹。錦城花落更愁人。杜宇啼殘澗瀨春。武侯廟下苔如繡。先主祠前草似茵。君不見遼東華表歸來鶴。城郭人民盡非昨。回首江南千萬重。夢裏寒雞村月落。照是亂後還蜀流賊雖平。人民未靖。送者多悲歌感慨之音。

揚州次梅村師韻

牙門置酒宴公卿。錦繡雕鞍命北征。縛袴健兒誰轉戰。借籌策士總虛名。百年洛蜀關時運。六代煙花兆

甲兵擊楫中流無限恨。夜闌欹枕聽江聲。福王南渡時事。關部分鎮。廟堂水火。四鎮交爭。喪亡之兆。顯然而彼昏不知。詩人所以歎也。

王 據字虹友。江南太倉人。著有蘆中集。○太原王氏。昆季多才。不啻過江王謝。而蘆中一集。尤爲矯矯。

謁睢陽廟

祿山陷兩京。唐室勢如沸。玄元廟一哭。義聲震天地。誓死守孤城。非云事必濟。自覆潼關師。乘輿久奔避。賊議圖江淮。憑茲一旅制。不然鼓而南。誰斷其右臂。惜乎四百戰。食盡終顛躓。城陷逾三日。援師鎬始至。殺賊雖無成。藉以衛神器。從此朔方兵。收京功乃遂。赫赫精忠祠。允宜祀百世。黃巾徧郊坰。明季遭傾毀。呂侯還舊觀。匪曰窮奇麗。偶客梁宋間。搢衣拜階屨。冕旒坐中央。左右南雷侍。動我忠義心。一消疲茶氣。剔蘚讀殘碑。峴山同墮淚。力表其蔽。遮江淮之功。發揮昌黎意。尤爲透切。

黃海歌

我所居兮在海濱。未登高邱望遠海。行入深山盡是山。銀臺金闕瞻安在。昨投湯院雨翻盆。電激雷轟衆壑奔。茲山雨後當鋪海。旋因觀海登天門。天門削成去天尺。歷盡危梯上絕壁。彌勒龕中一宿留。曉起白雲千里積。非煙非霧鋪虛空。時爲車蓋時爲龍。諸峯沒趾漸及頂。初由膚寸彌寰中。天吳髣髴舞其下。萬里無際連蒼穹。是時罡風吹蓬蓬。聽如擊鼓馮夷宮。更疑射蛟海水赤。一輪照曜扶桑東。須臾解駁浪紋靜。玉池開放千芙蓉。人間萬事皆桑田。惟斯亘古無變遷。塵寰跼蹐真可憐。胡弗蹈海如魯連。三山驅走

置眼前對之欲往心悠然長願採藥山中眠朝朝來往蓬萊巔帝鄉未遂平生志從此浮槎天漢邊庚午歲子遊黃山親見其景吐詞未能工也讀此實獲我心如重觀雲海一次

謁伍相國祠

蕭條古堞樹棲烏載拜祠門落日孤報父有心終覆楚殺身無計可存吳英雄忠孝留天壤山水蒼涼失霸圖回首荒臺麋鹿地屬鏤遺恨滿姑蘇作手無一泛語亦無一剩語

聞漢槎謫戍寧古塔

欲叩君門萬里賒驚聞遠戍龍沙文章只道金難鑠謠詠翻成玉有瑕滅死蔡邕方出塞哀時庾信未還家可憐交橐歸來日豈有明珠載一車

喜吳弘人聞夏南還

相逢只道此生休解網歸來話昔遊幸免無家投朔漠那堪有弟作蠻囚雲山漸慰思鄉夢風雪仍含出塞愁不覺喜深悲轉集潺潺雙淚爲君流有弟作累因時漢槎未還故有是語

懷許九日

聞君纔上摘星樓又到濡須塢口遊勝地山川曾百戰故人煙雨只孤舟蒼蒼楚水蘼葭晚漠漠江田秔稻秋應有陳蕃懸榻待免悲王粲滯荊州自注九日與楊仲延家阮亭二公倡和最合

呂城病歸

挂席西風桂葉輕。扁舟又次呂蒙城。身如枯葉方愁落。心似殘潮未肯平。宿雨河橋橫酒旆。晚煙邨店聚雞聲。故園歸去無多路。每念勞勞重愴情。

重陽前一日登鎮海樓

無端來作五羊遊。節近登高上此樓。海氣溟濛山繞郭。天風浩蕩客悲秋。飄蓬且喜雲生屐。簪菊應羞雪滿頭。鄉國茫茫何處是。珠江一片夕陽愁。

張文獻公祠

祠堂突兀倚江開。瞻拜空餘海燕哀。只道主由金鏡致。豈知兵爲玉環來。文章自昔傳徐碣。香火常新傍舜臺。風度依然憑想像。停舟一薦渚蘋回。元人咏太白有承恩金馬詔失意玉環詞句人以爲工此更說得關係

王曜升字次谷江
南太倉人

登北固山

雄峯高枕盦城斜。有客登臨送晚霞。水氣暗吞山頂寺。江雲遙護海門沙。天低雁鷺來千里。地迥星河落萬家。指點舊朝形勝在。吹愁何處起悲笳。

端午先忌

餘生十載恨蹉跎。令節閒門掩薜蘿。剩有蛟龍蟠大澤。空聞簫鼓發層波。三閭怨在餘香草。九地恩深廢
蓼莪。慙愧王修能罷社。葛衣檢點淚痕多。端午與先忌並列。而主意尤重先忌。

王曾斌字弘導。江南太倉人。

錢王祠

錢塘亦是興龍地。王氣依然據上游。鐵箭舊傳唐歲月。璽書曾拜宋春秋。江湖出沒三千里。風雨淒涼十
四州。剩有湖山供廟貌。坐看錦繡欲生愁。無一語一字輕。自是到家。

袁啓旭字士旦。江南宣城人。著有中江紀年詩。

循煙霞洞下嶺至石屋洞

晨興涉亂山。亭午憩修畛。巖高哀狖吟。樹密春禽隱。交藤路漸披。獨鶴徑徐引。石竇闕玄冥。巨靈委真境。
開鑿自何年。潛虬遯虛牝。海氣通平遠。寒烟錮深迥。雕鏤非一壑。險仄有孤嶺。仙室越陰涼。人世異朝冥。
渴欲漱乳泉。餒將摘松菌。於此託賞心。無勞慕張邴。遊山之詩。尤宜步武二。謝未造幽微。已合樂度。

李良年字武曾。浙江秀水人。太學生。康熙己未。應博學鴻詞。放歸。著有秋錦山房集。○徐尚書健菴。開史局於洞庭西山。武曾任分修。應亦題於古者。

九嶺

昨者暑氣清。嵐瘴喜初散。幕府有程期。鳴鐘戒宵半。殘月不到地。松梢耿河漢。冥冥列炬移。灼灼螢火亂。

空山悟無始。靜裏閱昏旦。九嶺爭一隅。徑窄中每斷。我行尙層岡。僕夫復深澗。浮生付飄忽。肩腋楚人慣。不墜良偶然。履危豈無歎。轉苦東日遲。坐待火雲爛。稍稍荆扉開。人語出沙畔。前途方迢遙。平明且須飯。
殘月山行。自夜及旦。歷歷如繪。

宣府人日

烽臺石戍曉煙平。人日逢人載酒行。客久漸多新歲感。邊方倍起故園情。圍鑪小伎兼箏笛。出郭諸山半雨晴。騎馬不愁歸路晚。江鄉猶及聽啼鶯。

栗子關十六韻

峻極重關勢。艱難獨客經。梯航原梗絕。中外劃郊坰。天作西南障。山開大小屏。路應莊蹻始。地自伏波寧。遺廟崇新祀。殘碑失舊銘。土田紛犬俗。樵採怯鳩形。往事聞開國。殊方久不庭。王師頻越歲。使節幾衝星。鬼斧橫飛棧。神功直建瓴。虛無雲漢逼。縹渺淥江停。鳥道層巔接。猿聲下界聽。半肩欹絕壁。一髮上空冥。石到諸蠻黑。楓過二酉青。炎風高瘴癘。晴日俯雷霆。豈有神明護。真疑虎豹扃。杖藜無恙在。珍重別山靈。

閑鷓鴣

花間飛上竹枝啼。纔過黃絲又冷溪。蠻鳥亦知行不得。行人那向夜郎西。

憶方虎客宛温

群舸秋綠晚萋萋。五十郵亭到越谿。不敢更嗟鄉國遠。有人還在萬峯西。因已遊歷之遠。而念更

黃

始字靜御。江南吳縣人。舉鴻博。不遇歸。

溪西

溪西人家秋水生。孤舟常自三更行。一聲啼鳥半江月。纔到兩山天欲明。

葉世佺

字雲期。江南吳江人。郡諸生。

謁劉公祠

世運凌夷日。中流荷大賢。反經斯起敝。往蹇自來連。濂洛開新緒。河汾具薄田。懸弓忘巧拙。食蜜自中邊。帝簡徵文在。薪存續火傳。人心方復古。天意不扶顛。遠塞唯迎盜。長江誰著鞭。鼎湖上龍馭。赤縣徧狼烟。涕淚包胥血。饑寒蘇武氈。偏逢苟安主。虛憶中興年。精衛勞填海。媧皇莫補天。去留關廟社。生死合經權。此道荒千古。何人障百川。祠堂拜遺像。風雨暗靈筵。傳寫念壘先生。兼思宗朝及南渡言之。確確有生氣。

暉

格初字壽平。後以字行。更字正叔。江南武進人。著有南田集。○南田工畫。山水。花卉。兼擅。比之天仙人。詩亦超逸。昆陵六逸中。以南田爲上。

月夜從愚庵大師陳際叔徐世臣湖干閒步

披衣攬夜色。遂適湖干趾。喧籟息近聽。林巒斂遙視。千峯寒月中。萬壑疎鐘裏。三潭弄浮煙。因風蕩爲水。浮汀漁唱入。過浦簫聲起。佳遊領支公。雅調及高士。霜月滿歸塗。宵深情未已。三潭十字。微妙可思。

贈莫十三

君家西湖濱，厭看湖上山。身依海鷗宿，心與天雲閒。口吟五噫西出關，脫帽自挂蒼梧間。偶然登燕臺，洗足御溝水。緇袍蒙茸一草履，金貂紫駟君勿喜。倒誦蟲書三萬言，侏儒笑擲番王璽。重譯曾驚外國使，諸侯盡倒蘭臺屣。既鍛上林羽，又轉桑乾路。囊破惟留五嶽雲，鶴飛還想三珠樹。滿腹皆象緯，纏衣悉烟霧。握尺量舜管，執杓考天步。流霞未肯酌，熊蹯亦不茹。聊將檉葉補秋雲，柳栗橫空萬山去。

莫君嗜古，精于天文，能駕外國。

送滕子還閩

滕子閩人，自閩入燕，沉身絕域者九年。後其姊致書薊門，物色得之。知老母尚在，遂以計脫。聞關南還。

別後春風染杜鵑，驪歌聲斷綠楊煙。身沉絕塞思千里，心死穹廬客九年。吳苑雕觴寒食後，黎關歸夢落花前。閩南別去能相憶，倘有雙魚海上傳。

春城戰血冷悲笳，廢壘傷心舊戰車。雪窖生還猶有母，玉門歸去已無家。同騎塞馬眠燕月，獨向河源上漢槎。我有離魂招未得，劫灰天畔哭黃華。

南田與兄相失於黃華山，故感及之。

贈筴在辛侍御

墨苑風流屬老成。白雲舊祕待先生。正平無地容疎放。北海猶慙問姓名。自辨銀鈎收蠶尾。尙留瑤草付龍耕。東來蠟屐窺松子。自注。待御。有松子閣。如向青霞望五城。

曉起

連夜深山雨。春光應未多。曉看洲上草。綠到洞庭波。

遠眺

暮雲千里亂吳峯。落葉微聞遠寺鐘。日盡長江秋草外。美人何處採芙蓉。

寄虞山王石谷

東望停雲結暮愁。千林黃葉劍門秋。最憐霜月懷人夜。鴻雁聲中獨倚樓。虞山亦有劍門。

佟世臨

字醒園。江南元人。諸生。

戊寅秋拜先王父墓下。自注。好瑤以熊廷弼事及難。

鬱鬱松楸蔭墓田。愴懷往事淚潸然。請纓慷慨終童志。賦鵬沉淪賈傅年。鈎黨竟成三字獄。招魂欲叩九重天。孤忠未返遼東鶴。俎豆聊分江夏賢。

陳維岳。字緯雲。江南宜興人。

贈友

相逢一笑看吳鉤。燕市悲歌上酒樓。地有大風連沛澤。人餘奇氣動幽州。天低古戍金笳冷。月墜巖城玉笛愁。此處舊傳多俠客。荆高去後水悠悠。

鍾映淵字廣漢。浙江嘉興人。○廣漢援據古昔。元元本本。遇虛聲之士。相對不交。一旨有勝已者。執禮甚恭。因是好惡之者各半。惜中年摧折。未底老成。

送羅比部暫歸西川

白帝孤城落照懸。鄉愁迢遞武功天。將歸故國無鴻雁。行過空山有杜鵑。劍閣風雲開五丈。笳關烽火隔三川。明年巫峽生春水。好上東吳萬里船。

馬世傑字萬長。江南溧陽人。貢生。

秦宮

阿房周閣百重環。美女充庭盡日閒。頻望翠華終杳渺。亦如天子望三山。卽有不得見者三十六年。意印合秦皇求仙。恒覺詞意俱新。

金

侃字亦陶。江南吳縣人。

雨泛湖上觀梅

細雨春波遠浸天。梅花爛漫滿溪灣。烟中人語前村樹。雪裏雞聲隔岸山。畫槳每侵疎影瘦。芳尊渾帶冷香遺。絕勝雪夜尋安道。歸路漁燈照醉顏。

寄家祖生大兄郡中

誰道湖山尚近家。出門回首卽天涯。寒深笠澤愁中雨。春老吳宮夢裏花。客久艱難悲世路。病餘憔悴感年華。不堪孤館懷人處。歸鴈蕭蕭度遠沙。

徐

夜字東。嶷山東新城人。縣學生。○池北偶談云。東癡年二十九。卽棄諸生。擢門士室。絕迹城市。有朱桃稚。杜子春之風。舉博學鴻詞。以老病辭。○詩格清瘦。自然者。近韋左司。刻削者。近孟

野東

初夏田園

朱夏輒復變。深綠日以肥。感彼生物勤。節候曾不違。清晨荷鋤出。田間人尙稀。觀物適自然。時見朝雉飛。不惜筋力疲。但恐坐食非。作勞有時息。高春行來歸。端坐撫素琴。可以理朝饑。

詠意

凡骨難遽化。仙藥不可求。一身爲物役。未可輕王侯。曠士洞達心。無爲生遠遊。遠遊亦有方。九州非一州。常恐血氣軀。車馬生墳邱。試聽螻蛄聲。語默成春秋。山嶽自終古。江海日夜流。漁洋云。車馬生墳邱。與大梁土中所得古石刻日月

逝酒漿五字相類似仙靈語。

九日得顧寧人書

故國千年恨。他鄉九日心。山陵餘涕淚。風雨罷登臨。異縣傳書遠。經時怨別深。陶潛籬下意。誰復繼高吟。寧人先生。遠辭故國。常拜山陵。起四語。一氣鏘成。杜陵遺法。

和秋柳

搖落江天倍黯然。隋隄鴉噪夕陽邊。誰家樓角當霜杵。幾處關程送晚蟬。爲計使人西去日。不堪流涕北征年。孤生蕉萃應相似。怕見殘枝帶暮烟。蕭瑟之音不黏不脫。連勝流洋名作。

經嚴陵釣臺

突兀高臺入望平。下臨百尺大江清。足消文叔真人氣。直得狂奴故態名。天位幾移仍舊祚。客星千載屬先生。不從七里灘頭過。誰信巢由無世情。太史公於許由猶作疑詞。有嚴陵始信巢由真有洗耳牽牛之事矣。

富春山中弔謝臯羽

晞髮吟成未了身。可憐無地著斯人。生爲信國流離客。死結嚴陵寂寞鄰。疑向西臺猶慟哭。思當南宋合酸辛。我來憑弔荒山曲。朱鳥魂歸若有神。落句卽用臯羽所歌。

坐放鶴亭

巋然一嶼水回環。想見高風物外閒。墓上梅開春又老。亭邊鶴去客空還。書無禪草逢當世。祠有名賢擅此山。占斷西湖皆宋土。羨他生死太平間。三四用梅鶴未能避熱結意言外見南渡之西湖不堪棲隱也。

丁耀亢

字西生。山東諸城人。由貢生官蕙安知縣。

老將

老將愁衰落。幽燕氣尙雄。虬鬚猶挂劍。猿臂已傷弓。帝寵嫖姚少。人知頗牧忠。低頭憐戰馬。落日大江東。
結尤悲壯

再答山陰王玉映并宗弟睿子

海上仙人挽鹿車。五噫歌就出關初。黔婁借隱稱良友。班女工文續漢書。玉笈家藏空粉黛。青箱世業伴樵漁。又聞宮壺徵閨範。不去翻來問索居。
玉映山陰王季仲女。工著述。故以班大家爲比。

久客浦城臺使屢檄不放夜坐達旦

山城風雨夜寒侵。欹枕燈殘耐苦吟。故國青山萬里夢。老親白髮五更心。微官求勅身仍繫。薄俗依人病轉深。自擁孤衾愁達旦。臥聽童僕有哀音。

張實居

字賓公。山東鄒平人。著有蕭亭集。○蕭亭爲漁洋內兄。嘗序其詩。謂生密華鹽。鳴鐘列鼎。其所固有。一旦棄之如屬甘。就隱約。豈時命使然。抑有託而述焉者。與。

巫山高

巫山高。不可步。湘水深。不可渡。水有涵湧澎湃之波。山有屈曲崎嶇之路。我欲攀緣。狼虎來。我欲徒涉。蛟龍怒。相思不相見。沾裳淚如雨。巫山高。空自高。湘水深。空自深。舟車非所願。但願人一心。

雨後

雨歇山欲暝。夕陽在鳥背。孤亭淡清秋。花木有餘態。涼風四面吹。長空蕩殘靄。更望西南峯。窈窕秀如黛。

山樹互幽映，流泉春雲確。獨坐酌芳卮，明月來相對。起寫晚晴入神，與高廷禮夕陽雁邊下同妙。

贈宜雨

聞道衡門下，洋洋可樂饑。今茲歷貧賤，斯言若我欺。蘭菊雖可餐，不如蕘與藜。菱荷雖可服，不如綌與絺。湘江無快語，監河有哀辭。人生苟困窮，自謀策難奇。北望望北斗，南望望南箕。祇有空倉雀，與我同所悲。

又贈宜雨

世人片言合，盃酒盟新歡。生死輕相許，酒寒盟亦寒。所以古君子，與人愧醴甘。雖言淡如水，水尙生波瀾。

末語翻進一層，勉人敦古道交。

九日王秀才攜酒至

續紛籬下菊，幾枝帶霜妍。物苟有至性，造化亦無權。故人攜酒過，斟酌坐花前。狂歌無宮商，破琴不必絃。志節之士與造物爭，爲夷齊一輩人寫照。

落葉

西風吹落葉，解作淒涼聲。一朝辭故枝，飄飄難爲情。坐觀此凋喪，我心亦不平。轉盼陽春至，落者又復生。葉葉還如舊，妍綠映日明。始知天下事，待時貴無爭。得失如循環，消長無定形。

山中卽景

兩髻鬢鬆曳葛裙。閒身許入野樵羣。衆禽見慣皆相識。五穀生成半不分。肌骨春來癭似鶴。心情病後懶如雲。琴殘弈罷先生醉。一枕高眠到日曛。

大遊仙

姑射仙人綽約形。初承帝命入天庭。霜清玉斧催修月。水冷銀河看種星。漢女驂鸞雲作旆。湘妃騰鯉霧爲軒。金泥祕籙新讎罷。詔錫長生億萬齡。修月種星工絕。

王秀才將卜居象山問風土因答

休將風土問山翁。欲習山翁莫憚窮。有徑皆穿紅樹裏。無人不在白雲中。花香鳥語隨時變。水色嵐光到處同。夜半柴門常不閉。南邨頗有太平風。

寄懷王秀才

如君莫歎少知音。萬古文章一寸心。賤至侏儒猶有粟。人能澁統亦多金。魂銷別路梅初發。眼看閒窗草漸深。冀水燕山何處是。蘧蘧好向夢中尋。見庸下之村。偏遇合也。

桃花谷

小徑穿深樹。臨崖四五家。泉聲天半落。滿澗濺桃花。

初秋偶題

颯颯西風吹薜蘿。炎天伏枕一時過。山中事事秋來好。只恐浮雲變態多。

夜雪

斗室香添小篆烟。一燈靜對似枯禪。忽驚夜半寒侵骨。流水無聲山皓然。左司門對寒流之後復見此詩。不明點雪讀未旬神於賦雪矣。

張篤慶字歷友山東淄川人拔貢生著有崑崙山房集○歷友學殖淹博揮洒千言同時諸前輩遇歸而處崑崙山不復出矣杜門著書有八代詩選班范訪談五代史訪談兩漢高士贊

等書卓然可傳豈以名位之有無為輕重耶詩古今體兼善宋元習氣不能染其筆端

鸚鵡洗哀辭

炎精滅。龍為鼠。羣雄囂。烈士忤。懷刺獨行徧九州。誰其識者孔文舉。薦士既不成。翻與死為伍。鄴下小兒競學語。許昌庸奴安足數。監廚借面良堪悔。禰生禰生氣如虎。漁陽按節三過鼓。岑牟單綬目無覩。睥睨阿瞞相爾汝。借刀殺人向荆浦。江夏豺狼曰黃祖。當筵落筆賦鸚鵡。生平謾罵膺礪俎。不可一世橫千古。乾坤踟躕歸黃土。芳洲何蒼蒼。衰草何茫茫。為君一招魂。魂兮歸故鄉。楚國山川蘭蕙芳。江聲浩宕風悲涼。風悲涼。芳洲涸。乘白雲兮駕黃鶴。嗟嗟百鷺鳥。不如一鷓鴣。衰世舉足妖氛惡。至今血照晴川閣。鄴下人豔稱之。此目以許昌庸奴。真蟻觀曹氏也。為才人吐氣中。仍見其以才買禍。兩層並到。

杖頭錢

富莫富於杖頭錢。貧莫貧於嚴道之銅山。銅山鑄錢萬萬千。到頭不得名一錢。杖頭百錢真我有。取自杖

頭且沽酒。今日百錢今日醉。得錢沽酒常酣睡。君不見何曾一日食萬錢。便欲下箸心茫然。洛陽離亂救不得。縱饒沽酒無顏色。眼看荆棘埋銅駝。錢乎錢乎奈若何。爲守財虜神喝也。後牛所見尤大。

宋趙千里海天落照圖

千里名伯駒畫。爲北宗中高品。

南渡以後推丹青。入妙首數天水生。光堯皇帝重毫素。集英殿裏揮御屏。賞賜一時頒內府。珊瑚碧玉黃金縉。雲麾將軍有遺響。夏圭馬遠同馳聲。怪石盤繪世所貴。浮巒煖翠千人驚。零紈斷素久磨滅。譬如孤鶴遺脩翎。今茲之圖何處得。海天落照臨蓬瀛。蒼茫島嶼在雲際。居然蜃市紛縱橫。貝闕瓊樓互隱現。溟渤浩蕩朝玉京。金芝瑤草安可數。時有仙侶飄華纓。方壺員嶠生筆底。又如霞起連赤城。鯨濤鼉風走寸腕。依稀噴沫蛟龍腥。手招徐福呼不起。三山縹渺開金庭。海壖洲渚勢迢遞。芥舟葉葉飛蜻蜓。碧嵐翠靄千萬疊。畫工得勿勞經營。一峯忽起冠雲杪。遙睇衆嶺猶列星。空齋臥遊到懸圃。便欲擊汰還揚舲。琉璃萬頃海煙滅。濯錦錦江如練明。枕碧亭邊啓紺篔。枕碧亭。魚尾亭名。耳畔但覺天風鳴。庭隅落日杳無際。搔首海天何限情。冷氣凌空。近信陽北地一派。

大梁城東南弔信陵君墓

邯鄲應與賦同袍。公子翩翩氣自豪。不少衣冠歸趙勝。誰將戈甲走蒙驚。大梁上客揮孤劍。臥內兵符勝六韜。今日九京良可作。愧無盃酒奠蓬蒿。平原直豪舉耳。借作陪筆。乃見魏公子之高。

憶舊

廣寒宮裏盼飛仙。月色溶溶玉有烟。半臂偏憐宋學士。曉風爭唱柳屯田。落花無語歸春水。弱絮多情上酒船。聽罷筵前囉嘖曲。不須更憶想夫憐。

述懷

天外層城近日邊。芙蓉爲苑玉爲田。夢迴瓊島三千里。心逐雲和廿五絃。薜荔風高悲楚客。蒹葭霜落對秦川。生憎綠鬢人將老。猶抱遺經亦可憐。悲己之不遇也。託以比興。令人思絃外之音。

碧城

王母西來曉露濃。碧城隱隱月溶溶。雲中懸圃三千里。天畔瓊樓十二重。手種桃花多歲月。自尋瑤草飼鸞龍。雙成已到人間否。海水枯時定一逢。冀賞音之終遇也。懸圃瓊樓。雖有三千里十二重之遠。而能手種桃花。自尋瑤草。則海枯石爛。自逢知己矣。與述懷一章。兩兩

對相

明季詠史

倦勤當日說神宗。高臥深嚴祕九重。玉輦經時登漢闕。鸞章隔歲下堯封。千官補缺虛龍袞。四海軍儲廢大農。縱使養癰終必潰。乾坤無恙且從容。神宗晚歲。臣下奏章。有二年不批答。軍儲有經年不發者。日以養癰信然。
盈庭讜議積封章。宗嗣常深未雨防。鶴禁無人瞻少海。龍箴有愛在昭陽。漢高終不私如意。竇后由來愛

孝王辛苦江南王相國重來北闕定儲皇。爲建儲不決而言。禍水始於鄭氏後三案皆胎於此。

蜀洛當年黨議多。分曹日日競風波。顧廚品藻矜名字。牛李升沉密網羅。私忿漫勞登白簡。濁流真欲棄

黃河。堪嗟此輩爭門戶。國是調停奈若何。爲黨禍而言。沈一貫之陷郭正域尤顯然者。

敕使當年出未央。紛紛礦稅采諸方。山川絕少金銀氣。誅斂何殊花石綱。一任豎貂盤社鼠。誰將鹽鐵議

弘羊。可憐國脈從茲喪。浪說朱提入太倉。此極言礦稅四出之害。

遺詔何曾立九嬪。漢家傾國李夫人。龍髯此日方長痛。鶴籙經時未卽真。長信宮中猶卻輦。朝元殿上已

批鱗。深心終是資元老。免使垂簾溷紫宸。此言李選侍移宮始末。

雕鏤嘻戲擅熹皇。婦寺相連說趙張。北寺獄成傾俊乂。西園例在鬻冠裳。清流白馬空朝右。墨綬青衫去

廟廊。郭泰當時憂殄瘁。漢家十葉已淪亡。時魏忠賢客氏連結熹主假子義孫競進構東林之獄。我虛士類至靈山去國而正士無噍類矣。人之云亡邦國殄瘁。古今有焉。

同慨

同文黑獄少完膚。妖傒熏天萬事誣。酷吏憑添沉命法。奇刑盡隸執金吾。勾陳天遠浮雲蔽。貫索星明正

氣孤。翻借封疆成鐵案。誰憐道濟血模糊。時田爾耕許顯純爲鎮撫司特股極刑。謂楊左諸公受熊廷弼金。因鍛鍊成獄。殺廷弼以殺諸公也。視同文館獄。禍尤烈矣。

思陵苛察誤宸聰。國計周章踐祚中。高棟已看傾大廈。神袞轉復認孤忠。論兵轆轤終無定。馭將寬嚴失

至公。獨有儉勤關睿慮。年年水旱瘁深宮。思陵苛察與憂勞國計。一一見之。而溫體仁之大姦。倚爲腹心。尤其所短也。溫死謚以文忠。真不可解。

赤眉分道亂中原。海內征輸怨正繁。天子常虛大盈庫。軍儲折入小黃門。傷心陵墓樵蘇盡。回首乾坤戰氣昏。賴有范倪諸節烈。猶能一死答君恩。流寇四起。府庫空虛。而利權歸於宣寺。此亡國之徵也。范倪諸公。一死報國。自盡臣節而已。

潼關不守竟倉皇。遺恨中涓促喪亡。驍賊直開趨洛下。行營又見潰河陽。將軍力戰捐軀脰。豎子迎降類

犬羊。從此三關似剝竹。誰人決策守金湯。孫傳庭之敗。由於中人促戰。潼關破而大勢去矣。五語言周遇吉之死。戰六語言姜瓖王承蔭之迎降。

銅蹄誰見下襄陽。坐致鯨鯢入未央。祕殿遺音憐赤子。大荒披髮訴高皇。九原龍劍沉王氣。三月烏號哭

國殤。死難紛紜酬養士。由來義烈重綱常。此言思陵不辱社稷。而殉難衆多。由三百年養士之報。從來史書所未有者。

坐使神州竟陸沉。秋江百丈莫言深。南還不少黃潛善。留守空爲宗汝霖。下瀨將軍窺故國。太行忠義感

雄心。望仙閣裏千迴醉。祇是難忘玉樹音。黃潛善指馬士英。阮大鍼言宗汝霖指史可法言。見史之必不能勝馬阮。猶宗之必不能勝黃汪也。

羽書百道起黃塵。一馬臨江入紫宸。國恥不言教戰士。時危亟欲選才人。空餘跋扈桓宣武。豈有勤王溫

太真。燕雀巢堂朝夕計。延秋門外走踐踐。此見左良玉之起兵。並無勤王之志。比之桓溫。極合。○以韻語紀實事。所謂詩史也。祇從神宗起。由國家頹廢。劇於神宗。故不

及穆宗以上。

鄧艾廟

奇兵未阨一丸泥。綿竹懸軍萬仞梯。奄忽當塗更典午。翻嫌多事鄧征西。

錢柏齡字介維。江南華亭人。

遊通天巖陽行先隱處

蘭楫亂奔流，筇輿出幽微。澗路凌高寒，晴空恣雄眺。越彼停雲岡，石勢愈巉峭。仙源湛水木，萬古藏僻奧。鬼斧亦何工，玲瓏鑿一竅。傾人此盤礴，千秋儼遺廟。仰瞻媿後塵，冥搜託前導。更窮邃洞紆，忽訝懸崖倒。羣山青濛濛，惟聞猿狖叫。既異少文遊，良慰康樂好。緬想開闢初，矯首發長嘯。待緝薜荔裳，來臥芙蓉嶠。爲問巖棲僧，荒蘿幾人掃。

吳

字仁趾，江南新安人。○仁趾與寶賢有二吳之目。而寶賢以性靈見，此以性韻見，幾於莫能相尙。

和宋秀才詠折花

今朝蝴蝶多，南園花發徧。佳人競攀折，新粧何婉孌。葉低防冑斂，枝高羞露釧。寧辭纖指勞，但恐牆東見。
傳出美人折花之神，六朝風韻猶在。

舊遊

舊遊最憶三茅峯，往來采藥多仙蹤。菖蒲潭上花紫茸，勾漏井內丹砂紅。朱顏好駐不肯駐，是時只貪山水趣。誰知一別年向衰，幾日浮生悔虛度。逝將重訪煉金人，昨夢華陽洞中去。

哭汪三韓

送我南遊日，傳杯頗盡歡。那知成永別，猶記勸加餐。落木秋城暗，歸舟暮雨寒。依稀追餞處，到眼劇悲酸。

阿玉

阿玉殊堪憶。春來見面稀。去年方解語。臨別一牽衣。鹵井黃沙路。潮灘白板扉。昨逢鄰曲道。日日望子歸。
詩之至者不外一真此直字字真矣。

酬朱穆公天台見懷四韻

遠愧遺榮客。深居桐柏山。有時駕鸞鶴。遊戲九峯間。見我題名處。巖花幾度斑。因風發高唱。千里慰離顏。
八語一氣。風格自高。

懷吳野人先生

伯鸞居廡下。元亮老籬邊。隱矣吳夫子。高風齊二賢。賃舂常作客。采菊始歸田。想見行吟處。溪流繞數椽。
五六仍用分頂氣疎法密。

悼亡姬成去豔

春歸無復見蛾眉。漠漠流塵晝掩帷。鬪草尙憐扶病日。看花長記返魂時。
自注。沒一夕復甦。索桃花數枝。插枕畔。少頃而逝。 香消翠袖籠猶在。影暗紅窗鏡未移。從此鍼樓愁獨上。去年同製鵲橋詩。

送陳射文出關省親

北望雲山氣。早秋煩將一語慰邊愁。時清屢見生還客。會有恩波到白頭。
射文之親。應是遣戍關外者。故以生還望之。

展園次兄遺札

草綠池塘夢已殘。西堂無復共盤桓。空餘懷袖二年字。零落銀鈎忍淚看。

卷十五

吳

雯字天章。山西蒲州人。應博學鴻詞不遇。著有蓮洋集。○徵君詩清誕生新。趙秋谷宮贊謂千頃之陂。不可清濁。天姿國色。粗服亂頭。亦佳。怡稱其詩之分量。

遙題王咸中石隴山房

積水浮九州。東南益蕩涵。人家半洲島。蘿篠互蒙密。具區我舊遊。石隴君栖逸。至今堯峯上。猶上堯時日。窗外一湖明。階前衆山出。春風散巖花。細雨溜崖蜜。仙靈每來往。真儒間儔匹。表聖具生壙。維摩得丈室。泉聲四回抱。嶺勢百峯嶺。何日復羸糧。爲君訪衡泌。堯峯十字新城尚書以此賞識。

黃湄先生游太華山遂得結尾地賦贈

車箱谷口雲。白照松間路。誰能訪叔卿。巖竇一身度。黃門具奇情。振策御風步。萬仞入洪濛。理勝境無怖。壑轉晦明錯。樹老丹青誤。俯見蒼蒼原。明河正東注。驟雨忽翻瀑。肘腋蛟螭怒。須臾亘長虹。關陝半呈露。徑側修竹倒。石迸垂藤護。相逢紫烟客。目擊道皆寓。齋房肉芝香。石園松花聚。卜居志已得。探幽坐成趣。嗟我生勞勞。入世每多懼。夢繫毛女壇。身遠將軍樹。日月對晴蓮。塵容自生妬。何年便結鄰。同住雲生處。

十字奇警寫長虹從未到此

羊山

落日山風吹長松亂清影。白雲逗殘雪。忽見前峯暝。野鳥下寒竹。孤僧汲修綆。聊欲遂幽尋。理策度西嶺。
左司

雜詠

樓居有何好。仙人苦留戀。金銀雜玉階。終是世俗見。王頭與士壘。達者兩不羨。富貴不可求。況復貧與賤。嗟我果何從。一愚了千萬。
即韓子歸愚識夷途意寫來生辣

次青縣題壁

去年九月長安來。鯉魚風起船旗開。本年三月舊山去。馬上綠楊掠飛絮。舊山風景復何如。昨日家人有報書。當門萬里崑崙水。千點桃花尺半魚。

憶棲巖寺

最憶棲巖寺。招涼有舊亭。河流週郡白。山勢入關青。崖斷蜂留蜜。松高鶴墜翎。盧師吾有約。許共一函經。
新城欲以山入百變青句敵之

望華山

蓮花五千仞，靈孕自洪濛。每變風雲色，能參造化功。陰將連太白，氣自滿關中。
氣自滿關中，
五字千古。

雲中寺

天半雲中寺，四山皆白雲。我來雲際宿，卻憶雲中君。塔影當晴出，濤聲入夜聞。此中有猿鶴，莫勒北山文。
起四語盛唐人有此風骨。

寄向書友

曾聞向始平，能注南華經。之子真苗裔，江山發性靈。寒蛟終謝餌，老鶴不梳翎。載酒鶯花節，長吟入洞庭。
古意東徐勝力

美人豔南國，顏色如朝霞。昨來耶溪上，妬殺芙蓉花。秦珠隨月滿，越練逐風斜。獨慕孤高義，今年尚浣紗。
太白

宿吳山寺樓簡嚴灝亭先生

蕭蕭暮雨急寒榛，獨倚高樓少四鄰。江上鼙鼓悲鼓角，下方燈火散星辰。梅花何處三更笛，寒食無家萬里人。不是相逢嚴僕射，天涯誰念草堂貧。
一句含三層意，從萬里悲秋長作客一聯悟出。

明妃

不把黃金買畫工。進身羞與自媒同。始知絕代佳人意。卽有千秋國士風。環珮幾曾歸夜月。琵琶惟許託賓鴻。天心特爲留青塚。春草年年似漢宮。弔明妃并寫懷抱。方脫前人束縛。

吳門初春

聞道江干冰漸消。眼看芳草坐無聊。酒杯總使愁中得。春色終難客裏銷。山鳥漫吟泥滑滑。吳娘偏唱雨瀟瀟。歸時借問金陵路。桃葉新添幾尺潮。秀絕。

齋居

瓠落何須慮大樽。蕭然無客款柴門。春秋未習嚴彭祖。紀傳常輕褚少孫。下澤幾曾驅款段。長河終擬溯崑崙。雷聲太白連朝急。次第牆東過雨痕。

文中子舊居

汾水湯湯繞舊居。白牛溪畔雁飛初。早知道不關窮達。應悔金門輕上書。上書於隋文。非其時也。如此持論。文中亦應首肯。

題雲林秋山圖爲查德尹

經營慘澹意如何。渺渺秋山遠遠波。豈但穠華謝桃李。空林黃葉亦無多。石田翁做雲林畫。其師杜瓊從旁觀之曰。又過矣。又過矣。解得

此意方得此詩之妙。

贈少年

二十少年望麟閣。盤馬彎弓氣磅礴。眼前都尉知是誰。雲中但看雙鵬落。

戲贈李武曾

沉醉東風盧女絃。泥人佳句滿題箋。預愁長夜無春色。徧種桃花作墓田。猶有未忘生死者在。

馮

樾字个臣江
南松江人。

過陳留

天邊鵲影客心傷。落日驅車過外黃。誰具草蔬邀郭泰。自慙名姓賞中郎。巴河風起荒烟黑。博浪雲開遠樹蒼。明發梁園舊遊地。十年潦倒愧行藏。典切處有自己身分。

楊

岱字東子四
川彭縣人。

棧道

鳥道與天齊。盤雲萬壑低。層巒飛瀑下。空木亂猿啼。山勢危巴郡。邊聲隔隴西。可憐存輦路。烟雨草萋萋。起步有聲有勢。

夜泊

夜船將泊棹歌齊。芳草萋萋野路迷。只有斷猿無宿處。最高枝上徹明啼。

劉淑頤

字百年湖廣麻城人。

四時詞

雲母空窗曉煙薄溫庭筠池邊雨過飄帷幕許日長風暖柳青青至銀線千條度虛閣韓偓捲簾巢燕羨雙飛

羅芳草王孫歸不歸章曾寄錦書無限意劉兼篋香消盡別時衣柳

午睡醒來愁未醒張子野煩襟乍觸冰臺冷韓偓白蓮池畔送清香皮日休樓角漸移當路影白居易臨風興歎落

花頻魚玄機又喜幽亭蕙草新杜牧永日迢迢無一事章雙雙鬪雀動階塵元稹

水映輕苔猶隱綠馬懷素夜窗颯颯搖寒竹劉惠井邊疎影落高梧羅隱鳥啄風箏碎珠玉元稹覺來紅樹背銀屏

莊露溼叢蘭月滿庭孫氏扇閉朱門人不到魚玄機輕羅小扇撲流螢杜牧

城上暮雲凝鼓角許渾狐裘不煖錦衾薄岑參樓寒院冷接平明李商隱簷外霜花染羅幕陸龜蒙煙生密竹早歸

鴉郎士元向鏡輕勻襯臉霞韓偓遲日未能消野雪皇甫冉故穿庭樹作飛花韓愈○音節悠揚無集句痕迹與

贈宋牧仲方伯

曾入甘泉侍武皇李邕暫隨紅旆佐藩方莊長承密旨歸家少王建出使星軺滿路光錢起謀略久參花府盛韋

風流三接令公香李頎共言東閣招賢地孫逖肯為詩篇問楚狂賈

邵長蘅字子湘江南武進人十歲補弟子員後為奏館案牘以山人終其身著有青門集○山人

滄溟四家之詩乃雙蘇黃范陸之派亦宋詩中矯矯者然視從前如二手矣茲所存者皆青門龍稿旅稿中作

稿中祇
略采云

經彭蠡湖口望廬山

晨帆發馬當。景昃停湖匯。北渚搖清陰。南灣走蒼靄。迴眺極羊縣。羣山爭瑣碎。蒼然雲霧中。拔起匡嶽大。絳氣天闕縈。白雲山腰會。遠岑抱積雪。近巖屯鸞對。倒景澄湖光。飛瀑溼天外。延佇情彌結。攀躋阻莫遂。五老空煙霞。九疊竟茫昧。慚愧夙心乖。臨風一長嘅。

連下溇陽舟中
作胎源小賦

溇陽舟中作

羈心零雨悲。水宿風潮倦。茲晨廓澄霽。沿流愜佳玩。綠英媚芳洲。雜花覆春岸。青天鏡中流。浴鳧沙際亂。落日碎江光。林巒采餘絢。靡靡遠烟生。霏霏夕暉眩。蒼然望廬山。山靄旦暮變。絳霞晨干霄。嵐氣夕羃巘。近巒或浮黛。遠瀑如縈練。賞奇得新歡。覽物有餘戀。山水愴娛人。客懷爲一遣。

雜詩

撫劍忽不憚。去上歌風臺。河流日夕迅。莽莽寒雲隕。帳殿下牛羊。鼉風空蒿萊。極目見芒碭。古人骨已灰。蕭曹自刀筆。樊灌奮鴛駘。歛起附龍鳳。英風被八垓。途窮蹶駿足。運適伸庸材。擾擾路旁子。疇知衷所哀。

起勢慷慨。途窮二語。括盡揚子解嘲中後一殿意。

漁父

清詩別裁 二卷十五

一百四十一

東湖有漁父，艇倚清溪瀨。垂竿秋雨中，櫂歌夕陽外。九月蘆花白，西風鯉魚大。釣亦未必得，得亦未必賣。扣之默無言，鼓枻悠然邁。覺非夷非蕙，聊以忘憂猶不免自道身分，此更超然。

熊經略

經略用遼瀋完，經略罷遼瀋殘。再起田間賜劍印，經撫日戰玄黃分。六萬蕩平竟何有，撫臣主戰經主守。一夜廣寧風鶴驚，撫臣先走經亦走。撫臣庸愚何足齒，奈何經略也惜死。若使慷慨提孤軍，搗柱殘疆報天子。縱然馬革裹尸還，九尺昂藏一男子。奈何經略也惜死，不死西曹死西市。九邊傳首魂有知，目炯電光血裂眚。經略之誤在廣寧之走，其實經理遼瀋具有將略，不應與王化貞同罪也。傳首九邊羣姦借經略以恐揚左諸公耳。天下冤之一結凍凍有生氣。

周將軍

櫓槍狂驅萬貔貙，橫嚼九州無完土。邱成血骨益成池，所過堅城孰抗拒。寧武一城如彈丸，誰與守者周將軍。將軍票鶴健絕倫，生駒攪陣刀截雲。見賊如蝟身逾輕，手挈髑髏茜袍腥。力竭罵賊血齒齧，旗竿矢集怒益震。閩中紅顏能殺賊，十發十殪無虛鏞。崑山火燄紅玉燕，天壤寥寥兩全節。大同宣府真奴儕，兩鎮降書同日來。長驅京闕疾於矢，賊談寧武猶咋指。列鎮盡如周將軍，我輩那能飛至此。賊逼寧武將軍戰死，夫人劉善射發一矢輒斃一賊，城陷圍門自焚，未即用流賊語作結，健悍有力。○大同宣府謂姜瓖王承蔭之迎降也，詳見後李玉洲太史詩中。

解仲長畫十八學士圖歌

秦王蚺一尺鐵。提槩視欄中原血。畫開天策羣龍趨。諸公袞袞皆英傑。當時立本傳畫圖。千載想像猶能識。我家此障解翁筆。宣和院體工設色。臺榭渲染輝丹青。宮殿玲瓏麗金碧。頗工人物良苦思。舊本摹拓開鬚眉。宮袍緋紫雜青綠。腰帶撻尾紛帔垂。髣髴銅龍散講後。晝遲行樂分曹偶。房公微笑杜公坐。投壺散帙無不有。就中一人落筆酣。細看恐是虞世南。其餘學士貌各異。峨峨列坐影華檐。卽論畫馬亦殊絕。奚駒十八森成列。銀鞍金鏤音晚高纏鏤。三匹翹足五匹齧。太液淡淡春風波。黃鬚奚官白鬪鞞。牽來十匹池上浴。丹鬚翦刷噴桃花。可憐人馬爭輝寵。憑軒坐久神逾竦。憶昔風塵際會初。君臣契合水與魚。功成開府迨清暇。春容翰墨非荒娛。只今朝野仍艱虞。時危整頓英雄需。撫圖懷古心鬱紆。書生豈有封侯顛。慷慨擊碎玉唾壺。高吟梁父浮雲徂。十八人豈能悉數。點房杜虞三人。其餘以虛筆該之。可悟繁簡虛實之法。

五人墓行

春光澹池山塘路。遊絲晴絮嬌芳樹。路旁剝落三尺碑。云是前朝五人墓。借問五人誰。中間突兀顏佩章。東西四塚排壘壘。墓門畫鎖松風迴。書生曾讀前朝史。依稀能說前朝事。天啓年間歲在寅。緹騎四出驚狂獮。此時一舸飛吳閫。屬鞮繡襖來昂藏。吏部短衣出就逮。自注周忠介順昌觀者擁塞如堵牆。轟轟萬口那可辨。哭聲震天日色黃。五人大呼奮臂起。形勢欹忽歷羹塘。誰何一校先橫屍。中丞卻避御史忙。詔收棄市罪激變。至今死骨傳芬芳。憶昔逆閹恣塗炭。鋏斧銅甕衣冠殃。諸公駢首填牢戶。東林首指左與楊。復與

就考備五毒，尸蟲嚙肌不得葬。

叶茲耶切

委鬼更灼爇天燄，穹祠金榜蛟龍翔。鳳闕敢擬至尊埒，龜趺忍立成

均旁。往往嵩呼九千歲，冕旒衰玉爭輝煌。寧知勢歇頓翻覆，阜城自絕闔奴吮。生祠處處毀斥盡，木石估

值充邊防。豈惟闔祠旋毀撤，廿年變故那能說。鼎湖鳧雁飛滿天，鍾山天壽狐狸穴。玉匣珠襦夜不扁，皇

陵白骨愁冬青。眼前寂寞一杯土，參天檜柏蒼蚪鱗。年年寒食山橋畔，指點飛花說五人。

順敘魏奄之流，毒勢便平直，此

從擊魏騎後用憶昔二字追敘自得順逆相生之法未幅蒼涼激壯一往神來

沛縣官舍留別楊簡庵表兄

我騎白氈浮江來，連濤倒蹴羣山開。黃河咆哮黑浪惡，一月始及歌風臺。骨肉五年不相見，風塵歛視吾

兄面。我昔弱齡今有鬢，君亦蹉跎四十餘。薄宦千里不快意，一官仍擁青氈居。感君意氣與君好，流連累

月開懷抱。夜飲酣呼玉屈卮，晝遊連騎金腰褭。高秋九月天氣涼，呂母塚上塵沙黃。出騎快馬風比捷，從

少年輩逐兩疊。弓弦拓作礮礮響，餓鳴飛去噉空桑。割鮮野飲氣益壯，肯作新婦車中藏。歸去歡宴不知

夕，羌樂琵琶鼓箏笛。明河欲沒牛西斜，主人稱壽客離席。吁嗟遊子如轉蓬，作客未幾行窮冬。忽憶故鄉

行樂好，黃雞正肥新籜紅。明日驪駒更東首，馬上別君但揮手。北風鬢發短後衣，蕭條中野行人稀。廣陵

驛前暮潮落，京峴山頭雪片飛。河水遙遙接江水，別淚與之誰是非。

超然而入中射獵一段，排宕飛揚神似太白。

雪後登滕王閣放歌

我攜鐵篋羅浮回。豫章城頭吹落梅。羅浮仙人太狡獪。蜚廉滕六供呵撓。亂灑梅花徧原隰。千峰一夜爭
皚皚。曉披白鶴氅。獨上滕王閣。九疊屏風失青翠。瓊樓十二垂珠箔。長江瀟灑迷孤篷。漁舟藏浦高梳泊。
團團萬頃水晶盤。一片寒光冪寥廓。初疑海上浮神仙。蓬壺縹緲不可攀。其物禽獸皆白色。自注用封
禪書語。銀
爲宮闕虛無間。又疑誤誇玉虹入月府。玉甌抱杵凍不舉。霓裳對對舞仙姝。清虛高處寒如許。回頭雉堞
堆璨瑳。簷冰柱地鐸鈴語。鱗鱗萬瓦溼煙浮。旋覺此身尚塵土。忽憶滕閣今千年。滕王蛺蝶隨荒烟。子安
退之骨已朽。何況珠簾歌舞當時妍。惟有西山只如舊。此中棲隱多神仙。洪崖丹竈流銀汞。蕭史茅龍耕
石田。我欲左攜葛勾漏。右挽梅子真。徑呼玉蚪騎上天。雲中縞鶴紛翩躚。或言神仙之說竟茫昧。且飲美
酒醅朱顏。向晚江山轉清絕。逸興擎雲坐超忽。夜深蹋雪還上來。揮手寒窗招海月。茫洋渾濁千變萬
狀極才人之能事。

江急

江急雨冥冥。江豚吹浪腥。濤奔遠岸白。峯逐去帆青。野戍春低樹。灘舟火聚星。長年趁風便。向晚更揚舲。

九江

吳楚一江共。波濤九派分。湖光寒自白。廬嶽曉常雲。虎鬪荒村跡。猿啼落日聞。琵琶亭廢久。楓葉正紛紛。
哭亡兒士騷

遺編繙不忍。轉憶課經時。過愛翻成薄。求全屢受笞。一燈寒夜影。十載膝前兒。辛苦成何事。酸心我不慈。

即鞭撻過多，機較少意，一經烹鍊，便覺不凡。

望楡經旬，嫩衣衫漬淚痕，伶俜餘此日。門戶且誰論，痛我無兄弟。憐渠是冢孫，昨朝寒食奠，隻立黯銷魂。

直白語，悲痛彌深，一結即柳州寄許孟容書中顧盼無後繼者意。

登歌風臺懷古

芒碭真人乘赤龍，故鄉行幸有遺宮。壁埋蝌蚪荒碑在，木落牛羊寢殿空。湯沐百年歡父老，衣冠十日擁兒童。淮陰已族黥彭醜，慷慨何須悲大風。
歌風時韓彭黥俱已族矣，思猛士何心耶。

望鍾山

陪京雉堞迥蒼然，重憶高皇逐鹿年。汗馬北騰穿碣石，長虹南倚劃吳天。鼎湖龍去離宮鎖，複道花繁紫禁偏。悵望寢園今寂寞，牧人秋臥孝陵烟。

登吳城望湖亭

鄱湖湖合贛江流，倚檻江湖望轉幽。湖勢北搖匡嶽動，江聲西擁豫章浮。魚龍晝嘯千艘雨，日月晴懸一鏡秋。回首戰爭曾此地，荻花蕭瑟隱漁舟。

題冀渭公所藏楊忠愍梅花詩卷

渭公大父梅軒，故官比部郎。忠愍頌繫時，先生傾身橐。忠愍高其詣，爲作此卷。同時周旋詔。

獄。霸州王繼津。太倉王元美。及應生最著。先生事世鮮知者。康熙丙辰。涇公來吳閩。出卷示余。蓋百二十餘年物矣。展卷肅然。敬題其後。

黯淡細縑墨影寒。那能展卷不洩瀾。當關虎豹糜軀易。畏路風波仗友難。濺血九原仍化碧。批鱗一疏獨留丹。文山詩句眉山筆。古瘦清香再拜看。自注忠懇有古癖清香原太始之句。○重忠懇及周旋詔獄畫梅意。只用一點已足。

登太湖西峯

山色蒼蒼積翠迴。沿緣仄徑入莓苔。嶺邊風葉藏僧寺。樹杪飛泉灑客杯。清磬一聲松子落。白雲萬頃太湖來。三高惆悵俱陳蹟。落日山空樵唱回。

張

宮字處中。江南華亭人。

飲沈鷺生池館

嘉樹俯城陰。居然爽氣深。非秋常落葉。不夜有歸禽。邱壑容芝草。冰霜耐竹林。主人山水志。誰與共清音。

送李素心之岳陽

畫舫中流芳草齊。臨風張樂洞庭西。從官諭蜀通三峽。大將平蠻下五溪。衡嶽雲開鴻雁度。巴陵月落鷓鴣啼。好憑羽扇成雄鎮。荒服於今靖鼓鼙。初平三楚之後。故有鎮聯。

陸次雲

字雲士。浙江錢塘人。官江陰知縣。著有澄江集。○雲士詩本真性情。出之。故語多沉著。而所選詩轉在宋元。以之怡情。不以之爲宗法也。

雜感

雷霆能擊人。獨畏操莽威。鬼神能福人。獨於孔孟遺。今古無鑿戒。禍亂相乘除。問天天不言。屈平空著書。
四十字中。可抵一篇天問。

北地每苦寒。狐貉出天山。南地每苦熱。絺葛生於越。人之所欲須。天意預爲設。大哉造化功。於世何所闕。
天道自然。君子亦因其自然而已。

芝蘭出穢壤。芙蓉生淤泥。賦性自芳潔。於此徵神奇。君子處濁世。師惠以全夷。何必登首陽。高歌懷采薇。
見傲傲易汗。曉曉易缺也。師惠全夷。指出持身處世之道。

出門

堂上有慈親。身外無昆季。承歡賴妻賢。委之以爲弟。弱女方四齡。初知離別意。恐其牽袂啼。深傷遊子緒。
字字真至。出門方隕涕。前人未經道過。

乘彼睡未醒。温存加絮被。拜母不能言。揖妻交重寄。此際心若摧。出門方隕涕。
字字真至。出門方隕涕。前人未經道過。

回首望家山。漸遠山漸低。側聽岸旁語。鄉音已漸移。放舟入大河。烟水無端倪。偶逢相識人。遙呼心依依。
無如交行舟。倏忽已遠離。

泛洞庭湖

大浸數五湖。莫大於洞庭。時當春夏交。雪融水氣蒸。仰視但有天。與波同一青。茫茫六合中。不見大塊形。

三老弄洪濤。澎湃意所輕。至此乃敬慎。風正始揚舲。同舟色俱靜。半帆容與行。此中有楠木。千載成英靈。出沒每不時。異響令人驚。舟婦散紙錢。徐徐乃就平。死生呼吸間。宴坐猶兢兢。吁嗟縹緲中。難測鬼神情。或問傳書事。心知不敢應。是賦洞庭別於賦海楠木敢言寫來恍惚變幻疑鬼疑神

君馬黃

君馬黃。臣馬白。君執珪。臣執璧。君意皇皇。臣翼翼。四海會同來。有繹和在鑣。鸞在軾。驕驕八駿不齊色。馳驅不向崑崙陟。馬之良。良以德。

誌感

人生當貴顯。每淡布衣交。誰肯居臺閣。猶能念草茅。朱輪來北闕。土室訪西郊。古道今還在。淳風近有巢。
登岱

得過三觀古。目上岱宗巔。海吸長河遠。天包大地圓。五更先見日。九點半升烟。孰謂方隅廣。迴環睥睨前。
天包大地圓。形天地之全也。五字極寫岱宗之高。

白溝河

道出白溝河。沉吟喚奈何。古今陵谷變。高下戰場多。厲鬼依殘骨。耕人拾斷戈。烽烟嗟又甚。搔首一悲歌。

五溪雜詠

崎嶇幽谷裏。盡是碧雲阿。祖每尊盤瓠。祠皆祀伏波。峒民參漢俗。溪女唱苗歌。漑種漁樵暇。悠然臥薜蘿。挂帆將匝月。猶在亂流中。野豕能飛箭。江豚善拜風。安危憑激浪。行止信孤篷。影落南天外。飄零望斷鴻。

天下大師墓

水關西出隱浮屠。燕子飛來半月孤。病虎無心看北固。潛龍有恨遜南都。十三陵外餘坏土。二百年來失鼎湖。一自桑田成海後。總啼鶻血洒平蕪。天下大師係元僧人墓。建文無出亡之事。前人辨之詳矣。此仍舊說而賦之。○病虎謂道衍也。道衍有北固青青眼。能看句。

疑塚

疑塚纍纍漳水頭。如山七十二高邱。正平只有墳三尺。千古安眠鸚鵡洲。大為文人吐氣。

詠史

儒冠儒服委邱墟。文采風流化土苴。尚有陸生坑不盡。留他馬上說詩書。

題荆山石壁

寄語山靈聽嘯歌。連城再別歎如何。人間碧眼應難遇。莫產瓊瑤誤卞和。七言絕。每龍用意不減。銜鳴。

章靜宜

字湘御。江南長洲人。諸生。○湘御為素文。鶴書之弟。九儀之兄。四先生並擅才華。名滿大江南北。間湘御尤工於詩。近人諒有知者。

擬劉太尉傷亂

宗社觀厄運。夷夏亂皇綱。神州盡糾紛。腥羶逼晉陽。余本炎精裔。投職事危疆。思將南山石。一補天柱荒。

妖氛煽四野。中道罹崑岡。上慙楚包胥。請師救國殃。下愧漢寶融。保境拒強梁。遺軌寧不仰。微志竟莫償。身同南冠囚。撫膺涕泗滂。心如高懸旌。因風尚飛揚。吹簾懷我懷。鳴笳斷我腸。孝行旣已虧。忠名徒自傷。功助付逝水。意氣亦何常。

寫出越石心事詩格亦幾如唐臨晉帖

汴梁行

汴州城內風鶴驚。汴州城外連軍營。一夜金陵雷電起。千年玉殿波濤聲。大梁自古繁華地。三市風光最明麗。西連伊闕作屏藩。北控成臯如帶礪。高帝當年闢草萊。分封萬騎自天來。蘭筍仍起飛雲殿。樹寢還通造字臺。子孫奕祀承青社。議親常得君王赦。傳來樂府勝河間。製就新聲誇鄴下。東風十里覆長隄。萬樹千條各向西。珠履盡知公子客。寶釵時見舍人妻。金梁明月空平度。玉津芳草迷歸路。園內雙雙蛺蝶飛。橋邊隊隊驂駟駐。雙雙隊隊更如何。紫陌朱城拂逝波。自言百歲來歌舞。自謂三時競綺羅。綺羅歌舞無窮極。炎天烽火嗟何及。北地誰知青犢鳴。東門忽見黃虬入。飄零雉堞少人行。牙旗大纛自縱橫。波翻夏后前朝廟。潮打梁王舊日城。故侯冷落悲徒步。新鬼荒荒泣烟霧。鶴雀高栖敖氏倉。鴛鴦虛抱相思樹。至今榛棘尚成行。落日寒沙古戰場。無忌已知新去魏。相如不復遠遊梁。遊人對此空嗟悼。胡笳蘆管聲中老。牧馬常過屠肆旁。射鵰每向彝山道。淒涼今古不須哀。極目秋風萬里開。試向東都更長眺。銅駝金谷半荒墟。

此感流寇決河灌城而作也前寫汴梁之盛後形汴梁之衰婉轉悠揚初唐風調

晚泊京口

舟行易日暮。旅泊背孤城。酒力當秋勝。鄉心逐夜生。人煙都會地。風雨大江聲。明發空南望。蒼然北固橫。

夏日雜感

蕪城柳色綠成陰。詔遣賢王羽騎臨。風急雙鷗辭塞口。天清萬馬浴江心。虛傳此地繁華久。誰念當年戰伐深。歌吹竹西如尚在。休教笳管漫相侵。

金陵

雞鳴山上滿青莎。玄武湖邊空碧波。草滿故陵埋石馬。月明荒徑泣銅駝。六宮夜雨棠梨落。萬里秋江葦荻多。猶有南朝城堞在。景陽遺恨獨悲歌。聖祖南巡後。修葺孝陵。御書治隆。唐宋碑額。非復向時園寢矣。詩成於未巡幸時。故有第三語。

京口作

鐵甕城西鼓角催。扁舟遙自秣陵迴。天清瓜步中流見。風起長江動地來。楚蜀帆檣千里集。金銀山寺兩峯開。秋光潦倒南遊客。落日魚龍夜夜哀。七律。沈雄蒼老。信陽北地之間。○銀山俗名對金山。而晉寶印森山也。

顧景星字黃公。湖廣蘄州人。著有白苕堂集。

題內府所藏唐人百馬卷子

開元廐馬四十萬。天寶從龍誰最健。夜讎火鼓延秋門。晝爭豆莖咸陽店。萬里橋頭百存一。騎去東宮還

幾匹當時芻秣盡凡才。急難何曾見騰逸。此圖蒲稍僅百馬。毋乃樂坊教成者。細看不是臨陣姿。可惜登牀汗流赭。黃衫奚官三五人。鏤花玉帶繡抹巾。羈前寶絡墜金鐸。覆以羅帕承錦茵。可憐賊破西京後。此馬全爲承嗣有。鼓聲應節反見妖。血碎桃花死猶吼。圖藏內府已千年。相傳畫手南唐前。畫師有意惜奇駿。不遣驅馳供舞筵。君看老驥還遭放。儘有驂騑氣凋喪。首宿難逢大宛種。荄蓉屢溼邊庭瘴。傲儻何須四百蹄。壯觀爭多眞畫師。轉思腰裏不世出。天子獨乘何所之。芻秣盡凡才二語。比當時象養庸流。臨難直不識爲何如人也。借題發揮。乃見作手。

汪徵遠字扶晨。江南徽州人。

天平石入師子林

深松寒白石。僻路到人稀。仰見高峯頂。孤僧采藥歸。雲多從杖起。鳥不上山飛。薄暮一聲磬。猿公來款扉。向遊師子林。雲滿几席。牛山即無鳥聲。讀此詩。知眞寫得景出。

上蓮花菴

秋山鐘梵寂。蘿徑上崔嵬。意想不到處。峰巒忽盡開。石牀平落葉。古壁滿荒苔。更羨孤雲逸。松顛自往來。頂有到者。方知豈有此理。題額三四語。即是此意。

坐狎浪閣

高閣臨溪水，薄暮軒窗開。不見菴中僧，微雨潭上來。不見庵中僧二語，王

汪洪度字于鼎，江南歙縣人，諸生，著有餘事集。○于鼎詩，流洋定其全集，歌行中賞其建文鑑篇，云中有史筆，非荀作者，今集中不見此詩，可惜也。

次街口

萬山落飛瀑，競向清溪會。灤洄穿松杉，葱蒨紛映帶。積石竦劍鋒，百里無靜瀨。篙師慣歌嘯，險絕了不礙。攢霄排巖巖，幽異此中最。轉惜嶮巖中，蒼黃出烟靄。漁火半明滅，海月上山背。家鄉送別人，已隔青峯外。過險而驚，出險轉惜，無情人不知是語之妙。

七里瀨

日照丹霞西，雨來青嶂東。船頭氣澄碧，船尾陰溟濛。峯交路疑盡，溪迴趣無窮。渚清水禽悅，徑碧巖花穠。束髮志沉冥，思躡客星蹤。曩遊已十載，老大仍飄蓬。山頂石乳滴，服食使顏紅。丹梯不可上，神仙杳難逢。何日謝塵緣，煙波從釣翁。起四語，卽所謂朝騰于西，崇朝其雨也。弔嚴陵意，只於隱躍見之。

蘗菴大師自注：侍御熊公，諱開元。

九尺老比丘，骨立石崖松。楞伽把一卷，兀坐西南峯。舉頭近帝座，低頭睨寰中。批鱗丹陛前，驅鰐滄海東。昔懷寧，易平托鉢降毒龍。陽靈大地匿，雨雪春山空。樵徑白雲迷，何處尋孤踪。

蘆中老人自注：禮部郎王公，諱泰徽。

蘆中人易老。不復刺漁船。悲歌采薇蕨。歸臥西山巔。山路幸峻嶮。足音少人傳。氣衰筑難擊。不如弄雲煙。骨瘦薪難臥。不如枕清泉。清泉滌塵襟。雲煙幻眼前。憂思能傷人。誰禁遲暮年。

鼠渡江

江北鼠口銜尾。結伴成羣滿沙嘴。飛塵滿野烈日在天。江北農人憂心如煎。江南稻秧齊。沃土不須雨。同類渡江。適此樂土。楚豫稻梁堪足天下。今年不雨春復夏。估不開倉穀添價。鼠乎鼠乎。勿食禾黍。食盡及爾同死。由江北而及江南兩地之禾同盡也。鼠俱餓死其人可知矣。此種詩從變雅中來。

翁履冰

翁挈稚孫暮歸。履冰上中流。值冰裂。落水死。

東家粟紅。西家粲白。借貸空歸。羞見河伯。河伯羞尙可。一家待我舉烟火。河水生骨膠渡船。攜孫偃僕行難前。誰知河心冰不堅。狐狸隔岸看墮水。枯桑槭槭酸風起。綏綏欲渡愁其尾。狐愁滿尾。猶與孫尙能履耶。愁慘之音。幾不忍讀。

紀歲珠

鄉鄰某娶婦甫一月。卽行賣婦刺繡易食。以其餘積。歲置一珠。用綵絲繫焉。曰紀歲珠。夫歸婦沒已三載。啓篋得珠。已積二十餘顆矣。

鴛鴦鴻鵠。鳧雁鵠。柔荑慣繡雙雙逐。幾度拋鍼背人哭。一歲眼淚成一珠。莫愛珠多眼易枯。小時繡得合

歡被線斷重緣結未解。珠纒纒天涯歸未歸。老杜新婦別為王家守河陽也此為行賈而別備所云重利輕別離者耶結意不用說盡婉約可盡

懷黃扶孟

從來經易水誰不念荆軻。有客自驅馬。秋風正渡河。回頭山色遠。直北角聲多。日暮思鄉井。踟躕發浩歌。憑空而下千鈞筆力

汪洋度字文治江南歙縣人

臂痛

那能扛筆氣如虹。自笑千鈞一握中。乍可偏枯猶半士。誰堪全折到三公。斜簪卻似垂翎鶴。子立還疑欲瘁桐。天意佚吾吾正嬾。紙窗晏臥罷書空。大雅之音可配曹魯圖贈徐子能跋足詩

吳江舟夜

水驛迢遙望不分。愁心落葉共紛紛。扁舟一夜搖江月。入夢吳歌斷續聞。吳歌以吳江為最用來獨切

卷十六

彭始奮字中郎河南鄆州人

滇南

久客愁攀廢苑松。舉家天末盡相從。蠻兒乘象同牛馬。棘道看花無夏冬。近接漏天常作雨。倒流滇水不朝宗。獨期攬勝遐荒外。恨未曾登雞足峯。

寄隴西觀察趙韞退先生

新分采邑陝西偏。上奏仍屯塞下田。部傍先零氈作帳。道通西域雪爲泉。陰山控馭六千里。河套因循三百年。會見殊勳陵海外。那煩班固勒燕然。

陶

窳字苦子。廣東順德人。○陶氏世襲錦衣。至苦子。刻苦如寒素。肆力於詩。誓不龔牙。慧語亦南粵錚錚士也。詩無鑄本。被其感竊爲己作。恐久而混真。故特表而明之。

古鏡

先秦遺篆在。想像出深宮。明月不生處。清光時與同。有形隨自應。無相本來空。白盡人間髮。全歸一照中。
賦鏡者未曾道及。第六句可以證禪。亦以明虛靈之體。仍儒家語也。

冬草

三徑經冬掩。飄零對汝時。未充君子珮。徒結美人思。世能看蓬轉。孤心感鬢絲。平生抱微尚。不與衆芳期。
借以自況。非尋常著題體。

送張超然

閩粵無多路。思君見面難。高文朋輩重。落葉客程寒。殘臘惠相訪。素絲勞共彈。重華不可作。幽思更無端。

望零丁洋寄懷友人

兩年九月此經過。極目蒼茫感逝波。窮島漢槎無限路。秋風禾黍自成歌。忠臣淚帶寒潮長。楚客悲逢落葉多。欲寄相思憑去雁。故人歸夢杳星河。因信國孤忠。懷及友人不拋擲零丁洋意。

秋望

數聲離鴈下寒汀。世事相看散野萍。入水苦匏思共濟。望秋蒲柳感先零。憂心滿似將圓月。旅鬢疎同避曉星。獨潔精稂候槎影。美人空自隔滄溟。有志濟時而撫躬已老。豈尋常栖隱士耶。老杜有感於聖朝無棄物。多病已成翁也。

查

字韜荒。浙江海寧人。

送武曾之宣府

由拳城頭月華白。張燈置酒宴征客。由拳城外柳條青。平明相送出津亭。羨君意氣真無比。此去幽州幾千里。攬轡遙看冀北雲。挂帆徑渡淮南水。大行山高日欲斜。邊風颯颯飛塵沙。候騎千屯吹觱篥。明駝一隊奏琵琶。上谷使者與君厚。轅門揖客論故舊。伐鼓鳴笳部曲前。錦筵紅燭軍麾後。觥籌交錯坐忘疲。玉缸瀉酒醉難辭。壯士橫刀看草檄。美人挾瑟請題詩。丈夫三十猶未遇。走馬窮邊那復顧。野狐嶺下白草枯。臥龍岡上黃雲暮。客中行樂不知年。但看月出幾回圓。沙場忽聽思歸曲。應使鄉關望眼穿。得力於岑嘉州。

贈別少典

鳴榔伐鼓不曾停。月落津樓見曉星。芳草自分南北路。垂楊相送短長亭。歌殘銀燭愁難別。勸盡金壺醉未醒。豈爲燕臺師郭隗。一時客去感飄零。

潘鏐字雙南。江南吳江人。

金山

孤嶼中流峙。橫空勢欲吞。天清江作帶。地闊海爲門。塔影魚龍靜。潮聲日月奔。茫茫千古意。醜酒共誰論。
造句奇警。

揚州秋感

光岳英靈河雒分。尙餘寒燄射青冥。將軍闔外空專弢。丞相營前竟墜星。鬼哭郊原淒曉角。鶴歸華表泣新亭。秋風萬里荒林下。手折黃花當薦馨。
拜史閣部墓而作。見四鎮跋。屬無功。而閣部惟輪躬盡瘁。死而後已也。比以忠武許之者深。

寄顧茂倫先生

十載江城久未過。美人幽夢近如何。著書歲月窮愁老。對酒湖山感慨多。誼重延陵貽縞帶。節高元亮臥煙蘿。還期鼓楫成良會。聽取尊前白石歌。

彭桂

字爰琴。江南溧陽人。○陳子山學士。攜爰琴詩見示。係鈔本。屬予選定。刪存四卷。僅取甚促。因節錄九章。終以不能多取爲憾也。

出宣州過箸嶺入歙州界遇雨

遊子倦行役，攀折畏險阻。宣歙盡山城，峯巒互撐拄。叢箐裹郡縣，仄澗跨垣堵。茲嶺何崿嶢，懸道通一縷。峭壁插天門，裂石界地戶。泉奔腳下雷，風嘯空中虎。朗日眩神魂，旅人怯亭午。況乎我獨行，縹緲入雲雨。

揚州巖署爲董江都故居署後有祠遣井尚在丁巳秋瞻謁感賦

鄒魯儒風溼，嬴秦強力逞。蘇張舌肆矛，申韓智設筭。典籍付劫灰，仁義棄荒梗。亭長馬上來，功成亦僥倖。苟且由蕭曹，因循及文景。卓哉江都相，量賈非可並。三策本春秋，反覆誠修省。正誼與明道，功利所亟屏。至今兩廡祀，千秋日星炳。管子霸者佐，思以富強聘。官海始熬波，國用因不窘。後世桑孔輩，錙銖收幾盡。淮南百萬租，設使俾專領。趨羶如蟻蠅，處濁同鼃黽。誰令先生居，一朝作金礦。我茲瞻荒祠，三歎中耿耿。幸有遺井存，悠然自清冷。獨來對寒泉，對之滌心影。前以蘇張申韓諸人引起，見道術久變，得管子而始正也。後又從管子之熬波說，到桑孔盡利，淮揚之間。蠅屯蟻聚，而管子之居，竟爲堆積金錢所矣。幸有遺井存，可以洗心鑒影，猶極炎熱時服清涼散也。此種詩不同風雲月露之作，而又不入於腐，所以爲高。

夜飲閩再彭席上聽孫良侯搗鼓歌

空堂昨暮聞疎雨，颯颯秋聲滿庭戶。可憐今夜露華中，明河碧漢還如許。堂中燒燭夜譙客，有客酒闌起離席。自言搗鼓聲最豪，奮袖操槌將欲擊。欲擊未擊手徐低，坐上先教衆樂齊。衆聲雜作一聲下，修如蟄雷動春谿。鼓聲如雷手如電，須臾迸激飄飛箬。管音何亮磬何幽，忽捲諸音聯作串。初聽緩，戛裂一聲迴抱腕，乍聞急。百萬軍中單騎入，急復散。蘆荻蕭蕭徧鳴雁，散終促。懸崖萬點亂噴瀑，有時宮海濤淘湧紅。

日中有時商。鳳皇九子鳴鏘鏘。有時角。擲地兜鍪起舞槊。有時微。有時羽。微如嗚咽灘流水。羽如間關鶯滑語。五聲都會鼓聲中。低時能辨高能融。直教上拂星斗亂。直教下徹井泉空。仰看缺月銀蟾上。邊風露草吹相向。鼓聲闌出畫堂中。只覺天清與野曠。於中能識鼓中神。揚桴擊節旁無人。淵淵沈沈有妙理。能動高雲不動塵。聽君擊鼓悲無那。好歇鼓槌來入坐。自從驚起漁陽鼙。多少江山都入破。二十年前日夜開。野花沙草弔殘軍。到今凝碧池頭問。祇有雷生曾報君。客聞此言神欲奪。兩手忽落雙槌歇。鼓聲一止截衆聲。空裏餘音猶恍惚。耳邊尙覺來闐闐。與君盡醉酒杯前。開顏但爲主人飲。今年歡會知何年。勸君打鼓莫輕下。世無曹瞞安足罵。主人縱有岑牟衣。不遇禰生未許借。遊邇而來備極音節後半借漁陽擊不輕擊鼓真覺四座無人目空一世。

建初弟來都省視喜極有感

相持莫下拜。拭淚認分明。訝爾顏何瘦。令余痛失聲。饑寒留剩骨。患難得餘生。乍見渾無語。那堪悲喜并。爲致慈親語。殷勤勸早歸。歎余遠井邑。況汝別庭闈。每念尸饔苦。深慚彈缺非。向來多少淚。都染手縫衣。弟傳親語勸歸而已與弟轉並滯客途倚闈之思愈切矣此種是真杜詩。

更傳兒女意。盡解憶長安。索飯啼堪念。牽衣別自難。兩人今旅次。八口在江干。此際愁何似。秋風暮更寒。比不解憶長安更覺可憐不解憫其無知盡解又憐其聰慧也。

同蒼符過王勤中怡老堂

自注堂爲文恪公歸沐之所勤中其七世孫

宰相當年怡老堂。雲仍七葉守青緇。成弘盛世思元老。晉宋新亭滿夕陽。蕉葉雨斜侵硯几。藤花風細落書牀。推君逸少兼摩詰。文藻東吳獨擅場。

答懷閻再彭

記別淮陰擲釣竿。楚天雲樹竟漫漫。徒勞問答皆賓戲。始信文章果說難。肥馬塵中孤客賤。嚴霜夢裏故鄉寒。自慚未得酬知己。腰下吳鉤怕解看。

彭

字則神江極南深陽人

得爰琴兄都門信

牀頭寶劍泣魚腸。賦就三都價未償。絕不待人惟歲月。最難爲客是風霜。春山自灑啼鵲淚。慈母曾纒遊子裳。今夜挑燈應獨寐。好將歸夢繞高堂。

吳之振

字孟舉浙江石門人。○宋代詩前此無選本孟舉刻宋詩鈔共百數十家已所成詩亦俱近宋人

疊韻送葉星期歲暮還山

空山鸞嘯激清音。壑斷雲連咫尺尋。老去貧交難聚首。眼前生客怕輸心。長鑱剛處霜苗短。柔櫓聲中落葉深。萬頃菰蘆堆碧海。星星漁火入香林。中有佳句

崔岱齊

字青時江南江都人諸生

燕來巢爲李秋水作

去國懷鄉莽自哀，舊時庭院鎖莓苔。塵凝風慢人初至，梁落春泥燕又來。紫海路深音信斷，紅顏年遠雪霜催。營巢哺子依君屋，也自逢秋未忍迴。

歲暮送戴衣聞還苕溪

荒郊晴雪映行裝，送客江亭恨淼茫。鳥近黃昏皆繞樹，人當歲暮定思鄉。經年文酒情相似，異地雲山夢不忘。最愛苕溪好風月，明年我欲擢輕航。高青邱潛明無客不思家推天然名句此亦不讓前人

龐

鳴字遼公江南嘉定人

吳宮詞

麗廊移得苧蘿春，沉醉君王夜宴頻。臺畔臥薪臺上舞，可知同是不眠人。吳宮之女采香，越王夫人采葛，猶此意也。一用井說垂戒悚然。

周穉廉

字冰持江南婁縣人。○冰持爲宿來之孫，鷹垂之子。少以錢塘觀潮賦得名，因不永年，故詩傳絕少。

送馮寶初

木末花開柿葉稀，旗亭分手淚沾衣。憐君身似江南燕，又逐秋風望北飛。不落送人窠臼。

洪

昇字昉思浙江錢塘人。上舍生。著有稗村集。○昉思名滿京洛，因演所著長生殿傳奇，至於斥革受辱，又遭家難，坎壈終身，五十餘隨水而沒。天之厄之，爲已極矣。而其詩疏澹成家，漁洋

及門中在吳天章下餘
子之上應以可傳許之

石門

先賢逝已久。予亦宿石門。天寒鳥自歸。林表斜陽昏。吏隱計難得。詎知憂世屯。棲棲終短褐。此意向誰言。
玩詩意乃魯地之石門也。
憑弔晨門亦自抒懷抱。

征途曉發

夜發薊丘道。馬蹄踏霜華。月照千里白。不辨冰與沙。行行三十里。始聞啼曙鴉。朔風起何處。隱隱鳴悲笳。徒侶慘不樂。從者咸咨嗟。揚鞭強笑語。前村有酒家。

送吳位三歸宣城

宋家丞相後。喬木到如今。之子獨古處。對人無俗心。偶來京洛道。旋反敬亭陰。芳草白雲外。春山深復深。

雪望

寒色孤村暮。悲風四野聞。溪深難受雪。山凍不流雲。鷗鷺飛難辨。汀沙望莫分。野橋梅幾樹。併是白紛紛。
山凍不流雲五
字寫盡雪望

蒙山道中

亂石繞東蒙。崎嶇古道通。一身千里外。匹馬萬山中。密樹遙遮日。輕花細逐風。望雲雙淚落。豈是爲途窮。

寒食

七度逢寒食。何曾掃墓田。他鄉長兒女。故國隔山川。明月飛烏鵲。空山叫杜鵑。高堂添白髮。朝夕淚如泉。

東李東琪

聞君昨日到長安。驛路風塵乍解鞍。古寺樓臺高避暑。晴天松柏晝生寒。親知把臂他鄉少。貧賤論交此地難。我自飄零歸未得。秋江勸爾弄漁竿。賈賤論交到處皆難長安尤甚此身親閱歷之言

衢州雜感

巒岼嶺勢轟仙霞。阻遏妖氛建虎牙。障日叢篁寧容騎。連雲列戟不通鴉。居人亂後惟荒壘。巢燕歸來止數家。一片夕陽橫白骨。江楓紅作戰場花。鳥飛者伏也此爲下有伏兵而言若連雲列戟則鳥不敢飛矣體貼入微下半寫亂後景象如置身古戰場間

將遊大梁

匹馬嘶荒野。羣山擁亂雲。迢迢二千里。去哭信陵君。

公子行

春明門外酒樓高。稱體新裁蜀錦袍。花裏一聲歌子夜。當筵脫與鄭櫻桃。

釣臺

逃卻高名遠俗塵。披裘澤畔獨垂綸。千秋一箇劉文叔。記得微時有故人。非裘光武正慨在貴意賤者之古今皆然也

答友人

君問西泠陸講山，飄然一盞竟忘還。
乘雲或化孤飛鶴，來往天台雁宕間。
陸講山，謂麗京也。麗京或傳仙去，或傳爲僧，或傳相遇於天台。

石梁故有此詩。

毛師柱字亦史，江南太倉人。

兵過

寧夏三邊要防秋，萬里屯營移千帳。
白馬飲一河，渾但覺旌麾靜。
眞看節鉞尊，軍容同細柳。
知不負君恩，
沉雄

舟中兩夢亡婦詩以志感

落月篷窗照水濱，音容疑假又疑眞。
境分生死傷心切，愁繞關河入夢頻。
酒醒乍驚身在客，淚殘猶道汝爲人。
廿年舊事從頭記，荆布相依最苦辛。
切舟中切夢并切兩夢別於尋常悼亡。

喜雲間徐合素至自甘州幕府話舊有贈

挾策攜琴絕塞行，將軍長揖重書生。
題詩好徧雲中戍，射獵應過雪外城。
綠酒黃羊晨草檄，黑貂紅燭夜談兵。
歸來萬里雄心在，莫惜離懷醉後傾。

二鸚鵡

綠襟細翼赤欄東。雙立雙棲入畫中。縱炫羽毛休見妬。爲能言語卻爭工。堂前報客聲相應。隴首思鄉夢不同。枉自含愁頻對舞。何須玉粒戀雕籠。語語從雙意著筆妙能渾然無痕第
六語用同牀各夢意真匪夷所思矣

朱仙鎮拜岳武穆王廟

破竹真能復兩京。十年功績痛垂成。但知金幣堅和議。忍使香盆聚哭聲。手挽山河心未死。身騎箕尾氣猶生。經過當日班師地。千古令人涕淚橫。

追感杜茶村先生

一生心事向誰陳。道路皇皇老更貧。白髮幾人懷故苑。青山何地葬遺民。狂來自合歌衰鳳。絕處猶堪紀獲麟。名並少陵身客死。自注先生沒於維揚旅寓空餘書卷照千春。陳北溟守江寧時始葬茶村於聚寶門外此時猶未葬也或云紀獲麟措語太重此言誠然然太白古風云希聖時有作絕筆於獲麟詩人之辭不必過於執著

方山阻風

征帆早喜到江東。凝望鄉關咫尺通。豈謂三朝又三暮。依然愁水復愁風。空餘山色煙波外。枉卻秋光道路中。但得快哉旗腳轉。更何分別問雌雄。

陳學洙字左厚江南長洲人康熙甲子舉人○左厚先生與弟右原爲學生兄弟形體性情學問志節無不相同不止如雙丁二到已也詩品雅潔並追唐人尤海庵太史謂陳氏兄弟昔稱二難今日二難復見
陳氏其言洵然

君子行

君子畏幽獨。大廷乃敢言。小人讐稠衆。衾影不可捫。繩尺君子心。之死靡所奪。脂韋小人態。臨難思苟活。譬如丹山鳳。煌煌世之儀。虵蝎藏陰房。白日難逞威。又如青松枝。經霜不渝色。厭彼荆棘繁。翦伐何足恤。緇素既異染。砒瑜僅同形。瀉水一器中。當辨涓與涇。漢樂府祇說君子避嫌。此則君子小人之分。判如冰炭白黑矣。未歸到人君之能辨。尤爲得要。

閱省試錄見璋兒名喜而作此

羈人百憂集。煩亂不能理。觀空息羣妄。澹泊對流水。簷端噪乾鵲。何事聒吾耳。南國賢書來。郵騎持片紙。解額六十三。有汝名在裏。大江巨南北。鎖闥萬餘士。高才動淪落。老至常拊髀。流年爍筋骨。飲恨積塊壘。汝年弱冠餘。腹未飽經史。不遇何足歎。得之亦偶爾。憶汝周歲時。呱呱而索乳。汝母躬撫育。一夜常數起。抱置大母前。呼名輒唯唯。姑婦相視笑。吾宗有孫子。安得若長成。讀書取青紫。斯言宛昨日。逝者已如彼。傷哉泉下人。不及親見此。吾衰久於役。蹙蹙靡所止。膝下無他兒。舉目惟在汝。幸汝名稍成。使我心竊喜。會須覽皇都。貽書趣行李。前見遇合之偶然。失不足悲。得不足喜。後見大母與母氏之屬。望而冀其成名。不及親見。深足感也。詩到布帛菽粟。纔是真詩。

別弟

不敢垂雙淚。孤懷自黯然。恐添慈母念。擲免病妻憐。書札從人寄。家庭賴汝賢。歸心倘可遂。應得在春前。

少陵與諸弟詩。字字從心坎流出。所以獨絕。作者直如面語。忘乎其爲韻語矣。

行次滕縣

望裏煙生雉堞低。滕陽城外草萋迷。井田舊業安征稅。淳樸遺風厭鼓鼙。青杏園林禽上下。綠楊村舍水東西。此中鄉土殊堪樂。莫惜從容駐馬蹄。井田淳樸能舉滕縣之大前輩滕縣花開色似銀。舉其瑣細而已。

燕京雜詠

萬里風煙古北平。蕭蕭牧馬遍龍城。旌旗曉接長楊苑。刁斗宵催細柳營。輦下公卿多結客。市中屠狗亦成名。儒冠拓落知何事。自笑江東一步兵。

帝城高接太微垣。龍虎蟠迴勢欲吞。關鎮居庸當北面。河流滄海抱中原。葡萄翠色來安邑。驟駟花鬃出大宛。正是金輿巡幸後。九重無事只臨軒。

一從丹詔下明光。封事朝朝獻未央。聖世保衡商左相。金門待詔漢東方。碧雞久說通邛犍。白雉初聞貢越裳。自此萬方歸有道。扶餘海外不稱王。時三藩海氛俱靖故有是篇。

與繆天自夜話

牢落蕭齋病後身。燈前款款話相親。寒暄世態吾偏拙。貧賤交情爾最真。縱酒莫辭今夜月。悲秋俱是異鄉人。明朝便作河梁別。天末涼風起白蘋。惟覺睡交故其情乃真感慨係之。

茉莉

玉骨冰肌耐暑天。移根遠自過江船。山塘日日花成市。園客家家雪滿田。新浴最宜纖手摘。半開偏得美人憐。銀牀夢醒香何處。只在釵橫髻驪邊。花取半開。留餘韻也。於此花尤宜。西樵考功後。又添名作矣。

哭外舅劉西翰先生

西臺慟哭血沾巾。百結麻衣剩一身。地北天南拋骨肉。魂來夢往傍君親。孔融收繫無完卵。張儉流亡少

故人。支遁峯前聊寄跡。此生長作宋遺民。尊人公旦公。全首陽高節。西翰先生。讀書砥行。年九十餘終。故以宋遺民況之。

獨行歸然老布衣。耄期不特古來稀。立錫無地能安道。抱甕何心但息機。愛女早歸泉壤去。遺孤尙作斷蓬飛。山頽木壞人嗟歎。星象於今暗少微。

送倬雲南還

滿地風塵急暮笳。歸程好覓渡江艖。故園兄弟如相問。只道征夫不憶家。征夫憶家。人人能道。語耳。此轉也。傳也。不憶家。以憶家之語。不能盡也。

紙窗矮屋似僧龕。春去春來摠不堪。忽見桃花紅映面。一時回首望江南。

悼內

簇蝶金泥杳不存。空箱顛倒月黃昏。牛衣一挂渾無恙。猶有當時對泣痕。牛衣對泣。尋常引用。此以追憶出之。其情更深。

紗窗曾弄管斑斑。剩粉殘脂次第刪。略記紅箋留片語。一鈎新月照愁顏。自注。內子幼好吟。紙尾得事。盡毀之。頃檢廢篋。於紙尾得

此句爲
之一句

李國宋字鴻孫江南興化人康熙甲子舉人著有蝶隱居詩

牛首山

獨上藏龍窟遙瞻踞虎邦。四天圍碧嶂一氣滾寒江。淨具安禪悅香燈冷法幢。頓令塵思盡高倚白雲窗。
渾然而來大氣大力

朝天宮感懷

冶城山色帶殘暉。絳節中天渺翠微。自昔鼎成龍已去。只今松老鶴還飛。齋宮寂寞聞金磬。泉海蒼茫想玉衣。唯有步虛諸羽士。秋風時禮白雲歸。

望國山

岳麓銅峯面面分。雨中遙望國山雲。紫宮祕記金函冊。青嶂殘碑石鼓文。虎踞幾年瞻王氣。龍驤他日駐新軍。九岑環繞荆溪水。留得司徒半畝墳。
國山有皇象篆碑此孫皓封禪文也國運將殄猶修對天鴻休之詞甄聯殊見譏刺

李

覆

字汝嘉福建閩縣人康熙甲子舉人官至浙江巡撫著有鹿山詩鈔○鹿山公虛己受益有指其詩瑕類者應時改定詩多見道語因未寄鐫本祇錄其盡時記誦一章

過司空表聖墓

古道瞻遺墓。豐碑紀有唐。榮華辭黻冕。泉石殉君王。詩品卑元相。清風慕首陽。如何長樂老。黃髮耐興亡。

表聖評元相詩。比之都市豪估。○表聖處危亂之朝。無宗社之寄。隱居王官谷。被召。賜為哀毫。巧歸。後聞哀帝被弑而卒。跡近隱淪。心實忠良也。泉石殉君王。移入他人不得。結以馮道。反觀。倍覺有力。

史騏生人。字千里。江南溧陽人。康熙甲子舉人。

寫懷

覽鏡何顏面。江東一腐儒。父書空滿篋。母線尙縈襦。窮巷慚南阮。騷壇廟小邾。世人憎愛錯。不賣櫝中珠。

胸中有物。目中無人。

藍啓肅字恭元。山東卽墨人。康熙甲子舉人。

送郭華野總制湖廣

中旨纔傳出漢宮。直教歡喜到兒童。如聞元祐徵司馬。未許東山臥謝公。列郡應多投墨綬。當朝誰不避

青驄。澄清豈但荆襄路。佇見訐謔沃聖衷。華野名琇。彈劾要人。直聲震朝野。後以報復摧折。聖祖南巡。問吳江士民。誰爲廉吏。衆以琇對。聖祖命總制湖廣。華野舊令吳

江。湯文正公紙。鷹爲侍御者也。

馬之鵬字文淵。湖廣蒲圻人。康熙乙丑進士。歷官戶科給事中。

別毛姬黃陳相宜

薄遊至西江。東南逢二妙。本是同門友。同心復同調。樂奏金玉聲。情深知仁樂。去聲清風披素襟。明月朗餘

照。已見投膠漆。無庸判紵縞。胡然忽分張。殊方理征棹。越俗斂文華。楚風戒輕剽。安驅越中和。研精歸道

大。要。江湖暫分流。終焉合廊廟。矢心展大猷。毋爲戀蓬壺。毛與陳皆越人。已爲楚人。所以化風氣之歸。而歸於中和措詞何溫厚也。未望其策名清時。所見尤

除夕得廬字

臘雪初消歲又除。鱸灰徐撥定更餘。親聞此夜思遊子。客路經冬阻尺書。卷軸隨身成故友。乾坤何處是吾廬。添年便惜年華減。飲罷屠蘇轉歎歎。

徐元正

字靜園。浙江德清人。康熙乙丑進士。官至工部尚書。

廣陵懷古

閒追舊迹檢殘編。繡柱珠簾盡惘然。東閣詩成何水部。揚州夢覺杜樊川。尋春易過佳風月。送老難忘好墓田。莫怪無人能跨鶴。誰齋十萬作腰纏。

汪

灝字文潛。山東臨清人。康熙乙丑進士。由翰林官至河南巡撫。著有倚雲閣集。

拜楊伯起墓

蟠龍關塞近。大鳥墓門深。萬古長河水。千秋暮夜心。衣冠朝嶽麓。蘋藻薦桃林。夫子應知己。囊無陸賈金。無剩語。便是作家。

送謝方山郎中告歸

孤心霜月迥秋清。三十年來翫世情。真得意時惟嘯詠。不如人處是功名。三臺後輩多迴席。五字偏師盡
五六承三四言之。唐人中每有此格。

卻兵舒卷從心難繫縲。白雲天際任縱橫。

施何牧字贊虞。江南崇明人。康熙乙丑進士。官吏部稽勛司員外。著有一山詩鈔。一山先生。中歲歸田守正履道詩學。斷斷唐宋之分。不肯隨時趨嚮。今沒世三十餘年。詩卷零落幾盡矣。茲錄其向日所鈔五篇。聊志風概云爾。

效諸將三首

萬疊雲山山外城。登陴一望氣崢嶸。渠搜西去新傳箭。弱水東來盡列營。有俟絃歌工化俗。且將韉帕學
論兵。鬼方親見高宗伐。奇績無須三載成。

關河日夕羽書傳。億萬芻菱悉帑錢。不爲陳師來紫塞。何緣轉粟上青天。至尊減膳龍庭外。諸將忘身虎
旅先。自古足兵謀足食。四方願祝屢豐年。

天山八月朔風吹。兩道飛符並出師。突騎全憑白馬將。彎弓已斃射鵰兒。金城舊日屯充國。瀚海今朝斬
郅支。蠶爾西戎稽顙後。還祈干羽格諸夷。
味詩意。應是聖祖討噶爾丹時事。時出師既還。轉粟甚艱。故聖人斯得。兵不血刃而已。奏蕩平。從古王師所未有也。錄考功詩。因恭紀聖人神武。俾後之覽者有所考云。

九日放舟山塘

老去登臨興未刪。便乘小艇放溪灣。高原水淺苗初出。密樹霜濃葉漸斑。半世功名隨旅鴈。百年心跡對

秋山黃花此日何岑寂。一笑層臺懶更攀。

贈焦山人

泠泠秋閣大江臨。中有幽人櫛玉琴。一自霓裳檀板歇。幾回鐵甕戟枝沈。孤鐘斷續迷寒雨。冷燄高低起暮陰。此日孝然如可作。白頭肯負紫芝心。此贈焦山冷秋江作。嘉其高隱。勉其不負初心。得古人贈晉之意。

黃

庭字蕞山。江南長洲人。康熙丁卯舉人。

延川道中

水似瞿塘險。山如劍閣雄。奔濤時齧岸。盤磴半臨空。馬踏雲頭上。人行石腹中。那知巫峽雨。翻作塞門風。能作奇語。

寧夏渡河

峽口回波繞塞流。自注。峽口山名。兩山相夾。河流其中。黃河利獨擅邊州。千屯得水成膏壤。海壩分渠據上游。自注。漢渠唐渠。今名大壩。
小壩。蓄水溉田。獨受河利。雞犬人家紅稻岸。魚鹽賈舶白蘋洲。那知澤國隄防急。百萬金錢擲浪頭。

正月既望自錢塘進艇新安江行十日達紫陽門卽事寫懷得船字

吳榜停時櫂越船。湖原浙水出山泉。一千里近新安路。三百灘齊天目巔。自注。新安平地。與天目山齊。軒后臺前神獨往。羲皇卦外歲初遷。自注。予今年六十一。衰年興待名山助。擬向雲端采石蓮。予遊黃山年七十有八。視作者多。十有七年。興待名山助。其言果然。

送陸翼王徵君南歸

天際冥鴻不可求。高飛豈爲稻粱謀。山中大隱徵弘景。海內奇書問鄴侯。風雪五年留上谷。鶯花三月下長洲。吳宮春色應如舊。眺望先登開府樓。

馬嵬

方士鈿釵何處得。農夫羅襪此間收。蒙塵莫漫尤傾國。猶剩唐家土半邱。

本禍水也。偏說爲唐家。生色見文人筆舌之巧。

梁佩蘭 字芝五。廣東南海人。康熙戊辰進士。官翰林院庶吉士。著有六堂堂集。○藥亭中順治丁酉鄉試第一。至成進士時年六十餘矣。未一歲即乞假歸。同榜中俱以前輩事之。

養馬行

庚寅冬。耿尙兩王入粵。廣州城居民流離竄徙於鄉。城內外三十里。所有廬舍墳墓。悉令官軍築廡養馬。梁子見而哀焉。作養馬行。

賢王愛馬如愛人。人與馬並分王仁。王樂養馬忘苦辛。供給王馬王之民。馬日齧水草百斤。大麥小麥十斗勻。小豆大豆驛遞頻。馬夜齧豆仍數巡。馬肥王喜王不嗔。馬瘦王怒王扑人。東山教場地廣闊。築廡養馬凡千羣。北城馬廡先鬼墳。馬廡養馬王官軍。城南馬廡近大海。馬愛飲水海水清。西關馬廡在城下。城下放馬馬散行。城下空地多草生。馬頭食草馬尾橫。王諭養馬要得馬性情。馬來自邊塞馬不輕。人有齒馬服以上刑。白馬王絡以珠勒。黑馬王絡以紫纓。紫駟馬以桃花名。斑馬綴玉籀。紅馬綴金鈴。王日數馬。

點養馬丁一馬不見。王心不寧。百姓乞爲王馬。王不應。以贊頌之筆。寫風刺之旨。貴畜賤人如此。其敗亡也必然矣。此種詩前無所承。後無所繼。應是獨開生面之作。○城南馬廄近大海。以上用眞文通韻。以下用庚青蒸通韻。莫認作一韻到底看。

日本刀歌

市中寶刀五尺許。市中賈人向予語。紅毛鬼子來大洋。此刀得自日本王。王使紅毛預齋戒。三日授刀向刀拜。龍形虎視氣生驕。抽出天上星搖搖。黃蛇之珠嵌刀首。百寶刀環未曾有。有時黑夜白照人。殺人血漬紫繡新。陰晴不定刀氣色。風雷閃怪吼牆壁。相傳國王初鑄時。金生火尅合日期。鑄成魍魎魍魎伏。通國髑髏作人哭。人頭落地飛紙輕。冰光在水鋪欲平。國王恃刀好戰伐。把刀一指震一國。紅毛得刀來廣州。大船經過海若愁。攜出市中人。不識價取千金售。不得我聞此語空歎呼。兵者凶器胡爲乎。中國之寶不在刀。請以此刀歸紅毛。字字鋒鋷逼人。駭膽慄魄。未見中國所寶。在明德不在武事。尤得尊崇之體。

易水行

易水悲歌動天地。荆卿入秦爲燕使。秦王尊禮設九賓。殿間顧笑旁無人。於期之頭奉上殿。血光直射秦王面。取持督亢色倉皇。咄哉年少秦舞陽。圖窮不覺見匕首。秦王睨之環柱走。荆卿不得刺秦王。無且在殿提藥囊。爲謀不成實天意。祖龍膽落荆卿死。一死可以報太子。君不見沙邱之椎亦如此。荆軻刺秦王。一係劍術之疎。然秦王之魄已爲之奪矣。以沙邱狙擊作精倒觀有力。

惠州王紫詮太守築羅浮子日亭落成作歌寄之

登山不到羅浮巔。舉足萬里真徒然。瑤房璇室七十二。羣真笙鶴長喧闐。況支蓬萊一左股。金陵地肺遙相連。風雲雷雨出其下。上界潏沔涵澄鮮。夜來星宿照分野。有若榆樹垂金錢。齊州九點盡可數。中原一縷搖輕煙。就中飛雲更奇絕。天門詖蕩雲聯縣。銀河屈注倒在背。帝座豁落平當前。神霄斧鑿施不下。烏道豈有藤蘿牽。何人築亭在其下。循州太守今豪賢。爲亭命名曰子日。意象直探鴻濛先。世間萬事起根本。黃鐘子氣無不全。靜爲動本太極理。循環迭運非言詮。陰陽旋轉推晝夜。陽明玉燭光回天。紫微垣中日杲杲。太陰蟬螻安能纏。此山三更坐見日。高與泰岱齊比肩。天雞大叫海水動。海中湧出金盤圓。羲和整轡升若木。神人枉用迴秦鞭。太守名亭復爲記。二樓伐石爲碑鐫。大書年月人某某。千秋萬世名山傳。附書仙人海瓊子。倡和共掣雲霞箋。平生濟勝仗筋力。匡廬白岳隨攀緣。羅浮家山望咫尺。反似往昔遊幽燕。山靈待我謝招手。不久黃鶴來高鶩。洞門借騎蝴蝶入。峯頂或就桂父眠。煩君刷取龍蔥七尺遺。贈我相酌先寄飛龍篇。波瀾層疊中就子日二字闡明動靜互根全理而仍不入於腐筆故超氣故達也仙人海瓊子作者自謂

次京口

繞郭盡江水。長虹跨不來。地形山勢截。天塹海門開。白晝龜鼉出。中宵鼓角哀。往時征戰處。臨汎重徘徊。

沛中

黃河西出南徐路。馬首經過識沛中。一代帝王還故里。幾家雞犬入新豐。天垂芒碭雲疑在。山擁彭城氣已空。湯沐昔時諸父老。相逢誰爲述歌風。

閣夜

百尋古閣郡城東。簾捲前山一角風。衰壑有光星在底。明河無影月臨空。羣生靜息鴻濛裏。秋氣森歸耳目中。不是夜深能獨醒。海門誰見日初紅。

湯右曾

字西厓。浙江仁和人。康熙戊辰進士。官至吏部侍郎。著有懷清堂集。○浙中詩派。前推竹垞。後推西厓。竹垞學博。每能變化。西厓才大。每能恢張。變化者較耐尋味也。後有作者。幾莫越

兩家之外

相見坡

清風生山巔。微雨在山腳。後山路始窮。前山壁又削。飛龍中忽斷。奔馬勢旋卻。兩山鬱嵬峨。一水相互絡。洩雲天光漏。仄壁石氣錯。俯逐飲澗猿。仰睇投林雀。高低總蹺蹺。下上殊苦樂。彼途俄復經。此路邈如昨。相見難相從。青冥倚寥廓。

極形兩山之險。而未以相見難相從五字括之。可云經營心苦。

澄海樓

大海東迴水波惡。如山浪打長城腳。千年萬年鬼夜哭。冶鐵銷沉石崩落。王公設險古制存。屹立重關嚴鎖鑰。干戈相尋遠不數。六十年前事如昨。大盜移國明社墟。瀕洞烟塵昏六幕。是時關門臨賊壘。白日旌

竿莽蕭索，奸兇滿盈。人鬼怒，世運艱屯。神聖作，飛龍首出在九天。熊虎戎衣只一着，石河西南破賊處。父老猶言戰時樂，後漢書今見其戰樂可言耶不聞人聲聞刃聲。霹靂摧枯風掃籟，只今車書通萬里。天下一家無厚薄，名都貨貝街喧闐。屬國費琛驛交錯，承平暇日展遊眺。賓客閒情寄觴酌，茲樓我到亦偶爾。萬古心胸忽開拓，更喜天容海色清。側身東望蓬萊閣，自注：土人言天氣晴明，往往見登萊也。○蟻賊毒亂與朝戰功於登樓時揮灑出之，豈同苟然之作。

登雲麓峯望南嶽歌

我聞三神山，遠在東海東。神仙恍惚路難到，世上五嶽蟠胸中。憶臨滄溟倚日觀，九萬曾踏扶搖風。昨辭蓬萊建羽節，陽景一翳迷高嵩。西南萬里入羅鬼，似墮幽井窺圓穹。東還雲夢吞八九，張樂已在軒轅宮。七十二峯青聯屬，蒼梧天外雲濛濛。清湘水流環九面，南嶽神鎮齊三公。靈妖物怪藪藏納，丹雘赤幕光瞳瞳。峯峯低昂宛相次，獨有紫蓋爭祝融。雷泓風穴互開闔，玉書金簡留穹窿。岫嶼山尖蝓蚪字，人跡欲到路已窮。使者虛亭花藥繞，山人仙骨雲霞通。似聞綠髮有毛女，不少翠羽來青童。離宮福地入縹緲，目所眺矚攀躋同。衡陽縣前昔聘望，壓陣巖巖雲排空。仙山咫尺俗緣誤，況今百病中交訂。升高視遠腰腳軟，左右扶掖如衰翁。道人鐵瓦緬遺構，拜嶽之石高巖崕。九疑清猿怨遙夜，洞庭落日浮孤篷。漢女幽蘭冉冉翠，楚妃淚竹斑斑紅。振衣周覽窮上下，忽興意思增清雄。人間擾擾等蟻蠓，慎勿變化隨沙蟲。君不見迴鴈峯來八百里，揮手欲駕冥飛鴻。前從使瀛回說入，便有波折，次寫望衡嶽處，淋漓飽滿言之，後憶往日經衡陽而未登，益見今茲將老不能更登也。於望字更添一

倍韻托作長
篇須解此法

放舟至下鐘山

空濛一片雲滿湖。西南風起吹橋烏。淵淵且止發船鼓。秀絕下鐘山色無。褰裳直上捷猿狖。樂哉一幅寒
林圖。絕頂飄飄目四豁。左右江湖渺空闊。烟波盡處洲渚微。彷彿扶桑見窮髮。天旋地轉不少留。迴看星
氣忽已周。扁舟歲晚夢吳越。匡廬五老空船頭。銜觴如山萬商集。使者纓旌騎吹入。行人擾擾競錐刀。落
日悠悠下城邑。前臨巨石紛盤陀。仰看絕壁青嵯峨。玲瓏窈窕萬竅出。安得灑汨生流波。風聲水聲奈爾
何。只今埋沒塵沙多。無絃之琴張素壁。歲久抑鬱恐不和。一歌如扣罈。再歌哀知音。洞庭木脫水深深。天
高月白風入林。或鼓或考聲欽欽。嶺猿江雁同夜吟。潛蛟出聽老龍泣。漁父滄浪知此心。石鐘山記坡公
鐘者不必更從鐘聲落想矣。
作者別行一路故語無雷同。

黑石渡

昨從邛山來。今從邛山去。邛山朽骨萬萬古。惟有行人朝復暮。黃金蝕盡白石爛。螻蟻三泉尙知處。我來
欲酌酒一杯。落日荒荒下前渡。朝暮行人。卽是邛山中人。
末語欲盡不盡點然神傷。

山海關

東西誰界絕。封此一泥丸。地接長城險。天浮渤海寬。連山趨碣石。積水見辰韓。吹角關門出。邊風馬首寒。

連下章盛
唐音節

辰龍關

東馬懸厓險。關門鬱不開。居然橫戟地。曾此挂弓回。浩蕩妖星落。蒼茫角吹哀。兵家爭間道。爲語勒銘才。

上玉峯徐公

海岳英華蓋代人。由來絕業迥殊倫。六經屢折羣儒角。九服齊扶大雅輪。無事心常愛丘索。有才誰不仰陶鈞。每看元老虛懷處。吐握風流一旦親。

春官玉尺手親持。科目光華此一時。嘗惜文辭傷篆刻。獨將經術作宗師。士當失意猶無恨。才苟懷奇定見知。只有公門慙小草。也滋化雨伴仙芝。健庵嘗欲蒐羅天下英奇。才苟懷奇定見知一語。非虛譽也。少宰爲司寇特賞識人。故言之親切。

登峴山亭至甘泉寺

籃輿嘔軋傍城隈。積霧霾陰黯不開。一磴自穿雲氣入。萬峯爭送雨聲來。山川浩蕩今如此。裘帶風流安在哉。千載牛山共揮涕。古苔秋井易心哀。

雲藏巖谷晝冥冥。忽聽天風響佛鈴。草際老僧迎客至。烟中修竹入門青。坐來瀛海茫茫地。盡失山川漠漠形。休問葡萄撥醅後。甘泉一酌自清冷。次章承萬峯爭送雨聲來言之。

荊州

剩礎遺隍間舊疆。龍門馬牧摠茫茫。接天波浪三江口。橫地風雲百戰場。尚有帆檣下巴蜀。無多戶口在耕桑。不堪原野蕭條地。吹角重城倚夕陽。

戎馬壬申逮甲申。萬家煙火幾家存。人如刳豕屠羊慘。事異黃巾青犢論。妖樹禍生天北極。怪風寒捲郡南門。龍陂橋外坡陀血。誰洗忠臣九地魂。流寇之亂於荆襄尤甚。篇中憑甲往事。故極形亂後蕭。颯今則爲天下重鎮矣。重熙累洽。歌咏者可忘所自耶。

黃尊古上都秋色圖

落日牛羊下遠村。平沙萬馬別開屯。君看鶻沒鵬盤處。莽莽青山是塞垣。

卷十七

唐孫華

字實君。江南太倉人。康熙戊辰進士。官吏部主事。著有東江詩鈔。○東江勤於學。不重絃冕歸田後。與二三老友登臨。燕飲。有香山洛下之風。至九十餘乃辭世。生平故天爵自尊者。也。論詩謂詩必有爲作。每與史事相表裏。故其詩不趨高超。尊崇實實。皆其言有物者。咏門神詩。偶然戲筆。而外間傳誦。利者紛紛。毋乃探驪龍而專取鱗爪耶。

述古

讒口成鑠金。沉舟由積羽。蒼蠅正羣飛。白壁無完素。臧倉沮孟軻。伯寮愬子路。正直枉者非。妍好醜者妬。芳蘭每見鉏。實以當門故。道義苟無僞。特立何足懼。由貪而跖廉。毀譽每錯互。孔光詆王嘉。馬融排李固。孔馬皆大儒。物情常嚮慕。一朝勢利奪。顛倒迷好惡。嗟爾名教人。毋令青史汗。孔光何足惜。以馬融之儒學。而排擠正人。則名節盡。

喪矣。時有名人而譏湯文正者。意作者借古以況今人耶。

贈趙松一趙晉著讀史質疑一書

尼父著春秋。大義揭星漢。功罪無匿情。是非有定案。作史與論史。宜以經爲斷。後儒恣穿鑿。如絲各棼亂。收誇爾朱功。壽嘗武侯短。蜀魏爭正閏。島索互詆讎。馮道善變通。武媚宜郊禩。邪說旣紛紜。大道日離畔。矯矯趙夫子。朱墨久研鑽。家貧出負米。賓席弄柔翰。六經貯巾箱。三史供點竄。上下數千年。一一如珠貫。筆挾董狐直。書過袁豹半。辯如懸河注。目如巖電爛。論準過秦覈。語陋美新謾。示我兩卷書。明窗得吟玩。潛德有必彰。姦諛死無道。南山豈可移。先零何足按。霍若雲霧披。渙若春冰泮。明史今未成。授簡多疑憚。白頭雖有期。青竹何由汗。如君著作才。固宜參史館。說經常硜硜。陳史亦侃侃。形諸直如筆。千秋事可判。庶稟魯史程。得隨游夏贊。惜哉擅三長。無從置一算。抱書菰蘆中。慨然發永歎。概舉論事不平者。逐一披駁。而以以經爲斷一語該之。何等光明正大。

閒居寫懷

屈伸固有命。秋毫非人功。三世不徙官。執戟揚老雄。苟爽起布衣。百日至三公。猿臂終數奇。李蔡本下中。方壯旣悼顏。皓首仍悲馮。世有巧而躓。亦或拙而通。憂喜塞翁馬。得失楚人弓。時命苟不諧。不如安固窮。巧拙躓通。俱可不問。而一歸於安命固窮。君子視躬。莫論於此。

同宋葭州太史登滕王閣

平生想慕滕王閣。未能千里驅輪蹄。豈意雲山落吾手。飄然直上凌飛梯。天風浩蕩入懷袖。頃刻塵眼開。金篋畫棟朱欄照城郭。丹樓碧瓦纓虹霓。吐納江流九派小。平壓雉堞羣峯低。落日倒射澄潭影。金波千頃浮玻瓈。上捫星辰若有路。下臨洞壑疑無蹊。賈客帆檣自來往。風濤出沒如鳧鷖。跼蹐飛鷁不敢到。長空杳杳鳴天雞。憶昔驕王盛意氣。臨風歌舞飄華桂。不惜金錢構飛閣。巖嶽上與煙霄齊。子安文字當時體。縱橫萬象誰端倪。如何俳語笑倉猝。潁濱一老猶相詆。自注子由滕王閣詩云俳語笑倉猝江河萬古終不廢。少陵不敢輕排擠。人生遊跡過如掃。鴻爪一瞥飛東西。洪都勝地獨數此。偶然匹馬隨雙奚。閻公賓客今寂寞。幸有勝友能招攜。憑欄徙倚三歎息。山雲亂起煙悽迷。一代繁華有衰歇。三王文藻誰攀躋。我行自哂真孟浪。此遊聊可驕昌黎。落窠白題須出以新意中間子由之詆一段是也昌黎作記始終未到此閣未以己之遊覽驕昌黎之未遊亦是別尋蹊徑

鷹坊歌與夏重愷功同賦

水磨自注地名園亭清且幽。碧柳陰濃古木稠。偶然攜客避炎暑。腥風忽覺來鸞鷗。云作閒坊爲養鷹。名材不惜千金收。板屋鞞樓拳鐵爪。浮雲仰視張金眸。就中海青獨稱最。傳聞出自青海頭。銳頭猛腦特神俊。自矜恥與羣鷗儔。杉雞竹兔不足取。氣吞乳虎欺鰲牛。白山黑水出異產。在昔遼代曾窮搜。誅求因結女直怨。無端兩國興戈矛。愛鶴愛鷹皆速禍。羽物何事常招尤。頭鵝盛宴付逝水。涼廡高臺成古邱。冰天朔漠

餘殺氣江山不改奇毛留。從來異物聚所好。攜籠走馬來荒陬。人間養鷹如養士。一時效用三時休。多畜
馴鴿供餵飼。流血滲漉霑喉。填腸滿嗉意未已。一飽欲傲梁邊鷺。乃知惠養多倖竊。肉食未必皆能謀。
虞人懸衡揣斤兩。軀骨輕重須相侔。自注鷹必稱斤兩。以十八兩為準。肥苦鈍遲瘦無力。上臂能辨劣與優。空倉飢雀日
叫噪。一出往往逢置學。爾曹攫肉偏遠患。得食那敢辭籠囚。譬若猛士饗牛酒。投石奮欲償恩讎。胥距久
閒求自試。常思一舉翻高秋。鷹乎鷹乎盍努力。霜天風緊將離韝。烏中惡物正不少。早拉訓狐擒鴿鷁。功
成山藪得清廓。願汝仍化林間鳩。勿戕胎卵驚鸞鳳。阿閣萬一重來遊。先說金遼爭鷹以致兩國起釁。次說養鷹不用同於肉食謀國。後說

搏擊惡鳥分別鸞鷁而歸於仍化爲鳩仁厚不殺此通篇結穴處。

讀梅村先生鹿樵紀聞有感題長句

一旅誰知扼紫荊。蝸蟬聒耳正紛爭。腹書競伏狐鳴火。手蔗頻驚鶴唳兵。直待臨危思翦牧。可應先事戮
韓彭。石頭袁粲真堪惜。自壞邊關萬里城。自注指東莞督帥袁公崇煥。○誅袁崇煥此我朝用間而前明爲間所愚也。事後追悔何益哉。

東山卽事

湖風盡日響松杉。接席連牀共一巖。文到無情真悔作。口除飲酒只宜緘。晚涼欲試蒲葵扇。暑汗頻嫌葛
越衫。破硯生涯今更拙。謀身端合託長鑱。

永嘉令馬公死寇難令嗣觀察公請於朝賜諡忠勤索詩

青袍白馬塞甌閩。一命官卑大義均。豈有兵符麾士卒。要將全節感臣鄰。君王未識真卿面。戰陣甘捐先軫身。尙念天恩未酬答。生兒留作報恩人。

諸葛武侯祠

臥龍潛下國。逐鹿走羣雄。慷慨吟梁父。擔謙拜德公。管蕭才豈匹。伊呂望應同。漢廟靈猶在。劉天姓未終。一犁畊隴畔。三顧出隆中。旒纒千年靈。絲懸九鼎銅。黃圖分社稷。赤壁掃艨艟。入蜀神基固。分荆隘路通。一嘘火井燄。自注。蜀有火井。漢盛時火燄。漢末漸微。孔明一窺之火。乃復盛。再起沛鄉風。操懿真如鬼。關張並是熊。自注。周瑜謂關張熊虎之將。崎嶇箕谷路。流涕永安宮。定計收關隴。深期卜鎬豐。雜耕屯渭曲。籌筆洗荒戎。吞貉曾無芥。鞭狐欲折兇。自注。石勒謂操爲狐媚。風雲開絕業。日月照孤忠。委寄尋前諾。艱危誓鞠躬。三分非素志。八陣漸成功。炎景終移祚。流星忽隕空。宅桑仍索寞。廟柏自菁蔥。異地留祠宇。靈旗捲暮虹。綜忠武平生而言。工鑿若鸞胎原出於少陵。

田從典字克五。山西陽城人。康熙戊辰進士。官至大學士。

擬七德九功舞歌效樂天體

七德舞。九功舞。武緯文經耀千古。朝廷千羽在兩階。天下車書盡九土。我皇御極垂衣裳。四方萬國來享王。自朝乃至日中昃。堯兢舜業不敢康。爲念斯民亦勞止。丹詔夕封馳萬里。咨爾強藩且載戈。釋甲歸來見天子。苟有三藁方憑陵。一朝敢弄潢池兵。蕩搖滇黔連楚蜀。虔劉閩越驅鯢鯨。驛聞天子赫斯怒。皇言

一宣天日午。誓將滅此後朝食。取彼兇殘界豺虎。臨軒命將親推轂。中有天潢建牙纛。日射春旗萬馬鳴。雲開曉帳千官肅。一從荆鄂向三湘。一自江州下豫章。西指秦川臨劍閣。南經吳越度錢塘。王師所至如風電。合圍掩羣開一面。狼奔鼠竄皆倒戈。市肆不驚芸不變。王師所至多謠頌。行者願齋居者送。天語殷勤再四宣。無令南畝妨春種。一年轉戰雍梁間。二年克敵威荆蠻。三年掃清甌與越。一鼓遂進仙霞關。四年官軍收閩地。逆臣稽首歸藩位。五年賊渠死岳陽。六年百粵置胥吏。七年一舉入成都。夾擊東西疾。度瀘八年蕩掃昆明穴。普天率地歸皇圖。羽騎宵馳傳露布。從此江山復如故。侍臣拜手賀昇平。武士鳴鏜歌大濩。我皇恭己開明堂。木鳳銜書下八方。嘉與吾民共休息。欲偕斯世為陶唐。思齊太任及太姒。翼子貽孫既受祉。恭上徽音萬國歡。再沛恩綸與更始。昔時民間苦被兵。烏鳥聲樂多荒城。今日言旋復邦族。閭里不聞愁歎聲。昔時民間苦征役。男子輟耕婦休織。今日公家免踐更。鼓腹行歌仍作息。機槍滅迹三階平。我皇宵旰猶未寧。手披目覽釐庶績。早朝宴罷勤蒼生。天縱聰明兼聖學。研精書史窮邱索。著述開天冠百王。四海文明生禮樂。舞七德。舞九功。五絃之琴歌南風。願令世世陳王業。王業艱難萬古同。康熙二十

年十月官軍收瀘南。頌詔中外。示天下蕩平。允羣臣請。上太皇太后皇太后徽號。恩逮臣庶。陽城因傲。唐代七德九功之舞。作為歌詩。中間三蕢之畔。三蕢之平。一一可考。當以詩史目之。詩之曲折頓挫。迤邐往復。得昌黎平淮西碑之體。不專學白樂天也。詩亦見翁司寇集中。豈翁為大司成時。田為太學生。代師長擬成稿。本耶。唐人詩中。兩見者有之。

趙 愈字文鏡。江南嘉定人。康熙戊辰進士。官定陶知縣。○定陶以他人累。牽引對獄。吏者再後。雖昭雪。然亦瀕於危矣。詩體靈敏之中。沖和自在。是為正聲。

古風

弧矢用威敵。還爲奸宄利。蒼姬六典書。莽新實階厲。國息旣藪慝。況乃肉刑議。後聖師前古。顯在行仁義。本同末則殊。沿革隨時世。孟軻今復起。亦不講井地。未聞書契作。仍可結繩治。聖人大法天。亦行所無事。介甫行周禮。通爲厲階。師法古人在。意不在迹也。安得此通達治體之言。

鴻纖列萬品。一一自稟賦。削觚使就規。涅縞忽失素。變本乃爲奇。矜新衆所驚。人於大塊中。果蔬一蟲蠹。吾欲追淳朴。各各安其故。因物付物間。斯理則已具。

斯蠡夏切股。翰音晨引吭。彼豈能自主。時至乃翕張。測天憑儀器。俄已易躔次。測晷以刻漏。時亦乖啓閉。夫豈聖人作。而顧謝物智。任人斯有爲。任天故不二。任天而行。人力不與。欲還淳朴。而不流入老莊。斯在有爲無爲之別。

踏車曲

杉櫓作筒。檀作軸。烏鴉銜尾。聲歷鹿。赤露兩肘。腹無粥。踏車辛苦歌如哭。前年井底泉脈枯。去年甌窶長菱蘆。旱年掘窩轉水入。潦年築隄翻水出。水入水出車欲裂。農夫那不筋骨折。無奈今年又苦旱。塘水少於衣上汗。往年車完人盡力。今年車破人無食。人無食不足。屣努力踏車聲太息。伍伯催租秋賦迫。連年未報災傷冊。歌聲如哭。水少於汗。皆十成奇警語。聖朝恤民。不啻父母之於赤子。而連年水旱。猶有未報災傷者。何知有官而不知有百姓耶。

射虎行

居人傳言郭有虎。白晝咆哮出林莽。將軍蝟毛鬚倒豎。遣使發卒悉所部。白羽長箭大黃弩。皮作車茵肉治脯。虎見千人若無覩。千人驚顏色如土。箭未脫弦弩折拊。虎起攫人如捕鼠。突出圍場公然去。當今四海樂昇平。軍士逍遙無什伍。將軍錦裘玉帶醉氍毹。胡爲輕捋虎鬚撻虎怒。從今軍府耀威武。只射兔麋莫射虎。

侶臺弟以悼妻哭子詩索和。憔悴婉篤情有不能已者。余欲發乎情而裁之以義也。輒有是作。

至痛君難割。前型我所師。延陵於禮合。奉倩太情癡。尙有君親重。休爲兒女悲。節哀宜引義。不敢再題詩。
以義節情歸於義。若助之悲悼。不猶醉人扶醉耶。只一製題。便得儒者立言之體。

舟行晚過青浦

孤篷秋氣入。此夕客心驚。露白浩無際。蟲吟併一聲。塔隨帆影走。潮湧月輪行。磔磔城烏起。譙樓已二更。
浩字併字。鍾鍊而得。併字尤佳。

和查夏仲敏裘詩

無復如膏耀日輝。關河難禦雪霜威。配宜東郭先生履。煖勝西華公子衣。絀絨猶餘清節在。蒙戎轉覺旅情非。只應五月能忘暑。披上江鄉舊釣磯。
典而雅。

岳忠武祠

檜樹枝生宋祚微。將軍那許總戎機。出師累捷身應死。與敵同讎事已非。脫幘收時光欲動。屬鏤賜後怒濤飛。孤忠願抱千秋恨。不共蘄王早見幾。以道濟伍符比之。冤抑相同。而關係尤大。此空際着題一法。

彭無山給諫自河工召復原官喜而有作

三年薄宦臥江干。鳴鳳今朝刷羽翰。暫屈鄴侯參幕佐。忽宣唐介拜原官。重來寰海皆傾聽。一入朝廷便改觀。漢室淮陽終不召。須知納諫古今難。使事典切。結意反。纘出。聖朝納諫。工於立言。

督亢陂

提劍荆卿勇絕倫。浪將七尺殉強秦。燕讐未報韓讐復。狀貌原來似婦人。見重智而不重勇也。

王導

本無助德濟艱危。儒雅風流事又虧。臣族早知三窟就。風塵休障庾元規。江左夷吾。何處生活。

溪聲

結廬何日住深山。竹月松風相對閒。卻笑溪聲忙底事。奔流偏欲到人間。

聞鷓鴣

月照霜華石磴危。鉤輞苦怨客歸遲。故鄉亦是驚魂地。只恐山禽尙未知。

陶元淳字子師。江南常熟人。康熙戊辰進士。官昌化知縣。

暮歸僧寺和潘九儀韻

暝色城先到。人聲野更稀。山深難得月。水暗欲濺衣。魍魅憎人過。蟲沙得地飛。迷途知未遠。鐘起喚君歸。

臬使劉公枉書惠存詩以志感

一官萬里尹蒿萊。幾個生前歸去來。況復勞心陽子拙。敢云流涕賈生才。峴消瘴霧千山淨。春到蠻花滿地開。從此不愁風土異。生還終望我公哀。

和唐張謂韻

道路非難作吏難。一洲鰲背立郊壇。人言瓊管曾開府。我道囚山合珪冠。萬里親知春夢斷。一生事業暮潮寒。新恩已是投荒處。卻望新恩福地看。

如此途窮欲進難。朝天漫上越王壇。踞高不合伸強項。逐裸何須岸大冠。傲外山河逢帝醉。心頭鐵石向人寒。長安日下猶言遠。窮海孤臣那得看。二章與遺臬使劉公詩同意。

史申義字蕉飲江南京都人康熙戊辰進士官翰林院編修著有蕪城集

由富陽至龍游

沙禽亦無數。格格野塘秋。孤棹有時泊。遠山相向愁。月明烏桕樹。人散白蘋洲。何處津樓上。無眠聽櫂謳。

南海雜詩

石壁猩猩語。驚心百粵東。四時山葉綠。五夜海霞紅。日月搖溟渤。星河浸祝融。鷓鴣飛不斷。只在荔支叢。
三語言地氣之暖。四語言東土日出早也。卽海日生殘夜意。

曉上越王臺。扶胥海色開。山連鰲闕近。朝射虎門迴。灑座荔奴雨。吹香椰子杯。崎嶇未朝漢。割據亦雄哉。
此弔尉作之霸。

海雨花陰候。春泥屐響聲。鷓鴣簪抹麗。紈扇過清明。瑋瑁潮通市。芭蕉綠上城。昌華鼓舞院。銷盡美人情。
此狀風物之明麗。

南昌

吳楚中流勢未平。章江雄闊客心驚。芒寒牛斗雌雄氣。風偃魚龍日夜聲。黨錮人高徐穉宅。封侯事往灌嬰城。豫章樓閣猶堪賦。賓主東南異代情。

朝雲墓

散盡泥金蛺蝶裙。雲藍小袖劇憐君。傷心白鶴峯前路。一樹榕陰蓋古墳。
一女子而死於萬里之外亦可傷矣。一樹榕陰其人如在淺淺語自有遺神。

吳

暱字元明江南太倉人康熙戊辰進士官兵科給諫有西齋集○西齋爲梅村令嗣工於詩筆近體清穩尤稱雅音

和振西贈王將軍紫厓

九尺須眉七十身。眼中遺老更何人。將軍競病詩無敵。弟子丹青筆有神。談笑尙能開霹靂。太平不復畫麒麟。酒酣拔劍聽君語。爲感窮途意自親。

玉殿風流講席重。故山歸去拂塵容。門生爲致荒廚菜。禪客同尋舊院松。夢後莊周從笑鷄。書成揚子解嘲龍。歐陽筋力猶強健。不羨扶攜手一筇。揚子解嘲中云。執輿而嘲龍。去一龜字。古人每如此用。

著書不復爲窮愁。獨樂園林散百憂。人乍拋殘塵海夢。天教管領太湖秋。槎形東第奇章石。釣具南江魯望舟。從此終身巢許穩。風光真擬洛濱遊。將軍能詩。復能著書。管領名園。僭遊禪客。比少陵所咏將軍。不好武。稚子總能文。尤得幽居之樂矣。太平盛事於詩中遇之。

題徐太僕遺像

金璫禍國歎荆榛。只爲須眉不計身。四海清流真直節。五朝舊德老遺民。獨先元禮彈常侍。共幸林宗免黨人。畫像吳中前事在。團溪好寫白紗巾。自注。世傳吳中先賢畫像一卷。○此勅魏奄而未破。賜者惜未詳其名。吳中先賢畫像。係張增筆。共三百餘人。今大半歸余家。

題顧亭林遺集和汪安公編修

野哭東風學采薇。蠡臣白首尙單衣。江山有恨憂天醉。草木無情長地肥。避吏趙岐誰共語。離家王粲不思歸。祇餘帷蓋蘭臺舊。萬卷淒涼辨是非。

奉和座主東海公山居存一首

東觀西垣按部居。牙籤萬軸載牛車。集賢手筆詞頭重。元祐文章叢目初。白髮乞湖狂道士。青山思穎老

尚書閉門碧草閑秋色。獨把遺編恣獵漁。時健菴尚書衆欲致之重辟而聖祖許其書局自隨保全舊臣者至也擬以賀監歐陽公不言君恩而君恩在言外矣得立言體之

贈張樾昭

相府蓮歌樂府春。清尊檀板話窮塵。誰傳天寶淒涼曲。柳市當年舊玉人。

花前月底奏新聲。夢斷昭華玉殿塵。記得雲間歌第一。貞元朝士已無人。此贈舊歌者與劉夢得贈歌者何戡聽舊宮人穆氏唱歌二絕

句一種風神

徐

賓字虞門江南華亭人康熙戊辰進士官給事中

遊梁詩

雄都形勝古梁州。匹馬衝寒訪上游。地控燕秦開闔域。天分南北鎖咽喉。平鋪白草千原曠。忽折黃河一線流。試上高臺還極目。城邊睥睨夕陽秋。

董思凝

字養齋山東平原人康熙戊辰進士官觀察使

擬古

楚人重菘菹。椒蘭爲荆杞。宋人寶燕石。安知球琳美。真僞詎難分。奈何徒貴耳。觸熱趨炎翕。浮名取青紫。豈不羨時榮。願言敦素履。匪勉以爲期。毋爲識者鄙。

聽周紫海先生話海外三山之勝

塵世難向蓬萊遊。空懷三山縹渺之銀樓。年光彈指如飛電。安能一室兀坐生煩憂。懶雲先生負奇氣。青瞳綠髮仙人儔。與余素心授寶訣。人間何處無丹邱。更言曾廁仙人裏。天風颯颯雲霧起。左攜東王公。右攜赤松子。仙山迢迢高入雲。方壺員嶠氣氤氳。側身俯視小天地。鸞啼鳳嗽空中聞。忽然駕岱輿。羽蓋斑麟車。琪花雜瑤草。六甲備行厨。於是振衣長嘯。躡足雲巔。滄海一掬。萬山如拳。白鶴翔兮凌厲。神龍下兮蟠旋。雙童醉舞兮婉轉。素女含笑兮翩跹。螺書薤篆人不識。赤文綠字誰與傳。我不知方丈之峯幾萬里。扶桑之木幾萬年。白眼悠悠誠下士。欲往從之道如咫。古來慧業多能仙。何必丹砂與玉髓。秦皇漢武非仙才。鞭山驅石何爲爾。詩成笑傲俯人寰。天驚石破開心顏。朱草紛披誰處所。白雲蒼莽何時還。識得人間何處無丹邱。則篇中所云俱作夢遊天姥觀可矣。詩境超逸亦做青蓮。

孫致彌 字愷似。江南嘉定人。康熙戊辰進士。官侍讀學士。有杖左堂詩。

江行雜詩

一舸淹晨夕。平沙艤落曛。江潮晴湧月。山火夜燒雲。黑想蛟涎出。腥愁虎氣聞。明朝牽百丈。回首白鷗羣。
諫句近岑補闕。宋人便一直寫去。

鷺鷥村下路。停策弔沉淪。大義存啼髮。高風緬補脣。明時甘浪迹。亂世得全身。搔首嚴陵瀨。南陽有故人。

啼髮補唇一聯過謝翱墓方千宅也
五六分承結到嚴陵釣臺乃見宗主

城迥浮雲外舟移亂石間波光能奪月灘勢欲驅山過險心猶悸思鄉鬢欲斑君看松頂鶴雲暝亦知還

福州道中

指點三山近輕雲護翠微曉煙榕葉暗春雨蔗田肥野女修櫻笠溪人浣氍毹啼鵲苦竹裏爭道不如歸

秋感

遼海關門百二雄長城萬里憶先公儲胥自有風雲護部曲空成帶礪功一戰龍旂勞汗馬廿年貝錦怨
藏弓不堪蔓草祈連塚況復銅駝恨未窮自注先中丞賢迹十載嘗舉龍文大纛鼎革四王及黃鎮南輩皆出麾下○郭令公部曲皆封公侯李義山詠渾瑊詩有感陽

原上英雄骨半向君家養馬來詩中亦同此感也

詠史次王玠右先生韻

南都歌舞動雲霄回首燕臺王氣遙燕領何年馳鐵馬羊頭此日總金貂霓旌小苑明秋月錦纜長江泛
暮潮龍虎親軍三十萬登壇空想霍嫖姚此見四鎮不能周防而金貂皆歸銅臭雖長江天塹不能守也下章兼選優伶言之

六朝遺恨水潺潺金殿繁華閉翠煙但聽臨春歌玉樹不聞清廟奏朱絃銅駝泣露飛鳴鏑鐵鎖沉江渡
戰船虎踞山前明月在秋風怨絕李龜年

同峻思大年訪華天御先生

蒲帆片片帶斜暉。路轉蒹葭興不違。白露爲霜楓欲脫。澄江如練鴈初飛。滄桑廿載衣冠在。猿鶴三軍事業非。回首悲笳驚日暮。新亭風景一沾衣。

感舊示魏禹平

寒燈無燄醉蒼騰。獨對遺編感慨增。複壁人曾藏北海。墓門劍許挂延陵。全家大節存忠孝。三世深交歷廢興。郭隗臺荒荆棘裏。茫茫根觸恨難勝。自注。魏忠節公被逮。子敬先生從行。先中丞獨匿之邸舍。及忠節卒。先公盡斥衣物。佐其歸葬。延陵許劍乃與子敬札中語也。

○忠節公父子忠孝。中丞公子身仗義。三世交情。合并寫來。遂覺生氣滿紙。

至江寧再疊前韻

蔽日浮雲已暫開。先秋偏覺氣悲哉。燕歸知入誰家巷。鳳去愁看舊日臺。胥靡敢期通帝夢。檻車羞比霸齊才。炎歊苦憶涼颼好。憑仗悲笳及早催。此學士脫罪後。重至金陵作也。胥靡之夢。虛期。檻車之微。無認詞近。退藏而用世之懷。勃然言下矣。後之遇合。已兆於此。

同介脩孟游集元夫園居卽事抒懷

朱絃寥落賞音微。尊酒論心靜掩扉。遮莫文章供齒頰。底須愁病減腰圍。蹏驪七日堪千里。大鳥三年始一飛。醉拂吳鉤談轉劇。主人忘送客忘歸。

張尙瑗

字弘蓮。江南吳江人。康熙戊辰進士。官翰林院庶吉士。改江西興國縣知縣。○損持太史詩。

風神未足。沉着有餘。猶書家之顏平原。柳誠懸也。生平宗法昌黎。故尤工古體。詩稿止備遊。後箋疏諸經。甚富。已鐫者有三傳折諸。

上灘

順流船似箭，逆流船似絆。衢陸地勢殊，牽輓程難算。江底清無泥，齒齒白石粲。船石相磨治，拳礪冰初泮。深者四五尺，淺或未及半。牽船蹋冰行，挽衣不掩髻。膠淺筓難施，肩舁雜呼喚。已前而復卻，欲迎或還扞。一灘抵數里，一里或數灘。灘灘行相續，侵曉到日旰。惶恐黯默名，熟聞心已憚。豈識灩紋江，驚湍爾許悍。長歌行路難，擊楫發三歎。

起二語諺，已領一篇之意。後形容上灘險艱，不遺餘力，令讀者目駭心悸。灘亦音歎，取十五輪中。

九鯉湖

艱哉觀瀾亭，所歷皆懸度。過此鳥道絕，從遊慄相顧。途危景益佳，興發情無怖。身非鄴侯骨，暫作壁間步。強半地嶺曳，有時猿攫鶩。磴斷體欲絕，根蟠足稍駐。琮琤絲竹澗，爛漫琪玕樹。壁水石雙門，挂嶺玉三柱。卻望珠簾垂，銀潢屑煙霧。直下去無幾，迴迴勞予溯。湍駛何潺潺，裘裳不可渡。長嘯向白雲，茫茫蒼鶴互。徑路斷絕，綠壁而行。地嶺同曳，猿攫並騰，服其真。寫得出，蓋遊黃山蓮花溝百步雲梯曾親歷此境。

謁韓文公廟

總角誦公文，不啻編三絕。半世味公道，無能劍一映。維公不朽姿，薄雲貫虹蜺。謗傷與誇銜，兩者均蠛蠓。氛氳一瓣香，萬古應同爇。舉舉何末生，敢云景行切。潮陽誦宦區，偶然鴻爪雪。藉此滌炎陬，海濱斗杓揭。湖流漾清派，峯勢環飛岵。江山銜明德，臨眺心神澈。白雲飄檐檻，恍憶靈旗掣。

公之行道，只在倫常日用，不特誇傷者可嘖，即誇銜

若亦見之未真也。讀原道篇自得。次章并其弟子表之明其鑄冶人才有功後學。

史公識尊聖。世家表弟子。後雖未敢例。義在可竊比。濟濟伊洛徒。游揚復羅李。韓門數入室。若籍湜服喜。唐宋兩朝史。附傳共編記。匹夫百世師。坡言得之矣。配禹尙非誇。傳軻又何訾。荒荒海水南。明珠孕天水。過化遂成材。廟食芳蘋芷。蚪枝侍郎木。檜楫同薤薤。

觀音巖

巨靈施崑刀。劈破青玉筍。千里插江面。削平如概準。羣岡互起伏。離立車連軫。獨此琨瑤屏。截肪無粟疹。頂轟日黯黯。趾沉波泯泯。一線裂石罅。虛中駕闌楯。香華鬘陀像。瀕洞棲谷牝。淒風颯然來。猿獍度必貫。安得立三分。言從伯昏瞖。王漁洋賦此題中云。騎危躡虛空。險絕緣鈎梯。此云。一線裂石罅。虛中駕闌楯。可以互證。想見左右石壁危闌駕。此巖未易登也。

彈子磯

競秀英州山。臨江多俯瞰。觀音與彈磯。嶠絕奇尤占。劃然千仞壁。削出長天塹。鴻濛開闢時。鬼斧安施鑿。蚪柯縷絡之。蒙茸紛碧紺。乳竇小於拳。巖然不容甌。相傳廣明賊。彈落金丸陷。雄非天山矢。險異蜀門劍。但見灘流駛。湍急不可纜。懷古夫如何。寒風江湛湛。漁洋南來志云。彈子磯懸崖千仞。如洞如厂。斧鑿。鑿。鑿。擬於鬼神。詩中亦可互證。廣明賊未詳。

仙霞關

七閩路與中原通。怪事咄咄驚天公。岡連嶺復雲樹匝。飛鳥不度猿猱窮。微茫一線走絕壁。誰鑿溟滓開。

鴻濛二十八盤尤斗絕。路難直似摩蒼穹。王公守國天設險。嶠函轘轅自古崇。茲豈小巫怯百二。偏隅冷落箐篁中。正恐五丁力不到。無諸倔強憑饑餓。爾來文物盛唐宋。舟車衢信當要衝。虵形蟠曲整磴道。史浩於此開榛叢。宋明王孫兩遺種。哀哀望帝啼鶉紅。日者井蛙跳涔水。高擁黃屋彎朱弓。陰平夜縋渠帥縛。崑崙電掃巢穴空。雖云負固不可恃。車箱箭筈名益隆。熱行五步一回首。僕夫告瘁心神忡。殘旗折戟渺何許。故壘瓦礫餘蒿蓬。淙淙飛泉下幽壑。駟衝百道鳴豐饒。迴谿互證前路失。恍惚七聖迷崆峒。南風不競自天道。嗟哉豎子時無雄。欲呼真宰鏟疊嶂。永俾灌莽無伏戎。左鼓右旗列几案。控舟舁輜從西東。懷古登危重興歎。溟茫襟袖侵霧縹。仙霞關爲閩越扼要界。高二十里。爲級三百六十。曲二十二。宋史浩以就禽。中一段正指其事。縱橫排氣。一氣蜿蜒。得昌黎之氣骨。

查

昇

字仲章。浙江海寧人。康熙戊辰進士。官至少詹事。著有澹遠堂集。○宮詹書法得董文敏之神。入直南書房時。聖祖屢稱賞之。

訪吳采山不值

秋水乘孤艇。沿緣亂葦間。時看黃葉落。境共白鷗閒。林影溪邊屋。鐘聲雲外山。故人今不見。月出棹歌還。

過浦口和清字

公路浦口浦水清。甘羅城外征人行。大河直下千萬里。哀鴈差池三兩聲。南國浮雲天際滿。異鄉秋草夢

中生。側身四望渾無盡。新月江關一片明。風格亦從杜出。

陳丈樸菴招賞牡丹同人卽席分賦

得明字

金谷何如蜀錦城。放翁舊譜閱天彭。置身富貴何須早。到眼雲霞覺倍明。丁字簾前圍蝶翅。午時畫裏驗貓睛。風流共憶清平調。合座春光醉玉罌。
牡丹用富貴字最易近俗此翻用之轉覺其雅死活之別也○
此正午時花也。貓眼黑睛如線此正午時貓也。貓且暮目睛圓。日午漸狹長正午則一線矣。用來恰好上一句以繡毬作陪襯也。

八里莊

斷井冰膠汲水痕。炊煙三兩不成村。客嫌南語呼難應。門對西風火不溫。白月荒途深夜柝。黃沙野菜雜蔬盆。耳邊俄覺秋濤捲。臥聽鴛鴦駘草根。

陳大章

字雨山。湖廣黃岡人。康熙戊辰進士。著有玉照亭詩鈔。○楚風舊沾鐘譚餘習。後又變為凌厲。芒角多而性情隱矣。作者矜平躁釋。一歸恬和。可以覘其所養。

九江夜泊

解帆及夕陽。繫舟傍枯柳。天低九派流。浪抱孤城走。奇峯插斗南。雄勢壓江右。雲中五老人。見我時招手。靜夜冷魚龍。古戍沉刁斗。欹枕不成眠。且飲潯陽酒。
舟中望見五老。標云五老招人。如此用筆便覺靈活。

甕山拜耶律文正公墓

林轉河陰長。遙峯窳可數。迤邐得甕山。嶽嵌若覆釜。劫火土一抔。英靈耿萬古。元祖昔龍興。戎馬日旁午。微公濟世心。斯人盡豺虎。荒祠香火微。斷碣聚鼯鼠。漠漠望秋雲。含情空激楚。
耶律楚材。遼之裔也。輔元祖。有濟世功。予遊西山。曾

拜其墓

王文成紀功碑

碑略云。正德己卯。宸濠叛。稱兵向闕。破南康九江。攻安慶。臣以列郡兵復南昌。宸濠擒。餘黨悉定。天子聞變。赫怒。親統六師臨討。遂俘以歸。末云。式昭皇靈。嘉靖我邦國。時庚辰正月也。明年嘉靖入繼大統。果符其讖。先是公將獻俘闕下。江彬等檄令縱之鄱湖。俟上親戰而後奏凱。公不得已。間道入杭。以濠授張永。遁入九華山。隨補奏。序彬永等功上之。然公卒無賞。嘉靖初。下其議。乃起爲南京兵部尙書。封新建伯。

武皇巡遊不知疲。朝御豹房暮京西。羣狐跳梁嗥且舞。搖搖九鼎一髮危。宸濠覺踵寘鐺起。盤結肘腋成

窮奇。堂堂孫許仗節死。孫中丞麟許按察遠東南傾刻翻潢池。虔州中丞屹柱石。忠義憤發非人爲。同時幕府盛才

傑。太守伍邢謔公戮力共豎天王旗。黃石磯前一再戰。掃除凶燄無子遺。事不泐旬功再造。隻手半壁扶坤維。當

時廟謀亦癡絕。露布已上重誓師。天子自將佩將印。六軍雷動江淮涓。謗書何止盈一篋。當關虎豹皆狐

狸。深謀豁達格神鬼。苦心退託隨髡緇。開先寺前七佛碣。旁有大字鑄崔嵬。雅頌嚴正揭日月。蝌蚪錯落

擎蛟螭。故元兆讖實天啓。酬庸錫爵開禎期。平原之書次山筆。千載以後非公誰。昔從流傳看搨本。頃來

石壁瞻豐碑。公之英烈傳萬古。求之翰墨蓋已卑。區區羣兒肆口舌。劍首一映終何施。嗚呼。奇人奇功不

世出使我摩挲再拜與嗟咨。實鑄安化王也。先宸濠反。楊一清仇鉞討平之。○王守仁禽宸濠。只三十六日。時安邊伯許泰。太監張忠等皆受宸濠賄。恐守仁見上。聲其罪。轉言守仁先與宸濠連。後乃變計。武宗知其忠。不信。復言其必反。多方沮抑之。守仁先以宸濠付張永。既乃入九華山。僧寺待罪得免。詩中直陳始末。作傳讀可也。

登小孤山

蜀江萬里浮鴻濛。洞庭勢挾彭蠡雄。小孤突起插天半。百川砥柱爲之東。磴道虛無動寒色。漁舟一葉傍絕壁。蛟鼉正晝吼風霾。泱泱孤雲天地白。參差樓觀麗朝霞。繡鞶珠箔顏如花。陰巖咫尺蓄雷雨。怪樹千歲盤龍蛇。吳楚雄關此第一。折戟沉沙莽蕭瑟。憑闌決昔倚半酣。盡捲乾坤入詩筆。隔江清瀉有彭郎。銀河帶水遙相望。舟師招手聞絕叫。急趁南風過馬當。小姑嫁彭郎。東坡偶然戲筆。後人輒以此相誦。殊可笑也。此出以端重之筆。能脫窠臼。

送胡卜子南歸

春光叫徹粟留音。贈別何堪折柳吟。空說高臺收駿骨。祇應敝帚享千金。五更風雨窮交淚。驛路鶯花故國心。白雉岡頭荒圃在。未妨述作老雲林。

陸

寅字冠周。浙江錢塘人。康熙戊辰進士。○冠周。高士。麗京之子。麗京出亡不歸。冠周訪父。幾遍宇內。終不得。幽憂畢生。少歲卽有豫章拔地之勢。遭困厄。詩品愈高。刊文集時。名未成也。戊辰後。詩無刊本。故未得見。

歧路行

出門竟何之。東西南北皆路歧。僕夫執轡馬踟躕。驪歌一聲聲最悲。道傍桃李似惜別。飛花故撲金屈屣。

人生目前貴適意，不如還逐屠沽兒。兄袁盎，弟灌夫，相逢自負高陽徒，擣菹百萬能呼盧。朝金張，暮許史，拔劍欲爲知己死，眼前誰是嚴仲子。

宣德箭歌

丁巳夏，余客長安市，有鬻爬背麻姑爪者，視其桿，有宣德八年餘干縣所貢竹箭字，後無所用，散落民間，改爲爬背之具，余乃作歌。

長安城東鬻廢箭，故老歎噓萬人看。金鏃敲殘鼓鑄鋒，鴉翎落盡丹黃變。棄擲風塵未嘗試，老桿分明宣德字。珍惜曾教武庫藏，標題尙識良工製。高皇昔日戎衣著，劍掃妖氛定雄略。已見蒲稍入大宛，更聞菡萏開邛笮。茫茫九服初通貢，竹箭東南待弦控。包茅常例豫章來，司空檄取官胥送。貽謀孫子但垂衣，夜夜黃星護紫微。三殿日高香不散，上林花暖燕羣飛。夕烽并罷平安火，服御深宮無一可。青蘂燒出碧雞成，熏鑪製就黃金裹。內家擎獻龍顏動，流落人間至今重。金馬銅駝條已非，石柝楛矢成何用。只今新製逾工巧，故物休言舊時好。猛將難調神臂弓，仙人且代麻姑爪。君不見銀泉山下草蕭蕭，狐兔秋原正寂寥。仰天大笑羽毛落，一箭穿雲看射鵰。

明自宣德後，武備漸弛，至正統而有土木之變矣。從廢箭中發露此意，點入宣德宣鑪，不同閒筆。

秋日憶家大人粵遊

又見秋風動，蘆花江渚飛。忍看時序變，猶與老親違。遠信無他語，深情祇望歸。應憐揮手日，兒女共牽衣。

眞摯
近杜

自笑

自笑桑弧志。天涯只布衣。到家翻是客。逆旅豈如歸。白日從愁盡。青山入夢非。緘書與僮僕。爲掃釣魚磯。
五六寫盡作客人心事。青山入夢非。卽夢裏還家不當歸意。此覺更簡。

錢塘懷古

祠廟吳山草木凋。蘆中窮士舊吹簫。眼看吳市東門甲。怒捲錢塘八月潮。烏喙竟能亡敵國。魚腸應悔刺王僚。錦帆一片風流盡。白馬紅旗浪裏招。
東門。史記正義謂閭門。卽錡門。後改葑門。子胥云。懸我目於東門之上。以觀越寇之入也。悔刺王僚。見位傳僚之子孫。越未必滅吳也。前此無人道及。

秋日雜感

翹首天涯那可憑。丹楓一望淚初凝。卻羞軹里逢嚴遂。曾否夷門辱信陵。攬鏡未應頭似雪。埋憂不辦酒如漉。棹歌且逐中流去。蕩槳操舟我亦能。
頡聯。見不達。知已意。

沈名孫
字弼房。浙江錢塘人。康熙午舉人。遷攸縣知縣。未赴。著有梵夾集。○漁洋香祖筆記中載門人沈弼芳詩話三則。本字弼房。筆記中應誤書。

題畫冊

篷開獵獵風脚。舵曳瀾瀾浪痕。杜宇飛邊蜀道。哀猿啼處荆門。遠紅夕照千里。濃綠垂楊幾村。已到落帆

亭下客心還怕黃昏。六言律詩。偶備一格。

去京師

望望南天雲樹迷。滄浪仍臥釣魚磯。誰言京洛縑塵滿。我獨還家是素衣。予咏白燕。未二語云。京洛何妨。共栖宿。素衣未必化爲縑。有同

心也。第欄房寫。篋。予則託興。

惠周惕字元龍。江南吳縣人。康熙辛未進士。由翰林院庶吉士。改授密雲知縣。著有研溪詩集。○研

字面以爲能事也。生平遠於經學。貫穿融浹。亦不第以詩家品目之。

出門

饑寒逼腐儒。顛倒作奇想。長安遠於日。無故思一往。曾聞丈夫雄。咫尺視天壤。豈知適千里。三月費勞攘。

爲裝迫旦暮。無乃太鹵莽。蕭然一室中。何物是行帑。念此壯心摧。低徊轉悒快。出門心事。爲起手十字。道

不能逼也。

浮雲翳清晨。孤帆雨初注。結束上高堂。迴遲更千慮。苦心發憤顏。但道舟楫具。小兒不知愁。牽衣乞同去。

不忍與明言。多方使之誤。送行雜親朋。刺刺語及暮。風急雨漸稠。篙師發微怒。郎今何多談。明日誰與訴。

夜坐有懷

青天如澄江。片月初洗出。草光露離離。樹影風瑟瑟。寒更夜點疎。鷺羽孤飛疾。惆悵不成眠。懷人坐終夕。

高極
高極

從赤城至國清寺

千山萬山渺何處。塔影層層國清路。斜陽林外送微風。布襪蕭然蹋雲去。寺外澄潭一鏡圓。連漪倒浸青蒼山。長松蜿蜒落潭底。白日疑有蛟龍眠。泉聲曲折引我入。菩提一樹高摩天。龐眉老僧可人意。爲我掃石開禪關。匏樽酌茗薦瓜果。野味足洗官庖羶。坐來庭徑轉岑寂。修竹杳窅聞清猿。北窗跛腳許高臥。冰簟蔭借青琅玕。始知物外卽幽曠。化城何必離人間。念昔平生俱道長。行騁劫劫無停鞭。三年席帽客京國。口識甘苦難爲言。今歲崎嶇浙東道。水浮陸走行三千。自注自錢塘太平永嘉至台州將出紹興計三千里矣人生如此竟何爲。空使慘戚凋朱顏。誓從今日扶塵網。山深林密行盤桓。桃花流水跣足渡。鬼峨半醉來參禪。但寫國清之幽曠易於平直。得平生道長一段。以往日之艱辛。觀目前之游衍。彌覺愉然物外趣味無窮矣。七言古須於平直中尋出曲折。

贈維揚顧書宣

維揚顧子文章雄。渡江問我清溪東。入門一見便驚絕。袖底詩卷光熊熊。造次手攬讀未徧。齒牙陡覺生清風。君言學詩二十載。前後正變差能窮。人生眉眼不自見。願以妍醜煩青銅。余時怵惕未敢荷。君才何健詞何恭。吾身貧賤困荆棘。竊弄筆墨吟三冬。一言落紙與俗忤。口排吻擊轟兒童。邇來讀書但自省。得失豈暇爭雞蟲。聞君議論復感發。如瞽得相行有筇。君才趨捷實倍我。何以屬我相磨礱。乃知賢者不自

伐虛襟苦抑由中充。從今尊酒托末契。女蘿裊裊緣長松。得聞君善我必勸。若遇我過須君攻。昌黎韓子昔有語。終始相合如駉蜚。君今別去正秋暮。得句幸寄南飛鴻。眉眼不自見二語。妙喻不減東坡。

同諸君與聖寺看杏花

誰翦明霞散山曲。千枝萬枝紅籛籛。五家合隊麗人行。杜老蒼騰看不足。聊憑杯酒添春酣。烏帽欹斜尚可簪。客路心情似春雨。晚來和我夢江南。必徵引杏花典實。便是笨伯。妙處正在離卽間也。然得此解者甚難。若竟以不切爲能。則又誤會其旨矣。

再賦一首示耑木及同游諸子

西勾之西花爲國。暈碧裁紅鬪顏色。杏花今歲開獨遲。不共棠梨作寒食。嫣然一笑破寺中。恰似詩人在遷謫。嬉春寶馬空當當。盡是看紅不看白。看紅看白。遺山語。楊郎愛惜攜酒過。花欄日底相婆娑。清香泥人著。榻席酒鱗瀉影搖紅波。花如有情解留客。到手莫負金叵羅。春風去矣綠陰合。明日花老君如何。正值改官。縣尹時隨所感觸。俱成妙語。按其詩稿中知之。

夏日寫懷

自從飛鞚到人寰。最憶城南香水灣。旅舍一涼來好雨。竹牀昨夜夢青山。藕花風繞湖三面。紅豆陰輸屋半間。更有西鄰垂白叟。來言玉桂待同攀。

重九潘長公恬庵昆仲招同魏蒼石飲太白樓分韻

天圍睥睨擁南樓。畫稅飛甍俛濟州。千載尙餘高士蹟。一尊今續酒人遊。碧雲淡日黃花節。紅樹西風白鴈秋。客裏放懷須醕酌。莫教根觸故鄉愁。

敝裘

和查夏重

一番淒風促暮砧。漫傾殘筍付縫紉。絲紋斷續難容線。毛理稀疏不受鍼。猶有餘溫勝短褐。還將獨夜抵重衾。歲寒惟爾堪相倚。忍爲豐貂易素心。一結見用意之厚。符物待人俱如此。矣。推而廣之。詔求故劍。亦是此意。

再用衣字韻

悼亡妾趙氏

春時初嫁秋來病。九月東遊我未歸。獨擁寒衾壓鍼線。辛勤還爲寄冬衣。年來無夢到彤扉。臥聽三商玉漏稀。記得去春風雪夜。添香喚我著朝衣。

棹歌

秋光瑟瑟半江紅。花事闌珊到水蘋。昨日芙蓉今日老。一年生怕鯉魚風。

清詩別裁

卷十八

陳鵬年

字北漢，湖廣湘潭人。康熙辛未進士，官河道總督。諡恪勤，著有滄洲詩集。

新春雜感次韻和中山

鐵瓮城邊路，金焦江上山。蛟螭蟠地軸，豺虎踞天關。皎日羣陰散，春風十畝閒。煙雲儼圖畫，蠟屐好躋攀。

京江雜詩

傑閣俯城陰，闌干每一臨。曲阿秦郡縣，北府宋園林。山色分吳楚，江流自古今。春風滿天地，無限望鄉心。

送靜庵僧之五臺結夏

五月正炎熱，山寒不可勝。好將雙赤腳，去踏萬年冰。虎石階前伏，龍雲盞底興。欲隨飛錫住，松雪路層層。

江干

愁雲毒霧鎖江干，院落沉沉晝景寒。貔虎千重森鐵瓮，穹霄何日下金竿。迢遙肺石呼難徹，寂寞丹心淚已乾。蟻蝨一身天萬里，仍依北極望長安。
忠愛之忱，時時流露，故終竟於難。

與許謹齋都諫夜話

琪樹琳宮鎖寂寥。逢君燒燭坐寒宵。三春華髮棲江表。五夜丹心戀聖朝。禁闥似聞憐讜直。湖山自合老漁樵。鯉魚風裏桃花水。共聽南徐早晚潮。

移寓城南草堂紀興

北堂遙隔楚雲西。遠近浮槎理亦齊。豈有園官供菜把。仍催稚子樹雞栖。寄奴井在泉堪汲。丁卯橋荒路不迷。比似成都留杜老。居人指是浣花溪。此在京江時移寓。玩其詩意。若欲終老於此者然。

冬日感懷

河淮重寄寵旌旄。方略頻傳霄漢高。中夜扁舟借舂鏞。經年匹馬狎波濤。廟堂正切宣防計。簿領仍懸撫字勞。漸看海疆今沃壤。桑田兒女獻春醪。此為從事河工而作。乃當日事也。下二章追念前事。

清時稽古獨優崇。詔許諸儒集禁中。花發上林春窈窕。雪晴阿閣日曛曛。直廬夜檢青藜照。講幄朝呈白虎通。痛定湘纍慙報國。阜囊無補但雕蟲。此讀武英殿修書而作。

平生夢落五湖邊。竹馬重來事黯然。獨賜歡聲方動地。滯淫秋水又浮天。東南財賦無籌策。士女嬉遊有歲年。春樹萬家煙霧裏。白公隄上每流連。此懷治吳舊事而作。公先為郡守。後署分藩。故有竹馬重來之語。

黃叔琳 字崑圃。直隸宛平人。康熙辛未。賜進士第三。官至吏部侍郎。○先生年十九登第。後庚午辛未。諸舉人進士。兩詣其第。稱後同年。議會。誠熙朝盛事云。

柏林寺觀李晉王畫像歌

沙陀懷古趨僧舍。駐馬柏林還看畫。素綃拂拭生輝光。神威凜凜須眉張。紅袍玉帶結束好。唐季英雄一目眇。當時角立有朱三百戰。干戈人易老。國讐未復留遺恨。破碎山河安足問。莊明帶劍左右立。錦囊盛矢受遺訓。誰歟寫照妙入神。李家父子俱天人。鷹揚虎視空一世。經營慘澹傳其真。千載留貽歸淨域。世無別本須珍惜。捲圖四壁起英風。想象沙場萬人敵。寫出晉王英氣勃勃。錦囊三箭。宛然在目。非此詩不稱此題。

送孫文博之雲南省觀

此去行歌陟岵詩。短長亭外柳如絲。雨過山驛雞啼竹。風送江程狄挂枝。花下迎親依曉暑。尊前憶弟夢春池。可能裁得相思錦。六六紅鱗寄莫遲。

高孝本

字大立。浙江嘉興人。康熙辛未進士。知涇縣。續溪著有罔哉叟詩。

沒字碑

山巔樹石表。雷雨終不歇。捫讀了無字。傳是秦皇碑。東封銘功伐。曷詔丞相斯。或云藏金策。石函外覆之。亭亭霄漢間。觀者徒然疑。祖龍昔多詐。茲意諒可知。六籍既已燔。焉用文辭爲。將以愚黔首。徒令萬古嗤。沒字碑向無實指。此以焚書愚黔首意實之。應爲定論。

登華山

萬古神靈嶽。三峰鎮雍州。首陽曾北裂。星宿此東流。臺駐軒皇蹕。天垂白帝旒。行攜九節杖。長嘯訪丹邱。

誰開千尺峽，斷處若相連。豈有丹梯接，惟憑鐵綆懸。猿攀巖倒上，鼠伏穴傍穿。自度車箱谷，飛昇傲列仙。
劉君東郊述登華之險全憑鐵索鐵索以上復用倒攀旁穿詩中兩聯真寫得盡

直到神仙窟，陰陰紫翠濃。希夷雲際臥，毛女樹邊逢。二十八潭水，五千餘仞峰。煙霞都踏徧，欲跨兩茅龍。
贈王山史先生

紫氣行看近，重重嶺上雲。山尊秦二華，名重漢三君。獨鶴亭初到，如鸞嘯乍聞。欲依張楷市，可許一塵分。

鹿忠節公祠 鹿太常善繼

自是胸藏十萬兵，提戈出塞事無成。廟堂不惜封疆壞，門戶惟知水火爭。辛苦四年隨相國，倉皇一死殉危城。白楊風急祠前樹，猶作金戈鐵馬聲。

姚弘緒 字起陶江南華亭人康熙辛未進士官翰林院編修著有招隱廬詩

送閻荊州終養歸中州

驪歌聽罷惜離羣，折柳春城倚晚曛。日下重君能愛日，雲間愧我尚瞻雲。霞觴味並金莖賜，綵袖香從玉殿分。聖主恩深親未老，好承庭訓答明君。
三四自然雅切不入於佻

程文正 字范村江南江都人康熙辛未進士官工部主事

采石李翰林墓

蒼蒼松柏繞層岑。謝眺青山葬翰林。天子呼來猶得謗。世人欲殺亦知音。煙迷墓杏漁樵路。月照樓空江海心。鸚鵡鷓鴣杯杓好。死生有約酒星沉。若世人不欲殺。是以尋常待之矣。語極警。極快。若黃九煙見之。必采入驚大集中。

錢王廟

霸業分星占斗牛。當年氣蓋海山秋。三千客自知羅隱。四十州空問貫休。鐵箭尙藏遺廟在。錦衣誰似故鄉遊。殘碑有字還堪讀。玉局鴻文筆力遒。三四本。事作對天然名警。

姚士陞

字別峯。江南桐城人。康熙癸酉舉人。著有空明閣集。

月夜泊慈水

舟泊聞宵柝。鄉心正鬱陶。岸蟲秋老急。江月夜深高。兒女懸雙淚。年華送二毛。嗟余悲失所。蹤跡獨勞勞。

送五弟

自注。時欲遊蕭山。

宦遊記汝懸弧日。一瞬滄桑十八年。早歲負薪廉吏後。重來衣葛故人前。出門含淚離慈母。長路衝寒值雪天。好認荒祠拜先子。江郎橋畔古壇邊。別峯考作令蕭山。其弟生長畧中。故有重來衣葛之語。

有懷

但分離處卽天涯。若個離家不憶家。自笑欲歸歸未得。也將歸信卜燈花。

願圖河

字書宣。江南江都人。康熙甲戌。賜進士第二人。官翰林院編修。著有雄雉齋集。○太史韻語。都從性靈流出。無一言依傍。鄙意深喜。但所得詩。只二卷。未見全帙。從前與令嗣善。不及一

借今令嗣已成
古人可惜也

攝生

保國釋外懼。攝生留小疾。朽索馭羸馬。徐行百無失。中疎固其衛。獲少靳其出。割慾如守疆。謹身如縛律。不讀黃老書。淵冰宜戰栗。自特強健。每易傷生。留小疾。正以攝生也。固其衛。靳其出。得老氏精蘊。

任運

善走須得途。邪徑不可行。善博須得慮。不關人力成。達人期任運。世路誇趨營。百慮輸一忘。百巧輸一誠。不見信天翁。亦得全其生。慮輸於忘。任運也。巧輸於誠。任運中有工夫在。更說得密。

息交

君子如春風。可愛不可竭。小人如酒顏。但得暫時熱。急弦莫浪彈。一彈弦一絕。市交莫浪交。中路難固結。惟當同心人。可與論金鐵。狀小人之交。喻新而確連。上二章皆閱歷有實得語。

諸葛銅鼓

武侯未築祁山壘。先出偏師渡瀘水。人言孟獲不足擒。股掌玩之徒戲耳。豈知北伐用南夷。正欲中原掃讐恥。夔人笮馬供鞭驅。羅鬼烏蠻皆效死。至今銅鼓散山谷。崗戶流傳尙誇侈。精銅其質革其音。想見援枹兵四起。烏虵龍虎倏離合。戎機萬變人難擬。曾傳八陣有遺蹟。更說旗臺餘故址。此鼓千年尙宛存。血

戰消磨土花紫。君不聞定軍山下陰雨中。山鳴雷動聲隆隆。埋鼓鎮蠻功未畢。反旗走敵恨無窮。公之平南夷正

爲北伐計也。議論正大。寫銅鼓處亦有聲。

斷硯歌爲姜西溟先輩賦硯爲家梁汾舍人擊碎

姜侯硯小纔如掌。玉膩金清世無兩。險塵發采宜毫爽。酒半傳觀各誇賞。舍人怒起奪之急。嫚罵何堪一錢直。奮搥頓似玻璃拆。滿座失聲留不得。物之成毀有由然。舍人辯口方便便。君不見姜侯醉作草聖狂而顛。怒猊跏趺龍蜿蜒。又不見姜侯著書卷幾千。抵突彪固追談邊。脫手便有風雷纏。廟堂頗復急此賢。諸公百僚壓其巔。祿米不救飢窘煎。焉用此石空鑽研。羈窮白首默自憐。嗚呼。胡琴摔破不復絃。唾壺口缺那更全。姜侯乃煎鱗角鳳背之膠重綴聯。玉蜍吐水調松煙。摩挲自謂石可田。石鄉可遊吾老焉。借舍人口中極抒憤懣不平。歸到姜侯恬然自安。尤見身分。若無此結。易流於露。

天平山

山遊窮日返。絕勝數天平。偉石皆人立。欹崖忽鳥驚。僧龕雲共住。樵路鹿兼行。耳畔猶虛響。淙淙落澗聲。

呂履恆

字元素。河南新安人。康熙甲戌進士。官至戶部侍郎。著有夢月巖集。○少司農時。言詩者多欲尊宋祧唐。而作者志趣。不但不落唐以下。并窮追六代以上。而從之。可云特立獨行者矣。

今後人之詩。尙能篤信家學。

祖越寺至羅漢洞

空山寂無聲。鐘磬自生響。宛轉松石間。忽來雲鳥上。筋骨未遑安。耳目已豁朗。巖腹正中穿。出入隨俯仰。混沌誰開鑿。玲瓏非意想。仰視縹緲峰。天表撐一掌。其上有飛觀。安能度袤廣。自非餐霞人。邈然不可往。
出入隨俯仰五字。
寫盡穿洞神理。

關門行

自注新安一名鐵門。

哀陳公也。公諱顯元。楚之蘄州人。崇禎壬午。令新安。以息民爲治。時洛郡失守。屬城邑皆墮。公率民登鐵門砦。日夜守陴。不爲動。賊檄公。公碎其檄。大罵。賊怒。并力攻之。砦啓。無少長皆屠。公走且呼曰。糾民守死者。縣令也。宜殺某。勿苦我民。賊不顧。公持其刃。呼益急。遂殲焉。其子某亦遇難。遺民三十六人。爲負土築墳。予聞諸父老云。

澗水奔山。齧石根。逆流百折。趨鐵門。鐵門山上。壘培在。居民曰。是陳公屯。瓦礫崩。翻燒黔黑。荒塚草白。天黃昏。猶傳壬午世。反側函谷關。潰無完邑。我公陟巘。關巉石。率民堅守。勿降賊。賊移檄文。謂公語。彈丸區區。何自苦。公揮礮石。擊賊軍。雙臂俱裂。豎狗鼠。黃巾萬衆。并牛力。飛鏃滿眼。天地黑。累卵難支。巢樹傾。蒼顛黃口。遭剗磔。更張空券。無所懼。齧血頸。僵不仆。同時哲嗣。亦罹殃。遺民負土。營雙墓。吁嗟乎。天柱地維。昔崩摧。金城鐵甃。空崔嵬。北門鎖鑰。墮燕薊。上東門亦軍。延開迎。降倒戈。滿眼是。公獨守死。何雄哉。春來杜宇。猶啼血。瓦棺不朽。常山舌。落落青松三尺堆。常照嵩峰萬古月。

早發褒城

旅客聞雞早，征車發驛亭。江城搖落月，石棧出寒星。林啓前村白，天迴遠岫青。七盤關下水，幽咽不堪聽。

梁州

蜀道天難上，梁州路已遙。岷嶓蟠北戒，江漢導南條。落日七盤嶺，晴天萬里橋。獨留懷古意，歌哭未能銷。

留別漢南諸子

白起城邊草，年年怨別離。漢王臺上月，夜夜照相思。歧路自茲去，故人何處期。潏潏數行淚，東盡漢江湄。

茲取其格不在語言之工。

棧中

九折征鞍一敝裘，壯遊心曲在梁州。山當子午縱橫處，水落褒斜日夜流。秦氏餘威碑字滅，漢家殘燒石痕留。昔年義舍勞尋問，衰草寒煙見旅愁。

前七子中近李北地。

潼關用螭峒原韻弔孫司馬

漢京形勝枕雄關，指顧山川一掌間。地險半開函谷月，天青唯見首陽山。中官催戰來何疾，司馬揮戈去不還。萬古黃河流血淚，春風慘澹旅人顏。

甲孫傳庭也。傳庭戮滅寇，因天雨催戰而敗，傳庭死而明亡矣。一結深惋痛之。

金川門詠史

金川北望日黃昏。聞道燕師入此門。不見古公傳季歷。祇知太甲是湯孫。風雷豈爲鷓鴣變。江漢難招杜宇魂。南渡降旗何面目。西山省恨舊乾坤。議論正音響高此種詩用全力而成。

孫大帝廟

仲謀才志擬難兄。江左開基事竟成。讐國稱臣綠底急。同盟歸妹卻相傾。南邦文武材何在。東鄂江山蹟已更。惟有遺宮傳避暑。古苔荒草對孤城。薛曹丕而謀西蜀何顏見桓王於地下耶。愚嘗有句云彼亦豚犬流烏足稱英雄。

荊州懷古

嘗思痛飲讀離騷。萬古傷心在二毛。風雅以還兼正變。懷襄之際獨憂勞。同官已妬能文寵。弟子猶傳和曲高。此日九原難可作。東門隱隱見蓬蒿。頷聯寫盡風子生平。

嚴子陵祠自注祠在鞏縣。

霜落秋城木葉舟。客星祠畔肅衣冠。故人無意驕同臥。天子何能屈一官。嚴瀨江山空浩渺。原陵松柏自高寒。東都多少知名士。不及冥鴻一羽翰。

山海關

天際重關虎豹扃。前瞻雲樹尚冥冥。山餘落日千峯紫。海瀉遙空一氣青。漠塞烽煙亭壁壞。秦城膏血土花腥。漫吟碣石東臨句。絕代雄才敢乞靈。

許由塚

青山頂上一孤邱。俯視陶唐十二州。偶使人間知姓字。遂教潁水澗清流。

荆山

自注。懷遠即下和。采玉處。有抱璞巖。

玉蘊山輝自有期。匹夫銜璧罪何辭。那知太璞元來貴。不在連城互易時。見玉之貴不在既剖後也。爲比德於玉者。增長聲價。今之抱璞

者。急欲術奇於人何哉。

陳璋

字鍾庭。江南長洲人。康熙甲戌進士。官至翰林學士。著有東冶集。○學士係左之先生令嗣。韻語克承家學。自應制詩亦不膚浮。其本領可知矣。

閩山雜詠

初識南甌路。灘船匝月程。江留螺女迹。臺記越王名。地氣三春冷。天時半日晴。誰呼行不得。江上鷓鴣聲。
屬國滄溟外。雄圖壓巨鯨。城隅防鼠雀。市上賣弓刀。旗鼓雙蜂雨。樓船八月濤。將軍今坐鎮。冠蓋路相高。
萬井山環抱。南圖亦壯哉。槎從天漢上。門傍海雲開。烏石藏幽寺。青榕廢古臺。到今傳壁荔。壇坵願追陪。

七月己未恭接誥命

少作貧家婦。歸寧更不歸。九京加翟芾。六月感牛衣。自注。前室王氏。歸余纔半載。旋有歷下之行。遂成永訣。故鏡照顏慘。宵鐙入夢

稀。此生同穴誓。何日重相依。

過張桓侯故居

漢鼎三分日。桓侯戰伐高。心猶輕馬趙。氣已奪孫曹。鹵莽生何惜。精靈死亦豪。英風留涿鹿。不翦舊蓬蒿。
不墳故實。自是桓侯。移壯繆不得。

秋獵應制

羽林按部下天闔。大漠風高兩翼張。獵火燒原秋草黑。陣雲圍磧暮山黃。太平不廢三驅盛。神武能調七萃良。應有非熊占吉夢。遊畋自古陋長楊。

滄洲兄席上詠冰

客醉宜供醒酒冰。水晶盤內露寒稜。直疑夏月常堆雪。不待秋風始掃蠅。裁作花紋看頃刻。削成山勢笑憑陵。多君心地清如許。好爲人間散鬱蒸。
兩聯俱藕句。勝予前奉敕和御製詠冰原韻。中云靈種應知幻。山容未許懸遙遙印合。

西出居庸關

西出雄關路屈盤。風雲重接舊征鞍。山如屏合窺天小。水作虹流入耳寒。萬里女牆連雁塞。百年兵甲洗桑乾。太平氣象無中外。鎮朔臺高立馬看。

閩灘竹枝詞

船如紙薄不經風。三扇低遮箬葉篷。萬丈龍潭千尺浪。也堪愁煞鐵梢公。
閩語。有紙船。鐵梢公之語。

虎踞龍蟠似此無。風雷怒挾一舟孤。千堆亂石排刀劍。直作南陽八陣圖。

張逸少字天門江南丹徒人康陽甲戌進士官至侍講學士

北征凱旋詩

獨斷行天討親征下詔書六師誰敢敵萬里摠長驅列缺轟雷礮橫參耀隼旗鈞陳環紫極肅肅護儲胥
變化鳥虵陣橫縱虎豹韜風生羣馬嘯日落大旗高御仗森金甲軍鋒淬寶刀勝兵嚴壁壘誰敢卸征袍
聖澤如時雨軍中盡感恩犀衣頒七校駿騎給千屯令自秋霜肅綸同春日溫衆心連指臂飲馬黑河源
神兵天上落迅疾下蘭臯螳臂當車轍洪爐燎羽毛妻孥俱自盡醜類敢潛逃已奏犁庭績應將弓矢囊
地中鳴鼓角天上落將軍已爲勝兵況天子自將從天而下乎一氣相生無一懈筆六章中尤推神勇

俘謀邀寬典恩先赦脅從軍門齊款縛聖度自包容日逐誠難赦昆邪亦可封因知沙漠外頰首望顛顛
掃穴傳方略豐碑勒武功亦曾資衆策只自斷宸衷戰伐夷頭曼威名儷有熊歸來頒賞賚燕饗賦彤弓
親征至凱旋六章已滿章法句法字法無弗老成應推能手

高其倬字章之奉天鐵嶺人康熙甲戌進士官至戶部尙書謚文良著有味和堂集

行役曉發

飛鳥翔遙林銜哺戀故枝人生重離別況我親衰時升堂告行役暗淚腸中垂未言向何處先說還家期
慈親起送我語好顏色悽愛我不便哭願我平安歸家貧萬事乏供饋倚病妻嫁衣典已盡不復餘稽幃

男兒羞低顏。舍子將語誰。在家同一愁。出門成兩悲。傷心最何物。雙輪八馬蹄。今日行門前。明日行天涯。塞水鳴咽流。木葉高下飛。天晴尙愁人。風雨秋淒淒。舍至情無以成詩。先寫慈親之慈。次寫閨中之賢。萬事倚託。字字從心坎流出。與東野遊子吟。可以並讀。

古北口

九邊雄寰中。古北乃其一。北顧關居庸。南境抵遼碣。屹然介其間。長垣兀積鐵。高冒峯巒巒。低竟蛟龍窟。晴空展虹霓。海勢現城闕。千里不可窮。隨山遠曲折。城頭一抔土。黎庶九州血。作俑趙與秦。流弊及明末。貂璫乘國成。書生搃戎律。志擬封狼胥。兵不踰房闕。颯沓西風來。萬騎射南月。騰凌在俄頃。若蹴蚍蜉堞。深源竟喪師。無忌空抱節。可憐邊沙中。青燐照白骨。城同夏鼎傾。事與秋煙滅。齷齪何足論。階厲病前哲。不見張韓公。築城門不設。從來守邊術。能戰守可說。更有必勝方。千古同一轍。赤子付龔韓。白麻命蕭葛。在人乘成。暨儒總戎。徹徹佛佛。驅赤子爲白骨矣。末見能戰方許能守而要歸。於循吏之愛民。賢臣之執政。誠拔本塞源之見也。此種正論。可以勒諸金石。

曉行

蚤行無定時。愁客苦夜永。出門望明河。月在西峯頂。木葉落衣上。馬蹄踏人影。荒雞樹上啼。秋星露中冷。情愜耳目幽。身倦道途迥。擊磬聞車聲。更上東南嶺。四更山吐月。殘夜水明樓。讀者如親見其景。出門望明河二語亦然。

薊州新城

于役季冬月。東入漁陽城。城圯五十載。奉詔新經營。墉堞一云具。築作工遂停。胡不事宏麗。役物勞皇情。

此州實險要。世界方昇平。長馭控八極。內地固所輕。昔當明之季。置鎮藩神京。高起兩重郭。遍徼九州丁。城中貯芻粟。城上羅旗旌。薊門大帥任。鄭重屬老成。高議百僚會。推轂千人英。且復命丙魏。不啻求韓彭。陛辭涕洟瀾。密詔言丁寧。志鳴伊吾劍。意洗魚海兵。長計一蹉失。塞馬仍縱橫。連營一日潰。列幟同時崩。塵來白日匿。燒猛蒼天頽。九門戒樓櫓。六府嚴關局。平安一星火。重比千金瓊。傳呼達禁闕。夜寢始不驚。外召勤王師。內辦遷都行。下詔責專閫。幕府空搶攘。擁兵不敢救。閉壁如聾盲。偵敵已出境。追騎甫及垆。殺人取其元。受賞都堂廳。纍纍鞍上級。一一田間氓。更奏塞外勛。肯恥城下盟。懦帥肆欺謾。勅敵生門庭。旣以殺其軀。患亦貽朝廷。嗚呼厲有階。夫誰滋亂萌。或云右文士。誤國由書生。或云客邊餉。餓卒難力爭。南史與董狐。百喙同一聲。敢獨曰不然。奄寺實慧英。監軍專將柄。司禮爲阿衡。衆賄水輪海。百度禾生螟。榜笞殺壯士。羅織戕名卿。剛鯁靡子遺。姘媼忌忠誠。肯效鷲鳥擊。轉畏走狗烹。潢池弄兵者。竟射承天闕。緬維開創初。明祖垂家型。內官止四品。洒掃供使令。外事付卿貳。著戒在宸屏。孰畀鐵牌毀。坐見九鼎傾。惜哉興戎首。未正司寇刑。我皇法殷鑒。典制原六經。寺人無官階。置員有定程。衣冠帶履外。越者誅竄并。皇皇一王法。萬世其勿更。願獻五百字。勒作城隅銘。軍政之壞。至殺百姓。以獻級。大帥益於盜賊矣。而其

賊蜂起。而宗社隨以隕焉。明祖初制。誰實毀之。至於此極也。末歸美本朝典制。禁輯寺人。真可垂法萬世。○擴音。擲前漢賈誼傳。國制搶擲。師古。擴爲俗。擲亂貌也。

碧雲寺

崔巍碧雲寺。壽安山南阪。前貌衆龍象。後植千松楸。于經首作俑。魏豎復效尤。規制駭心目。宏麗無匹儔。近屏羅翠嶂。遠勢交迴洲。石室窈中空。繚垣屹外過。鏤階風襪襪。琢壁龍螭繆。僧侈陋陵闕。豈止逾王侯。當其繕構際。乾坤困徵搜。攻石千仞岡。輓材萬里舟。蒼生莽奔竄。四海輸琛賄。卿相稱義兒。穢名豐碑留。刑餘胡敢然。童昏寄巫旒。紛臂奪之柄。盪腹心舌喉。鉗鑕殺喬固。軒墀延共兜。上擅天賞罰。下快私恩讎。敵張寇盜熾。木蠹禾生蠹。罪雖淪一族。禍乃延九州。高廟血祀斬。泗鳳戕松楸。思陵葬無所。麥飯矧可求。昌平寒食日。春慘風颺颺。民家敗紙錢。吹挂陵樹頭。窮奇舊衣冠。乃得歸巖幽。百年有餘恨。烈士涕橫流。偉哉張侍御。一洗異代羞。仆碑剗名字。伐冢爲平疇。茲事良義舉。我更借箸籌。聖賢律既往。褒罰語不浮。善固揭百世。惡亦昭千秋。誅姦賴直筆。不繫塚去留。上世戮鯨鯢。封骨高嶠嶠。請肆彼遺骸。存此招魂邱。用之作京觀。事異理亦侔。覆轍留眼前。後車庶迴輈。殷墟歌離黍。鑒之者有周。作詩述胸臆。以俟采風輶。

張祁門請削魏閣墓事。諸名家詩多有之。詳盡無如此篇。竟可作魏閣傳讀。○徐善泠然志。謂忠賢戮屍後。未聞墓葬。或甲申國破後。其黨爲之王敬哉。又謂天啓三年。忠賢拓子經墓。立塚於後。二說不同。豈營墓於天啓中耶。葬於甲申後耶。

與熊敏思登蟠龍山頂望都城值大風有感呈敏思

城中拄頰看西山。千峯歷歷橫眉端。山頭倚杖望城市。萬雉鱗鱗在足底。左有潞水右太行。桑乾流合東南方。王氣中開千萬禩。上應北斗與明堂。瓊樓十二門九關。王侯甲第麗青春。大風忽起白晝昏。俯視一

氣不可分。唯見參天蒼蒼之綠樹。蔽空翳翳之浮雲。浮雲綠樹朝復暮。英雄豎子俱成塵。君不見石甕山中耶律墓。碧雲寺後于經墳。連雲樓觀已傾圮。滿山松柏摧爲薪。天邊紅日不肯回。頭上白髮仍相催。攀龍附鳳有時輩。餐腥啄腐非吾儕。與君無何日飲酒。買山著書歸去來。登高望遠。每暢高情。況於帝王之飛動之氣行之。此章又近太白。

秋宵

離抱何時釋。秋宵特地長。夢迴仍遠塞。月好是殊方。蠟淚紅垂地。蛩聲寒近牀。遙憐多病後。吟罷正迴腸。

寄內

溼雲低似幕。永日坐如年。風雨方如此。歸期愈渺然。深愁通日夕。遠夢共山川。無計憐貧病。親衰賴汝賢。
和許子遜中秋風雨後看月原韻

風雨初更歇。涼蟾已在天。涔涔終不溼。炯炯只孤懸。髮映千莖白。秋逢兩度圓。三吳烽燧靜。絃管自年年。
點題後就題寄託。見寸心炯炯。物不能累也。深得少陵家法。

過長平驛感坑卒事有作

丹水橋邊落日明。頭顱山畔晚煙生。十年碧血無遺燐。幾簇黃沙有廢城。陰密復冤酬上黨。新安坑卒祖長平。紛紛豎子真兒戲。齒冷西來阮步兵。

劍門

兩崖對起削雲根。邸閣全傾佛寺存。千古衰興幾蠻觸。一龕鐘鼓自朝昏。無人戰鬼啼清晝。不夜於菟到驛門。蜀道荒涼身萬里。不聞鈴雨亦消魂。

修法海

字淵若。滿洲人。康熙甲戌進士。官至兵部侍郎。著有悔翁集。

詠鶴

丹頂由來異。玄裳自少文。生成雲水性。偶與鳳鸞羣。翹足憐孤影。乘軒恥俗氛。長鳴因警露。豈為九天聞。

通體自寫體。抱風骨獨高。

送查悔餘還鄉兼寄賈奠坤

生平文字友。引疾得休官。老去身須惜。歸來夢亦安。江風吹浪急。山雨逐人寒。惟有憐同調。長嗟離別難。憶昨青雲侶。偏承恩渥殊。出同陪羽獵。入共侍蓬壺。老境憐分散。天涯各一隅。秦郵如過棹。為我問珠湖。

周起渭

字漁璜。貴州貴陽人。康熙甲戌進士。官禮部府醫事。○貴州向日未聞詩人。又因天遠無從蒐羅。故祇采漁璜前輩。又未得全稿。所收從略。俟異日更徵求之。

武陵為人寫北窗高臥圖

陶公臥北窗。夢寐無今人。豈惟無今人。頽然非此身。何處無北窗。臥者少真淳。胸中失佳趣。几榻俱埃塵。吾子雖今人。宛然葛天民。攜枕入華胥。遂卜柴桑鄰。蕭條掩三逕。松菊相與春。可知夢醒間。莊蝶孰為真。

偶然南風來。吹墮漉酒巾。

避風赤壁登蘇公亭放歌

今日江頭風勢苦。黑雲從風散爲雨。波聲撼塌郝子城。濤頭逕射白龜渚。猶似周郎萬騎橫江來。千艘撇擲聞驚雷。咫尺南北不可辨。際天煙燄紛成堆。舟人繫纜垂楊陌。忽見峭壁鑿天地。崩坼髻蘇一去青山閑。老子今朝散輕策。崔嵬亭子江之濱。壁上二賦猶鮮新。人間風月不可駐。天上來此閑仙人。秀骨疎髯脫囹圄。詩不能茹酒不吐。吹唇沸地羣狐狂。遣作江山文字主。東坡黃桑手自種。廢壘蓬蒿相親舉。平生食飽愛閒行。沉壁汗牆到氓戶。武昌樊口丹楓稠。載酒還作凌雲遊。清波白月在人世。素心孤鶴橫天浮。忽憶美人思魏闕。自驚流落天南州。我拜遺像空山陬。巖桂慘澹枝相樛。悲風入座髯颯颯。大江茫茫東注愁。二惇二蔡俱蜉蝣。唯公大節今古留。當年欬吐驚龍蚪。洞簫嗚咽聞中流。長嘯一聲煙潦收。如此江山如此客。縱無詞賦堪千秋。思公不見余空返。楚塞風和白石晚。柳外人家竹籬短。明月正照黃泥坂。二蔡羣狐跳踉。適使坡公爲江山風月主人。小人之謀。無怪不福君子也。中段渾括赤壁二賦筆筆凌空。

南隄踏青因留觀音寺小斂

選勝雖無獨樂園。出城半里卽山樊。雨餘朝麓嵐光別。人比春禽笑語溫。花霧陰時迷遠浦。柳煙開處見漁村。憑君莫話金山約。玉帶因緣恐斷魂。

山陰舟中

越山巖壑鎖煙霞。此日輕舟泛若耶。紅雨棹邊迷遠近。綠蘿陰裏見桑麻。啼鶯過水仍棲樹。乳燕銜泥半帶花。試訪剡中幽絕地。不知何處戴逵家。
柳烟開處見漁村。乳燕銜泥半帶花。宋子虛集中時有此種佳句。

焦袁熹 字廣期。江南華亭人。康熙丙子舉人。著有此木軒詩。

雜詩

四氣自潛運。陰陽互來往。春風何必多。碧草日夜長。一樹生空庭。婆娑不堪賞。舊業靡遺餘。生意久天枉。天心非不仁。物性固難強。睇彼桃李顏。徙倚增悵惘。

經生歌

蹄涔之水不生淪。漣覆簣之山。那有雲煙。章句微細。必無豪賢。可哀哉。說經鏗鏗。乃畢吾之餘生。
見死守章句之

不能有爲也。此章與體。

蒺藜

爰有蒺藜樹之中庭。日月幾何。維葉青青。青青之葉。不可採擷。凌彼嘉卉。自以爲傑。念汝非種。亦天所生。憐而勿鋤。乃傷我於行。嗚呼。疇昔之日。有一溉之德。不以爲德。肆爲殘賊。蒺藜蒺藜。誰其樹之。於汝勿尤。怛焉自思。
加惠小人。而小人反欲傷之。乃絕無怨尤。而咎己無知人之明。究之過於仁。不失爲君子之過也。此章比體。

秋蟲

切切訴何事。無人知汝心。正繁燈欲死。乍斷月應沉。申旦誰能那。悲秋自不禁。癡人偷向壁。側耳一相尋。

他人用在中問者。此用作起手。便覺突兀。此法得之少陵。

謝方琦 字應雲。江南宜興人。康熙丙子舉人。著有東墅集。

雨中送客

北風驅寒雲。蕭蕭亂松雨。前山忽杳冥。不辨溪頭樹。漁父邨外歸。牧人煙中語。翩翩東來鳥。悲鳴尋故侶。惆悵別情人。挂帆何處所。

雪後送殷介持歸嚳城

朔風蕭蕭林竹折。曉來門外千山雪。有客淹留陽羨城。愁聽旅館雞聲咽。仲文儒雅舊知名。漂泊江湖百感生。故園東歸歲云暮。斷冰寒月他鄉路。村橋早發行人稀。凍浦舟橫不敢渡。朱門重裘被僮僕。文章不救窮途哭。短衣衝雪君毋悲。寒士何當謝荒谷。君不見少陵廣廈空高歌。江上秋風捲茅屋。雪後送客。自是不得志。人於其歸也。以杜老之秋風茅屋比之。村橋早發一聯。寫雪後如畫。

送友人之楚

殘雪梅花月滿庭。送君移棹訪湘靈。幾行歸雁雲邊斷。無數寒山江上青。卷畫一尊虛載酒。武昌孤劍又

侵星平生漫說無同調。好向三閭弔獨醒。

春閨詞

林外子規啼。數聲窗欲曙。憐妾最傷春。語語催春去。子規似解人意。其實春去之感。過于傷春。仍是敗人意也。最近崔顥崔輔國小詩。

何

梅字雪芳。福建寧人。康熙丙子舉人。官建陽教諭。

望接筍峯不得上

入洞疑無路。虛無接筍梢。鈎梯仙鬼半。鐵索死生交。人影猿升木。僧寮鶴架巢。那能乘羽化。絕頂共誅茅。
險語。破鬼膽。

三山歸舟雜詠之一

閩溪不可上。上若上青天。纜向峯頭繫。舟從石罅穿。晴空排虎刺。急瀨吐蛟涎。賦命真窮薄。頻年往復旋。

沈

育字配蒼。浙江嘉善人。康熙丙子舉人。官永寧知縣。

臯陶祠

虞廷推執法。才子產高陽。主德寬三宥。臣心慎五章。訐謏同禹益。姦宄服蠻荒。遺廟楊侯國。青松近北邙。
慎五章。較東坡殺之三為得體。

郭有道墓

東漢多賢達。人倫君最優。士林爭折角。仙侶羨同舟。品在君宗上。名超清濁流。中郎碑不見。論定足千秋。
郭有道人品在南北部諸君之上五六語品評愜當

雞頭關

雞頭山勢迥。人馬半空旋。風御千盤磴。雲遮一握天。猿聲深樹外。鳥道夕陽邊。漸喜關南去。悠悠入漢川。

謁董江都祠墓

興慶池南下。馬陵廣川魂。魄古祠憑。旁搜典籍。秦灰後。首應賢良漢。詔興一代師。儒崇道義。諸王子弟斂。驕矜可憐。年少長沙傅。太息徒勞淚。滿膺也。崇道義即所云正誼不謀利。明道不計功也。下以能服驕王言。二語已該廣川生平。

王

焜字大生。江南嘉定人。長洲籍。康熙丙子舉人。官丹徒教諭。著有考槃集。

短歌行

親交莫絕。秉燭莫滅。來日孔懷。如何易別。營營百年。萬慮難捐。在樂滋憂。當歌慨然。人生如蠶。食桑於野。桑少防飢。桑多防瀉。繭成自殉。竟何爲者。我欲終此曲。揮淚不能長。白頭莫照鏡。照鏡悲流光。在樂滋憂。樂中有憂。孟子充虞路問章可證也。繭成自殉。蠶猶有功於世人之飽利而死者。并遠不如蠶矣。警勸世人不少。

贈蜀使

尊酒此時別。猿聲他夜同。江連白帝郭。月照漢王宮。蜀棧孤軺外。彭門積霧中。使旌隨雁盡。留夢繞蠶叢。

虎邱二姜先生祠

掖垣抗疏觸天威。拜杖淋漓血染衣。遠戍孤臣終守節。罷官難弟竟無歸。宣州藁葬依靈爽。茂苑荒祠隱翠微。下馬行人奠椒醑。千秋孤竹並光輝。他人用二姜祠者。但表給諫。而行人闕焉。此兼及行人之去官避難。乃見周密。

許 遂 字揚雲。廣東番禺人。康熙丙子舉人。官清河知縣。

山月

不知誰抱鏡。挂在白雲岑。萬壑照成雪。梅花寒一林。美人此遙夜。千里結愁心。解帶松風下。霜華流素琴。

格高氣清。如出屈翁山手。向隅揚雲稿。獨賞此篇。近見廣南選本。亦然。詩取可傳。不在多也。

周士彬 字介文。江南婁縣人。康熙丙子副榜。著有山舟詩。

蟲災艱食賦以遣意

力稼冀有秋。螟蝥害糜苳。非無負郭田。突煙寒不起。攜鑊剛土芋。矻矻雲山裏。盈筐遂忘疲。持歸餉妻子。杜陵勞拾橡。柴桑欣採苳。身悴神常怡。先民安素履。啾啾林杪禽。飽甚聲歡喜。何人抱窮愁。戚戚成愚鄙。撫琴寫素懷。松月明窗几。天憐樂飢人。豐年行轉矣。於眼食時。傳出樂境。胸中本有樂也。

營巢燕

雙燕銜泥葺巢壘。飛去飛來掠煙水。巢成抱卵意苦辛。忍飢終日伏巢裏。哺養新雛四五子。衝風冒雨尋

魚蟻燕雛羽弱飛難起。母燕呢喃翔復止。一朝相引向天飛。子去母歸誰顧視。獨有前林慈乳鳥。銜恩反哺情無已。此等詩可以教孝。

揚州

青樓歌舞勝杭蘇。花月神仙揔一途。騎鶴腰纏爭艷羨。無人解道董江都。咏揚州詩者多及陳隋遺事。獨拈出董江都令人耳目一醒。

嚴虞惇字寶成。江南常熟人。康熙丁丑。賜進士第二人。官至太僕少卿。著有嚴太僕集。○太僕六經皆有述作。而讀詩質疑二十卷尤有功詩學。古今體詩略爲寄興。然亦不苟同於人。

咸陽懷古

六王畢後霸圖空。三百離宮一炬中。八水淒清秋色早。九嶷巖窠夕陽紅。車迴博浪沙中客。舟引蓬萊海上風。自料驪山萬年計。豈知遺恨在樵童。博浪一擊。雄威盡奪。神山雖到。妄想空存。祖龍自思。亦有嗚然色沮。啞然失笑者也。遺恨樵童。用牧羊兒失火之事。

奉和東山對月有懷之作

十年一夢鬢垂絲。禪榻茶煙事最宜。正是空江明月夜。相逢尊酒落花時。傷心暮雨還朝雨。瞥眼桃枝更柳枝。身似荷珠原不著。從今學道未嫌遲。三四忘乎對偶之跡。神到時有之。

秋宵讌集酒闌漫興得孃字

客裏經秋祇自傷。況逢明月倍淒涼。悲歌燕市尋屠狗。寥落江潭解佩纒。天上已歸秦弄玉。人間重見杜韋娘。酒闌曲罷渾無寐。疑是維摩證道場。

姜宸英字西溟浙江慈谿人康熙丁丑賜進士第三人官翰林院編修著有華間詩集

徐健菴編修筵上觀洗象

長安六月三伏始。主人門對御河水。御河流水聲潺潺。玉泉奔赴城西灣。是日都人看洗象。立馬萬騎車千輛。曼延蹴踘羅岸旁。吹角鳴鉦沸川上。滿堂賓客何從容。棋局未了酒不空。日中報道象奴出。至尊朝罷明光宮。魁形詭貌三十六。一一騎就深潭浴。雲起乍疑龍蜿蜒。湍迴更與人翻覆。須臾小吏前推排。將軍拔營羣象回。就中一象行躑躅。齒毛脫落顏摧頽。長者謂余豈解事。此物經今不知歲。聞說先朝萬歷初。貢車遠自扶南至。中更四帝時太平。一朝闖賊殘神京。忍死不食三品料。俯首淚下聲哀鳴。滄桑變換忽塵夢。勉強逐隊留殘生。茫茫舊事君莫說。勸君且飲杯中物。流寇破京師過象房羣象哀鳴淚下比於唐之舞馬此日所存者其一也滄桑之變

哭魏叔子二首

鸞江哀晚一時聞。惜別他年恨離羣。天末無因能致醉。夜臺誰與共論文。江山寂寂歸魂斷。葭菼淒淒去路分。尚有蔡邕書籍在。獨隨秋草伴孤墳。

苦節誰云不可貞。翠微山共首山清。更無安道能求死。只有韓康解避名。遠媿文章當紆綺。不教官爵累銘旌。臨風一慟江天豁。未覺前賢畏後生。己未鴻博叔子徵召不至故有韓康避名句

惜花

一春強半是春愁。淺白長紅付亂流。剩有垂楊吹不斷。絲絲綰恨上高樓。

卷十九

汪士鏞

字文升。江南吳縣人。康熙丁丑會元。官右春坊中允。著有秋泉居士集。

陳滄洲太守出瘞鶴銘於江中以搨本見示作歌記之

焦山山崖瘞鶴銘。雷擊墜江江冥冥。一旦水底出至寶。神物焜耀含精靈。此碑書家最珍惜。欲搨恐犯蛟龍腥。致令贖本遍天下。刻畫嫫母誇娉婷。或傳此是右軍跡。逸少二字疑足徵。或云弘景或顧況。未覩真跡憑圖經。滄洲使君好古士。搜奇挾怪心無寧。竭來江邊問遺碣。太息墨寶存空亭。時當窮冬江水涸。巖洗刮平沙汀。或側或仆露奇字。磊落散布如天星。命工舁石置江岸。殘筆剩畫稀留形。重依舊石定方位。安排字跡還儀型。屹如陰崖立華屋。恍然峭壁開新硯。字體寬綽近古隸。鋒稜雖剗光晶瑩。睇視山中宰相筆。齊梁風格我所憑。何年埋沒忽露洩。水府倏忽仍邱陵。吾吳太守素神異。驅使直可到六丁。狼貪虎噬且弗避。靡斥水怪如蝦螟。世間寶物久必顯。雲日肯被煙塵暝。扶傾固待巨人手。此舉便已喧驚靈。遠道寄我喜創見。從今摹畫希精能。此石此銘不再得。毋使日夜椎搨無留停。

插秧圖

車軋軋水活活。誰家田翁勤種田。插秧田中量疎密。呼童課僕運秧馬。俯首泥行股無骸。今日車水滿。明日祝秧活。不知何日秀且穎。築場刈禾賦秬秠。大兒讀書如養苗。勿忘勿助不敢擾。小兒讀書心孔開。惟恐鹵莽與滅裂。主人有田復有兒。書味酒香滿一室。呼童留客和田歌。田家之樂樂如何。寫田家樂事。令人神往。但恐兒

子讀書不免漸失真朴奈何。

徐

發字衮侯。江南長洲人。康熙丁丑進士。官戶部主事。

早春

新月如鈎挂碧空。六街遊眺興無窮。隔牆歌管娛殘夜。出窖名花媚好風。珍惜飛鳴憐病鶴。消除矜躁仗枯桐。盍簪招取同心友。把酒應多酌次公。出窖花。所謂唐花也。三春花一時並開。夏季花則不能矣。

春分日和韻

一半春光付柳條。可憐天氣是今朝。尋芳每踏蒼苔路。夢別重經紅板橋。零落梅花人共老。淒其燈火酒全消。遙知鄉國清明近。水漲橫塘隱畫橈。

陳

萇字玉文。江南吳江人。康熙丁丑進士。官桐廬知縣。著有雪川詩藁。○清如鏡淨。如拭。意味稍薄。而真氣獨存。賢於鮑釘為博。纖佛為工者。

臨終詩二首留別諸同志

辛卯中秋後二日

兩曜無停機。委運固其理。修短良不齊。誰復能逃此。俗士戀其生。涕泣對妻子。達士輕其生。鳶蟻均一視。二者皆棄天。有識所深鄙。君子則不然。奉之以終始。生有所以生。死有所以死。吾聞諸曾子。至死而後已。俗士貪生。人知其非。老莊達生。共推爲高矣。此見兩者均非。一歸於存。順沒寧。纔是吾儒正學。

我有同心人。道義相友師。頻年喪逝多。存者復別離。卽今將去客。欲別無由辭。丈夫會有志。豈爲兒女私。所恨在世日。孤負箴與規。臨風一長歎。願爲諸君期。百里半九十。一簣功莫虧。鑒戒不在遠。請君視此詩。前章自矢。此章規友。見一息尚存。不可忘臨深履薄之功也。既理不腐。況得於臨終時。足徵平日敬身之功。

發南陵

一路寒泉送客程。離亭回首隔山城。秋從黃葉聲中老。人向青山缺處行。幾片閒雲供畫本。一林落日待詩成。來時記得留題處。尚有殘尊慰客情。

挽姜西溟

晚入承明數未奇。那知鑄錯不堪追。文章舊價欣方慰。辛苦初心悔已遲。遺恨一時頭腹尾。空傳三絕畫書詩。生芻一束無從唁。獨向西風淚暗垂。

夢中

東流無復水重回。欲斷危腸暗自摧。見燕引雛還墮淚。聽鳩呼婦不勝哀。春風隴上新寒食。夜雨堂前舊

鏡臺子母重泉相見否。夢中還望寄聲來。先賦悼亡。後痛喪明。彌增伉儷嗣續之重。

讀相如傳

移病文園臥歲餘。同時真恨失相如。所忠枉遣求遺藁。不記當年諫獵書。相如可重。特在諫獵一書。詞賦其末也。作者不肯埋沒古人。

山行

山行風暖落花輕。雨過田間野水鳴。自笑微官如布穀。年年三月勸春耕。

宋聚業

字嘉升。江南長洲人。康熙丁丑進士。官吏部文選司郎中。著有南園詩藁。

宿沅江驛樓時秋分夕

沅水三更月。燕山萬里雲。夢隨天共遠。人與序俱分。風景殊蠻落。音書斷雁羣。可堪秋節半。蘭畹正清芬。

題南陽旅壁

真人自水生文叔。名士青山臥武侯。水自奔騰趨漢口。山猶層疊枕城頭。時來一夕收銅馬。事去經年運木牛。歎息興亡千載上。荒村野廟愔悠悠。三四承山水言之。五六又承文叔武侯言之。格律一新。

同呂侍御元素過新鄭侍御有妹隨壻在官予兄弟五人天各一方感而賦此

憐余兄弟各西東。一處離情五處同。音問久疎雲樹外。笑言甞接夢魂中。根浮春水漂萍葉。影亂秋風叫雁鴻。今日停驂新鄭道。羨君兄妹樂融融。通首皆感弟兄分散而侍御兄妹相聚只於結處一點作法甚變。

鄂爾泰字毅庵奉天人康熙己卯舉人官至大學士謚文端○文端開藩吳中以古學造士今南邦
選者黎獻集彬彬如也掌輪院時亦以立品董率後進生平不欲以詩自鳴而意格自高鏘治騷
能或先未

聽姜容彈琴

初春多佳日。旭影照高林。曉煙斂木末。暖意浮衣襟。檐前有嘉樹。枝上有鳴禽。道人太古士。幽旨寄瑤琴。
元聲隨指下。和氣散輕陰。無須泛瀛海。已見成連心。聽者各有得。豈必求知音。

贈方望溪

六經治世非土苴。相期津逮闕垠涯。扶經之心不易得。詞林文苑徒紛拏。博物但解辨麤鼠。搜神或詭名
騶牙。心井偪塞航斷港。銀海掉眩生狂花。此曹正坐讀書誤。遺棄根本搜枿芽。桐城望溪我老友。學崇中
正防奇袤。說經鏗鏗究終始。尤於三禮咀其華。曲臺增刪繁就簡。正義參訂蓬扶麻。羣書穿穴尋聖奧。下
簾每聽鼓三撾。方今重輪陛下聖。五緯順序曜帝車。致君堯舜誠有術。許身稷契非矜誇。天地人祀各適
職。往諸秩宗帝女嘉。惟寅惟清恭朝夕。詔兼書局窮羅爬。吾衰舊聞苦荒落。妄冀邃密商量加。間送一難
輒許可。瓊琚乃報投木瓜。姚姒上溯下閩洛。青鏡恐蝕妖蝦蟆。豈邀名譽嗣聖德。寧望荒遠登羲媧。所貴
經學適時用。暇坐矚若翻金鴉。委蛇退食時過我。劇談恆淪頭網茶。脩閒依然兩學士。相視一笑無喧譁。
張蒼伏勝暨轅固。經儒往往臻耆遐。朝廷會行乞言禮。洗爵君且斟流霞。望溪說經簡而能當詩中稱揚無溢分語軒昂磊落音節極高

昭陵石馬歌恭和御製元韻

行天維龍御飛霞。行地維馬周天涯。開張卓立須駕馭。豈獨巡遊西海騰渥洼。千金市駿世希有。美名徒挂涓人口。自來房駟無虛生。六轡乘時應乾九。聖朝啓運戰與農。秉耒調馬彎雕弓。文皇雙馬特超絕。駟騶駟堪齊蹤。艱難馬上得天下。累洽重熙集純嘏。叶至今斲石傍昭陵。始信人間有神馬。雲臺烟閣銘功宗。策勛此馬將毋同。在天之靈憑陟降。嘶隨列缺追豐隆。吾皇鼓車方記里。萬仞塞垣銷壁壘。金鼈長見鞏如山。石馬何由汗如水。留都展禮朝翰屏。鸞旗照影遼河清。待翻樂府歌天馬。佇看馬負圖出龍祥。徵。太宗文皇有神馬二。皆乘之破敵建功者。後斲石像於昭陵。御製作歌文端敬和。

恭和御製永定河元韻

無定河名古。南流自北京。恍疑天上落。不肯地中行。無事智方大。窮源委可并。禹謨原可繼。永永慶功成。不肯地中行。故名無定。師神禹行所無事之知。以治之。則無定者定矣。末句點題。通體俱醒。

謁楊忠愍公祠

司馬分曹日。批鱗再見時。求仁原自主。得死更何辭。十罪彈文在。千秋正氣垂。祇今瞻廟貌。頑懦有餘悲。

九日海天閣

秋氣鬱佳哉。秋鴻歸去來。百年元是客。萬里獨登臺。黃葉寺前雨。茱萸江上杯。海天寥闊際。何處是蓬萊。

贈學使中丞法淵若

已教千莫息鋒鋦。轍遍江南衆所瞻。除卻詩篇何有癖。獨於山水不能廉。瘴烟蠻樹棠陰在。絳帳春風畫戟兼。今日相逢共尊酒。形骸脫略兩無嫌。

滇中回宿易隆詩示送行者

踏雪飛鴻任此身。戟轅回首已前因。從知三萬六千日。半是東西南北人。悵別羣僚紛涕泣。過歸一老念尊親。平蠻坊底休煩思。記取天涯若比鄰。三萬六千對東西南北本老杜尋常七十而變化之彼板對者不能解此

閩中述懷柬同事諸君子

寂靜春闈春意深。模糊老眼怯春陰。四千四百有奇卷。二十二同此心。屏絕丕休求正士。別裁苗軋得元音。三條燭燼前塵夢。坐對奎堂思不禁。丕休說宋楊億事萬軋宋楊劉體

將出都赴滇卻寄吳中王子重吳漪堂夏曉堂徐學人諸老友

尺書裁罷又重拈。細字旁添手自緘。此去滇陽真萬里。夢魂不易到江南。

經略北軍弔戰歿諸將佐

蟲沙猿鶴總堪哀。持節籌邊嘉峪關樓名塞上來。聞道將軍期馬革。幾人真箇裹屍回。可憐無定河邊骨猶是春閩夢裏人爲從軍者

言之此爲將帥言之彌可悲也。議開邊者尙敬而聽之。

張

字超然，福建人。康熙己卯解元，著有無悶堂集。○超然旅寓常熟，久困舉場，發解時其年已老，以老名士終賢於方干身後成名矣。詩格大段疎朗，異於局束如隸下駒者。

下建溪諸灘

無諸拓閩疆，山川賈餘霸。亂石鬪雷霆，終古不可罷。輕航一鳥疾，砰湃千轉下。前舟歛然沒，初見各驚詫。須臾出白浪，迴旋去如射。生命寄柁師，與石爭一罅。在險魂屢飛，過後舌頻咋。造物產湖海，至此窮變化。若匪衆盤渦，閩溪高可瀉。仙霞插霄漢，天險此其亞。所有縱橫徒，一丸每頻借。吾聞天下雄，以德不以詐。閩中如井底，未足供叱咤。安得常治平，絃歌出桑柘。極形諸灘之險，若可憑藉而歸於以德不以詐。煌煌上道，望如舟沒溪中，忽然復出，三入三出，倏達海門矣。驚中前舟歛然沒數語，真工於形容。

開籠行

秦景天自連江籠鷓鴣，寄曹秋岳先生。先生作開籠行，予嗣響焉。

鼇江之山削蒼玉，鼇江之水浮深綠。石榴花發春茫茫，鷓鴣無數啼山麓。一聲兩聲紛如泣，落日銜山聲漸急。其中有客思江南，怪爾曾云行不得。羅入籠中寄遠人，不傷其羽傷其神。深林叢草那可問，卻看燕雀心酸辛。聰明文采古所戒，生人生物同至仁。開籠放入青霄去，還爾悠悠自在身。聰明文采古所戒句，一驚主意。季漢之福生，唐初之四傑，皆以文采累也。鴻飛冥冥，安得不令人羨慕。

題黃山山人墨竹

結體欲密勢欲舒。節圓葉老如草書。吳興已往不可作。此君顧影空扶疎。黃山山人澹於菊。胸有千竿萬竿竹。翛然落筆電與雷。縱橫幻誕何奇哉。墨汁三升酒一斗。颯颯晴空風雨來。蟄虵出鱗劍出匣。天矯老龍卸龍甲。共道一日不可無。頗恨古人無我法。櫛材揮盡世莫知。撐腸拄肚徒爾爲。伯時畫馬入馬腹。但恐山人變竹枝。筆下有兔起鶻落之勢。神宵東坡。

鵲巢爲童子所破

十載風塵客。棲棲旅食難。以予搖落意。羨爾一枝安。力盡嘵嘵語。巢成响响歡。豈期輕薄子。偷眼已相看。病起憐雙鵲。依依向我悲。巢傾寧問卵。身在竟安之。天地饒鷹隼。江湖足鼓鞮。羈棲隨飲啄。且莫怨羣兒。歲暮寄懷故園親友

一年一萬一千里。馬足車輪舴艋舟。自笑此身渾似葉。不知於世復何求。磨牛處處循陳迹。籠鳥依依憶故丘。正是羊城梅放日。瘴雲霾雨獨登樓。何等起法。開寶以後罕見此筆墨。

閩中雜感

奕葉承恩異姓王。繼從宮殿擬汾陽。三年鼙鼓驚天地。當日清簫引鳳皇。藍水一九爭鼠穴。仙霞千騎失羊腸。蓮花峯下荒墳月。慚愧他家白馬郎。清簫引鳳。指聯婚天室言。

還至延平遙望先墓有作

登樓遙望墓門秋。辛苦經年尙劍州。豈有弟兄依隴畝。祇憑風雨護松楸。來從豺虎行邊路。去逐鯨鯢腹裏舟。四十無成還浪迹。雲山何處可回頭。

送沙子羽之日本

壽安山迥敞雲烟。邪馬臺高四面天。縹緲似遊星漢外。依稀直到日輪邊。乘桴昔日傷尼父。蹈海今誰是仲連。見說遺經在茲土。卻將吾道問東偏。相傳徐福求仙不返。挾未焚書時諸經去。故日本國至今猶存也。

魏

坤字禹平。浙江嘉善人。康熙己卯舉人。著有倚晴閣集。○禹平係忠節公後人。少負才名。交滿宇內。而遇合獨艱。詩體研摩宋人。各從所好也。所錄五章。皆才情發越之作。

寄居蟲

人生如瓜牛。長負軀殼累。何況外緣假。妄思得久寄。茲物生海壖。乃具周身智。常共水族遊。愛此一螺翠。延緣遂遷入。宛轉據其內。腥涎吐清波。微風納涼吹。揚鬣遇釣師。觸急輒驚避。兩兩收霜鉗。虛中得靜閤。晏然稱寓公。久亦漸忘僞。如以物附物。是一卽非二。而我辭鄉國。歲歲困旅次。結屋少定蹤。對之發深喟。暇或箋蟲魚。爲汝別種類。狀難狀。取事居然爾雅。末歎息已之無家。隨所感觸。詩人往往有之。

登黃鶴樓

江聲已吞大別口。束之不住復東走。怒濤萬頃天風號。沙岸日斜羅欲吼。一葉翦過烟波灣。登樓憑徧十

二欄忽飛涼雨濺衣濕。白浪高於黃鵠山。山川滿眼來蕭索。吟鬢互垂且孤酌。青蓮畢竟非仙才。崔顥題詩不敢作。醉擬橫將鐵篴吹。歸向仙人借黃鶴。何等自頁。

送少司馬楊以齋先生予告終養歸里次悔餘韻

行詣誰從末俗論。陳情今見袞衣人。喜當海宇銷兵日。許乞林泉將母身。得失不須分出處。去留總是戀君親。馬蹄篤速行何亟。肯待河流泮早春。

慈仁寺有粥孤雁者四明萬季野購畜於庭作羈雁詩邀予賦之

不趁涼雲結陣飛。羈孤似爾欲何依。彌天燿繳雖知避。滿地江湖卻暫違。空守殊鄉驚歲晚。難招舊侶待春歸。臨風無限回翔意。獨立閒庭對落暉。

田橫島

蹈海誰能帝漢高。同時一死等鴻毛。只憐五百忠魂散。不及鷗夷有怒濤。五百人同死。而精靈混沒。殊恨事也。然題須尋出新意。庶免雷同。

汪

釋字東山。江南常熟人。康熙庚辰。賜進士第一人。官翰林院修撰。著有秋影樓詩。○殿撰於臚唱日。馬上得句云。歸計未謀千畝竹。浮生只辦十年官。癸未假歸。未十年卒。知詩識之。早成矣。詩切。嗟於邵陵。然邵陵真而近。但。殿撰則骨秀天成。稟諸性生。友朋莫易。

新草

原上離離草。春來一雨生。寸心燒不死。萬里碧無情。油壁輕輕度。花驄款款行。六朝佳麗地。愁煞夕陽明。

秋砧

萬戶清颺動。疎砧特地哀。杵隨涼葉下。響帶早鴻來。長信秋偏早。漁陽獵未回。無衣應不少。刀尺漫相催。
用意全在一新

梅花樓訪月溪上人

撼屋西風起白蘋。紙窗木榻靜無塵。斜陽影裏看歸鳥。落葉聲中著病身。丈室只容清淨侶。禪門今見讀書人。慚予又作長安客。夢斷山塘二月春。
予方外友樾亭能讀書盈篋樾亭沒而所接皆俗僧矣讀第六語不禁有觸第月溪未知果能讀書否也

望岱

矯首原從萬仞論。千年漢時上公尊。崢嶸直上疑無路。呼吸通天尚有門。獨立巖巖真氣象。滿前疊疊盡兒孫。閒雲莫戀山頭住。四海蒼生正望恩。
此殿撰計偕時望岱而作隱然以第一人自命結意欲霖雨蒼生原非忘世也後假歸不出旋至在忽豈登第時或有徵兆耶

秋柳次韻

短長亭畔暗銷魂。無復絲絲映綠門。千縷冷風餘倦態。滿梢清露尙啼痕。蕭蕭去馬斜陽路。點點歸鴉落葉村。獨立寒潭倍惆悵。婆婆生意不堪論。
頸聯取題之神咏物詩須得此事外遠致

寄庭仙

五年心事共誰論。惜別胥江。日色昏。水底須眉終有相。雪中指爪已無痕。秋風鱸膾江南味。春雨梅花處士魂。畢竟家山貧亦好。知君亦厭孟嘗門。初看似飄仙歸老實則全寫自己襟抱也。玩末句爽然東山之不出已決於此。

首夏同青門雪航以寧允恭叔度讌集秋水閣卽事限韻

憑高風物欲凌秋。門外平湖碧似油。暝色已歸鶉背外。斜陽猶戀柳梢頭。疎疎遠岫屏間畫。點點輕帆鏡裏鷗。不盡蕭條東澗水。至今嗚咽爲誰流。

秦始皇

方丈瀛洲杳莫攀。金銀宮闕湧煙鬟。桃源自是人間世。卻遣童男問海山。總說求仙之妄。卻道來自別。

項羽

一炬咸陽火未殘。楚人真是沐猴冠。英雄豈學書生算。也作還鄉畫錦看。書生見解。一筆掃盡。

老聃天寶中尊爲
玄元皇帝。

仙李蟠根天上栽。玄元皇帝廟崔嵬。神仙不作兒孫計。一任張巡慟哭來。巡慟哭玄元皇帝廟起兵而竟不一救笑唐代附會神仙之妄也。

柳枝詞

一種風流得自持。水村天與好腰支。月殘風曉無窮意。說與桃花揔不知。

田家樂

短籬矮屋板橋西。十畝桑陰接稻畦。滿眼兒孫滿簷日。飯香時節午雞啼。田家至樂。早朝時節。候雞啼者。焉能識此。

張廷玉 字衡臣。江南桐城人。康熙庚辰進士。官至大學士。謚文和。

雜興

月虧方就盈。陽盡斯來復。靜觀天地機。迴旋似輪軸。盛滿易為災。謙沖恆受福。所以賢哲流。秉心若虛谷。名高氣益卑。位顯心彌肅。大智詢芻蕘。殊勛謝輿服。常思重載車。不為再實木。以茲保初終。何憂易傾覆。

吾願讀書人。休同晏子僕。高而不危。親切言之。此公生平持守處。

我聞昔人言。苛政猛如虎。又誦魏風篇。碩鼠況貪取。嗟哉牧民人。煌煌綰珪組。乃以父母稱。而為眾所苦。騶虞有仁心。麟趾中規矩。藹然太和氣。千載如可覩。君子慎所擇。休與毒獸伍。此為墨吏酷吏勗也。有父母稱而不媿父母實者。吾

願真見其人。

飄風不終朝。驟雨不終日。三復老子言。可知立身術。譬彼草木微。春華秋始實。氣候苟不完。蠱爨安可必。寄語功名人。進取休太疾。早榮亦早枯。易得還易失。默識乘除機。處滿須防溢。此戒進取之速。早發還先

也。蒼松

題漁樂圖

秋江渺渺無津涯。江邊漁父船爲家。往返何知路遠近。一帆明月依蘆花。清晨舉網西風裏。網得長魚滿船喜。兒能炊火婦烹鮮。鄰叟還貽新醞美。陸魯望。張志和。朝朝詩思在烟波。吾曹不解工吟詠。醉唱羲皇網罟歌。羲皇網罟歌不傳。元次山補之。漁人能唱。猶謂不解工吟詠耶。

山中暮歸

林端鴉陣橫。烟外樵歌起。疲驢緩緩行。斜陽在溪水。妙在添不得一語。

楊汝覈

字石湖。江南懷寧人。康熙庚辰進士。官至左都御史。

雜詩

神龍蟄深淵。杳冥人莫測。玄豹隱南山。澤膚甘不食。造化本無端。歸藏始生息。氣盛物所尤。名高德之賊。卓哉先民言。士必先器識。

北行偶述

皚皚村樹白。曖曖朝陽昇。瘦馬立猶僵。西風警如箭。飛塵染素衣。嚴霜改顏面。村酒濁如泔。沙土和羹飯。向北物價增。去鄉身命賤。回首故山遙。但見南飛雁。

舟中懷長孫超恆時新任藁城令

汝始分符去。吾纔買棹歸。縱然違祖膝。猶喜近親闈。法立奸胥畏。心清案牘稀。此方經巨浸。軫恤念民依。

聞錢彭源卒於蒼溪詩以哭之

燭暗窗昏夜黯然。驚聞巴蜀訃音傳。一官薄俸蠶叢外。萬里全家鳥道邊。但有清名堪壽世。更無靈藥可延年。傷心堂北孀親老。哭向秋風暮雨天。

陸

師字麟度浙江歸安人康熙庚辰進士官至兗寧道著有玉屏山樵吟

雜感

朝聽衙鼓搥。暮聽樞馬嘶。夜長不成寐。憂來無端倪。老親遲暮景。荒庭守蒿藜。雪髯添幾莖。麥飯進幾匙。白雲天東南。可望不可躋。

入夏苦霪雨。兩河歲少登。吾邦岡阜多。頗以豐稔稱。皇天憐瘠土。長官曾何能。哀彼中澤鴻。嗷嗷號寒冰。子母各翻飛。何鄉可依憑。此任河南新安縣時作

之官真州述懷

昨歸自東垣。結廬屏山住。書史尋夙好。長日儘可度。親亡焉用祿。涕泗誓諸墓。此意愧未堅。又被微名誤。綺羅紛五色。鳴機自織素。縱然遠時趨。努力守故步。

物生號有萬。心性冰炭異。蟬螭吸露華。蜚螻甘穢膩。若使易地謀。卻走兩不嗜。擾擾歧路間。東西各行意。儒者重敬官。市估乃競利。

邗溝自隋唐。昔稱繁庶地。宴享窮珍羞。吉凶踰典制。巷有衣錦人。家無終歲備。權衡奢儉間。張弛有治義。採風美唐魏。古人豈無意。庶幾去其甚。聊洒俗吏愧。至今人第誇揚州富饒。不知樂鹽築幾家外。賢因猶他處也。權衡奢儉而欲去其太甚。卽此見良吏用心。爲士不學道。所得皆支流。爲民不服耕。逐禾非良謀。彼都中聲利。迷罔何當瘳。一髮挽千鈞。力薄知未周。我舌敢辭敵。我行敢告休。力田與孝弟。勗哉景前脩。

雜詠

獨坐空堂中。時隱南郭几。悠然萬慮消。止水清見底。無端一物交。倏爾兩念起。因兩遂生萬。梵紘不可紀。靜定動亦定。烏用著些子。鑑空而衡平。君當會斯理。周子云。主靜立極。不獨靜時當靜。卽萬感雜投時。心中有所主。不亂紛也。詩中所云。豈拘守聲律者所能。

禱雨自効

祝融乘權號令酷。赤日黃埃助炎熇。稗禾枯焦似束薪。潤溪涸竭行成陸。哀哉斯民瓶罍空。婦歎兒號盈白屋。已走羣望薦牲璧。未見天公鞭蟄伏。天降災祲非偶然。毋乃感召由司牧。一官衣食寄閭閻。何忍鞭箠等犬犢。本心未喪戒摧戕。於民無恩僅無毒。黃昏縱謝四知金。白日虛糜五斗粟。我今自分無寸長。官方久矣宜褫逐。安得暘雨時若民無飢。挂冠高隱弁山麓。

騎牛曲

牛背兒童自放歌。頭頭注潤復踰坡。問渠何法牛馴擾。鞭撻無驚芻牧多。牧民之道。盡末一語。

許迎年字毅士江南江都人康熙庚辰進士官中書舍人著有槐墅詩鈔○詩品如靈和楊柳初日芙蓉晚唐中最近溫岐情韻勝也配徐淑則互相辭唱風格略同蘇林比之秦嘉夫婦因並

之及

新竹

乍與僧參玉版禪。旋看解籜裊新烟。斑龍驚蟄多爭地。翠鳳修翎欲上天。烏坐叢枝歌睨睨。月搖虛幌影連娟。此君相對殊瀟灑。不厭秋聲攪夜眠。

萊陽二姜先生祠

黃門高節著萊陽。伯仲風裁在抗章。請劍上方思斬佞。荷戈南國竟投荒。危言足破狐狸膽。浩氣堪增史册光。海湧峯頭祠廟在。谿毛特為薦馨香。風裁。裁字平仄。二音。唐賢並用。

和淑則園居病起作

一病經春瘦可憐。幾時不到曲闌前。花殘幽砌堆紅雪。鶯坐垂楊破綠烟。輕暝未成連日雨。薄寒猶怯晚春天。方池新漲遊魚樂。興寄濠梁秋水篇。

楊守知字次也浙江海鹽人康熙庚辰進士官榆林知府

嘔嘛酒歌

楊花吹雪滿地鋪。杏花一片紅模糊。榆錢簸風風力軟。芳林處處聞啼鴉。青旗斜漾茅屋底。天然好景誰

臨摹我留此地一事無。太平之世爲羈孤。東鄰西舍相招呼。般兄張丈與俱動。釀錢買醉黃公壚。麥缸鵝黃新釀熟。味醇氣郁過醞酬。彭亨翠甌如鶉觚。細管尺五裁霜蘆。低頭吸同渴羌飲。一口欲盡鴛鴦湖。林水名。白波倒捲東海沸。渴虹下注西江枯。碧筩不用彎象鼻。龍頭屢瀉蛟盤珠。須臾餅罄壘亦恥。春意盎盎浮肌膚。劉伶大笑阮籍哭。直欲躍入壺公壺。吾皇聖德蠲逋租。吏胥不擾民歡娛。今年更覺酒味好。百錢一斗應須酤。盲娼醜似東家嫖。琵琶箏阮聲調粗。有時呼來彈一曲。和汝拊缶歌烏烏。青天作幕地爲席。醉倒不用旁人扶。樂哉邊氓生計足。白羊孳乳驢將駒。賣刀買犢勸耕鋤。女無遠嫁男不奴。含哺鼓腹忘帝力。歲歲里社如賜酺。安得龍眠白描手。畫作擊壤堯民圖。風土詩。傳出太平無事景象。乃不徒作。

徐昂發

字大臨。江南崑山人。長洲籍。康熙庚辰進士。官翰林院編修。著有畏壘山人詩集。

雁門關

昨升繫舟山。試望雁門塞。巖業陣雲黑。勢與元岳配。及茲赴谷口。跼步入煙靄。曲曲山根盤。層層蒼壁對。嵐光自摩蕩。巖壑遞明晦。古雪滋陰崖。新泉下奔瀨。猿猱一線路。迥出飛鳥背。側磴上空曲。攀危凌地籟。始知經陟高。足底羣峯會。玄冥操斗柄。制此天北戒。插漢立雄關。蕃畿隔內外。東掠鳳皇城。西極菖蒲海。呼吸萬里通。形勝兵家最。信乃天下蔽。詎惟三晉隘。時清關門開。畊田鑄矛鏃。不見沙土中。箭鏃餘腥在。

過彭蠡湖

水落晴沙高。鶴鳴霜野冷。我來越彭蠡。及此秋光迥。林岫遠參錯。洲澱互陵巨。魚龍氣不驕。鵝鷄散游泳。川塗翫迴轉。欬疾孤帆影。洪流既歸壑。巨藪失溟滓。乃知造化根。終焉返虛靜。沿溯過連圻。蒼然見西嶺。曖曖斜陽中。悠悠動漁艇。異人不可求。松門企清景。天下萬動歸根於靜。不過借湖指出。

漱玉亭

合沓巖厓窄。風雨松顛聲。雙瀑從西來。飛出九疊屏。羣峯忽搖蕩。右界銀河傾。孤亭攬要妙。恍惚光怪呈。天清霹靂鬪。日抱虹蜺生。飛瀑濺積素。上散爲雲英。奔湫澗壑間。萬玉相鏗鏘。遠山已十里。餘響騰空青。惜哉古球石。獨向山中鳴。坡公作以自得勝。此作以矜鍊勝。惟不相襲。故相逼。

鳳尾岡望海

側磴緣秋毫。連巖眩明晦。蹉跎逾積阻。曠望霄宇大。鳳翥振華尾。下視九州隘。我來躡其顛。若涉靈羽背。一身與雲輕。迥出天地外。巒嶺何隱軫。草樹紛映曖。彷彿魚龍沸。萬里滄溟匯。神山恍可掇。灑氣吞南戒。力形容別於觀海也。若出時下才人手。浪費筆墨矣。

觀打魚戲爲鷓鴣歌

鷓鴣鷓鴣巢高木。張口吐雛連五六。睨睨碧眼玻璃明。稜稜長喙鉤鉞曲。野人採網橫覆車。鱗沙兩翻不

得舒鹿角腥涎養馴熟。朱繩繫頸來捕魚。潮波吞天一葉舞。野人指撝若部伍。鷓鴣穿浪疾如風。水面迴篙掉飛鱗。戲鯉游魴驚失次。拏髻磔尾萬魚遊。翻身入水追亡逋。搗鼓船頭助聲勢。大魚鱗脫紅肌摧。小魚半死盈艫堆。鷓鴣鼓翼鳴得意。貪殘嗜殺神所猜。野人捩柁斜陽墜。論針賣魚謀一醉。鮮鱠遙看蒼葉香。輕刀細剝春葱脆。鷓鴣鷓鴣垂頭斂翅上橫木。一寸鱗鬣不入腹。

相見灣詞

自注：在贛州南二十里章江中。

人厭溪灣遲。我愛溪灣遊。三暮三朝見百回。相思那及長相見。

揚州

木鵝沉處錦颿斜。隋氏離宮接暮霞。辱井有魂悲玉樹。仙都無夢餉金蛇。裙纏禹穴千年繭。鏡擁迷樓萬朶花。莫向吳公臺上望。江南江北摠無家。從義山地下若逢陳後主二語而申言之。一加點染遂若別開面目。

淮陰侯釣臺

木落荒原水氣昏。英雄漁釣跡猶存。蒯通不售三分策。漂母長留一飯恩。人歎老臣知國士。天哀女子殺王孫。藏弓烹狗由來事。只合終身淮上村。

城南二首次宋五嘉升韻

漢室曹瞞是獍梟。獠兒年少欲橫挑。刀圍玉帳觴公瑾。花簇珠屏舞大喬。水上神書纔息燄。牀頭明鏡旋

生妖。蟠龍門外牛羊墓。糴麥黏天似雪飄。

此咏吳桓王也。英氣勃勃。千載如生。

東風倚棹木蘭舫。舊事淮張剩野蒿。人弔夕陽花作雨。鳥啼初月水平橋。江陵故老憐蕭銑。隗囂亡國有魂歸。不得驅狼衝海漫。呼號。此咏張士誠也。比以蕭銑。隗囂。恰如分量。

集秀野草堂醉後作

飛揚意氣未磨礪。五岳峻嶒方寸中。草木尙生無患子。男兒那作可憐蟲。逢花酩酊爲愁飲。結柳逶迤歎學窮。至竟文章成底事。莫臨遼海哭秋風。無患子。見本草。古今注。謂此樹可以殺鬼。關疫。即菩提子也。企喻歌辭曰。男兒可憐蟲。出門懷死憂。此種對法。全學秋風客春

夢婆之類。

查嗣琛字德尹。浙江海寧人。康熙庚辰進士。官翰林院侍講。著有查浦詩鈔。

賈太傅祠

陳書痛比秦庭哭。作賦情同楚奏哀。已遣長沙憂不返。如何宣室召空回。身逢明主猶嗟命。天奪中年亦忌才。此日題詩還下拜。也如君弔屈原來。

過白沙嶺寄同年張硯齋

積翠浮空不見峯。羣峯俱擁萬株松。怪來小驛重關路。忽與千巖萬壑逢。丹壁斜飛千尺練。白雲遙送一聲鐘。龍眠居士如相識。畫我山莊第幾重。

徐永宣字學人江南武進人康熙庚辰進士著有茶坪詩稿○茶坪天爵自貴不就
選入詩全得力於東坡王蔣東耘勛極稱道之謂其晚唐風韻各有會心也

潤州

江山誰第一最是潤州城。山上南朝寺。江頭北府兵。三春添黛色。萬古一濤聲。閱盡東西客。勞勞役利名。
舟行卽事用香山韻

秋深酷愛水雲空。興到五湖東復東。船泊荻花全白處。酒沽楓葉半紅中。貴人翁仲蘊荒草。浮世賓鴻逐
斷蓬。何似素心晨夕共。詩籤茗椀得相同。三四語令讀畫卷中每有之予泊船時往往遇此而不能言彌用自娛

竹垞先生留宿楓橋慧慶寺夜話追悼陸文孫自注陸與先生同里善音律流寓常州卒於粵東

朔風號怒紙窗前。憶舊僧房感逝川。鄉曲公憐楊狗監。天涯吾悼李龜年。雪深院落妻無絮。葉擁階除突
少煙。此夜楓青燈黑影。鼓寒霜重不成眠。通體意在文孫故於竹垞從略第三語傷竹垞之淺落下俱言文孫之賢而沒也結意黯然傷神

宋建中靖國辛巳七月二十八日爲東坡先生騎箕之辰先生乞居常州卒於孫氏寓館其地去
余家不數十武舊蹟猶存歲值辛巳去先生六百年矣感今追昔邀同學諸子於是日肇祀先
生用眉山二字成詩二章致敬恭思慕之意云

鍛羽難遷月下枝。文殊問疾倍支離。夢縈竹屋風前樹。心繞觚稜雨後葵。已分孤臣傷骨鯁。可禁衆女嫉
蛾眉。憐才只有宣仁語。千載追尋五夜悲。東坡先生生平轍軻惟宣仁太后能知其才并諒其忠愛宣仁祖落東坡連竄以至於死矣此詩特爲表出

白雲深處碧波環。詩識無端落此間。回首古橋衰柳斷。傷心小院野花殷。魂歸月黑疑僂耳。鶻沒天低憶故山。直接岷江溪水是。瓣香裊裊淚潺潺。六百年後辛巳。此意亦宜一見。

秋日訪朱錫鬯先生

沈尤村僻絕塵寰。千个篔簿水一灣。學道著書無箇事。滿庭黃葉對秋山。先生清節一語。寫景中傳出。令讀者如或遇之。此種微妙。難為

外人道也。

蔡

堡字甘泉。江南江寧人。康熙庚辰進士。官甌寧知縣。

蠓磯孫夫人廟

魂傷巴蜀雪消時。歲歲東風哭子規。近水芳春花易落。沉沙終古石難移。悲銜白帝生睽隔。恨切蒼梧死別離。環珮不歸清夜杳。月明無主照荒祠。如此英女。而所遭不辰。家國兩有遺恨。視乃兄之降曹。真可媿也。漁洋斷句後。應推是篇。

送卓子任之大梁

中原天接大河長。駐馬夷門又夕陽。客路半生心似雪。風人未老鬢先霜。屠沽事業傳公子。詞賦聲名重孝王。此去梁園千里外。不因懷古自悲涼。

陳沂震

字起雷。江南吳江人。康熙庚辰進士。官給事中。

雲安

水折山紆路欲窮。何曾破浪駕長風。高峯猿嘯重雲裏。絕壑舟行亂石中。宦迹羈愁川上下。詩翁遺事漲西東。雲安麴米今何有。寂寞誰憐酒盞空。此川中作令時詩。下一首同。

巴東

征人日夜逐征鴻。乍過川中入楚中。版籍已知邦國異。人民仍覺語音同。五年三峽風波路。萬里孤舟老病翁。誰信書生遇天幸。平安八口出巴東。

白雪樓

自古衣冠笑楚優。文章聲價付悠悠。人間豈解陽春曲。此地猶存白雪樓。山色千尋常聳翠。泉源萬斛自飛流。乾坤清氣依然在。更向何人筆底收。甲李滄溟見後世有攻伐之無繼續之者。連下首皆學使時詩。

試院卽事

畫戟森嚴晝漏遲。凝香燕寢日斜時。柝聲繞院人聲寂。滿宿春蠶正吐絲。

途中

白雲如絮擁蒼山。膚寸能彌六合間。卻怪紛紛頻出岫。不曾行雨竟空還。

許

涓字凌洲浙江嘉善人康熙庚辰進士官湖南石門知縣○此予座主竹君師考也勤卹荒政民受其賜石門至今俎豆之

雙溪坪勘災

策蹇來投止。荒廬繞棘叢。看人惟野蔬。撼壁有狂風。疢鬼村村聚。牂羊戶戶同。救災長吏職。無術起哀鴻。
寫災荒景象如繪。結意自道無術。藹然仁者之言。

費洪學 字巽來。江南吳江人。康熙庚辰進士。官博野知縣。

登滕王閣

岩嶠傑構勢凌空。憑眺山川氣象雄。彭蠡潮聲轉天外。豫章山色落杯中。才人逸唱秋烟渺。帝子遺墟夕照紅。一閣堪憐幾興廢。江頭爲問釣魚翁。

劉師恕 字秘書。江南寶應人。康熙庚辰進士。官至直隸總督。

護花

花開笑春風。卻被風吹落。自無堅貞性。但怨風輕薄。賴有護花幡。衆芳得所託。恐此亦偶然。莫便矜灼灼。
見乘性貴貞。不藉擁護也。

臥龍岡武侯祠

祠堂舊是栖遲地。門外曾停三顧車。自信君臣並魚水。不教莘渭擅耕漁。大星墮地終炎祚。古柏參天傍草廬。魏殿吳宮俱泯滅。荒岡猶峙劫灰餘。
從杜詩化出。而泯其痕。

卷二十

秦文超

字偉士，湖南長沙人，康熙壬午舉人，著有漁村詩集。

過漂母祠

清淮水漲岸添痕，望裏長隄古廟存。一飯偶然憐餓者，千金何必重王孫。母能忘報真高誼，漢不酬功實寡恩。我亦江湖垂釣客，經過聊爲薦芳蓀。

黃

任，字莘田，福建永福人，康熙壬午舉人，官四會知縣。

暑雨後坐月

雨洗月逾潔，氣寒光轉幽。露螢不自夜，風樹已先秋。烹茗籟遙起，拂琴泉暗流。清宵形對影，身世兩虛舟。

讀楚辭作

無端哀怨入秋多，讀罷離騷喚奈何。明月竹枝湘浦夕，西風木落洞庭波。美人環珮惟蘭杜，公子衣裳在芰荷。千古靈均有高弟，江潭能唱大招歌。

題畫

桃花灼灼水潺潺，隔斷千山與萬山。生怕漁郎漏消息，不流一片到人間。

西湖雜書

珍重遊人入畫圖。亭臺繡錯似茵鋪。宋家萬里中原土。換得錢塘十頃湖。即胡澹菴所云小朝廷意。高宗不復父讐。隱然晉下。

珠襦玉匣出昭陵。杜宇斜陽不可聽。千樹桃花萬條柳。六橋無地種冬青。感楊建真伽發六陵事。西湖詩。流連光景者多。此較有關係。

彭城道中

天子依然歸故鄉。大風歌罷轉蒼茫。當時何不憐功狗。留取韓彭守四方。泗上亭長。何詞以答。

陳睿思字匡九。江南長洲人。康熙壬午舉人。○予前結葑南詩課。招匡九入。每詩成。乘人屈服。謂文。惜。莊公有後。茲選中三朝要典。丁將軍故劍二篇。皆課題也。才命相妨。中道租謝。士林咸為惋惜。

贈張永夫

盧仝家貧無長物。一婢一奴屋數間。先生之貧異於是。破竈頽墮寒無烟。途窮厭見俗眼白。餓死不食嗟來食。驕兒不襪脚凍皴。老妻無食面黧黑。一間茅屋四壁空。雨淋日炙號長風。蠨蛸入戶蒼鼠立。夜寒僵臥牛衣中。屯蹶否塞貧且病。憂思感憤明其衷。險語突兀泣神鬼。奇氣磊落撐蒼穹。豪家婢僕何昌丰。睚眦笑老秃翁。白日晦昧吾道窮。此輩何足填心胸。喘月之牛負塗豕。紛紛輕薄應如此。君不見季次原憲留清名。斯人今日常不死。極形其窮。而以險語奇氣表。其必傳。永夫可慰於地下。

觀丁將軍故劍

丁公小永孫子棊。崎嶇歷落非庸人。興酣對客拔劍舞。飛電睽睽風軒軒。坐客觀者喜且愕。丁生材武超人羣。生云小子何足算。公等未見先將軍。將軍自少性敢決。翹關負米空千鈞。生平武事略可數。鈎戟劍稍刀槍。就中劍舞尤第一。上馬下馬皆如神。白猿遁逃不敢進。青龍髣髴纏其身。余聞自恨生已晚。不得身與將軍親。將軍更有遺事否。余爲傾耳君具陳。生云昔時有草竊。嘯聚海島如雲屯。醜人之骨食人肉。元戎束手徒逡巡。吾祖仗劍往殺賊。髑髏帶血梟轅門。賊中豈少強健者。直前捕斬猶狐狫。後來賊平受上賞。皆由一劍成功勛。只今吾祖已沒世。英風猛氣猶生存。此劍時時吐光怪。匣裏龍嘯清宵聞。同人拔鞘決眼覷。殷紅戰血痕疑新。昔聞隴西世受射。將軍之後應生君。君今好文不好武。性嗜奇古師皇墳。自言今者特偶耳。兒戲恐使他人噴。勸君只合繩祖武。毋徒健筆扛龍文。古來武人畫麟閣。文士老死荒江濱。君不見賤子學書不學劍。途窮慟哭空酸辛。只寫入先將軍一語。便已出衆。以下聲勢縱送。無不如古。必時露奇警句。乃不薄弱。篇中髑髏帶血梟轅。門。殷紅戰血痕疑新。皆奇警句也。得此通篇振起。

王式丹

字方若。江南寶應人。康熙癸未。賜進士第。官翰林院修撰。著有樓村集。

蕭尺木凌歊臺圖

高堂素壁雲氣生。莽蒼一嶺秋山明。矗空巖紫勢千丈。飛流樹頂如聞聲。借問此景從何得。凌歊臺畔青嵒嶙。大江東去抱姑孰。天門竦立牛渚橫。崇臺拔地接星絡。湘雲巴雪相逢迎。寄奴賣屨作天子。目營八

極憑江城。燕秦電掃自豪喜。三千歌舞隨霓旌。至今英雄久灰滅。漠然山高而水清。鍾山有客癖樵枋。坐
揮墨藩升斗傾。不爲永初繪巡幸。臥遊自欲酬生平。橋頭策杖者誰子。幅巾瀟灑攜秋英。毋乃義熙老處
士。獨依松菊歌閒情。謝宅已荒桓井廢。斷碑苔蝕留空名。何當野立下幽聽。慈姥夜裏琅玕鳴。我來讀畫
三歎息。萬年之計徒屏營。涼宵對此且痛飲。西風颯颯燈燐燐。

睢陽廟二首

曾披唐史遺傳烈。百戰孤城蹟不磨。犄角力堪殲寇盜。殞身功已障山河。名先李郭懸青簡。血並南雷染
碧莎。此日楹間修一拜。陣雲邊月想悲歌。睢陽一城若非張許死守則睢陽早破而江淮力不支矣使李

識之

繡幔煙沉鐵面寒。衝冠餘怒尙桓桓。戴天定不借阿榮。斫地還應滅賀蘭。自注鐵鑄賀蘭進明跪階下爲觀者捶擊止存半軀萬古
歲時尊俎豆。九幽靈爽託筵簞。卽今燈火傾城市。彩繪旌旗徹夜看。

于忠肅公墓

自拚熱血灑高穹。隻手扶天日月中。帝位安危操上策。外藩影響戮孤忠。苔封石馬三春雨。烟暝巢烏萬
木風。相望鄂王精爽在。靈旗蕭颯暮山空。咏古貴于簡要土木雜門二語中俱已寫盡見作者鍛鍊之功

南中書事

禹甸埴墳殊廣大。蠻方節鉞漫紛紜。欲披角鯉池邊草。旋攪都鵝洞裏雲。孔僅算縉原始禍。盧循入海豈能軍。詔書一紙烽煙靜。重見侏離拜聖君。

蔣廷錫

字揚孫。江南常熟人。康熙癸未進士。官至大學士。謚文肅。著有青桐軒秋風片雲諸集。

續古詩

松蘿良有托。葛蔓亦有依。丘中一貧士。四海無所歸。日飲澗中水。朝採山上薇。天寒水結冰。年深薇漸稀。浩吟悲哉行。君子其庶幾。遊魚躍池樂。苑馬騰櫪肥。豈知鴻鵠志。不逐燕雀飛。

題小顛墨竹

畫竹不如真竹真。枝葉易似難得神。風晴雨露皆有意。子瞻與可無其人。去歲關地栽新竹。枝葉離披覆茅屋。竹梢枯勁竿清瘦。久久可以醫吾俗。昨夜雨過月上時。壁上掩映青青枝。張子對之無一語。淋漓潑墨發異思。淡煙輕霧筆底生。枝枝盡帶風雨聲。移向乾明寺中挂。壁石好撰張顛名。

表忠觀

流離五季徧干戈。草竊英雄奇遇多。一角國分唐土地。百年廟共宋山河。凌烟閣上功臣像。衣錦營中駟馬歌。爲問販鹽爲盜日。仲謀曾許較如何。頌聯已舉其大。

看梅

橫列春山翠帳開。幾株相映白皚皚。輕烟未散月未上。放鶴亭邊雪欲來。高格

張自超字彞歎江南高淳人康熙癸未進士○彞歎己非用世人不就選調生平達於經學詩亦從經學中出

詠懷

阮生何鄙固。往往泣途窮。途豈有窮時。毋乃太熱中。學道無獨識。舉足迷西東。太虛亦寥闊。顧弗容其躬。能貴不能賤。遂爲物所攻。時論于儒者。謂貧爲素風。搖落感剩蒂。飄漾如飛蓬。願爲達觀者。與世開鴻濛。途豈有窮時。喚醒急躁人多少。貧賤能移之人。即富貴能淫之人也。達觀者尙未足以知之。

秋懷

大道自坦夷。于中生荆棘。廓清有古人。所貴無遺力。堯舜至今存。孔孟教不熄。世運或遷移。日月亦食昃。邈非聖賢心。剝猶天地德。霜風洗長林。羣木涵新色。廓清異端。正以章明聖教。堯舜至今存。由孔孟之教不熄也。誰謂詩不足以載道耶。

桑

老桑古怪大成圍。秋風落葉著地飛。腹空皮裂榦拳曲。霜雪歷盡生意微。左邊柔條猶自好。解向東方弄晴暉。我生骨瘦常苦寒。繭絲賴汝成冬衣。願汝百年不戕賊。春日三眠蠶可食。即作者自狀其平生

掃塵行

掃塵練日臘三七。細竹長竿風捲疾。歲歲荒村守敝廬。家家淨掃迎新吉。掃遍瓦椽及四圍。甌中之塵凝不飛。朝來坐曝茅簷下。垢面相逢仍苦飢。甌中生塵舊語也。加凝不飛三字。便覺質況可掬。即此想見。舉歎清風。

何

焯字吧瞻。江南長洲人。康熙癸未特賜進士。官翰林院庶吉士。卒後。賜侍講學士。

同友過堯峯。免水禪院訪過庵長老。

道人種松罷。免水開禪關。微塵吹不到。白雲相與閒。偶尋林外約。引我過前山。倚杖看奇石。徘徊殊未還。
送友之長沙

憐君獨向此江潯。把手河橋淚不禁。匹馬西風千里別。一盃濁酒百年心。雲開湘水橫孤鴈。日落荆門起暮砧。舊是賈生遷謫地。可應弔古動哀吟。

吳廷楨

字山掄。江南長洲人。康熙癸未特賜進士。官翰林院學士。著有南村詩。

試兒行爲天標令子賦

璇源照夜凝冰壺。老蚌就掌生明珠。翠眉玉頰瞳點漆。人間又見徐卿雛。去年湯餅會衆客。鬱葱佳氣方充闕。走邀溫嶠辨英物。耳畔髣髴聞啼呼。今來周晬露頭角。矯矯自與羣兒殊。豪鷹削朮毛骨異。敢以凡鳥題門樞。雲屏翠幙好遮護。抱持保姆顏敷腴。圖史百物羅左右。滿堂坐展紅氍毹。排窗穴壁競覘轡。親戚笑問兒何須。徑前握管隨手抹。似尋字畫摹之無。諸餘玩好不挂眼。豈羨取印提戈戈。迺翁雅素耽詞

翰吮毫。砥墨勤。咿唔。兒生墮地有同嗜。端能讀父盈車書。草牘方當等曼倩。臨書且爲留官奴。幾人有兒得寧馨。萬金之產良非誣。我歸責子坐歎息。提孩便已趨殊塗。朋來雖有四男子。森如立竹僵墻隅。嬾惰搥不好紙筆。召令吐記常含糊。正應坐我老伏櫪。顧後駒齒皆頑鶩。韓子不免簡教示。陶公終是分賢愚。詩成聊復使之寫。得不媿汗沾肌膚。生兒當如李亞子。爾曹碌碌何爲乎。逐層引出。正如春蠶吐絲。七古所必用也。此以撇爲用。便不覺其陳陳。

石田畫廬山高

石田老人筆有神。匡廬面目爲寫真。瑩确高峯駢駝臥。蜿蜒懸瀑蛟龍蹲。更叱巨靈連神斧。削出坡陀似懸乳。哀猿下飲難攀條。寒鳥歸飛愁墮羽。萬古盤渦轉輪轂。三疊水簾珠萬斛。遊人總向畫圖看。依稀認得康王谷。何年來遊支短筇。筇輿芒屨相過從。會當洗耳萬山頂。高揖五老看鱸峯。

觀潮

閭闔長風吹海立。馮夷怒挾天吳入。層層駕浪薄秋旻。涼波如沸魚龍泣。海門匹練遙飛來。龕山赭山青。崔嵬罔象橫。衝兩崖束。巨靈直壁中流開。劃然分奔吼餘怒。霆擊雷轟碎天鼓。日車傾昃羲和愁。疾掩陽烏避吞吐。是日陰晦。倏忽奔騰萬馬奔。鷗夷蹴踏來窈冥。雪山摧翻鼇脊瘦。冰柱迸裂蛟涎腥。俄聞春岸喧雲碓。旋見跳波散珠珮。驚濤蕩瀟天低昂。亂石匄訇山破碎。潮頭一落百丈強。迎潮之子凌蒼茫。千桅乍隱

鷗起沒。一葉忽浮鳧拍張。目精眩轉毛灑浙。我生江鄉惜未識。吁嗟向若郵然驚。倒瀉長江盪胸臆。水犀強弩千雕翎。欲尋斷鏃揚遺靈。釣臺西峙灘漲急。海天溟洞孤煙青。此詠廣陵潮也。一路排山倒海而來。末幅烟波無際。蓋潮至富陽而怒平矣。

天妃牘

斷堰鎖崔嵬。奔流下石隈。勢吞淮甸盡。聲撼海門開。水氣晴吹雨。天風夕送雷。扣舷驚險絕。誰是濟川才。

淮浦夏日雜感

濁浪南奔萬馬雄。清淮如線失春容。天連碧海盤霜鶴。水拍金隄轉雪龍。四載禹功今未遠。一丸蟻穴古難封。杞憂卻怕天饒笑。且與平治磊塊胸。

曉望華嶽

曙爽西來嶽勢尊。削成天外射初暎。寒松翠滴仙人掌。晴雪光浮玉女盆。氣肅金晶橫地軸。路尋箭筈倚雲根。懸知絕頂通呼吸。直吹排空謁帝閭。

函谷關

九泥塞險恃崇墉。表裏山河百二重。城晚角聲通晉塞。關寒樹色鎖秦封。驚心逋客聽雞度。矯首真人跨犢逢。西去嶽蓮迎面起。雲開立馬許從容。連前一篇。雄整稱題。猶見王李遺格。

吳瞻淇字漪堂江南歙縣人。康熙癸未進士。官翰林院庶吉士。○

發富陽夜次嚴瀨

忽見桐江樹。回頭失富春。中天一片月。千古兩高人。自注嚴子陵祠對謝阜羽墓世亂宜晞髮。時平亦潔身。清風迎客棹。欲為滌征塵。五六語分承阜羽子陵潔身每在危亂之邦時平潔身前惟巢許後惟子陵也語不刻削而自切

三答家兄

留滯周南客。相思春草餘。夢來乘夜月。詩好代家書。父有千秋業。兒慙兩地居。何時耦耕罷。商略注蟲魚。

章藻功字豈績浙江錢塘人康熙癸未進士

晚遊西湖

雲漏晴光一縷斜。紛紛歸逐七香車。山中影散樵薪客。隄外帘收賣酒家。乍捲村烟橫遠岫。暗移篝火點平沙。可容爛醉湖頭宿。夢轉三更玩物華。通體不脫一晚字

查慎行字夏重浙江海寧人康熙癸未進士。官翰林院編修。著有敬業堂集。○施注蘇詩。行世久矣。蘊藉謙之。然視外強中乾。襲面目而失神理者。固執得而孰失也。惟學之者。勿更揚其波斯為善學者耳。

秋感

渡淮橋成枳。一變性終失。不聞返故土。枳又化為橘。人生百年中。孰是保初質。就衰水赴壑。駐景戈挽日。

幾見白頭翁。鬢霜復如漆。見變善爲惡不能復返爲善即未有小人而仁者意所以防失足也。下又推廣言之。○若果於迴車仍可返跡爲舜此又當活看。

開口觀罾魚者

插河一線才如溝。戢戢魚聚針千頭。其中巨者長二寸。領隊已足稱豪酋。爾生亦覺太局促。漂漚散沫沉復浮。不知世有海江闊。長養何異蒙拘囚。居民活計乃在此。勞不撒網逸不鈎。竹竿綳罾密作眼。駕以一葉無篷舟。朝來暮去尋丈內。細細黏取銀花稠。庖廚卻緣瑣碎棄。曝向風日乾初收。微鯉但供飼狸用。性命肯爲纖毫留。吾聞王政雖無澤梁禁。鯤鱸尙有滄池遊。人窮微物必盡取。此事隱繫蒼生憂。一錢亦徵入市稅。末世往往多窮搜。

王文成紀功碑

明朝制科號得士。吾鄉前輩尤絕倫。于公王公後先出。往往艱大投其身。朝廷坐收養士報。倉卒定變皆儒臣。正德己卯夏六月。逆濠犯順江湖濱。公然舉兵思向闕。三郡一閩生祆塵。皖口駸駸勢將下。留都岌岌恐震鄰。是時海宇正清晏。武備缺略久不振。公方持節撫南贛。似可觀變徐遄迤。同讐大義憤所切。守土敢限越與秦。出師必待九重詔。是謂以賊遣君親。飛書插羽聲罪討。攻所不備真如神。自從擣巢及執醜。通計時日纔兼旬。軍門戎首已面縛。天子鞅韉方南巡。石頭城南獻誠罷。待命行及明年春。周公東征尙跋蹶。形跡詎可拘忠純。盈廷宵小古亦有。忌者愈衆節愈伸。初心祇期濟國事。豈必畫像圖麒麟。茲山

勒銘蓋有故。深刻歲月題庚辰。紀功非夸乃紀實。書法逾勁辭溫醇。首從伐叛敍始末。繼舉神武歸丹宸。天方嘉靖我邦國。誰其紀者臣守仁。隨征官屬例得列。惜哉名姓今俱湮。讀書臺傍一片石。百四十字磨崖新。逸事吾聞長老說。弘治一榜凡三人。後來立朝適共事。數本前定非無因。胡發其姦孫殉難。公乃一手回千鈞。自注弘治五年吾浙鄉榜公與胡公世寧孫公懋同舉其年場中見三巨人煌煌助業本德性傳爲異事及宸濠之變胡首發其姦孫以巡撫死難三人共此事亦一奇也出遇世會開經綸。質語百世可無惑。似此理學寧非真。後來輕薄好詆毀。撼樹不過欺愚民。如公表見猶未免。此外何以加冠巾。手磨碑碣發長嘯。白日皎皎懸秋旻。就禽宸濠始末詳言之表出一榜三異人事見事屬前定非偶然也末以紛紜詆毀比之蚍蜉撼樹用以問執小儒之口。

中秋夜洞庭湖對月

長風驅雲幾千里。雲氣蓬蓬天冒水。風收雲散波忽平。倒轉青天作湖底。初看落日沉波紅。素月欲升天斂容。舟人回首盡東望。吞吐故在馮夷宮。須臾忽自波心上。鏡面橫開十餘丈。月光射水水射天。一派空明互迴盪。此時驪龍潛已深。目眩不敢銜珠吟。巨魚無知作騰蹕。鱗甲閃爍翻黃金。人間此境知難必。快意翻從偶然得。遙聞漁父唱歌來。始覺中秋是今夕。

高斯億爲余畫竹以詩報之

畫竹原從草書出。眼中孰是張芝筆。高生善書久絕倫。餘技兼爲竹寫真。自言亦用狂草法。頗覺游戲能

通神無諸城中少修竹。客舍連旬苦炎毒。賴君妙手補化工。爲我一揮終十幅。幅終擲筆風雨來。野人疎爽心顏開。須臾雨止墨光濕。潤入紙背生蒼苔。老龍蛻骨瘦幅強。翠鳳掉尾紛毳毳。魄雄氣大腕力壯。盡掃篠蕩皆凡材。忽然幻作鐵鈎鎖。自注江西南李圭作竹自根至梢極小者一一鈎勒成謂之鐵鈎鎖自云惟柳公權有此筆法世有誠懸應識我。渭川千畝胸鬱蟠。放縱精微無不可。文湖州脈繼者難。後來獨推王孟端。人間多畫風中柳。自注東坡題文與蚰筆畫作風中柳珍重蕭郎十五竿。前後以草書作關鎖章法不懈

與顧梁汾舍人次閣學韓公韻

不是微之定牧之。紫薇亭擅舍人辭。十年未就歸田賦。衆口猶傳赴洛詩。往事相關碁已散。秋風纔到鬢先知。怪來東閣留賓地。難遣深情是酒卮。

景州董子祠

西風殘照廣川城。董相祠邊感慨生。官秩稍增秦博士。文章獨闢漢西京。醇儒豈以科名重。英主無如經術輕。卻笑武皇親制策。牧羊牧豕盡公卿。牧豕牧羊。卽羈羊頭。羈下養之先聲也。轉自崇經術者開之。故奇。○牧豕猶僞經術。此因牧羊而連及之。

度仙霞關題天雨菴壁

虎嘯猿啼萬壑哀。北風吹雨過山來。人從井底盤旋上。天向關門豁達開。地險昔曾資劇賊。時平誰敢說雄才。煎茶好領閒僧意。知是芒屨到幾回。

黔陽雜詩

玉斧銅標界有無。苜蘭城外亟儲胥。田橫客已辭窮島。樂毅功難敵謗書。官濫羊頭爭獻鏡。謀新鼠穴可乘車。英雄穉子論誰是。廣武登臨歎有餘。

送陸蓬叟之井陘

不道西遊爾許難。萬峯高下渡桑乾。亂鴉雪緊荒城暮。叢雁天低斷角寒。燕市莫尋當日伴。并州且作故鄉看。到時尺素煩馳寄。及與梅花報歲闌。

擬玉泉山大閱二十韻

地關丹稜泝。天開裂帛湖。連岡環北極。列曜拱中樞。鞬驛銷氛氣。風雲蓄睿謨。不忘神武略。獨握帝王符。吉日將差馬。先期已祭軀。桓桓齊步伐。肅肅選車徒。野曠金鉦轉。沙平玉帳鋪。一人躬靺鞨。九校勇馳驅。鵝鶴知兵法。龍蛇入陣圖。雪光明組練。寒律勁雕弧。憶昨三犁候。親征萬里逾。行間走英衛。麾下拔孫吳。撻伐聲靈在。韜鈴將相俱。詩人賡虎拜。士氣動山呼。振旅時方暇。回鑾日未晡。殊威宣遜土。同軌坦經涂。典禮因時舉。機槍掃跡無。武功雖再續。文德久覃敷。用邊昭無外。周防戒不虞。煌煌太平業。磐石鞏皇都。

敘明大閱下將萬里三犁振起頓覺神骨俱適作長律解得此法自無平直之患

登蕪湖浮圖

落帽家山記幾巡。弟兄南北各傷神。茱萸明日重陽酒。五處登高各一人。自注。時家次谷在粵。荆州在燕。德尹在黔。惟韶荒家居。故云。

曹操疑塚

分香賣履獨傷神。歌吹聲中總帳陳。到底不知埋骨地。卻教臺上望何人。或云。發盡七十二塚。或云。埋骨。更在七十二塚之外。奸雄心事。

未易窺測也。此卽以望西陵。語調笑之。曹瞞應亦齒冷。

題蔡方麓修撰早朝圖

水晶簾捲月如鈎。侍史妝成盡下樓。比似早朝還較早。不教君起看梳頭。

陳至言

字青厓。浙江蕭山人。康熙癸未進士。著有青苑堂集。

春遊同吳六應辰張四星陳金大以賓韓十三渙文暨家魏公兄登摩烏山蘭若醉中慈上人索

賦

湖光如練山如拳。青天倒削波心蓮。何年飛下小蓬島。驅山不用秦王鞭。山前山後桃花路。不上湖船那能渡。滿船載得踏春人。荇帶荷錢春欲暮。茅庵誰結山之阿。青竹江籬古薜蘿。徑穿曲磴飛紅雨。門對平湖捲白波。白波捲不開。紅雨飛不定。湖風忽起亂鴉啼。白雲流水瀉成鏡。座中韓生忽大叫。對花無酒花亦笑。阿菱十二能操舟。隔湖買得射洪到。射洪春酒醉百壺。壁上新詩值一掃。慈山山人知不知。人生行樂須及時。自注。白香山歌童名阿菱。

北平送友人南歸

哀角嚴城起，悲秋淚滿衣。如何遊子恨，偏自送人歸。霜落孤鞍急，天高獨雁飛。賞心零落盡，朋舊日應稀。

白杜鵑花

蜀魄何因冷不飛，空山一片影霏微。那須帶血依芳樹，自可梳翎弄雪衣。細雨春波愁素女，輕風明月泣湘妃。江南寒食催花候，腸斷無聲莫喚歸。

詠白丁香花

幾樹瑤花小院東，分明素女傍簾櫳。冷垂串串玲瓏雪，香送絲絲麝馥風。穩稱輕奩勻粉後，細添薄鬢洗妝中。最憐千結朝來坼，十二闌干玉一叢。

喻成龍

字武功，奉天人。官至刑部侍郎。著有塞上集。○嘗有句云：丈夫既捐軀，豈能依骨肉。又云：立馬望黃河。天育塞雲紫，頗學少陵。

聞笛

夢裏悠揚橫笛聲，高天露下共淒清。愁來江漢人何處，望裏關山月倍明。萬里孤雲隨絕漠，十年羸馬更長征。誰知一曲終宵怨，霜雪無端兩鬢生。

曹寅

字子清，奉天人。官江寧織造，著有棟亭詩稿。

歲暮遠爲客

曉鏡寒無光。驅馬別親故。殘月墮楓林。荒煙白山路。十年遊子懷。惜此歲華暮。載詠無衣詩。何以蒙霜露。
起手十字。寫盡辭家之苦。可與別賦並讀。

讀洪昉思稗畦行卷感贈一首兼寄趙秋谷宮贊

惆悵江關白髮生。斷雲零雁各淒清。稱心歲月荒唐過。垂老文章憂患成。禮法世難拘阮籍。窮愁天欲厚
虞卿。縱橫掉闔人間世。只此能消萬古情。

揆

敍字愷功。蒲洲人。官至都御史。

鷹坊歌

西郊天濶沙茫茫。高槐古柳溪風涼。地偏寂寞少人住。但作甌脫供鷹坊。中有海青最神俊。竦立毛骨森
昂藏。金眸玉爪異凡品。下視狡兔如跛牂。側眼似覺天地窄。常思一舉摩穹蒼。憶昔遼代最珍貴。女直貢
獻交相望。搜求無厭旋致禍。兩國轉眼悲興亡。至今黑水留異種。雕籠競致來遐方。五陵年少頗好事。愛
玩豈惜千金償。嗟汝生性特趨捷。隼鷃未許隨肩行。長繚羈縶豈初意。歲月浸久成馴良。關山秋暮盛羽
獵。商飆倒捲塵沙狂。翻身向空入霄漢。快若駿馬初脫韁。駕鵝潛飛雖難避。雲羅萬里無遮防。老拳勁翮
奮搏擊。風毛雨血齊飛揚。天生羽族亦有命。飢雀叫噪悲空倉。林邊野鶴骨立瘦。度腹僅得分餘糧。爾形
雛雛亦安用。終朝肉食恆充腸。人間生計總媿汝。翻笑溪獺銜魚忙。侏儒方朔異飢飽。萬物榮悴真何常。

況今飛啄本同類。強弱吞啖堪嗟傷。食餒原不乏魚鮪。捕蟬亦復驚螳螂。何當忘機效海客。驅逐猛擊延奇祥。羣飛衆動各適所。丹山鸞鳳常遊翔。桐花搖落期不至。老鴉攫肉紛路旁。且隨韓嫣逐金彈。排風毛質看騰驤。

議論正大。不及唐東江作。而筆力亦自矯健。

鈕

琇字玉樵。江南吳江人。官邑宰。著有臨野堂集。○玉樵博雅多聞。著賦一書。能舉見聞異詞者。折衷之。可以補正史之闕。詩亦變風之遺。

春草

不信繁華事已空。傷心南浦復濛濛。何年陵寢斜陽外。幾處亭臺暮靄中。歷亂影連流水碧。萋迷香襯落花紅。多情陌上雙蝴蝶。猶是飛飛失故叢。

題方石居贈忍公用吳媿菴先生韻

方庭修竹綠如圍。琴榻書牀識靜機。紫朮夜春供客飯。白雲秋製入山衣。落花逕曲呼童掃。斜日林空放鶴歸。最喜遠公寬酒戒。虎溪乘月叩禪扉。

于養志

字涵一。奉天人。官四川巡撫。著有讀易草。四征集。

不寐

秋風吹白帝。枕上落江聲。小苑煙光薄。疎簾月影清。三更羈客夢。萬里故鄉情。漸聽荒雞動。驅車按部行。

起手杜陵家數

管 掄 字青村。江南武進人。官師。掄宗州知州。著有吹萬集。

匡廬歌

平明迎日上廬嶽。春山滌翠清如濯。攀蘿直上三萬級。側身蟠走如飛鶴。雲鱗鱗。花冥冥。劃然巨靈劈千丈。瀉出萬派洪濤聲。耳目蕩漾不能主。恍如坐我於滄瀛。滄瀛風雨不可測。中有一人不相識。回頭笑指遊空濛。導余絳節雙玉童。呼吸帝座隨清風。俯視一一金芙蓉。白雲如緜滿空谷。乘此欲與天庭通。拍肩笑問洪厓生。口吹玉笛銀河傾。山中木葉蕭蕭響。下界疑爲鸞鳳鳴。巖牋授蕭史。供飲白玉醴。長觥傾倒慎莫辭。醉眠石上呼不起。白猿蒼鳥莫相猜。前五百年曾住此。空靈縹緲之氣。凝結而成。自是君身有仙骨。

陶孚尹 字誕仙。江南江陰人。貢生。官教諭。

早春閒興

東郊雨後景逾新。蠟屐尋芳踏軟塵。橋畔杏花村店酒。水邊紅袖畫樓人。鶉鷓覓壘頻穿幙。鸚鵡偷言巧弄春。陌上王孫何處去。青青草色送征輪。草莊草。風流斯在。

舟中

烏衣翦翦柳穠穠。陌上誰家賦采藍。我在木蘭船裏住。夢魂依約到江南。

水仙花

澹蘭沆芷若為鄰。澹蕩疑生羅襪塵。昨夜月明川上立。不知解珮贈何人。同是凌波微步之義。而風神閒遠。在欲離欲即之間。

張養重字虞山。江南山陽人。○張嘗有句云。南樓楚雨三更遠。春水吳江一夜生。王漁洋尚書賞之。初謁漁洋時。即問此等好句。生平有幾。張退謂人曰。生平快意句。不意王公一見道出。

自困溪歷延平抵建寧雜詠

風吹博望槎。白浪滾江沙。纜走懸厓險。舟穿亂石斜。龍鍾垂澗竹。躑躅映山花。野泊無人境。前林起暮鴉。

纜走懸厓險。即所云百丈牽江上瀨船也。舟穿亂石斜。即所云船落危灘無正行也。經過險境吐語自然暗合。

不寐數嚴更。危厓戍火明。聞鶻春淚滴。防虎夜心驚。枕落高灘響。篷懸密雨聲。山川淒絕處。魂斷劍州城。

汀州道中

左顧朝陽右贛州。新羅高據萬山頭。番獠接地蟠關隘。烽火連天起戍樓。日夜鄉心皆北向。古今汀水獨南流。可憐滿眼崎嶇路。惟有清猿伴客愁。

沈受宏字台臣。江南太倉人。歲貢生。著有白澗集。○白澗先生。孝友誠懇。在名場五十年。終老不遇。而中心坦如所養。可知也。詩學親承梅村。祭酒指授。故吐辭淵雅。無志微曠殺之音。

九龍灘

我從建溪走千里。膽落魂銷百灘水。舟人更說九龍灘。絕險諸灘安足齒。嗟予漂泊何為哉。今日親到龍灘來。恰聞昨日七舟下。兩舟卻破尋尸骸。上灘猶比下灘好。人登崖岸且自保。長索條分衆挽舟。獨把操篙付三老。一灘水懸一丈高。奔雷捲雪春怒濤。舟尾向天舟倒立。還防巨石匄相遭。欲上不上力再著。號

呼互應愁一錯。我傍山根彳亍行。峻嶒石罅難移腳。九龍九龍路折盤。盡日勞勞上幾灘。最有墓龍勢尤險。過此相慶方平安。嗚呼上灘人自苦。下灘水急誰能主。輕舟逐浪轉如飛。縱有賁獲勇何補。清流之人水中生。自注。閩中舟子。俱清流人。弄舟慣與洪流爭。商旅乘舟漫僥倖。性命直比鴻毛輕。我意欲將山路闢。下屬安沙上鐵石。自注。安沙鎮。鐵石磯。爲九龍上下地名。閉卻九龍不復行。往來免誤天涯客。史。漢敘事。全在生動。使千載下如親其灘。數語。猶存史漢遺法。

舟暮

不知所宿處。暮色正氤氳。路遠隨行賈。村稀傍戍軍。江清波浸月。山赤火燒雲。同客如鴻雁。天邊自作羣。

憶母

貧是儒家事。難安爲老親。遙憐負米客。長作倚閭人。夜續孤燈暗。朝梳白髮新。生男亦何益。只是累艱辛。從憶母中傳出母之憶子。其言藹如。

許九日閩歸

萬里歸家白髮新。秋風重得飽鱸尊。脫身戎馬憐今日。回首關山哭故人。跌宕七言才更健。蕭條八口業長貧。一杯同把松窗酒。坐看天邊戰伐塵。

衢州書事

尚書昔日駐旌旄。烽火危疆保障勞。已見降王歸斧鉞。徒聞戰鬼逐弓刀。山圍四野寒雲沒。水拍孤城夜雨高。回首可憐離亂處。至今閭井半蓬蒿。此詠李文襄事。神氣完足。絕似梅村。

客曉

千里作遠客。五更思故鄉。寒鴉數聲起。窗外月如霜。如出李青蓮手。此種神妙。何必界限古今。

示內

莫歎貧家卒歲難。北風曾過幾番寒。明年桃柳堂前樹。還汝春光滿眼看。如此處貧終身可混怨尤。視牛衣對泣者身分遠過。

送毛亦史入都

三月鶯花紫陌春。曳裾何處逐風塵。毛生初作平原客。莫便輕他十九人。

蘇隄口號

六橋遙帶兩峯孤。煙水茫茫舊宋都。一向鄂王墳上拜。回頭不忍見西湖。費高宗之溺於偏安。不欲復讐也。余舊有句云。卻憐一片臨安

月。同照龍沙五國城亦是此意。

同錢太史泛舟東湖。座有女郎。湘煙戲題

酒綠燈青夜語中。家鄉同隔海雲東。傷心一種天涯客。卿是飛花我斷蓬。我未成名。君未嫁。感舊也。此則

泊於無關合處。生出關合一往情深。

送春

客舍長安十丈塵，閉門終日苦吟身。一花一草何曾見，卻道今朝是送春。極陳因題，偏得此新色。

陸韜字亦岸，浙江山陰人。

白雲

白雲縷縷青山出，雲自忙時山自閒。唯有野人忙不了，朝朝洗硯寫雲山。以忙寫閒，如許措辭，純乎天籟。

方登嶧字晃宗，江南桐城人，官工部主事，著述古堂詩。

秦女休行自注：女報讎也。秦人名休。

一尺髻，三尺刀，讎人頭在女腰。渭水深，華山高，血風腥。天冥冥，手提髑髏氣崢嶸。法吏執之付以理，女欲報讎先辦一死。後來又有龐娥親，千古英雄在女子。兩女子能復父讎，惟志堅而氣定也。宋高宗輩能毋媿死。

盤中詩

木刻鳩，紙翦馬，飛山頭走山下，露貫珠，紉為襦，雲裁衣，爛光輝。是耶非，孰辨之。六月桑，吐蠶絲，冬之蕙，苗新枝，爾所思，非其時。素者髮，丹者淚，心惻惻，老已至，骨肉殘，風雨駛，寸有長，尺有短，雙輪馳，不可挽，我所急，天所緩，擊瓦鼓，聲烏烏，白雲滿天歌，且呼歌，周四角，旋中區。初言似者之不能為真，次言過時者之歸於無用，末言年命之速，時不可挽，而一付之悲歌也。中間隱分五解。

古詩

勿傲步兵哭。應比士龍笑。有時笑亦哭。不在音與貌。鐘鼓可以哀。長歌可以弔。寸心無營求。流泉淨泥淖。味淡聲亦希。淵然涵衆妙。笑哭兩不關。天半發清嘯。

村北

野曠朝靄清。峯高日半規。遠風吹水氣。澹林結幽姿。策蹇訪故人。村北路逶迤。碧陰漾千畝。涼露沁心脾。刈麥走田父。婦子相追隨。老翁欣得食。回頭顧其兒。大兒束麥把。小兒抱豆枝。歌笑偕鄰叟。飲濯清湍湄。留運緩去路。寓目心情怡。田間有真樂。朝市知者誰。

出西郊道過摩訶菴經前明宦寺葬地

易代一坏土。纍纍葬宦官。餘威剩碑碣。流毒在衣冠。樹接宮雲密。鐘敲佛火殘。東京喬固塚。鬼哭北邙寒。
誅姦宦。悲忠直。侃侃稜稜詩不徒作。

望南信不到

不見兒書至。應知下筆難。有心慰衰老。無計說平安。關塞寒雲早。門庭落葉殘。倘逢南鴈過。便當室家完。

霜遲樂

七月不落霜。卜魁城邊麩子黃。八月霜不落。千夫下田總歡樂。官田刈穀載滿車。官兵急公先完租。毳帳

牛車十日路。驅向城中易茶布。和茶煮穀布裁衣。卒歲不憂寒與飢。人人盡樂霜遲好。蕎麥沙田收更早。但願年年不出兵。官兵皆休農夫老。

七兄以詩慰病和答

形骸百鍊後。心事五更中。苦海終無岸。愁城豈易攻。道危迷老馬。邊遠失歸鴻。誰謂青天濶。浮雲亦礙空。

紀事

爭看金甲健兒裝。玉輦雲移下鳳皇。名城名都尉魚麗開細柳。將軍猿臂射長揚。螿弧露冷搖秋月。鞞輪風高帶曉霜。大閱至尊非好武。良弓不爲太平藏。

濮

淙字澹軒。浙江桐鄉人。

聞梁蘧玉已寓京口

容易相逢尙未逢。老年親故喜相從。已辭野店中山酒。望斷煙江北固峯。一夜夢遊千里月。五更霜落萬家鐘。莫言人遠天涯近。書到樓頭第幾封。中有名句。

贈方望子入黃山修煉

詩成當代說方干。何事辭家久不還。夢裏湯泉非故國。眼前雲海是名山。花深古竈憑燒藥。月冷啼猿爲守關。只是白頭慈母在。不教容易別人間。入山修煉。非儒者事。況有慈親在耶。途之卽以招之。得贈人以言之體。

卷二十一

楊

賓字可師浙江山陰人○考安城爲友人累戍寧古塔可師赴闕訟寃得旨之柳條邊迎親歸

其門人處得塞外詩一册故所錄皆辛苦愁慘之音

至寧古塔二首

望望吉林峯，白雲繞其下。登頓及今朝，亦得依親舍。父母驟相逢，注視還相訝。別時髮覆眉，胡乃成老大。鄰舍爭慰勞，應接苦不暇。姓氏未及知，空言聊慰藉。日暮細挑鐙，恍若夢中夜。喜極乃更悲，不覺淚如瀉。

父母驟相逢二句與妻孥怪我在驚定還拭淚同一真至而父子至情則又過之
姓氏未及知，空言聊慰藉。非身親其地者不能道也。此種詩豈在語言聲律之工。
上書不得達，生男亦胡爲。四十始省親，問心良可悲。戲綵媿老子，挽須同小兒。西山日已薄，鄉國歸何時。歎息謂季弟，爾獨無分離。承歡廿八載，此樂人誰知。季弟隨侍戍所故羨其承歡之樂然不有行者誰奉晨昏不有居者誰陳寃抑楊氏可云有子

換車行

冰凍馬蹄行不止，歷盡千山復千水。邊門未出已難堪，況出邊門二千里。瀋陽城外換柴車，柴車換得無人使。坡陀木石相枝撐，谷口泥淖多呀坑。日日轅摧與轂折，翻雲覆雨如人情。人情翻覆烏可識，出門步行荆棘。涕淚沾巾向北風，但見庭闈死亦得。直白語從少陵出，不從白傳出。

王 戩字孟毅，湖廣漢陽人。著有突星閣詩集。○王漁洋謂孟毅池陽山行長句過歐公廬山高遠甚，而其詩卻平直，故不及錄。

秋日遊白茅寺次少陵韻

天空靈籟發，入耳心逾靜。何許微風過，月林搖客影。人生五濁世，爲歡苦不永。爭如羝觸藩，有如瓶墮井。及茲清夜遊，無辭燭共秉。佛香一院深，僧梵四山迴。身尙依迦葉，足真踐箕穎。禪燈照宵夢，妄念未能屏。金篦開倦眼，慧目陟東嶺。他時禮白雲，應上最高頂。

讀放翁集

南渡四傑俱驚才，醉心尤在渭南伯。江翻海立富篇章，躍馬彎弓老梁益。一寸丹心常炯然，歸來垂釣鏡湖邊。卻憐老死空家祭，不見王師北定年。略其詩集，表其忠義，立言識輕重處。

顧希喆字有典，江南長洲人。太學生。○先生與惠所溪太史爲汪純翁入室弟子。五經紛綸，有井大春之目。詩其偶然作也。然吉光片羽，彌用寶貴。

姑蘇楊柳枝詞

行春橋下午風和，畫舫樓船次第過。一面青山三面水，不知何處柳陰多。

越國佳人舊有名，吳中嬌舞不勝情。柳腰合是芳魂化，長向胥臺一路生。原唱係純翁先生，時和者甚多。幾同濟南秋柳，然風神搖曳無

作論二

許 潤字儉農，福建閩縣人。以子松信官江蘇布政使司，贈如其官。

己巳六月拜別家慈之楚

荒雞斷續天將曙，遊子辭親寸心悸。霜鬢攜燈立檻前，頻語加餐暗垂涕。舟子招招促行李，殘書數卷裹破被。解維咫尺是天涯，回首空閨人獨倚。發乎至情，可使迴解。東野遊子吟後，乃有嗣音。

閩溪舟行卽事

天設南閩多險阻，古今勞役幾時休。下灘疑泛銀河水，上瀨如牽陸地舟。響應風湍歌欸乃，身藏雲木叫鞦韆。筆牀茶竈延緣好，準擬浮生託白鷗。

戊子春自嶺南奉老母挈家旋閩

行囊帶得嶺頭春，荔浦珠江過眼頻。半世總爲天外客，一家今是故鄉人。迴看東粵名山遠，好補南陔樂事真。莫問田廬在何處，洛陽季子本清貧。遠客旋歸，人生樂事，况一家全歸，尤天倫至樂也。此種真詩，讀者亦爲色喜。

舟泊劍津懷亡友劉復庵

分手齊安隔數春，何緣龍劍合延津。可堪風雨孤舟夜，白髮盈頭哭故人。哭故人一層，白髮盈頭一層，孤舟一層，夜一層，風雨一層，合井

寫來如聽猿啼三峽

毛世楷字古愚，江南吳縣人，官光祿寺典簿。

武昌

百戰江山一水萍。武昌宮闕舊亭亭。枝梧蜀漢爭持角。控制東南欲建瓴。未定中原安枕席。底思建業厭魚鱗。只今鐵鎖銷沉後。浪打寒潮入穴青。自注。穴尚在。○此合吳大帝後三嗣主言之。盛衰之感。渾括無遺。

秋日感懷

秋夜焚香醮玉眞。秋河歷歷動星辰。人間何處投金瀨。天上徒聞析木津。同學少年悲杜甫。美人遲暮感靈均。青天碧海吾無悔。且泛南溪採白蘋。此感士不遇賦意也。三四虛含。五六正寫。最得淺深次序。

楊

模字子式。浙江仁和人。以孝聞。生平不惑。二氏布衣。中有卓識者。

漢陽旅中送蔡子彙征遊湘潭

相送斜陽外。相逢更幾時。共來荆楚地。還賦別離詩。祖席杯堪把。河橋柳挂絲。洞庭他夜月。千里繫遐思。
閏六月初七夜月

南訛莫認火西流。顧兔高懸略似鉤。四日魄生方入夜。七回絃上未成秋。先期乞巧穿鍼線。後月舒光照女牛。半露姮娥能卻暑。廣寒深處玉爲樓。字字雅切。第四語疑有鬼工。

沈

峻字田子。江南吳縣人。廩生。

荒亭

荒亭古墓南。遠見車塵滅。墓前雙石人。送盡人離別。

九日

有酒賞重陽。無煩白衣至。恐驚鄰舍翁。謂是催租吏。催租吏。攬潘邠老不成詩者也。此云驚鄰舍翁用意又別。

沈鍾彥

字美初。江南長洲人。諧贈內閣學士兼禮部侍郎。○後學周準填諱。○先君子喜成斷句詩。館於畫師湯式九家。湯寫一花卉。先君子輒題一詩。年五十餘。專工分隸書。詩偶然作矣。身徒稿為人竊去。初刻國朝詩時。未能得也。茲於汪氏學徒册子中。得此三詩。皆馮氏館中作。潛兒時所及見云。

題畫

春林如畫。器朝曦。燕立穠陰濕不飛。柳外有樓簾半卷。掠花雙翦莫忘歸。

罌粟花

炊烟時或斷貧家。曉起俄看五色霞。任爾侏儒誇獨飽。籬頭已放米囊花。

金錢花

鄧氏銅山虛設想。沈郎榆莢許為鄰。清宵風露頻頻擲。似向空庭卜遠人。花曉開夜落。故有三四語。

沈紹姬

字香巖。浙江錢塘人。○香巖。羈蹟淮右。垂老不歸。浙中詩壇亦罕數其。人者。偶於清江于氏得手鈔一册。亟采入之。其生平出處未遑詳悉。

錢塘懷古

城上黃雲鎖戍樓。城頭古木叫鉤輈。地從江底分吳越。天向欄前挂女牛。尚有荒祠題伍員。曾無杯酒祀

錢鏐。可憐人事今蕭索。花草依然發故邱。吳越之分。以江為界。用江底字。句便不平。此可識捶字之法。

寄懷查伊璜先輩

亭亭絕巘結蕭齋。高峙龍門百尺階。蘇晉堂前宜繡佛。馬融帳後有金釵。淒涼歌板憐君僻。磊落文章與世乖。愛我巴歌長擊節。汝南月旦媿齊諧。

杜鵑

年年啼徧欲殘春。午夜枝頭血滿脣。不盡羈魂悲蜀道。何來處士感天津。聲中似怨無家別。地下應憐再拜人。縱使欲歸歸便得。故宮何處更容身。中二聯俱以對句見靈活。

寄家人

歸來借隱計猶虛。垂老他鄉歎索居。別久乍疑前劫事。路岐才得去年書。夢如柳絮飛無定。愁似芭蕉卷未舒。記得小園親手植。一欄紅藥近何如。有敦瓜苦丞在梁薪到家喜極無可措辭故指瓜苦梁薪以志粹也此種詩風人之遺。

司馬懿故居

王業偏安蜀道難。奸雄寧獨數曹瞞。中原回首移神鼎。豎子成名建禪壇。城上風旛新塔宇。墓中巾幗舊衣冠。掀髯西指蠶叢路。丞相祠堂尙錦官。

淮陰侯

鼎足才堪角兩雄。當年應悔滅重瞳。分羹父子恩猶薄。推食君臣誼豈終。獨有千金酬漂母。曾無一語感滕公。名成自古身當退。沒齒休論戰伐功。報一飯之漂母而不報救死之滕公。英雄舉動。不可解也。漢祖不封紀信亦然。此意無人道及。

題韓蘄王湖上策塞圖

南渡何人主廟謨。清涼居士老西湖。兩朝和議分棋墅。百戰雄心付酒壺。策塞山前逢故吏。參禪花底坐浮屠。只今猶恨丹青手。不畫麒麟閣上圖。

詠古

脫穎人成公子名。不然碌碌竟何稱。夷門虛己真知己。莫繡平原繡信陵。

爲報韓仇奮一椎。副車雖誤亦雄哉。淮陰也是韓王後。何用當時躡足來。從無人開此口。欲報韓者。幾於語塞。

張衍懿字慶餘。江南通太倉人。

進峽

峽自夷陵東。江從白帝懸。兩崖如劍立。百丈入雲牽。石出疑無路。雲開別有天。往來頻陟險。千里正茫然。

三四卽入天。猶石色注腳。

瞿唐峽

歷數西南險。瞿唐自古聞。水從天上落。路向石中分。如馬驚秋漲。哀猿叫夕曛。乘流千里疾。回首萬重雲。

此下置唐也。玩如馬字樣。及回首萬重雲。句峽之在上可知。

過馬伏波墓

漆水東流遶墓田。伏波埋土幾千年。西風但見吹殘鬣。南海猶聞畏站鸞。豈有明珠來戚里。空留銅柱在炎天。功成未得雲臺畫。回首荒原一惘然。謗來宵小。功在南天。二語爲伏波定論。

度梅嶺

拔起危峯萬仞雄。勢臨百粵控南中。人從丹壁千盤上。路入青天一箭通。古碣尙留唐相迹。荒祠誰祀越王功。只今四海梯航日。早見征車度曉風。

孫中岳

字楓麓。江南桐城人。

大姪書金陵回卽走西安悵然念之

纔解征鞍又遠行。相看意氣轉縱橫。故宮荒草埋金狄。客路秋風動石鯨。詞筆已從梁苑禿。詩情又向灞橋生。隴頭流水聲幽咽。似我頻年送別情。隨題轉折。中有全力。法本之初盛唐人。

謝志發

字雲逸。江南長洲人。著有一角山樓稿。

春日送張梅莊之維揚

春郊烟景濃於酒。萬縷千絲隄畔柳。當杯惜別暫流連。長條能綰離情否。挂帆暮靄指維揚。渡口分飛各

一方一葦不從張仲去。思隨飛絮繞雷塘。

過褚漁黃山居

數峯深曲徑。返樸遂栖遲。虛室雲為牖。成鄰鶴在枝。漱甘臨澗石。遯迹稱茅茨。客至青精飯。長鑱共采芝。

頗見作意

過舊送別處

憶昔亭前柳。分攜曾繫船。至今攀折處。猶是鎖愁烟。音淺韻深。此詩社題也。同賦是題者。皆極力鋪張。然只是送別處詩。作者二十言中。一一注意舊字。尤

西堂先生定為歷卷。兼無異辭。

姜實節

字學在。山東萊陽人。流寓吳中。此真毅先生仲子也。好古畏榮。布衣終老。詩工七言。斷句每於若不用力處遇之。

繡谷堂中牡丹今歲惟開一枝。楊子鶴馬扶義。徐采若。暨目存上人各為作圖。王石谷補一石。余為

題句

四人分寫一花枝。寫出傳看朶朶奇。恰似蘭亭摹搨本。淺深肥瘦各相宜。比擬恰好。若但著意牡丹。便是笨伯。

白頭公鳥

霜鬢逢春可自由。老人端的為多愁。不知小鳥綠何事。也向花前白了頭。

鷓鴣

天山白草路橫分。日暮悲笳不忍聞。想得玉關方轉戰。阜鷗風起欲盤雲。忽然變調

題黃鶴山樵聽雨樓卷

湖天過雨水冥冥。吹綠東風草一汀。絕似銅阬橋上望。遠山如髮向人青。

題簪花圖

六年前見傾城色。猶是雲英未嫁身。今日相逢重問姓。座中愁殺白頭人。此歌者張乙嬾照蔣繼谷屬楊子鶴圖之。同時賦詩者多濃纖

肥膩。獨作者盛衰之感。盡傾一座。外此目存上人。亦復超然黃四孃家花。溪姓名因杜老傳也。

吳祖修字愷思。江南吳江人。貢生。著有柳塘詩。○柳塘爲高才生。友教遠近。張損持陳起雷周漢荀諸公皆門下士也。詩尙才情。議論不主蘊含。能成一家言者。

古詩

兀坐一室中。澄觀若止水。羣動既已息。萬籟不到耳。方寸涵靈臺。光明疇與比。此中無將迎。安用起碗礪。此古賢靜坐觀心之法。宜遠觀者未喻。

蒙莊曠達人。亦未解斯旨。如何逃虛空。登然足音喜。少陵薄文章。謂非道所尊。不讀破萬卷。何由聞斯論。經史足驅使。今古堪胚渾。寂若萬象滅。燦若衆星繁。根柢有至理。刊落皆陳言。以此爲詩史。孰能窮其源。

讀司馬相如傳

綺靡文傳是子虛。曲終雅奏竟何如。後人嗤點凌雲賦。曾讀當時諫獵書。

讀王褒傳

金馬祠神事已遙。子淵才擅漢宣朝。非無聖主賢臣頌。只教宮人記洞簫。連上章俱用議論。義山詠史亦多詩。其初祖也。高青邱詠史亦多

此種

寄示趙書年陳起雷

千里歌驪竟不聞。尙思尊酒數論文。過門不入能無憾。未敢人前薄待君。千里遠別。不聞於師。故以詩責之。然不即比之鄉愿。言中猶有

情餘

陳

炳字虎文。江南長洲人。○虎文居陽山之陽。性狷介。幾至三旬九食。有餽以粟者。苟非義不受。炳與黃震生中堅友。論詩文不合。至拍案面赤。過此仍歎好也。工篆刻。得顧蒼正傳。俗士求饒名氏。雖多金謝之。不願。詩宗孟山人。或少變化。然塵埃盡滌。亦如其性情之孤子焉。

雜詩

斧柯不到處。惡木易成林。君子抱渴疾。偶然息其陰。端人貴潔己。寧使霜露侵。事往悔何及。喟焉傷我心。

漢上

楚國江山古。維舟望渺然。山盤青入蜀。江合白吞天。樊口上寒月。漢陽生暝煙。欲尋抱甕者。小別夕陽邊。

此首如孟山人之詠洞庭湖。獨爲變調。

尋馬山人不遇

一壑冷雲白。山家何處尋。忽逢采樵者。遙指梅花林。曲徑吠寒犬。短籬鳴野禽。柴門閉幽寂。獨立聽泉音。

文

字寶日。江南長洲人。著有十二研齋集。○待詔五世孫。能述祖德。敦士行。詩品亦近清真。

病中雜詩

十日髮不梳。五日面不顰。久病臥荒村。秋深積陰晦。體弱殊畏冷。破衲已可愛。晚晴秋更佳。山色遙如黛。我當拭几塵。推窗坐相對。

吾愛陸渭南。一生常善病。謂非酒色來。雖病元氣正。雙眼澀如棘。搗頤猶高詠。省事兼寡言。能使心無競。病亦不迎醫。書卷養性命。

李必恆

字百藥。江南高郵人。邑廩生。○宋漫堂中丞選江左十五子詩。厥後十五人中。殿撰一人。位病年止中壽。何其厄也。然詩格之高。才力之大。可久者。應讓此人。事久論定。所得果孰多。孰少。耶。惜未見全稿。祇從選本中錄出。不無遺憾云。

詠史

方朔仕漢廷。事道非玩世。時時一諷諫。彼自敬其事。叩頭誅董偃。凜凜直臣義。豈得以談諧。目之曰遊戲。文成甫伏誅。五利復親屬。爵祿尚可捐。何至棄骨肉。天子而神仙人。苦不知知足。汲黯言誠戇。陛下內多欲。

悼亡詩

一室何啾啾。人語雜鬼哭。那得少踟躕。黃泉路迫促。飛來白項烏。啞啞上我屋。心知不吉祥。其時六月六。

病婦晨起坐。清水自膏沐。再拜辭舅姑。雙足不能縮。灑泣眼無淚。酸苦只在腹。迴頭語小姑。語咽氣復蹙。可憐我生兒。艱苦賴鞠育。勿以生死異。飢飽時在目。開我嫁時箱。布衣未堪鬻。指日秋風來。改作我兒服。徽音又如何。日月忽已積。枯坐慘不歡。出門昧所歷。空房起晝陰。冷氣出枕席。窗多蛛結網。案盡鼠行跡。亦有筐中麻。燈火手自績。亦有所對鏡。花鈿恣狼藉。徘徊思言笑。彷彿面如覲。回頭遽欲語。撫心一慄慄。前夜夢見之。色慘體更瘠。恍惚絮語間。問兒何所食。暫時魂魄聚。覺後泉壤隔。忘情媿太上。莊缶詎忍擊。

漁洋悼亡詩風雅之中。純乎富貴氣象。此則元相所云貧賤夫妻百事哀也。越瑣屑。越見真至。卽他人讀之。亦爲感傷。

謁浮山禹廟次昌黎石鼓韻作歌

粵若稽古帝舜世。光華復旦卿雲歌。滔天獨恣河伯怒。帝曰四岳咨如何。九載隳績羽山殛。黃熊碧血膏霜戈。惟鯀有子子曰禹。負罪飲泣爭濯磨。行山表木敷五土。大地碁置如星羅。首疏濟深定冀域。導南條水先岷峨。舟車繹絡紛水陸。橈楫雜沓周陵阿。支祁夜鎖縛奇相。百靈炯炯誰敢訶。九河旣道九原滌。支分派析無舛訛。濁水綠字著神怪。穴中金簡書蚪蝌。鼎塗百物禦魍魎。驅使蛟鱷馴鼉鼉。蠙珠瑤琳貢銀鏤。鉛松篠簜浮青柯。土功荒度錯昏晝。跋烏八載同擲梭。東漸西被朔南暨。手胼足胝難委蛇。呱呱門內弗暇子。塗山洒泣同湘娥。玄圭載錫幹厥蠱。黃龍呈瑞江之沱。烝民乃粒玉帛會。萬國輻輳車書和。厥田惟上中下錯。總銓結粟開輸科。淮海惟揚古澤國。昏墊實維東南多。舊傳浮山此作鎮。崑崙最屬神鼇駝。

或云一拳實中繫。其下滾滾洪濤過。或云媧皇煉餘石。巨靈斧劈同切磋。又云蛟龍性險怪。制以鑕鐵沉諸波。頂露一丈其色黑。平砥如掌無偏頗。由來神物歷年久。溯源那復知其他。楚俗紛紛競淫祀。蛇神牛鬼爭媮媮。數椽冷落傍闌闌。空餘盛蹟誰摩挲。我來再拜瞻黻冕。俯仰四矚生悲哦。壞廊風吹舞鴨脚。麗牲有石誰刑鵝。山根斑駁苦薜蝕。清泉朝汲唯禪那。吁嗟下士抱微尚。利濟無術心丘軻。負薪沉璧戴君相。會見注海行江河。緬思禹功纘明德。分陰用惜毋蹉跎。用韻詩。須胸有成竹。以意爲主。而以韻從之。則無趁韻之病矣。看此篇敘事議論。一氣呵成。若自己用韻者。然中有大力量在。

鏡歌

從軍樂

牽馬出里門。扈蹕邊城去。西陲有遺孽。狡脫甚投兔。誓滅此朝食。家室非所顧。附書與六親。不必念苦辛。天子是主帥。拊循如家人。天子是主帥。士氣爲之揚。天子是主帥。甲冑生輝光。早夜五十里。在道無兼程。軍中米粟多。到處泉流清。昔怨從軍苦。今歌從軍樂。功成受上賞。圖形在麟閣。歌成於聖祖親征。隋丹時一片鏗鏘。漢魏音節。

役者謳

輦石陟硯。山石齟齬。豈不憚行。念我聖主。念我聖主。在軍中。親韎跣。盱乃食。蚤夜不得休息。小人戢戢。敢告勞苦。驅駝千匹。牛萬頭。峙乃糗糧。負乃餼。餘粟纍纍。棄道周野。烏爭啄。聲啾啾。起句至敢告勞苦。用七變韻。中夾入十三職中。

三句漢樂府
嘗有此體

歸化城

歸化城。徠羣生。日入之部。就我日出主。聞風者。施施來。來施施。帝念之。作室家。相地宜。俾爾父母兄弟妻。子無寒飢。出作入息。以邀以嬉。駐者歌。行者思。歸化城。樂不可支。

破陣樂

礮車轟天。白日燒烟如燒虎。軍聲塵天。威所到。心膽墮。霜刃未交。敵壘破。塵漫漫。大風起。鼓不絕。馬逸不能止。窮寇解甲降。巨憝抱鞍死。皇帝曰嘻。武不可究。罪人斯得。矧敢多。又且日將軍來。幕府上功簿。峨峨甲仗高於山。孳畜谷量不知數。天子受賀軍門開。山呼萬歲聲如雷。

釋纍俘

臨高原。漠北墟。其無人。但見風馳霆擊。沙石的礫。爭飛奔。殲渠魁。喪厥元。自餘跂行喙息。百一存。寡妻弱子。俘軍門。皇帝德大。蓋載遠邇。曰予不孥戮爾。多賜繒帛。美酒甘食。與之更始。傳告衆人。赦女脅從貨女死。盍歸來乎。聖天子。樂府之妙。全在音節短長錯綜。變化使人不可測識。此篇略備。

大愷

奏愷樂。歌彤弓。攬鼙鼓。鏗鯨鐘。酒再行。樂三終。羣臣拜手上帝功。帝不自功。謂女庸。爾諸臣來。大者公。小

者侯。釐爾圭瓚。桓豐一卣。維茲山川。田土弗敢愛。分土三列。爵五及苗裔。永終譽。

月上

月上微風起。飄飄吹素林。草蟲浮夕響。木葉識秋心。涼氣湖中水。砧聲空外音。不知孤館客。此際感何深。

方正學先生祠

烽烟一夕逼南畿。痛絕孤臣淚血揮。十族可堪同蔓草。自注。時戮建文諸臣。謂之瓜蔓抄。九重亦自媿麻衣。金川燕子飛還出。玉壘龍孫去不歸。祠宇高皇幸鄰近。一坏鍾阜共斜暉。

吳門徐昭法先生畫芝

壘圻輪困態最工。披圖謾謾起清風。定知崖畔叢三秀。不在祥符萬本中。

孫元衡字湘南。江南桐城人。官臺灣郡丞。有赤嵌集。

渡海

振柁揚帆似發機。茫洋自顧此生微。亂山斷處天應盡。一髮窮時鳥不飛。魚眼光邊波閃爍。龍涎影外國依稀。壯遊奇絕平生冠。斯語東坡未必非。

蔣景祁字京少。江南武進人。官府同知。著有東舍集。

伏波廟

雲臺圖功臣。椒房獨未許。示公轉見私。遠嫌亦何取。龍虺方鬪爭。幾先擇真主。回翔竟不歸。風雲會軒舉。五溪阻且深。一鼓氣如虎。顧盼惜壯年。矍鑠勇堪賈。薏苡蜚語騰。宮側起讒蠱。公匪一將榮。犀貝何足數。松固乳臭子。無乃累建武。薄遊沅江濱。靈祠立江澚。遺事徵故老。英風尚千古。慨然懷昔賢。功名想銅柱。
松固乳臭子。無乃累建武。儒者之言。不必意盡話竭。

朱載震 字海人。湖廣潛江人。選貢。官石泉知縣。著有東浦詩鈔。

建蘭

叢蘭生幽谷。莓莓徧林薄。不紉亦何傷。已勝當門託。輦至踰關山。滋培珍几閣。掉頭忘閩海。傾心向京洛。輕颺晝回芳。清泉晚宜淪。玉軫一再彈。天際如可作。
此為王新城尙書題花木六詠之一也。新城謂王筠為沈約賦郊居十詠約曰。此詩指物呈形無假題譽。今之視昔。殆為過之。詩意古淡無迹。不同漫許。

雪中呈黃湄先生

鐘動明光接曙暉。雪花片片點朝衣。玉珂積素趨仙仗。金勒凝寒出瑣闥。北極樓臺天上迴。西山雲樹望中微。閉門有客還僵臥。歲暮羈愁未得歸。

陳于王 字健夫。順天宛平人。

遊文殊院歷天都峯逢採藥者

夜宿疑積雨。曉知松風鳴。日出霧靄消。紫氣羣峯生。十月山葉綠。境僻草木榮。策杖穿蘿徑。宛轉隨昏明。路滑懸溜滴。橋欹崩石橫。蒼茫衆岫接。絡繹飛泉迎。矯矯霜髯叟。負鍤巖邊行。息肩趺盤石。細說農皇經。謂我有夙緣。相顧若有情。令我坐其側。翠筐厓上傾。雙朮赤白色。二苓龜虵形。柏葉含貞性。蓂花至陽精。服食屏嗜欲。堪與元化并。金丹餌軒轅。誤人始容成。言訖超然去。白雲空冥冥。起十字山中夜宿真境後寫采藥者驚然而來超然而去妙在盡而不盡。

硃砂菴一名慈光寺

古寺開巖腹。層層雲氣流。溪聲過竹院。山影落僧樓。施食玄猿接。齋鐘遠客投。奇峯三十六。一一畫中遊。

王丹林

字赤抒。浙江錢塘人。官中書舍人。著有野航詩集。○詩品在牧之飛卿間。羈留日下。諸鉅公交口推重。方欲薦揚明廷。而中道摧折。詩之鐫刻者亦少。藝林至今想望之。

銀塘曲

宜春小苑樓倚空。綠楊晴掃千絲風。湘簾翠卷暮山色。斷霞散作魚尾紅。美人舊事平陽主。十五盈盈學歌舞。羅襪還凌洛水波。錦衾祇夢巫山雨。團扇承恩夏日長。晚裝闌掃追微涼。玻璃一頃翫空碧。白玉勾闌銀作塘。姊妹相憐復相妬。私語凭肩一迴顧。文鴛雙宿乍驚飛。貼水荷盤瀉珠露。

白桃花次乾齋侍讀韻

相逢不信武陵村。合是孤峯舊托根。流水有情空蘸影。春風無色最銷魂。開當玉洞難知路。吹落銀牆不

見痕多恐賺他雙舞燕。誤猜梨院繞重門。無翦刻痕。有天然趣。一時和者。皆出其下。輦下詩人。鈔寫幾遍。

乾齋再賦白桃花重和

亞水仍宜曉漲時。似無姿處最多姿。融融和露逢三月。皎皎臨風見一枝。縞袖未依秦隱士。藥宮休遇漢偷兒。紅塵拂面何曾染。枉賦劉郎紫陌詩。

寒食

鳴鳩穀穀畫樓邊。欲雨還晴百五天。香薺亂堆梁苑雪。綠榆小鑄沈郎錢。催花雨起無多日。銜紙鳶飛又一年。賴得近時無火禁。茶牀吹裊竹爐煙。

題桃葉渡江圖

細雨橫塘記昔過。畫圖開處奈愁何。桃花一簇紅無主。春水三篙綠始波。解珮清狂餘髣髴。濺裙宿約竟蹉跎。由來蘭槳無情物。錦瑟華年送已多。

悼亡妹

十年兄妹恨離居。惡問驚傳涕淚餘。急雪罷吟簷外絮。大雷空寄袖中書。塞鴻影斷鄉關遠。墓草痕生奠饋虛。寶瑟凝塵長簾冷。潘郎憔悴欲何如。昔人論詩。實事貴虛用。死事貴活用。道韞咏雪。明遠寄書。實事死事也用罷吟空寄四字。則虛且活矣。悲悼之語。出以悃款。其

深情自

顧嗣協字迂客江南長洲人官新會知縣○迂客詩才不在令弟秀野太史下未見稿本不及多收

雜興

駿馬能歷險力田不如牛堅車能載重渡河不如舟舍長以就短智者難爲謀生材貴適用慎勿多苛求

言用貴適乎其材也此種詩劉繼莊時有之緣情綺靡之家未能辨此

出居庸關

巖巖形勢好躋攀粉堞高樓一望間自有天威臨絕塞不因地險恃雄關衝雲澗雪懸千丈撲馬塵沙失萬山哀角悲笳聽漸近何堪落日照征顏

題宋宮贊葯州北征圖

刁斗聲中起塞氛詞臣亦復張吾軍王師神武原無敵儒將風流更不羣鐵馬夜嘶千里月雕旂秋捲萬重雲畫工自具凌煙手圖出沙場紀舊勛

鐵馬雕旂一聯寫塞外景象有聲有色可匹令嚴鐘鼓三更月野宿貔貅萬壘煙之句

李

寅字東崖江南吳江人恩貢生崇祀鄉賢

書武侯傳

寤想宗臣握帝圖盟心無地不艱虞運移京國方扶漢力竭西南更託孤縱使河山分鼎足忍教正朔委當塗可知空谷龍蟠日幸野躬耕道自符

初決策時已知三分鼎足而既受重託志在死而後已三代下出處之正惟臥龍一人也詩中無意不到如讀武侯列傳

書鄴侯傳

衣白山人現宰官。每參帷幄繫危安。但清河湖風塵易。欲掃宮庭枳棘難。戰伐有功身屢退。副儲無恙魄猶寒。平生漫託神仙術。絕勝華陽早挂冠。
平定河朔保全儲副功幾不在汾陽下託言神仙猶從赤松子遊意也而舊唐書以鬼道少之真乃不成議論

王

錫字百朋浙江仁和人邑諸生著有嘯竹堂集○作者古今體詩俱有家數即入西洽諸子中亦為上駟而名不出里巷予往來浙西歷訪辭人無道及百朋姓氏者偶於仁和柴侍御案

頭得之錄入卷中因知名家而溼淪者正有其人也為之憮然

法相寺

釋氏貴無生不在形骸久性真既已離色相復何有寺僧惑愚民丹漆飾木偶謂是肉身存雙耳長齊口斯言或信然結習終多狃四大了不空六依反塵垢何如任歸全清淨還高厚吾聞孔子云死者欲速朽破釋氏之說表出歸全正理是為儒者立言

題朱氏山莊

纔過合澗橋。便到雲林寺。泉石奇以秀。疑非人間地。不知萬木中。亭榭更幽邃。溪聲隔竹喧。松色當樓翠。鶴識嶺雲歸。僧乘蘿月至。嗒然吾喪吾。安問形與器。
溪聲四語如暗對左司

冬曉登韜光禪院後山望晴雪

天地氣嚴凝。出郭遊人少。踏雪登山巔。凌虛縱遠眺。萬戶炊煙遲。奇景湛清曉。竹折枝蒙密。松危勢天矯。

足底多寒雲。眼前絕飛鳥。風驚碧落間。日出扶桑表。千重越岫明。一帶錢江小。百里紛皚皚。萬象爭皦皦。積素射晴霞。異光互迴繞。日眩下高峯。冥濛林壑杳。舉首望精藍。樓臺俱縹緲。

春江花月夜

春江兩岸百花深。皓月飛空雪滿林。爲愛良宵清似晝。獨來江畔試幽尋。東風送冷春衫薄。花月堪憐難擲卻。孤月何能夜夜圓。繁花易遣紛紛落。搔首踟躕江水濱。月明忽遇弄珠人。紅粧笑入花叢去。併作江南腸斷春。月轉江亭花影動。數聲嬌鳥枝頭弄。侵曉分途踏月歸。連宵應作春江夢。題中五字。安放穩貼。風神去原辭未遺。

觀潮

風激滄溟立。驚濤拍翠巒。朝昏存大信。天地湧奇觀。皎日雷頻作。秋江雪早寒。賈帆收欲盡。千里水瀾漫。三四籠蓋一切。覺摹擬形似者。但得其瓊屑耳。

丁卯中秋

去歲中秋節。燈前病劇身。黃昏正風雨。白首獨酸辛。此日全微命。高堂失老親。不如垂死處。尙見倚閨人。兩中秋前後分寫。仍是一氣。渾淪見今茲全軀而喪母。不如前此垂死之身。猶依母氏也。律詩之變。至少陵已極。此又在少陵變體之外。發乎至情。格律不足以拘之也。

冷泉亭

小憩空亭戀翠微。上方日暮客過稀。春秋閱盡水長冷。風雨到來山欲飛。嶺半樹高猿每挂。林間雲暝鶴

知歸。炎天坐久寒生骨。思向僧家借衲衣。三語正寫冷泉得山之欲飛作觀。字字皆活矣。極生動又極見成。

李白

誰道謫仙狂。豪情托舉觴。目無高力士。心識郭汾陽。青蓮大節已盡二十字中。

詠雪

朔雪舞迴風。華凝香閣晚。繡幕尙生寒。人在龍沙遠。

俞

熛字日絲浙江秀水人。

灰七姑辭自注。不俗。嘗以二月祀灰七姑。即紫姑之遺也。

紅繒張管箕。斜插海棠杏。竈前舂來竈下請。小婦薦清茶。中婦陳白餅。大婦拜致辭。燭花弄鬢影。種杭種秫須多收。養蠶新絲十倍抽。不願生兒近王侯。但願蕃息滋羊牛。小姑靈感識人意。髻箸重重書作字。管箕頻動小姑迴。瓦爐香燼柏子灰。穉男收拾棗栗去。門前簾鼓喧春雷。村落間瑣事。寫來最真。

劉石齡字介于。江南長洲人。著有瓠容草堂集。○國初孝子劉蔞。於鼎革後。艱苦省親。父前沒。遇母于見。孀村蓋前定也。介于為孝子之子。讀有用書。奔走四方。韓文懿公重其人。欲薦于朝。

未及薦而韓公卒矣。詩滂溷閎肆。得力昌黎。近體浸淫宋人。因未見全集。故祇錄古體二章。以志厓略。

登祝融峯頂宿上封寺

梯空躡晴霓。振衣祝融頂。俯視七十峯。茫然墮烟井。湘流失灣濶。洞庭餘溟滓。目窮日月鄉。袖拂天漢影。

迴首蒼梧雲，飄飄度前嶺。太陽汲新泉，石鼎淪苦茗。肺腑添清涼，丹元溢光景。麾斥隘八區，幽尋愜孤秉。徘徊會仙橋，晴崖發娟靚。絕壁有行跡，仙路細如綆。蚪松生古巖，翠葉光炯炯。靈秀天所鍾，應與茲山永。倒景迴明霞，大地總澄瑩。歸來宿上封，一枕山雲冷。生平學韓此章又近謝公。

恆山

寶符玄王奠茲麓，有神上下扶坤乾。曲陽飛石就禋祀，虞舜不到恆山邊。茲語荒怪誰所紀，翠砥鳳曇空磨鐫。磁窰兩岸盡絕壁，南有細徑緣秋煙。崖回水立三百丈，巨石怒落隨奔泉。幾年於此壘雲棧，排空石竇鬼手穿。餘材蠹蝕插山腹，欲落藤蔓相鉤牽。平生未嘗識劍閣，或謂蜀道險亦然。崩芳萬仞試初步，飛仙巖閣中霄懸。虎風一噫土囊口，犍牛飄墜輕鳥鳶。渾渾雲霧起林際，乖龍鱗尾方蜿蜒。紫芝翳翳隱幽峪，黃榆颯颯飛晴天。中有仙人繫驢樹，下根離析枝相連。寒濤萬壑起松杪，翠雪散落山亭前。夕陽晚霞足幽眺，丹竈夜光然通玄。野人頗有濟勝具，度越峻嶺如登仙。俯視羣山盡臣庶，太白巨麗差隨肩。茫茫一氣辨龍塞，橐駝萬隊成蟻旋。丈夫寧能死章句，有名須勒狼胥巔。此心未遂身老大，投足巖岫差安便。徧遊五岳自茲始，俟昏嫁畢當何年。天地奇境，須得此驚人句寫之。蜿蜒如龍，幾於不可控馭。

黃中堅字震生，江南吳縣人。歲貢生，著有蓄齋集。蓄齋以古文鳴詩，其餘率然即此二章，已見其情至文生，不同釘釘。

聞陸旣藩樞歸弔之

昨得傳來信，靈輻返故居。悲深翻作喜，望切轉疑虛。一棹風烟外，孤魂憂患餘。生還當此日，歡笑定何如。
傳來凶信，故悲聞其極歸，翻喜及望而未至，又恐消息之虛也。十字中無限曲折，結用反觀以生還之樂，觀喪歸之戚，倍難為懷矣。

題馬雲達像

故國蒼涼天地秋，誰將肝膽託清流。狂瀾已向東南倒，正氣偏於草莽留。憤似安民悲刻石，
自注：官為魏閣立碑，命鑄

石君先期遠避去。厚同齊相賸孤囚。自注：魏忠愍公子濂，以誣賊道比君，勸募入金得免。畫工只貌須眉古，一片丹心未易求。
官命鑄魏閣

曰：安民乞免，銷名固善。然已汗吾手矣。適之浙西，以免。又魏忠愍被逮，至晉江，周忠介欲以女妻其孫，無人為媒，雲達攝任之。此又詩中未及詳者。

沈廉字補隅，浙江嘉興人。○補隅方壯入秦，有去題百二關中壁，要看三千里外山之句，聞者壯之後足跡幾遍天下，而蜀遊一集沉鬱中復極縱橫，頗得杜陵氣骨，一時訾摩其鼎者。

出連雲棧抵宿褒城

蜿蜒雲棧縈空迴，劃然半壁秦天開。煙巒高下勢排宕，興元形勝何雄哉。放眼襄中樹如薺，一片孤城落井底。紛紛飛鳥墮蒼烟，落日無光沙泥泥。我馬脛躓不復驕，解鞍止宿心搖搖。孤雲兩角天一握，側身西望驚魂銷。眼前險阻無時無，區區百里成坦途。且復開襟澆濁酒，放歌一醉花間壚。前路崎嶇君勿慮，揚鞭更上青天去。

江口行 井序

江口者，岷江口也。明末孽賊張獻忠據成都三載，誅求民物殆盡。鼎革後，獻孽運其輜重赴楚。

巨舟數百號。連檣銜尾。東至嘉州。直抵江口。先是有武舉楊展者。豪勇冠西川。憤賊蹂躪。練集鄉兵備賊。至是截之。獻孽怒。舉火悉焚其舟。金物並沉於江。獻孽復集賊黨。還成都。會王師至。盡殲滅之。西蜀既定。頗有覬覦江中遺物者。竭人力取之。終莫能得。半溺於水。到今七十年矣。嗚呼。由此觀之。彼獻賊之暴。愚民之貪。皆歸烏有也。乙未秋。成都楊鳴岡孝廉述其事。爰作江口行。以志慨云。

岷峨江水清且深。黃金那識行人心。岷峨之水清且淺。黃金偏著行人眼。爲問黃金何處來。客談往事真荒哉。獻賊當年蕩蜀土。生民甲第成飛灰。一朝東裝賊東走。連檣直下岷江口。岷江楊展豪勇者。痛憤呼天忍束手。義旗一舉羣飛揚。弓刀直掩日月光。一時天地爲震怒。橫江截殺勢莫當。旌旗徧野風颼颼。嘉州三日江不流。煙雲黯淡日無色。山川撼動蛟龍愁。孽賊此時無一可。突怒鼻端欲出火。狂呼一炬燎羣艘。黃金百萬歸洪濤。賊衆奔忙還錦水。王師殲盡獍與梟。妖氛靖後七十載。可憐猶見民脂膏。江流滔滔走如駛。黃金曜日清見底。貪夫從此智力窮。無冬無夏驅人工。摸金半入江魚腹。十無一得空貪慾。馮夷冷眼笑人忙。孽賊猖狂有餘毒。不貪爲寶古所云。世人攘取徒紛紛。竊國竊鈞分大小。斬刈淪溺同亡身。我聞客言三太息。可備野史傳其真。君不見古來讓以天下惟恐晚。世間尙有洗耳沉淵人。獻賊之虐。愚民之貪。同歸於盡。中寫楊展義勇能以鄉兵截殺羣賊。大是快人。

自彝陵州發棹至黃牛峽

江月欲落晨雞鳴。客船未發官船行。曉風颼颼舟子喜。蒲帆吹出彝陵城。鼓聲坎坎日方吐。船頭漸聽灘聲怒。棹轉俄驚又一天。桃花雞犬回頭誤。入峽愈深山愈奇。半雲半雨崖傾欹。疾風捲水水欲立。紛紅駭綠相離披。盡日冥搜思縹緲。空裏無聲絕飛鳥。斜照西南一角天。數峯青入微雲表。初疑前山無路通。劃然一線開鴻濛。乃歎偉哉神禹蹟。人力疏鑿天無功。危灘更轉勢欲壓。路斷雲根疑倒插。噴珠跳雪從空來。不知此是黃牛峽。我聞昔日有黃牛。助禹開導疏江流。至今風雲相隱見。恂恍如有神人遊。百丈高牽不可越。行人到此真愁絕。一舟簸蕩波濤中。卻與魚龍爭出沒。吁嗟乎。黃牛峽水無時停。黃牛峽石無時平。人言雖險君勿怖。那得人間有平路。斜照西南二語。宛用虛寫危灘更轉以下。乃用實寫。率穠涼澀。聲勢俱壯。一結轉說開去。意境莫測。

錦江觀漲

桃花落盡春水生。錦江忽作輓雷鳴。奔流欲轉草堂去。大聲撼動芙蓉城。兩岸迴旋如走馬。飛騰上下馳流星。浪花排空百丈立。銀河倒瀉天爲傾。一氣渾噩渺無盡。乾坤不覺如浮萍。憶昔長江破巨浪。風帆乘我空中行。身如滄海渺一粟。性命直與蛟龍爭。今日江城看春漲。披襟想像神猶王。安得呼起滄花翁。相與乘舟坐天上。

苦雨有感

蕭瑟三秋序。沉冥萬里天。吳儂愁送日。蜀國雨爲年。時去名何與。詩窮老或傳。黃花應有恨。不肯放尊前。
兩爲年三字。新絕警絕。

入遠雲棧

飛棧盤空鳥路分。烟嵐霧樹合氤氳。人緣蟻垤紛相引。風遞猿聲斷更聞。百道爭飛天外瀑。千峯亂插馬頭雲。身當絕境渾忘險。不覺頻穿虎豹羣。

劍門

亂山迴抱蜀天昏。雙劍爲峯闢一門。怨鳥三春悲望帝。井蛙當日笑公孫。幽花怪木隨高下。冷霧荒雲自吐吞。千載漫多憑弔客。摩崖詩徧綠苔痕。
自注石壁多。鶴前人題詠。

翁

荃字止園。江南江寧人。○止園究心三禮學。與方望溪張舉歎諸先生說經經。經不以詩人自命也。即詩中寄托亦復抱負不凡。讀其詩可以觀其旨趣矣。

讀武侯靖節合集

士生三代下。著書日紛紜。武侯與靖節。述作稱完人。三聘出草廬。治國兼治軍。滅賊志未遂。鞠躬竟忘身。彭澤歸去來。恥爲二姓臣。甘守西山節。荆軻願空存。二公重志行。豈惟尙華文。隆中倘未出。悠然樂天真。柴桑苟任事。述祖抒忠純。易地則皆然。孟子曾有云。吾生千載後。展卷如相親。夢寐接古賢。心期共探論。還斬志顏尹。望古情彌敦。
三代下。漢以武侯爲完人。晉以靖節爲完人。顯晦不同。志節一也。篇中善於推論。結意尤高。

田家詩擬陶

窮經一生事。老至強荷鋤。先師鄙樊子。農圃謝不如。我胡忽改業。甘爲小人徒。珪組豈不榮。日與傾危俱。黽勉食其力。一飽安有餘。魂夢無縈擾。日高起徐徐。牀頭清酒熟。聊以解辛劬。

卜

煥字彤文山東
日照人諸生

愛菊

我非柴桑翁。素性亦愛菊。地不滿數弓。所栽備種族。泥沾洗餘滓。天暑障素幅。插援聊扶傾。除蠹恐滋毒。愛護同家兒。日夕榮顧復。花時繞畦看。相於淡無欲。遲暮亦何妨。霜餘愜幽獨。自號菊花農。頭銜珍令僕。
花品人品並見不
學陶自足陶趣

卷二十二

劉青藜

字太乙河南襄城人康熙丙戌進士官翰林院庶吉士著有高陽山人集○
太史既通籍彌刻苦自勵乞假後補官旋卒故發言爲詩多食齋腸苦之意

贈車同

癡雲壓長空。荒郊風栗冽。敝裘毛已禿。疲驢骨欲折。問君何所之。語次氣哽咽。子婦往歸寧。一病遂永訣。淮西有書來。返櫬資囊竭。況有小兒女。呱呱須提挈。燈昏漏且殘。爲君中腸結。麥舟愧古人。惆悵明朝別。

車同全軌字也。中河南解元。王漁洋稱許之。惜無從覓其詩稿。

友朋何寥寥。人事兼聚散。一飯別君廬。時日不可算。子嗟喪類仍。余苦病居半。酸辛勿重陳。倒篋煩點竄。

但愧嶺頭瀧。波瀾怯河漢。佳惡吾自知。洪爐休辭鍛。後會總茫茫。莫負燈花燦。太乙車同。皆愁苦之士。故以喪與病對言。後屬點竄。

詩稿望其攻瑕。誠古道交也。詞意清真。何從著得藻采。

杜少陵墓

萬里清明節。回頭憶北邙。可憐出巫峽。曾未到襄陽。故國三千里。羈魂二十霜。蹉跎稷契志。終古恨茫茫。

此甲少陵墓。故只就出巫峽。沒來陽言之。末二語志其生平之大者。

將赴都門

十載長安道。風塵鬢欲皤。天寧哀志氣。人盡笑蹉跎。日落汾邱壘。冰膠乾勒河。又驅羸馬去。惆悵意如何。

孟德疑塚

銅雀凋零鴛瓦殘。西陵遺塚徧河干。不知歌吹層臺妓。冷魄還從何處看。孟德疑塚。雄用心。不

王萃字秋史。山東歷城人。康熙丙戌進士。著有二十四泉草堂集。○秋史所居。近望水泉。元于欽所編七十二泉之第二十四也。少歲多否少。人以狂士目之。王漁洋田山隴二公賞其詩。

並奇其人。漁洋許其不以貧賤終。後果如其言。

南園

何處窳窳有敝廬。空存老樹與清渠。亂泉聲裏誰通屐。黃葉林間自著書。草色又新秋去後。菊花爭放鴈來初。慈畦舍北餘多少。取次呼童一荷鋤。

春日述懷

泉頭十九年前住。試看垂楊大幾圍。猶是隻雞招近局。依然山鳥怪儒衣。詩如上水船難進。身似沾泥絮不飛。屈指年華竟虛擲。從前悔未買漁磯。

讀吳野人集

海上吟詩到白頭。菱花滿地一沙鷗。一生不出東淘路。自有才名十五州。

弔張布衣

拜杖譙樓血肉飛。少年帕首奮重圍。惜君生後陳同甫。獨使丹陽有布衣。布衣名秦運。明末上書開府。陳戰守之策不用。杖四十推墮城下。

下幾死。秋史另有張布衣傳載其事。

吳士玉 字荆山。江南吳縣人。康熙丙戌進士。官至禮部尙書。謚文恪。著有吹劍集。

玉帶生歌奉和漫堂先生

先生原本云。楊鐵崖有七客者之寮。以貯所藏笛。琴。管。胡。琴。古。甕。與。研。並。已。爲。七。六。客。各。錫。以。嘉。名。而。硯。舊。寶。於。文。丞。相。紫。質。玉。紋。所。謂。玉。帶。生。也。丞。相。殉。國。硯。歸。謝。臯。羽。轉。歸。鐵。崖。鐵。崖。作。

志命門生張憲作玉帶生歌余幸觀奇寶亦贈以歌

中丞好古據幽情。示我寶研光晶瑩。紫衣通身腰橫白。云是景炎故物玉帶生。曾遊鐵門翻白雪。向陪臯羽號冬青。其先文山早結契。揮灑神筆凌霄嶺。銘錫貫珠四十四。至今的燦光日星。業几摩挲追往事。感慨鬱律何能平。或云信國當年初射策。生也卽隨顧盼趨承明。萬言一掃盡龜鑑。鐵肝石膽生風稜。轉瞬烟塵昏瀕洞。生同顛隕哀零丁。丹心磨礪句不滅。正氣磅礴歌吞聲。天崩地塌壯士死。但聞西臺擊竹聲。悲鳴可憐宋社淪海水。片石迺有神靈憑。鼎遷者三載五百。貞質不毀堪嗟矜。英英紫玉暈痕透。有如白虹貫日昭精誠。仰止孔石自注孔遺研陋桑鐵。笛管之族非其朋。焦琴況出自奸相。自注琴爲賈似道故物蘇糞那混申。椒馨彼哉客寮並。數七嘈雜非偶徒。虛名豈如我公位置肅。左圖右史箋遺經。濡翰端可幹元化。作歌雅欲親典型。公歌突過玉笥作。爲生寫真垂千齡。萬言一掃四語見硯與文丞相一生開切後將買似道之琴作一反觀忠姦判別波瀾不窮矣作七言古須得此法

稽曾筠字松友江南無錫人康熙丙戌進士官大學士陸文敏

五臺山

昔人一覽五臺勝。謂可不須五嶽遊。把詩令我神輒往。襍被欲發仍勾留。那知山靈有深眷。銜命太原償此願。見山已自開心顏。況復驅車到天半。摩霄跨漢何窈窕。呼吸直與精靈通。疑是媧皇此煉石。化作五朶青芙蓉。聞說東臺特奇妙。拾級先登縱遐眺。夜半湧出硃砂丸。海外天雞猶未叫。山僧復導過西臺。舉

頭正喜鴻濛開。陰晴涼暖變俄頃。颯然萬里邊風來。遙指南臺高幾許。蹈虛躡險如霞舉。上方歷歷見星辰。下界冥冥自風雨。欲往北臺更飄瞥。分明引入水晶窟。陰崖高疊萬古冰。幽澗長流千歲雪。中臺宛在山中央。云是文殊舊道場。馴虎何曾避行客。伏龍猶自依空王。飛泉宛轉當檐落。注入清池長不涸。鏡中大可印禪心。惟見一泓開澹漠。小憩剛逢梵課餘。妙香冉冉飄衣裾。到此能令衆緣息。祇有夙好猶難除。攝衣餘勇更一鼓。直上蓮花嶺頭坐。兩九日月足底生。百道烟霞腰下裹。一峯萬狀難具論。諸山環侍猶兒孫。置身合在最高頂。俯瞰一氣渾無垠。登高倘使心不猛。奇勝何由得全領。從知萬事須造巔。賴得茲遊發深省。竭來幸得公務閒。閒情暫寄水石間。幽吟頗得清淨理。遐賞適在清涼山。卻爲王程難久住。搖鞭又入紅塵去。回看一片出山雲。不識爲霖向何處。明點五臺。移形換步。登高造巔。悟及立行。結到出山之雲。雨澤天下。宰臣心事如見矣。

寄天津范自牧觀察

有母常教獨倚閭。顯揚無計愧何如。南溟鶴唳歸華表。吳地冰霜逼歲除。倘憶通門重啓事。定教伏闕上遺書。忠魂已化萋弘碧。雪涕君恩浩蕩初。哀贈公懷節母也。閩詩意應是未通籍時作。

登披雲山眺海

披雲更上一層臺。睥睨乾坤獨舉杯。海勢欲浮台宕去。濤聲直撼斗牛迴。三秋笳鼓當風競。千里艤幢蔽日來。爲詔奸雄齊解甲。聖朝懸爵待招徠。

俞兆晟字叔穎浙江海鹽人康熙丙戌進士官內閣學士○公視學江左時諸生進謁相接如先生弟子論文行外兼及詩品畫理以二者皆公所長也清風和氣至今猶想慕之

吳宮曲

館娃春深畫寂寂。美人列坐彈瑤瑟。自裁白紵六銖衣。回雪流風侍君側。清歌珠串鼻入雲。梁塵不動花繽紛。繁絃急管停復作。當筵催進泥金裙。軍聲殷殷來構李。犀甲晶瑩照秋水。破楚門東鐵騎圍。君王夜醉扶不起。白紵歌殘事已非。洞庭漁唱雨霏霏。至今城上烏啼急。猶聽吳娘夜擣衣。悠揚婉轉結處一聲中有無限餘聲

蔣

綱字有條廣西全州人康熙丙戌進士

舟次書感

蒲帆一幅挂秋槎。渺渺煙波去路賒。不及茂陵歸有壁。翻同杜老別無家。囊中長物餘詩草。道上重陽負菊花。他日縈懷在何處。知予依斗望京華。妙能活用

鄭任鑰

字魚門福建侯官人康熙丙戌進士官至湖北巡撫○江左多名學使公其一也生平不以詩重而詩亦可傳

春蠶詞

蠶月人家愛晴旭。紙筐分葉聲滿屋。三眠過後桑樹稀。稱來銀蠶纒爲絲。山村日午緯車響。榆柳陰陰煙火遲。憶昔民間累苛派。新絲二月長先賣。近年兒女有完襦。急公更足償私債。艱難衣食在農桑。年年拜祭馬頭娘。不辭小婦閨中苦。願作山龍藻火裳。他手每說蠶之苦此用翻案法見閨中女子忠愛有餘先生補衮之心言中流砥柱矣

喬崇烈

字無功。江南寶應人。康熙丙戌進士。官翰林院庶吉士。著有學齋集。

悼亡

慘目復慘目。掩涕入汝房。攬鏡泣孤影。撫枕悲殘芳。嫁衣亦已敝。繡幕無時張。篋篋遺素壁。刀尺緘空箱。種種感故物。脈脈想容光。憶汝初歸時。盛飾拜姑嫜。錙銖今何有。毀棄坐我窮。叶往余客京師。心念第三郎。料知需玩弄。買來小銀鐙。封題託鴻羽。更著書數行。嗟我寄未到。此子先天殤。汝每持以泣。因之汝亦亡。那更復見此。能不摧肝腸。末買銀鐙寄歸一段。愈瑣屑愈見情真。

立秋日枕上

新涼滌殘暑。細雨作秋聲。笛簟初宜夜。鰥魚自愴情。草荒原上塚。夢斷驛前更。來日憐兒女。單衣補未成。

徐用錫

字壇長。江南宿遷人。康熙己丑進士。官翰林院侍講。

關峽早行

柝響知關峽。東方尚未明。蛇紆危壁路。雷走大河聲。星落寒燈見。沙崩疲馬驚。一夫須設險。塞下尚連營。

三語鍊在危字。
四語鍊在走字。

張麟書

字玉函。江南華亭人。康熙己丑進士。官翰林院編修。

早梅

夢寐難忘姑射姿。春山無伴每相思。誰將暖律翻三弄。卻遣芳魂返一枝。淺瀨影疎人小立。曲簾香動鳥先知。賞心不待花如雪。好在寒冰未解時。

繆

沅字湘芷。江南泰州人。康熙己丑。賜進士第三人。官至刑部侍郎。著有餘園詩鈔。○司寇視學楚中。延四方名流校閱。所得人文極一時之盛。楚人爲予稱道之。詩舊入江左十五子選中。

予曾評點。後披全稿。見中賜朱墨。改易所云。老去漸於詩律細者耶。

王孝子詩

丁徭日繁重。閭戶多逃亡。文安王氏子。飄泊辭故鄉。棄我舊井竈。舍我舊耕桑。甘心雜匹耦。各自東西翔。故鄉不能歸。涕泣淚如雨。一燈何熒熒。健婦搗門戶。生兒在襁褓。日夜尙須乳。兒生未十期。兒志如成人。上堂見阿母。兒有平生親。兒生不知父。兒不如鮮民。阿母爲兒言。汝父久埃塵。上天與入地。欲見愁無因。孝子聞母言。含淚聲酸辛。團圓復團圓。爲兒授家室。登堂見花燭。吞聲哭不得。兒生未識爺。何以安枕席。誓辭連理枝。永遠事行役。再拜阿母旁。泣血流顏色。出門何所之。惘惘別里門。長號感行路。天地爲之昏。日則望雲馳。夜則戴星奔。飛篷冒天末。何處尋本根。行行大壑旁。僵臥荒祠外。精誠動木石。魂魄交冥昧。開門揖老叟。夢中與神會。午食見指南。莎羹未粗糲。當歸乃隱語。不聞附子膾。迤邐入東南。山澤形神枯。黃沙蝕顏面。瘡痍生肌膚。果然帶山下。夢覺逢精廬。佛香飄院落。有客蒼髯鬚。詢知舊鄉里。驚喜立坐隅。尋聲猶識得。精神相感孚。父子抱持哭。淚落千僧徒。慇懃勸還鄉。緇林戒行李。入門見

老妻毀顏已暮齒。新婦潔盤餐。爲翁具甘旨。至行格天地。和氣浹鄉里。高曾遺矩矱。子孫遍朱紫。至今道
旁人齊歌王孝子。胎源於孔雀東南飛一章。中間夢與神會一段。妙在若可解若不可解。

房中詩

嬌兒衰師繞案長。文如翻水聲琅琅。夜堂篝火攤書讀。吹落燈花紅簌簌。小者玉頰好眉宇。手持黎粟能
爾汝。中男依兄坐短檠。毛詩新讀一半生。山妻椎髻夜操作。手弄諸雛共笑樂。頻年踪跡隨天涯。賴汝
勉能持家。不爲楚相君勿哂。與君相偕鹿門隱。孺仲一家可云有道妻子。皆得快樂。司寇非隱人。而家庭之樂。與孺仲同也。語語用韻。兩韻一轉。格調得自嘉州。

袁術

公路浦前白日昏。千重駭浪猶奔騰。袁曹昔時爭戰地。秋原尙作黃雲屯。兄弟鬩牆事堪歎。術也讎紹翻
結瓚。謬算適足羞先公。強云圖讖天所贊。里謠誰記當塗高。僭號不聞閭象諫。符命之說誠荒唐。當車有
臂疑螳螂。江淮凍餓士卒死。宮中日夜爲荒亡。蛾眉皓齒競害寵。馮家小女悲懸梁。灑山之敗所自致。江
亭奔竄如亡羊。堆牀十斛僅麥屑。一勺入口無蜜漿。當時割據意何取。離離滿目悲禾黍。我來袁浦爲弔
古。老龍晝眠蛟夜舞。鯨波蝕盡戰場土。衆尊爲帝。而欲奔匈奴以自絕者。劉虞也。因當塗高識語。而欲自稱爲帝者。袁術也。漢末羣雄。惟術爲至愚且妄。身死後。妻孥不保。亦惟術爲至慘。篇中綜本傳始終言之。不漏不支。自然中節。

送顧嗣宗返吳門次留別韻

韓孟雲龍日夕依。故山猿鶴久相違。人如諸葛真名士。品是江東大布衣。吳地烟嵐應入夢。楚天鷗鷺漸忘機。步兵日有蕞鱸思。隱語當歸且緩歸。

訪汪鈍翁先生故居

山光塔影尚嶙峋。遺築丘南野水濱。草沒垣衣何限感。乞花場上弔詩人。乞花場鈍翁先生所居。

張大受

字日容。江南嘉定人。康熙己丑進士。官翰林院檢討。著有匠門詩文集。○先生未第進士時。即已陶成土類。既入館。選汲引尤衆。後有貢之者。弗與校。且若不知也。吳中宏獎風流。斷推匠門。今沒世已久。過其故居者。猶想望餘風。

馮駢語韻語。皆清新獨出。披其集如遇其人。

魯肅廟

闕達謀吳策。幾微保漢心。才輸公瑾捷。道契武侯深。夏口帆初上。龜山廟至今。靈風吹赤壁。城北雨沉沉。肅始迎先主於長阪。繼勸吳主召周瑜。選與武侯共破曹操。後又勸借荊州於劉則肅匪獨忠于吳。兼能保漢也。十字中包括無限史事。三四申言之。

送顧祿百外孫

博識蟲魚晰。閒吟花草工。長康三絕擅。東野一身窮。老我離思外。慈親望眼中。榮名真不朽。雲樹隔江東。

慕廬先生還朝

交無洛蜀本和衷。雅量分明司馬同。常以文章推後輩。久將政事托羣公。委蛇晏退裘應敵。狼藉髡留釥。莫空出處古來雲。變化芳馨誰播史書中。韓公得詩。答以斷句云。扁舟不怯蘆裝薄。好語穿來一珠吟。到交無洛蜀。句千秋牙曠賞音。孤以公中朝子立不隨黨同。詩

能得其素心也。三四亦惟公足當斯語。

睢州謁湯公祠

過宋頻登夫子堂。傳經應比鄭公鄉。曾遊霽月光風裏。早歎浮雲白日旁。衆母至今歌子產。伏龍疇昔起南陽。音容似昨人千載。贏得吳民淚溢眶。茂叔襟懷伏龍出處國僑遺愛而不免浮雲之蔽日君子歎息痛恨於方正不容也事久論定曲直顯然彼譖人者亦何益而哉。

送沈子大赴江西

才子秋風淚點多。遠行霜曉唱騷歌。三年皮骨空人役。千載文章奈命何。紫氣豫章龍變化。青峯彭蠡雁經過。舊時慷慨南征賦。送客都門髮已皤。

答袁虎文

重遊梁宋訪心知。一揖尊前感贈詩。射虎舊誇從李廣。鬪雞今喜逐袁絲。文章白璧元無垢。意氣青萍兩不疑。歸到江南最相憶。小園風雨對牀時。

呈竹垞先生四十韻

日月懸鴻筆。江湖伴釣翁。斯文如一髮。此老不三公。世溯章賢相。生稱江夏童。異書都默識。疑義若披蒙。瑚璉珍初待。金刀數正終。蘭成終竄谷。王粲早飄蓬。寄興滄溟外。悲歌燕趙中。揮箋迴雪白。拍板落花紅。

劍拔看天小。觴浮覺海空。但隨遊野豕。未卜漸遼鴻。當代旁求說。盈朝並薦雄。對揚欽學邃。拔擢荷恩隆。太白官供奉。龍門史折衷。掄才弘鐵網。校藝試青銅。書卷裝歸橐。神仙近法宮。騎將天廐駿。捧出御書虹。自此期調鼎。無端怨失弓。歸來操翰墨。吟笑脫樊籠。醞舫波還泛。書亭日久烘。聖經羅象緯。物理析魚蟲。注地鄧元似。論詩蕭統同。采飛神每助。斤運帝無功。鳳小能翔漢。蘭摧莫叫穹。暮年餘痛哭。篤志益明聰。鹿引晨穿屐。龍聽夕倚篷。門生輿請舁。朝士刺求通。斯畫珊瑚缺。邕文金帛充。共知占蔚豹。仍望載非熊。小子勞鑽仰。先生發覆蒙。逢人憐抱璞。知己撫炊桐。再謁鴛湖曲。高談桂樹叢。森森開武庫。藹藹挹春風。世路誰輕薄。耆儒只困窮。養心欣事簡。餬口幸年豐。角里芝徒采。春卿爵可崇。人情留樸拙。天氣值和融。三歲依門下。千秋歎道東。經營慚小技。雕斲冀良工。廣樂陳鼗鼓。凡民警贖聾。升堂私有願。陶冶及纖洪。

題徐大臨湖鄉小景

鳥背嵐光過夕汀。碎萍魚唼水花腥。青山一角湖三面。記是塘西乙未亭。七言絕句。唐人以神韻勝。宋人以清新勝。此宋體中最高者。

山居

愛看支硎一角山。何妨身臥薜蘿間。峯頭片片秋雲白。不礙虛亭鶴往還。

清流道中梅花

駐馬清流香氣吹。東風漸近落花時。可憐躑躅關山路。才見江南第一枝。

惠士奇

字仲孺。江南吳縣人。康熙己丑進士。官至翰林院侍讀學士。著有牛農人詩。○牛農少卽篤志經史。而於經學尤深著。有易說春秋說禮說大學說等書。皆晚年論定者。視學廣南。以通

經術爲先務。空疎舊習爲之一變。操行之潔。比於白圭振鷺。廣南前此未嘗有也。身後祀於韓山。配食昌黎韓子。至今尸祝之。詩近唐人。以自然爲宗。視研豁先生家學各有所得。

除夕寫懷

捋門賴健婦。頗憶貧孟光。今夕復何夕。洗手調羹湯。辛盤與椒酒。一一親排當。夜半理梳裹。燈前事晨粧。君姑尙未起。雞鳴候高堂。駒躑借先後。雜珮鳴珩璜。我亦夢到家。身侍阿母旁。烏啼忽驚覺。仍在天一方。夢回思往事。石闕空銜悲。緬惟遭喪日。事遠尙可追。先君昔遷謫。家細不得隨。二載密雲尹。溘然遂長違。時余行未至。伯兄適南歸。飯含未及視。安用有子爲。一棺尙寄旅。僻在城南陲。遙憶今夜奠。紙錢風吹灰。吾聞古喪禮。未葬不釋縗。念此痛欲絕。有如刺心錐。哀歌不成曲。我唱和者誰。二章發乎至性。不以辭句爲工。

坐月酬鄭 賦

見懷之作

明月上西軒。流光照積雪。開軒一長望。皎皎千里潔。佳人怨遙夜。起坐彈金屑。爲我操孤鸞。悵然感離別。相思報瑤華。無使音塵絕。

牧童詞

溪水碧。溪上牧童青。簞笠烏韃斜。繫柳陰中。藉草臥吹三孔笛。橫鞭還過飲牛亭。亭邊撲撲飛牛蟲。雀兒鼓翅蝦蟆跳。陂塘水滿齊牛腰。歸來仍放青山郭。遠樹杆杆烟漠漠。日暮聞歌不見人。隔林月下敲牛角。

連下二章，皆張王體中最雅潔者。

樵客行

春山暮，山花吹滿樵人路。平原淺草連天遠，樵風初起樵雲捲。數聲樵唱出林間，夜夜歸來擔頭滿。曉上陰崖逢月黑，前溪虎去猶留迹。昨宵山水漂人家，失卻澗邊磨斧石。伐木當伐檀，刈薪當刈蘭。刈蘭爲佩檀爲幅，免使年年老空谷。

田家行

二月青蟲初化蝶，三月紅蠶欲斷葉。桑榆門巷綠陰成，四月家家纒白雪。屋邊豆苗垂宛宛，鴈齒叢長雀梅短。道中歷亂蝦蟆衣，昨夜風來牛跡滿。竹雞啼罷楚鳩語，十日田家九日雨。平旦開門看天色，聲聲老扈催收麥。日出腰鎌向隴頭，桑間驚起黃離留。

送蔣樹存之官餘慶

憶昔識君年弱冠，風流文酒長耽翫。無事頻過交翠堂，觥籌往往行無算。二月山塘柳色青，玉簫金管醉中聽。可憐明月初三夜，最憶春風第一亭。沉沉玉漏鳴街鼓，寂寂春陰月停午。燈前一曲柘枝新，小玉僂僂踏筵舞。雲散花殘事已空，秦淮水榭又相逢。三條共翦深更燭，五夜同聽鎖院鐘。數載飄零不相見，去年忽覩雲卿面。待詔吾留金馬門，修書君上南薰殿。只今天子急循良，莫恨天涯道路長。烏撒白苗生似

鹿。禽。丁。溪。子。狼。如。羊。邊。氓。正。欲。煩。君。撫。況。有。君。家。理。縣。譜。九。溪。斜。繞。葛。蠻。司。十。洞。遙。連。金。竹。府。不。知。握。手。在。何。年。離。別。今。朝。倍。黯。然。待。爾。歸。來。尋。舊。約。月。明。重。泛。虎。邱。船。寫。難。合。聚。散。情。事。可。入。管。絃。○。理。縣。譜。係。傳。瑛。父。子。作。令。事。事。見。南。史。此。應。借。用。

送陳秋田先生之官長寧

善。卷。洞。裏。咀。丹。客。玉。液。朝。朝。鍊。精。魄。偶。然。作。吏。山。水。邦。衣。裳。猶。帶。雲。霞。色。昔。年。曾。到。瘴。江。濱。布。襪。青。鞋。萬。里。身。邑。里。時。逢。烏。蠻。戶。居。民。半。是。馬。留。人。今。年。仍。往。西。南。徼。路。遠。健。鷹。飛。不。到。劍。閣。回。看。北。向。雲。石。門。遙。指。南。征。道。知。君。才。似。寇。巴。東。莫。歎。生。涯。類。轉。蓬。登。棧。人。行。紅。樹。杪。隔。溪。猿。嘯。白。雲。中。平。林。芳。草。萋。萋。綠。從。此。連。縣。到。西。蜀。月。上。峨眉。一。片。秋。煙。銷。巴。水。三。回。曲。瀘。川。渺。渺。夕。陽。低。更。在。瀘。川。西。復。西。遙。想。訟。庭。春。寂。寂。海棠。花。發。杜。鵑。啼。

張文獻公廟

海。燕。辭。巢。日。何。曾。戀。舊。痕。南。州。一。麾。去。北。闕。幾。人。存。蕃。將。頻。蒙。寵。胡。雛。竟。負。恩。淒。涼。謫。仙。怨。空。向。曲。中。論。自。注。副。談。錄。玄。宗。幸。蜀。次。駱。谷。下。馬。望。長。安。鳴。咽。流。涕。謂。高。力。士。曰。吾。用。九。齡。之。言。不。至。此。因。上。馬。索。長。笛。吹。之。有。司。旋。錄。成。譜。名。謫。仙。怨。○。即。少。陵。所。云。受。諫。無。今。日。臨。危。憶。古。人。也。公。歸。南。州。而。李。林。甫。牛。仙。客。用。事。矣。北。闕。尚。得。有。人。乎。幾。人。存。疑。言。之。也。

廣州十二月書懷

風。物。娛。遊。子。孤。懷。強。自。寬。鷓。鴒。知。歲。暮。鸚。鵡。訴。冬。寒。山。上。飛。鳴。好。樊。中。飲。啄。安。可。憐。珠。樹。鳥。無。地。避。金。丸。

白注西陽雜俎鷓鴣正月一飛至十二月十二起新唐書林邑獻鸚鵡數訴寒詔還之○寫飛鳥即自抒懷抱

姑胥臺懷古

五道通諸郡三江繞故都白猿終霸越黑犬竟亡吳人去空芳草春來長綠蕪蕭蕭楊柳岸愁殺夜啼鳥

黑犬及下章公孫聖事俱見越絕書

好上三臺望還從九曲行可憐文種水猶抱伍胥城風雨松陵暗煙波笠澤清公孫今在否寂寞久無聲

自注公孫聖曰我死當使後世有聲響及吳亡三呼三應

題座主安溪相國紀伯父葆甫先生破賊詩後

孤城鼓角四山聞刁斗聲中五夜分獨領數人探虎穴何如一鶴入鴉羣青袍不改儒生服白馬偏成上

將助萬丈峯頭餘故壘千秋猶說李摩雲李罕之攻破摩雲山樹柵其上時人呼爲李摩雲見五代史

送徐亮直編修奉使琉球

海神擎日映波紅此去扶桑直向東鯨眼常明無月夜蠶身能使不帆風天書捧到恩應渥唐帕傳來語

盡通自注唐帕譯者之名想見中山迎使節踏歌齊擁紫髯翁烟開蘇背千尋黑日射鯨波萬頃金三四語足與相敵

張照字得天江南華亭人康熙己丑進士官至刑部尙書諡文敏○文敏性地高明通釋氏教所作詩左磔右觸皆禪語也予未諳禪理仍取主性情叶風雅者

觀海

境界真無兩。聊爲物外觀。乾坤浮一氣。今古浸雙丸。野鳥飛難過。眞仙望亦寒。人間白少傅。高詠海漫漫。
乾坤十字。本魏武東坡句意。鏘而成詩。可以壓倒一切。

蓬萊

蓬萊山下水橫波。流入銀灣隔翠蛾。天上星辰歡會少。壺中日月別離多。鸞驚香夢紅蘭笑。花帶愁痕青鳥歌。昨日子登傳敕去。一時齊羨下天河。
此卽悼亡之作。以李義山體行之。不使人一覽而得。

悼亡

邊關暑夕冷於秋。孤鶻驚飛別樹頭。此夜萬家明月裏。幾家思婦獨登樓。

秦道然

字維生。江南無錫人。康熙己丑進士。官翰林院編修。著有泉南山人存稿。前明高忠憲歸季思二公詩理足於中。不假修飾。得陶公一脈。泉南先生亦然。無理語。有理趣。別乎白沙定山流派。彼求工詞句。與說理入腐者。均不知其品之高也。能觀陶詩者。欣然遇之。

山居詩

山齋寂寂。玄鳥初來。春風融融。林花乍開。共二三子。撫景銜杯。從容詠歌。吾師點哉。
自寫天機。人力不與。

靜坐吟

我愛山中坐。白雲來無時。垂天自靄靄。歸山亦徐徐。青松千歲姿。天矯干霄枝。舍此不棲鳥。營營竟安之。超然無懷世。日夕心神怡。

我愛水邊坐。照我遺世情。周流雖不居。瑩澈全其真。蒲蘆依渚碧。杜若方春榮。波間雙白鷗。游泳不復驚。高天雲影淨。相對同涵清。

夏日閒居

何以娛永日。對景常忘言。棲遲詎非計。造物與我閒。碧草長庭除。珍禽息樹間。微風生秋意。雨氣在遠山。良友欣然來。小酌俱陶然。柴門月色裏。相送溪橋邊。

春日月坡初成

湖干月無際。月坡先得之。山人倚杖間。坡上月到時。逝者不可留。明月常如茲。田夫荷鋤歸。漁舟亦夾斯。笑言隄柳畔。誰云不相知。仰觀天宇空。不礙浮雲馳。千川同一月。孰寂亦成私。撫景時有得。古人吾所思。千川同一月。化機之大公也。若寂守一川。則惟此川有月。則私矣。此吾儒與釋之別。

湖上閒居友人適至

昔人感離羣。吾亦念吾友。片帆湖上來。扁舟繫隄柳。呼童掃三徑。欣欣競奔走。清言味道腴。庶慰別來久。相期在千載。聚散亦何有。結契不同方。合併亦非偶。載歌伐木章。真氣滿戶牖。

張光靜坐

一涉山水趣。所得常有餘。況茲禪境寂。更值三春初。嵐光照几榻。花氣盈庭除。忽聆清磬音。頓覺塵跡疎。

先聖言淵淵。瞿曇說如如。門庭別疑似。當別靜與虛。欲識道味腴。莫厭山中居。

從釋教引入吾儒。儒教主靜。釋教主虛。靜能生動。虛

不能生實也。靜與虛判然。即公與私判然。

詠史

六籍委秦燄。聖學棄榛蕪。董子乃崛起。遺經究始終。不沿縱橫流。不將枝葉窮。精心契先聖。高文發羣蒙。

譬如剝復間。微陽生窮冬。譬如百世系。一線傳其宗。孟氏醇乎醇。繼之則有公。何為昌黎書。乃稱軻與雄。

昌黎亦指揚氏之疵。而軻稱之者。溺於辭章之學也。此能明道脈之正。

偶作

文章從何生。其道本自然。中天列象緯。川岳蒸雲煙。風來水生波。春至花自鮮。人心何所有。出之則繇繇。悟此無文意。至文乃生焉。嗤嗤夸毗子。綺麗徒爭妍。

老境

天運日推遷。人生有大分。隆冬百蟲蟄。分耳非為困。老年精力衰。聰明安所騁。冥心了無作。無作乃無悶。

李

絨字巨來。江西臨川人。康熙己丑進士。官至戶部尚書。著有穆堂初集。穆堂來吳。問字於匠門。而學問各有所得。匠門主溫雅。穆堂主闊大也。詩品不加修飾。亦復自見風標。

夏至日滎澤渡黃河

日車方北至。我馬獨南行。廣武風猶壯。黃河浪不平。澄清誰攪轡。憑弔漫霑纓。前路雄關近。平靖當年駐。

重兵。

秋山學圃爲張章齋明府題

莊鳥經春祇越吟，菜根滋味憶山林。夕陽千樹鳥聲寂，涼月一庭花影深。宰塔波原難作宅，磨兜堅已自題箴。惟餘結習殘書在，窺見羲皇以上心。
章齋匠門弟也。識穆堂於未遇時，去官後暫留江右佛寺穆堂作詩贈之。

驛南舖不寐

草舍摧頽早戒更，旅人靜夜倍淒清。沉沉戍鼓樓頭動，宛宛參旗天半橫。短燵一空雞絕唱，敗槽百鬪馬多聲。十年夢想公車路，支枕連宵白髮生。
荒謬情事，身親其境者能言之。

方式濟

字沃園，江南桐城人。康熙己丑進士，官中書舍人。○中翰隨考堯宗水部居塞上，服勤左右，以慰晨昏，著五經一得書未成而卒。詩格清真，樂府尤嫺然拔俗。漳浦蔡文勤謂其秀骨獨異，清音自適，誠定評也。後以子問亭宮保貴，贈如其官。

遠行曲

結束語童僕，雞鳴看天曙。辭我鄉里親，曳屣出門去。出門口無言，寸心煎百慮。請取囊中琴，暫坐理絃柱。一彈示知音，音新知者故。人情戀鄉井，冰霜況歲暮。此身值賤貧，焉能樂完聚。嶺高猿狖墜，水急蛟龍怒。行行將何之，白日沙飛路。
此卽省親出門別，鄉里親交而作。

鐵五送至蒲河賦別

勞骨不遑席，脂車迫東馳。晴日照大野，去去從此辭。相送蒲河陰，感激潛酸嘶。戀景重須臾，念當生別離。我有數行淚，欲墮還自持。死化桑下蠶，吐君衣上絲。生同比翼鳥，夜夜長相思。生死如浮雲，素交山不移。

八月十七日霜

土牀入夜氣，骨冷火不溫。起視手種花，委仆墻籬根。早霜纔一夕，不緩須臾恩。窮邊無林柯，後凋誰與言。柔條受戕伐，悼惜同蘭蓀。回憶故鄉暖，萬里傷征魂。窮邊十字見投獻荒遠雖抱後凋之節人誰知者可以悲其志矣

護菊

盆菊瘦亦花，尺莖綴錢小。荒地苦栽培，強說顏色好。種從鄰圃移，南階漑昏曉。八月藏戶牖，扶護費探討。而胡傲霜姿，翻畏寒霜早。人實累此花，人實累花怨而不怒

掃地

抱帚倚戶立，寒風吹衣巾。凌晨汲土井，灑掃庭陔塵。掃塵不掃雪，留取寒意真。棄帚出門望，邊塵浩無垠。俯視穢草積，仰見黃雲昏。放廢敢晏安，勞力清心神。強鍊未死骨，涸水潛窮鱗。家破散如雨，一僕隨征輪。偶効胼胝力，賴顏翻辛勤。萬里親童奴，傲惰誰能噴。

采萱

曉起望術阡，萱花盈古道。采萱欲忘憂，佩之轉紛擾。豈有壯士懷，聽命寸莖草。勿謂百年短，計日不爲少。

憂更多於日，忽忽憂中老。蕙茝化爲茅，勿歎秋風早。人能自立，雖處憂患，不傷品節，倘茝蕙化茅，即日受和風，亦何益之有哉。

蜀錦曲

蜀錦機長越羅短，繡出鴛鴦春水暖。姊妹綺年俱遣嫁，空閨寂處蘭膏卸。女貞擇對師孟光，依然操作紉蘭纒。藏有天孫五色線，鮮明巧奪雲錦章。願縫堯衣與舜裳。借貞女縫紉傳出山甫補，哀意忠愛之思，藹然言下。

隴頭水

河水濁，江水清，妾似隴頭水，清濁自分明。昔爲田家女，擇婿嫁邊吏。田夫入城不隔宿，邊吏年年在邊地。聞道梁州新破虜，燉煌已入中朝土。戍卒受賞官封侯，血裹冰霜凝繡斧。主將笑擁雙嬋娟，箏瑟夜醉穹廬眠。橫塘水接隴頭去，送妾雙淚流君前。田夫入城不隔宿，俚俗語，轉與古樂府近。

題遂安鄒廣文效忠圖

遂安城大如斗，賊兵來，縣官走。儒官罵賊賊縛肘，乘機遁出豺狼口。集衆擊賊挺在手，妖星一掃寧雞狗。賊伏莽，去還來，城門火，棲烏哀。登陴矢石驅風雷，狂氛惡霧層層開。釋重圍，士民喜，歸我絳紗帷。理我舊書史，孤忠未顯微官死。當年佐陣兒折齒，兒今抱圖獻天子。音節詳明，忘其爲酬應之作。

送朱鹿田之任蜀中

天入萬峯攢，羊腸路屈盤。黃巾追往事，朱邑幸之官。復業民無幾，催科政待寬。從今行蜀道，歌唱不知難。

呂謙恆

字天益河南新安人康熙己丑進士官至光祿卿○光祿詩烹鍊兄元素司農詩古雅新安二呂並重於時

望嶽

馬首三峯近林端萬壑封青天迴落鴈赤日抱蒼龍玉女時吹笛仙人此種松罡風何處斷忽聽九霄鐘

起二十字雄渾蒼壁華嶽已落我手通體只是望不是登此作家本事

西鄉對月

纖月照闌干愁心夜獨看光流千嶂動影入萬松寒銀漢何清淺金波自淼漫臨風旋起舞烏鵲過林端

寧鄉道中

奔峭時相引盤回勢屢遷雪峯藏白日雲谷束青天路轉啼猿裏人行飛鳥邊懸車頻度險回首失三泉

自注三泉地名○藏字束字極錘鍊之功

望吳嶽呈王使君擬山

吳嶽高寒蔽蜀門巡檐跋望肅心魂地形近接關山脈禮秩遙同太華尊衆壑雲雷生白晝中峯星宿落黃昏凌風欲躡王喬舄玉粒丹砂信可捫

五六語總經捶鍊而出故能字字奇警

送澤州相國予告歸里

元老承恩帝里回奏書三上曰俞哉丹心寧恕蒼生望白髮方看綠野開綸閣有章光日月巖城無地起

樓臺他時天語還存問。沁水遙瞻佳氣來。五語表其奏疏光明。賢於孔光割草之嫻。六語表其持躬潔白。同於寇萊公行之清。有官居鼎鼐無地起樓臺。魏整呈萊公也。

登岱

煙嵐雪瀑見鴻濛。閭闔平分一氣中。身倚青蒼巖壑迥。目窮雲水海天空。雞鳴半夜騰潮日。鐘落層霄響澗風。七十二君勞想像。盤回輦路望龍從。

方

覲字近雲。江南江都人。康熙己丑進士。官陝西布政使。

定興縣謁楊忠愍祠

倔強楊員外。鄉閭尙有光。何須冠獬豸。直欲問豺狼。伏鑕差無補。當車肯自瞳。荒祠臨野水。肅拜奠椒漿。忠愍本無言責。而欲爲國除奸。置死生於度外也。三四擲地有聲。

七夕

佳時臥病更添愁。枕簟涼生覺早秋。蓋篋儘教塵網遍。三年不上曝衣樓。佳節悼亡。倍難爲懷。予作七夕辭。亦有句云。只有生離無死別。果然天上勝人間。同此感也。

子規啼

平羌江口江水清。峨眉山頭山月明。江樓望月人未寢。腸斷子規啼一聲。

吳

翊字振西江南太倉人康熙己丑進士著有樂園集○振西係梅村族孫為諸生時學使者試適才人學人兩者兼之梅村之流風遠矣

西山探梅

虎山橋頭太湖曲。花為銀海山為玉。湖鄉歲判梅花租。花開便抵湖田熟。我來繫艇南溪邊。晴空無雨山無烟。只有白雲三十里。模糊隔斷山中天。笳輿側入似無路。矮籬窄逕相迴旋。黏衣不嫌花霧重。壓帽更愛花枝偏。前迎後送迷遠近。豁眼條上山之巔。熨斗巖邊路幽仄。長旂嶺外連西磧。十家五家無別程。千樹萬樹同一色。微分螺黛障橫青。遙奪琉璃波湧白。出林更上蓮花臺。枝枝呈葉當門開。一擲凡軀衆香國。十年面目慙塵埃。使君仙尉如可喚。芳魂古魄何悠哉。梅花不老青山在。姓名清絕留蒼崖。吳儂愛花乏花趣。但貪狂賞慳清句。寒花謝客似有言。好勸幽人為少駐。舉西山全勝言之。誦其詩可當臥遊矣。使君晉青州刺史郁泰玄葬於此山。仙尉但詳其姓名不詳其姓。

洞庭山館呈司寇東海公二首

廿載鴻文典集賢。還鄉仍續石渠編。暫伸謝傅登山志。校勝溫公在雒年。嶽瀆遺經搜禹穴。金鑾舊記錄吳船。須知玉局閒居士。元是蓬瀛第一仙。健庵司寇去官後奉詔開書局於洞庭東山。準司馬相公修資治通鑑之例。蓋異數也。書係一統志。故有嶽瀆遺經。金鑾舊記。

云云

錦堂恩詔許歸休。妙選賓僚佐校讎。江左文章分史局。山中宰相起經樓。詩豪酒敵皆登座。野老溪僧亦伴遊。笑引韓門窮賈島。放吟同上碧峯頭。

謁范文正公祠

慶歷推英傑。龍圖景大賢。少思天下任。老至四夷傳。薰德吳風外。徵文雒學前。人師真百世。社祀近千年。緬昔孤如綆。登朝直似絃。垂簾誠宮闈。專柄斥樞銓。奮舌天心正。嚼膚黨議偏。賜環仍待制。筭鑰又從邊。地闢橫山壘。師承好水川。靈胸羅甲盾。蕃落靖戈鋌。卒踐三台重。終持十事堅。志伸恢舊典。遇短謝時權。育士開饗序。收宗設義阡。一莊風自古。五世澤猶延。祠額咸淳創。碑銘至正鐫。蒸嘗啟格遠。榱桷墜塗鮮。舍菜羞蘋藻。繙經謁几筵。衣冠標正大。鐘鼓震愚顛。長白書堂錄。天章館閣編。萬言何慷慨。六籍本搜研。要識爲梁棟。須從忍粥饘。名高遷謫裏。憂極治平先。忠孝還詒子。精誠儼在天。蘇湖開禮樂。自注。公延胡學。夔高咏詩篇。自注。見慶歷聖德詩。舊宅寒松偃。亭園老杏妍。披圖一回首。古色照蒼然。不遺本傳。而於被謗夏竦。到斷蓋剽弼。先天下憂。見士當勵志窮居。不求溫飽也。篇法句法皆苦心營構而成。

卷二十三

張景崧

字岳維。江南吳縣人。康熙己丑進士。官樂亭知縣。著有鍛亭詩稿。○鍛亭學詩於葉橫山先生。稱入室弟子。論詩以鮮新明麗爲主。謂與其爲假王孟。不如爲淺溫李。以王孟可僞爲溫。

李不易偽爲也嘗以詩呈王新城尙書新城比之韓門張籍人服其尤

弄潮兒歌

錢塘江上弄潮兒。放船拉槳乘流澌。短衣單衫不蓋膝。科頭跣足暄朝曦。自言大父官藍田。堆金不計萬。與千阿侯年少邯鄲俠。貂衣駿馬珊瑚鞭。兒年七八掌上珠。逢人稱是千里駒。雙鬢左右列屏障。不教風著千金軀。大僚特疏上天子。剋剋脂膏飾羅綺。坐辭華屋入囹圄。一家夜哭長安市。當時珠履客三千。至今漂泊誰堪倚。洪濤江上高於天。性命換得青銅錢。豪華如電不可恃。東升紅日西山巔。豪華子弟讀之恐面熱內慚汗出而食不下咽也或恐子弟不能讀奈何○子孫性命換錢由祖父剋剋脂膏所致居官者盡一思之

京口

身外茫無際。橫江老雁秋。芙蓉皆別思。風雨獨歸舟。斷岸隨烟合。奇巒破浪浮。自從南北限。萬古逐東流。
和途中卽事韻限高字

愁起疲驢背。吟聲入楚騷。江湖縈別夢。風雨戀征袍。驛草秋先歇。邊雲晚更高。時平多設險。旅夜看龍韜。
邊雲五字高渾

錢鴈

數聲哀怨客樓聞。九月相逢二月分。繪繳伺多難避地。關山歷盡悵孤羣。離腸曲曲湘潭水。行色重重楚

峽雲。此去豈無留別字。一行空際自成文。

晚渡平望湖同舟話舊

稻梁謀已拙耕耘。越水吳山逐雁羣。細雨殘鐘荒驛夢。斜陽衰草故人墳。空江鴉散遙衝霧。絕巘樵歸盡
躡雲吟得小詩留。蠹篋也當麟閣記殊勛。晚唐神韻。○般亭嘗戲咏甘蔗丞相。有句云。是長樂老焉。知苦非讀書人。終欠酸。可云工巧。因題織小。故不錄全詩。

蔣仁錫字靜山。順天大興人。康熙己丑進士。

唐諫議劉蕡

隻手思扶皇運傾。春秋三傳論縱橫。生前不售鋤姦志。地下何慙諫議名。惡稔北司威正煽。冤銜南國恨
難平。自注。實爲宜者所惡。貶柳州司戶參軍。卒於貶所。玉溪爲寫招魂句。滄浦書來愴客情。賈身後對策之言皆驗。因贈諫議大

念者此也。

王時憲字若千。江南太倉人。康熙己丑進士。官翰林院庶吉士。著有性影集。

舟中遣興

四十日來誰地主。二千里外客天涯。青山兩岸尋詩路。黃葉孤村賣酒家。鼓枻有聲過蟹舍。使帆無際失
鷗沙。前途遙指蒼茫處。黃鶴磯邊正晚霞。

旅舍感懷

侯門縱可曳長裾。嬾癖偏安水竹居。臺畔空傳收駿骨。肆間敢望活枯魚。鬢將如鶴頻看鏡。松欲成龍尙著書。百尺樓頭且高臥。陳登豪氣未全除。太史爲顧華相國從父行成名時年已老矣。玩五六語見其老而勤學。

黎志遠字寧先。福建長汀人。康熙己丑進士。官至京兆尹。

禮執客鄂城用和巨來韻見貽事牽未報漢陽舟次次韻寄答

離羣劇調饑。晤言暫濡沫。方快鄂城遊。條有瀟湘別。論文期摘瑕。求友惟攻闕。古風不可回。時頗笑迂闊。長江撼坤浮。舫窗敞天豁。晚月升虛無。夕霞爛披列。低昂漁子舟。參差渡人筏。顧我自夷猶。嘯歌爲誰發。征夫出玉城。九玩團團月。人事俄是非。宦途遠得失。夙懷經世心。詎可違前轍。飛鴻向長沙。沙渚何當歇。吾愛武昌山。遲君理布襪。載收玉與珉。慧珠照澄澈。運旋轉於無痕之中。善學選體。

泊陳家灣觀山石奇秀遲客舟同登不至日暝獨遊未窮其勝

殷殷紅樹村。漫漫白沙堰。深叢切秋禽。修竹翳長阪。奇境在幽遐。神工啓關鍵。泛漣鯨波搖。跳躍龍遊宛。玲瓏變繩墨。疊皺若違反。蘭舟不卽來。臨淵奚繾綣。薄暮遲客心。篷窗聊息偃。侵宵杖策行。焉得窮其闔。雲寒月色深。漁靜江光遠。嗟予事行役。徒爾登眺晚。玲瓏就一處。貫合衆玲瓏言之。則變繩墨矣。粗心遊山者。不知其妙。

王世琛字寶傳。江南長洲人。康熙壬辰。賜進士第一人。官至侍讀學士。

登樓

萬里辭吳會。經年滯越舟。兩行鄉國淚。獨上海山樓。鸞母威難近。蠻雲瘴不收。炎荒非我土。何事愛南遊。

英州道中寄大兄

江岸草萋萋。愁懸落日低。天涯兩兄弟。客路各東西。眠食知何似。音書莫懶題。遙憐端水上。惟聽子規啼。

靈山峽

瘴鎖雙峯合。江穿一線通。崩崖飛鸞母。落日嘯猿公。林暗蒼梧雨。波翻厓海風。朝朝啼杜宇。蕭瑟似巴東。

連上二首。體順清朗。似極玄玄風格。

題畫三照

邊草初枯獵馬肥。甲光照日散金微。健兒羌笛三聲晚。射虎歸來雪滿衣。

沈樹本字厚餘。浙江歸安人。康熙壬辰。賜進士第二人。官翰林院編修。著有論翁詩集。從來學蘇遺山。必無滄海橫流之目。

遺山必無滄海橫流之目。

五顯嶺

高峯入閩奇。飛路盤空幻。硤角隱堂皇。壁面壓溪澗。洩雲生嵌竇。飄雨來轉盼。馱馱滑難行。攀緣苦木慣。進虞一步艱。墜有千丈患。戰兢腰脚疲。牽挽衣裳綻。前望怖啼猿。俯視羨歸鴈。險疑過秦關。危或踰蜀棧。積陰何時開。壘嶂誰能鏟。人無戀舟車。我將老葭蕀。

浴象行

瑤光之精照九真。奇獸天生好軀幹。貢入虞廷受封號。朝儀熟習無拘悞。神威礪礪過熊羆。異狀嶽嶽陋
羆。狂隨澣濯順陽氣。勾引傾城閔奇翫。故人僦屋宣武門。邀我來觀玉河畔。一笑登樓快倚欄。樓下千
人萬人看。傳呼都尉出西城。指點蠻奴踞南岸。羯鼓喧闐羣象來。錦鞍結隊紅雲爛。鼓聲初歇人語寂。並
立沙汀卸羈絆。一人裸體騎一象。徐徐踏浪排魚貫。細刷四蹄及兩牙。洗淨塵汗一身遍。水面浮來自在
行。淺瀾盤渦纔沒髣。翻身一躍入波底。疑墮蛟宮杳難喚。隔浦俄驚浪拍天。波心突出銀濤亂。蠻奴依舊
跨肩頭。觀者魂搖共嗟歎。也似吳兒石作腸。潮頭出入全無憚。往來盤舞復幾回。揚沫飛涎繞雲漢。連蜷
修鼻吼長風。老魚瘦蛟皆遠竄。浴罷依然上錦塘。赤鬪重裝日將旰。成羣歸鎖御房深。明日宮門須待旦。
油壁花廳影漸稀。風吹十里香塵散。濛濛樓角翠浪流。西山掃黛橫天半。
狀象奴入水出水。如見其人。結處濛濛樓角翠浪流。謂長鼻噴水濺及樓角也。

磨盤山

回顧不見入山處。此身已似盤中住。百千旋折眼生花。三五迴環神失據。纔思左往復右行。正欲仰登先
俯注。坡平幸獲尋丈寬。徑仄只留分寸度。鞭絲帽影蟻緣窗。馬足車輪虵繞樹。乍陰乍陽日向背。在前在
後風來去。山遠不踰三十里。山高不越萬餘步。從卯到酉歷未窮。自壯至老陟猶誤。燕齊大賈有深愁。并

代健兒俱卻顧。人間不省行路難。請過磨盤山上路。起六語寫盡山行屈折已盡磨盤之義以下壽澗注坡直如行所無事

遊汴城宋宮故址

帝闕崔巍逼敵營。乘輿倉卒赴青城。力窮巷戰悲何處。計決親行誤范瓊。此後難逢迴日馭。有人空喚渡河聲。杜家留守真雞狗。草草南歸失四京。徽欽北狩始誤於不用李綱繼誤於不用宗澤至用杜充爲留守而國事萬不可支矣此種詩可作史讀

贈王載揚

唱遍楊枝又橘枝。洞庭林屋有新詞。誰知楓落吳江冷。未是崔郎歷卷詩。載揚少工詩人無知者。輪翁見吳江人故以楓落吳江冷爲比。

李白填詞

花前承旨筆如飛。三闕新詞萬古稀。被酒不忘規諷意。故將燕瘦比環肥。從前作者但美其才思之敏。知遇之榮。此能道其規諷微意。所見者大。

徐葆光字亮直江南吳縣人康熙壬辰賜進士第三人官翰林院編修。○曩見太史懷舊詩七章胎源於少陵八哀今已散佚矣茲從奉使琉球冊中錄出得其大概

康熙戊戌六月朔奉命冊封琉球述懷三首

我生寡行役。敦敦守書案。少長太湖旁。臨涯渺無岸。竭來京國遊。涉江已三歎。濁流益奔駛。疑向銀河亂。今將事解東。寵命賁冗散。皇靈賜九垓。當險敢云憚。銜綸出區夏。郵籤浩難算。八千閩越路。未及溟程半。

涉川守忠信，古人寧我謾。茲遊縱目初，奇絕平生冠。

去家逾一紀，有母嗟尸饔。微名雖獲忝，祿薄仍固窮。侍養曰有季，願我如飄蓬。玄髮恐日霜，倚門望屢空。七十古云稀，茲秋欣已逢。膝下闕親拜，頌況徒爲恭。聞命蹶焉起，問驛江之東。我家官河壩，水郵當此從。省覲始一遂，長跼獻泥封。自注：癸巳覃恩，請封始賚回。王程幸非迫，且復樂融融。

家貧如屋敗，榱桷強撐拄。大者既就撓，薄弱成何補。瘦妻豈云健，乃委持門戶。二女皆獲歸，紉緝良辛苦。相見且歡喜，譎怨茹不吐。佳兒得嘉耦，此日來歸祖。新婦前致辭，階前綵雙舞。不覺愛憐生，拭淚成媁語。水清石纍纍，此事自前古。到家不成歸，離緒還縷縷。首章奉命，次章拜母，三章辭家，章法井然，詞亦朴茂。

自口外回至密雲道中車折軸遇雨

出山復入山，顛頓不知幾。瘦馬怯孱顏，兩轂鬪石齒。脫險就夷曠，泥行鈍亦喜。中軸忽摧折，輪轉不踰咫。勞薪不能言，事敗悔方始。解輓就牛車，落日照行李。駛雨截山來，壞雲翻墨起。橋阻斷虹邊，路辨掣電裏。風吹祇裊單，沾濕行未已。將經滄海身，平地已如此。

楓嶺山行至梨嶺

風泉聒旅枕，壁鏡照客起。雲木澗初陽，蒙茸猶谷底。笳鳴驚宿禽，旌影照溪水。虹橋接楓嶺，闔程從此起。仰見梨山巔，霧行猶十里。陰崖竹梢空，寒碧光蕤蕤。山僧延客坐，孤亭翠微裏。亭邊方竹枝，乍見心尤喜。

稜稜節目勻。端正比君子。我行既在險。所恃非圓美。從僧乞杖材。中矩皆如砥。行行步亦步。扶我歷濛汜。
人生涉險。惟中正自守。可以免禍。古來聰敏人。每以圓美得咎。不止捷徑。躋步已也。從方竹枝。悟及持身有素。言下遇之。

上灘行

祇命走閩服。崎嶇敢易安。紙船託微命。上灘復下灘。上灘逆水怒。求進尺寸難。片石扼我嶮。力費千篙攢。

下灘得水利。雙楫如輕翰。穿針與走馬。自注皆灘師語。一瀉百里寬。順流雖云樂。觸激無堅完。灘師頭易白。鬪捷

摧心肝。上水既失利。小心事驚湍。救墮愁脫手。引汲心膽寒。釜懸船挂壁。溜急魚升竿。步步自牽挽。力盡

終躋攀。于此互乘除。得失如循環。上灘與下灘。請君擇其間。處順恣肆。處逆周防。恣肆者敗。周防者安。行路體身其義一也。

顧嗣立字俠君。江南長洲人。康熙壬辰進士。官翰林院庶吉士。著有秀野詩集。○秀野。選元人詩集。搜羅殆遍。使百年文獻。不致淪沒。皆其功也。素以文酒友朋爲性命。有名人過吳下者。惟恐不詣其家。至家道中落。猶以不能酬贈爲媿。與前明葛震甫之愛客。正復相類。

不詣其家。至家道中落。猶以不能酬贈爲媿。與前明葛震甫之愛客。正復相類。

讀元史

中原皇綱失。宗社如山崩。讀書遭兵燹。滅沒無一存。偉哉姚公茂。絕學能相承。軍中來江漢。賢許號得朋。讀書鳴琴下。聖賢接寢興。寶劍挾浮雲。手扶日月升。經學唱西北。文物得未曾。茫茫六合內。獨讓斯人能。

姚公茂。名樞。寶許。寶默。許衡也。

周室憫忝離。蜀臣悲杜宇。吁嗟彼王孫。甘心事仇虜。死媿文丞相。生慙謝臯羽。書畫雖絕倫。大節吾不取。

賢哉彝齋翁。高風邈千古。遇弟輒生噴。到門必見侮。吾愛水仙圖。寶爲翰墨祖。彝齋名孟堅字子固。以梅竹水仙擅名。

文章開魯姚。元氣尙團結。天歷置奎章。作者首虞揭。金華接踵興。儒林推四傑。爲學務根柢。行文淨冰雪。

古藻揚清光。煌煌照碑碣。一代制作手。小儒盡咋舌。同時惟歐陽。瓣香乃祖烈。後來宋太史。猶承黃柳訣。

斯文如江河。源遠流不竭。猗歟百年間。生才竟殊絕。傳道脈。風清節。人道所重。表章前哲。別於風雲月露之詞。

自錢唐江口至常山舟中雜詩

積雨濕江雲。林深白一片。春風急吹開。青峯遞隱見。晴旭散旅愁。鼓枻聊自遣。昨宿西安城。今到常山縣。

故人松桂林。葱蘢眼中見。自注。張常山天農。有讀書松桂林圖。西北有浮雲。別來幾番變。阮籍醉不醒。司馬遊已倦。弭節暨淹留。孤蹤媿深眷。

畫筆所不能到者。以韻語補之。此化工也。起四語。予嘗於舟行曉望時一遇目。

望郎回。自注。在大安驛。有石形如婦人。攜一稗子。立山上。名望郎回。

望郎回。望郎回。朝朝望郎郎不回。孤兒三尺形。單影隻。冬愁風酸。夏愁日赤。南山雲連北山雨。一樣人間

兩樣土。望郎回。幾時來。東海會有西歸水。妾作石人甘爛死。爲男子作詩。風其忠愛。爲婦人作詩。風其貞烈。此立言體也。杜陵得三百篇之遺。作者猶

得此意。

日觀峯

羣山向背東南缺。一聲雞鳴海波裂。黃雲下墜黑雲浮。金輪三丈鮮如血。當時李白平明來。風掃六合無

織埃精神飛揚出天地。口吟奇句招蓬萊。我今黯黯失昏曉。雙石凌虛自悄悄。安得快劍開烟雲。直指扶桑窮杳緲。嘗於五更登天台華頂見浮雲卷盡海面俱紅須臾金輪上升天地忽開萬象呈露前之赤海盡浮金光矣讀黃雲十四字服其簡而能該

萬安

城仄羣峯壓。江紆亂石通。灘聲從地北。瘴氣自天東。采竹童乘筏。撈魚家置籠。灘師喜風利。撥棹入黃公。自注土人譏水性者呼爲灘師黃公灘卽惶恐灘

賈傅故宅

治安策上衆猶猜。謫向長沙卑濕濱。生遇漢文猶痛哭。放同屈子竟亡身。洪鑪久已爲銅炭。宣室何勞問鬼神。絳灌不知才子貴。漫輕年少洛陽人。

宿遷西楚霸王故里

拔山扛鼎力難支。有勇無謀敗固宜。王霸業成破釜日。英雄淚盡別驩時。重瞳每小江東土。殘魄猶依魯國祠。只有野花紛五色。春風省識帳中姬。項王霸業成於救趙敗於弑主至垓下而氣已盡矣三四語已舉其概

黃陵廟

翠帷玉佩問湘娥。夕張佳期憶九歌。寂寞荒祠叢竹淚。西風吹作洞庭波。

杜

詔字紫綸江南無錫人康熙壬辰進士官翰林院庶吉士著有雲川閣集○雲川以詩受知於聖祖會試不第賜進士入辭館士林榮之而雲川以養親歸不復出矣晚與道士榮連僧天

鈞結九龍三逸社。有廬山東林之風焉。中歲嘗選唐時叩
彈集行世。皆中晚名作。故平生得力亦在大歷以後云。

隋隄曲

隋隄一帶官河口。不種桑麻種楊柳。錦帆帝子數巡遊。厭住東京樂奔走。將兵西域再征遼。呼韓稽顙諸蕃朝。江都宮監伺顏色。翡翠玻璃恣雕飾。水晶殿揭珠簾開。香風吹送飛仙來。凭肩笑語能幾回。夢遊惚吳公臺。吳公臺下雷塘路。野土茫茫亂煙樹。傷心爲弔玉鈞斜。柳色黃昏不知處。柔肌令儀。按節起舞。

周處讀書臺

臺廢尙遺址。荒荒宿草中。在朝能獨立。致命見孤忠。始信讀書效。因高力戰功。斬蛟與射虎。未足號英雄。見力戰致命。緣讀書有得。而斬蛟射虎。未足言也。一氣鼓鑄。結倍有力。

黃金臺

伯業銷沉等劫灰。黃金照耀獨名臺。兵連五國收燕地。力借羣豪始郭隗。豈獨一時能雪恥。直令千載感憐才。於今瀟落風塵客。猶是紛紛向北來。隗。韻平。仄俱收。

戲馬臺

戲馬元來楚故鄉。鴻溝還記各分疆。儘教率土歸劉氏。剩有斯臺與項王。一戰快心惟鉅鹿。三分失策在咸陽。如何蓋世英雄氣。獨爲虞兮泣數行。王漢王。巴蜀漢中。使得選定三秦。此項王最失策也。特爲拈出。具見論古之識。

雨泊吳閶送春同顧梁汾先生作

吳宮花老淚臙脂。點點殘紅墮晚枝。自是東風無著處。本來西子有歸時。錦帆冷落青簾舫。玉管闌珊白苧詞。雙槳綠波留不住。半塘烟雨柳如絲。以西子泛湖比春光。謝又怡關合金閶送春。天然波折。

次泰和韻送同年于元士入都因簡劉喻旃楊若遊諸同館

春明分手兩經春。吳舫忻同夜語親。欹枕卻憐聽雨細。入山還喜試泉新。飽嘗世味初歸客。寒到征衣又送人。爲語玉皇香案吏。秋風且莫憶鱸蓴。不無玉堂天上之感。

花朝讌集

舊遊零落復新知。不放傷春到牧之。一笑豈云無覓處。百花多在未開時。金鈴小繫香仍淺。羯鼓高催信較遲。共是軟紅塵裏客。薄寒消得酒盈卮。

羅浮蝶

海南飛夢渺無涯。小洞朱明自有家。仙種固應呼鳳子。香魂只合伴梅花。別來風雨迷烟嶂。撲向樊籠泣露華。回首此生空羽化。滿身狼籍葛洪砂。第四語天然名雋。雕琢轉或失之。

王圖炳

字麟照。江南華亭人。康熙壬辰進士。官至詹事府詹事。著有授香書屋詩。

詠史

洙泗無煖席。齊梁無停軌。吾道大可爲。斯人詎可避。閉戶與纓冠。出處須易地。貞元有韓公。讀書尙其志。唐士太披猖。淫靡沿六季。獨自抱遺經。卓哉不朽事。觚排二氏言。周情兼孔思。鳳躍鈞韶鳴。氣象庶幾似。當其未遇時。皇皇出載贄。佛骨尙欲燒。鱷魚尙欲制。豈其百鍊剛。繞指頓柔脆。三上宰相書。誰識躑躅意。汝曹不自量。嗤點何容易。撼樹在蚍蜉。當轍笑螳臂。韓公三上書。共謂宜少安毋躁。此獨表其皇皇濟時之心。與席不暇煖同意。知人論世。不當如是耶。

鸚鵡

文采擅江東。隴山短夢通。有時尋稻粒。無計脫條籠。侵曉梳翎慣。當窗學語工。聰明真誤汝。天際看冥鴻。

遊仙

青雀西飛繞集靈。麻姑仙訣悟熊經。玉杯日暖黃雲動。金掌風微白露零。望氣方壺猶寂寞。祈年太乙尙丁寧。君王欲乞長生術。不道郎官是歲星。

平原邨

年少驚人入洛名。雲津龍躍是平生。八王兵甲無臣主。兩晉文章有弟兄。晚節不堪愁鶴唳。舊交聞已賦蓴羹。春蒲細柳平原路。長使行人淚滿纓。累世將家子。而甘受驪邦恩遇。又處濁亂之朝。而不思潛身遠害。宜其及於難也。以季鷹之歸。作對面觀。託其義尤妙。

白燕菴

鰕菜飄零范蠡船。幅巾短杖自翛然。柴桑歸及元興日。同谷歌成天寶年。流水桃花何處問。春風燕子至

今憐隔村隱隱精藍結。知是當時已解禪。海叟以遺民終不羅于禍詩中獨高。清節略其文辭是識解高處。

渡江

雲自孤飛月自明。蒲帆十幅翦江行。君聽濁浪金焦外。淘盡英雄是此聲。無限悲壯。

程夢星

字伍喬。江南江都人。康熙壬辰進士。官翰林院庶吉士。○太史好友。朋喜著述。注李義山詩。成平山堂志。名流過維揚者。每定縞紵交原字。伍喬取南唐書。伍喬居廬山。僧夢大星旁一星。曰伍喬星也。

後易曰。午橋。

讀史

公孫舉賢良。先棄後乃收。巋然置第一。一晚封平津侯。陸贄舉韓愈。亦以再舉售。叶其論不貳過。卽以前文投一君與一相。取舍豈自由。得失故有命。際會良悠悠。見遇合有命。亦有時。君相不能主也。從前無人道及。

老人峯歌

山煙作霧朝濛濛。模糊煙外疑遠峯。風開日出始破笑。一峯背俯兼頭童。何年南極下霄漢。無事僵立空山中。諸峯兒孫並臚列。形體雖具難相同。平生儕輩恐無幾。匡廬五老齊高風。世人少壯幾時好。等閒倏作雞皮翁。何如此峯既老常不老。前古後今無始終。浮丘容成每來往。俯視塵世擾擾同雞蟲。

雲棲

靈山結想十年前。一路穿雲許問禪。人綠須眉全是竹。晴喧風雨摠因泉。地高偏覺江聲近。峯遠猶將梵

唄傳吟盡夕陽歸較晚。清池應愛遠公蓮。

舒大成

字子展直隸宛平人康熙壬辰進士官翰林院編修

自城子山還宿白家灘贈主人

到山日亭午雞鳴桃花村。响响原隰廣。藹藹桑麻繁。展眺興方永。卽事情彌敦。盤餐古時俗。作息平生言。際夜轉清闌。明月來南軒。撫時寧不惜。勞生焉可論。當須遂夙願。與君采芳蓀。

山行

杳杳雲外鐘。原陸颯已晦。寧知沙際月。復與前峯對。墟落有歸人。烟蘿聞犬吠。

作者五言應得力于唐賢三味風味近劉春虛不能

用多能用少也近人能用少者惟吾友喬億摹韓

東靈臯先生

伐木廢千載。勞者方載歌。印須良有繫。觀善匪在他。大道無隱晦。斯文流江河。先民重邁征。所戒惟蹉跎。春風迴歲律。芳色滋庭柯。喟然慚所欽。去日何其多。古淡

當時

玉筍嚴催金巨羅。當時歡會總如何。燕辭華館無迴信。葉落橫塘有去波。曉日軒窗閒夢少。晚涼庭院別懷多。露桃花下三年客。腸斷秋來一曲歌。

林 倍字吉人。福建閩縣人。康熙壬辰進士。官中書舍人。著有棧學齋詩。

甘泉宮瓦歌自注。文曰。長生未央。

甘泉漢宮遺古瓦。何年棄擲荒隴下。泥沙埋沒風雨剝。誰人物色求諸野。阿兄遊宦西入秦。嗜奇好古搜沉淪。西京文字傳絕少。何意長生四字完形神。周圍一尺有二寸。水清翡翠光鮮新。非篆非隸含古意。不瑀不琢歸元淳。歐陽集古見未到。劉敞博雅誰探真。二千餘年復寶重。轉憶飛廉太乙俱成塵。當塗銅雀非儕偶。歷十四朝真可久。寶器逾晦逾光明。肯讓漳河片瓦傳不朽。吉人兄同人遊秦。得瓦於田畔。瓦礫中人沉淪久而光顯者。何獨不然。

遊武夷登一覽亭

吾聞武夷山。乃是昇真元化之洞天。中間溪流有九曲。三十六峯陷折相排聯。我家去山七百里。道然神往已十年。雖未扶藜臨澗谷。早有清夢來騰鶩。今冬適經雙溪口。舟子西指思迴船。興高踴躍決探勝。四日逕到仙宮前。凌晨登筏泝霜瀨。山容面面其沿緣。幔亭巍峨聳雲際。玉女秀出清而妍。虹橋千載駕陡削。接筍一線梯鈎連。嫣然花竹藏別塢。小九曲內宜安禪。隱屏精舍昔講學。窅且奧處羅羣賢。雍雍絃誦倡權曲。會心微妙超言詮。盤遊六曲望不極。有亭天半憑空懸。虛無縹緲徑欲斷。猿鳥絕跡惟雲烟。捨舟輕身陟危磴。聽徹水樂鳴濺濺。仙船天路落不落。誰弄狡獪疑彭錢。險艱歷盡到奇絕。天遊古觀山之巔。

亭稱一覽小閩越。扶背遠眺無涯邊。此時不知此身在何處。便思脫遣人世同飛仙。丹山碧水如此勝。恨不早拍洪厓肩。會當買山傍雲壑。盡載羣籍來摩編。山靈愛山亦愛我。定應招我棄官賦。就歸來篇。可作武夷有韻遊記讀不嫌其詳。

虞景星 字東臯。江南金壇人。康熙壬辰進士。兩任知縣。改授吳縣教諭。工詩畫。書學米芾。陽雅。貞鄭。處三絕之望。

班婕妤

翻因棄置久。轉念寵恩偏。燈暗增成夜。花飛長信年。秋風有時歇。團扇豈常捐。獨惜羅衣色。塵生不再鮮。
悻悻小丈夫。不能作是語。

湘中曲

風起黃陵廟下秋。斷猿聲裏繫孤舟。雲鬢霧鬢知何處。竹色娟娟月影流。

任蘭枝 字香谷。江南溧陽人。康熙癸巳賜進士第二人。官至禮部尚書。著有見南詩集。○公出使安南宣諭國王。使王知天朝恩重。拜舞感泣。此生平大節。詩亦典重有體。

武侯祠

丞相祠堂沔陽谿。檜柏森森鐵轅古。行人指點定軍山。月黑天陰聞戰鼓。三分炎祚鼎終存。萬馬中原氣已吞。五丈原頭將星落。此間終古藏忠魂。泱泱寒流向東去。霜郊豁見平蕪路。南通劍閣北褒斜。想見當年運籌處。我來下馬拜荒邱。三代而還第一流。絲竹戰餘瞻尙死。一門忠烈壯千秋。
憑弔武侯。寫出風雲動色。忠魂如在。末并

傳出縣竹之戰一門死烈此前人未說到者應與王新城定軍山下作並傳

大相嶺

肩輿歷峻坂力盡得躋攀。冰雪明孤嶺風雲暗百蠻。地應雄劍閣天已近陽關。舊說南征相兵戈駐此間。

宿劍關

斜日下荒原驅車宿劍門。寒山風落石殘夜虎窺村。斷續京華夢淒清獨客魂。古來設險地與敗共誰論。

五言律多從杜出咏蜀中詩尤宜近杜

巴州

深院嚴扃盡日閑。一年花事已全刪。情同籠鳥難舒翼行似枯僧正閉關。萬里煙波通峽水連朝雲霧失。

塗山故園遙在春江畔邨得扁舟縱往還。

吳

襄字七雲江南青陽人康熙癸巳進士官至禮部尙書謚文簡○文簡老年遇台位至六卿出處進退如鳳皇芝草賢愚共稱美瑞者詩品亦高不肯流入三唐以下

柏鄉雨花菴口占

雨花亭子上坐飲趙州茶。古寺木初落疎林日已斜。黃花應笑客白髮未還家。老衲若南去鄉山問九華。

自注僧楚澤云將行脚南中○黃花一聯十字成句此文簡出使楚中過而留題也名流過者俱有和作總未及其自然予見而錄之

送徐激齋先輩奉使琉球

浩渺滄波隸九州。貢航不絕大琉球。自注國朝册封琉球今為第三次。使者才名第一流。龍節高擎天北極。星槎直泛海東頭。書生報國宣威德。敢詫乘風萬里遊。時送行詩。彙成卷軸。劇多名。作然頌揚得體。無論此章。

題黃山蒲團石

小心坡上得心安。鶴落猿飛路不難。百步雲梯誰撒手。九年空坐石蒲團。

唐建中

字赤子。湖廣竟陵人。康熙癸巳進士。官翰林院編修。

臨高臺

臨高望秋水。寒鏡出塵函。碧蘚淨孤渚。蒼雲陰半岳。風傳隔院笛。葉送下江帆。正有南來鴈。離情孰寄緘。

張

梁字大木。江南華亭人。康熙癸巳進士。著有澹吟樓詩。○張氏門風鼎盛。聲華赫奕。而澹吟不樂仕進。戶庭蕭寂。如遊方外人。喜鼓琴。與到時弄一二曲。晚遷居青浦之珠溪。無疾而逝。人謂同禪家之解脫者。

彈琴

偶坐藤蘿下。揮手弄素琴。我琴不悅耳。能作澹泊音。本非求人知。我自寫我心。鍾期既已亡。成連誰能尋。豈徒桑與濮。六代趨荒淫。時世有升降。性情無古今。撫茲枯桐枝。欲辨口若瘖。罷琴人寂然。明月窺疎陰。
古人五言。如人心盡如此。天下自和平。能使江月白。又令江水深。七言如空山秋滿霜。烟平寫琴理。琴韻非琴聲也。作者此篇。已得古人三昧。

彈琴雜詩

孤桐獨爲奏。不假金石諧。微矣園客絲。能寫曠士懷。中散已云逝。千載罕見儕。奈何大雅音。委之優與俳。撫絃傳宵渺。希聲正復佳。豈難悅人耳。所恥在淫哇。聽者雖或疎。宮徵安可乖。束髮好鼓琴。自謂甚易工。初得一聲似。曠若意已通。學之既十年。茲理彌無窮。吾未忘吾手。焉令諸有空。乳泉滴幽洞。箏木含遠風。至音非可求。只在天然中。諸有皆空。只在天然。滯于手不能空也。末句點明。

梅花三弄

梅花隨東風。淡淡入我絃。凍雲殘雪春乍破。一枝兩枝籬落邊。啞啞野雀噪深竹。溪水無波照空淥。陽和暗覺指下來。遙峯潑翠嵐陰開。五色鳳子雙徘徊。小絃急。大絃緩。冷香拂袖東風軟。孀孀冰魂吹不斷。忽然孤鶴唳一聲。羅浮山遠春夢驚。霜天欲曉寒更清。平生茆屋心。松篁共蕭寂。山家閉戶悄無人。綠滿青苔落英積。瑤琴悄悄醉橫膝。一片孤月當窗白。梅花與琴。渾融無迹。

謝遵王字前蒺。江南江都人。康熙癸巳副榜。

吳中感興

兩月金閨住。聽殘白紵歌。山惟洞庭好。春是虎邱多。良覲故人遠。鄉心寒食過。舵樓閒倚望。渺渺奈愁何。
三四已括吳中之勝。春是虎邱多。眼前語道來。轉覺其新。

枕上

簾幙微風入。輕寒枕簟侵。夢多通夜惡。病覺隔年深。簾簾燈花墜。寥寥戍鼓沉。寒蛩偏戀我。牀下和哀吟。
前幾沒於早歲。此即病中作也。說去哀音動人。

顧陳埈 字玉停。江南太倉人。康熙甲午舉人。官行人。○婁東詩人。雖各自成家。大約宗仰梅村祭酒。玉停晚出。欲自闢町畦。而能不離正軌。亦後輩中矯矯者。

餞敬亭上江西觀察分題得盆檜

一尺萬丈勢。鬱此昇仙婆。托根几案間。抉石出怒猊。黛枝雲蓋結。鐵榦霜痕披。聖植既劫火。猶覩具體微。風靈起春蟄。應有飛龍知。願為祖生楫。送君中流時。
借題發義。見得聖傳一脈。正可乘時有為也。後敬亭居官克副此語。可云不負友朋矣。敬亭字子大名起元。

分擬鮑參軍白頭吟

持妾懷中月。照君絃上心。琴聲逐流水。月向波心尋。體雙珍合璧。心一利斷金。如何乖宿昔。貌昵情辰參。破壁成帶玦。挫金置氈鍼。昔為比目魚。今作分飛禽。分飛日以遠。反目望轉深。言念結好初。忍垢共泥沉。錢刀焉足貴。信義乃可任。不見黔婁妻。相看雪盈簪。
溫厚纏綿。箇泥沉之共艱。責信義之足守。怨而不怒。可與谷風並讀。

豹留皮

豹留皮。人留名。死無所留。不如無生。大丈夫。得死所。光奕奕。照千古。王鐵槍。不識字。但好武。鄆州失。鐵槍出。破強敵。期三日。妻子羈。唐勿復言。男兒誓不私家室。轅門置酒出舟師。座客未散連鎖摧。亞子膽落守

殷竄威名播耳如春雷青蠅營貝錦成保鑾潰中都傾吾槍可折吾膝勝鐵誰能向鬪雞小兒屈惜哉豹
爲鼠死豹皮文獨存鼠腐臭未已彥章事朱溫固爲不能擇主然既已事之則君臣之義不能亂也歐陽
之兩者兼而王
鐵槍之論定矣。

十阿父

爲天子父孰如其尊阿父過多難爲兒孫殺人於市如屠犬豕臯陶袖手虞舜充耳一父披猖九父譁張
願言築宮奉以上皇脂車秣馬歸之汴京後周太祖后柴氏無子以后兄守禮之子爲子是爲世宗守禮
殺入於市有司以聞不問時王溥汪晏王彥超趙令坤等同爲
將相皆有父在洛陽與守禮往來
惟意所爲洛人畏之號十阿父。

古北口

地險雄關舊秋臨獨客驚馬頭懸漢月山背絡秦城草帶烽烟色蟬爲朔吹聲輿圖正無外大漠亦神京
捶鍊而成
言無浮響。

偕王樹先觀察渡錢塘舟中對弈

問渡攜棋局忘言到夕曛星辰兩手握吳越一江分小劫壺中隱餘音榜外聞機心渾不用仍可狎鷗羣
吳越以江爲界人能言之以手握星辰引
爲對偶兩語皆發拔矣作律詩須得此意。

瓜州曉渡

征鞍才卸客身輕。指點金焦雙眼明。宿雨漸收遙岸出。海雲初落怒潮平。人歸春晚猶餘興。風入江南亦有情。正值百花新釀足。一杯先爲破愁城。第六語久羈北地者始知其工。

寅鑑堂後燈筵卽事自注各以字爲韻

珠明玉豔簇芳庭。細膩風光鎖曲屏。歌板欲殘餘白雪。月輪初上淡春星。坐忘賓主宵嫌短。思入鄉關酒易停。不奈峭寒歸客枕。半垂紙帳一燈熒。

硯

端谿誰割紫雲腴。萬古文心向此據。小點墨池成巨浪。就中飛出北溟魚。小中大。

尤秉元字昭嗣江南長洲人康熙甲午舉人官樂至知縣○昭嗣年五十餘响喘喘依然童穉及乎蒞官民安政肅去後猶思賢者洵不可測也詩承西堂滄湄兩先生後不入輕浮之習是

爲唐音 孤雁篇

玉關萬里秋風遠。南歸鴈渡蘆洲晚。數行中斷忽分飛。零落寒空誰作伴。可憐孤鴈不勝情。常伴寒星夜夜鳴。客舍淒涼魂欲斷。深閨輾轉夢難成。客舍深閨聽淒惻。絕絃更有傷心客。十載同棲連理枝。一朝忽拆雙飛翼。空館經秋冷總帷。黃昏微雨畫簾垂。當時漫作求鳳引。此日翻成別鶴悲。悲來常向西風慟。重續難溫誰與共。一似孤鴻失侶飛。湘江不作鴛鴦夢。天上人間兩渺茫。年年歲歲恨難忘。尺書肯寄重泉。

去爲道蕭郎正斷腸。昭嗣三十餘，悼亡不娶，旁無姬侍，人高其清淨，不知其情深也。篇中連絲不斷，如春蠶引絲，失偶人幾不能讀。

芙蓉映水曲

秋江澗澗開明鏡，湘女窺簾曉妝靚。遺佩飄香散作花，一枝豔質臨江映。江水盈盈未易求，相思空望夕陽樓。西風一夜生南浦，零落紅衣入暮愁。

牡丹

洛陽花譚幾番新，爛漫欣看穀雨辰。晚出遂超羣品上，纔開便足十分春。倚欄妝重愁無力，繞幕香濃欲

醉人。千載沉香遺迹在，誰將絕調寫風神。李山甫數苞仙艷火中出，一片異香天上來。羅隱公子醉歸燈

看到子孫能幾家，則又過於衰颯矣。顧聯爾雅典切，古今人何必不相及耶。

張弘敏字訥夫，江南丹徒人，康熙甲午舉人，官孝感知縣。

詠史

劍術莫論疎荆卿，一何愚生劫萬乘主。此事大難圖，惟彼虎狼秦。變詐實多虞，誑楚絕齊交。終不致商於

焉能反侵地，信義申匹夫。急剗嬴政胸，羣憤亦少舒。如何披督亢，猶事久踟蹰。嗟哉報丹心，空與日月俱。

荆卿不止劍術之疎，欲生劫以反侵地，是以齊桓望虎狼之秦，其勢必不能也。宋不沒其報丹之心，咎之之中，實深惜之。

放榜明日知落副車有作

瓊樓高迥絕躋攀。大藥功成第八還。行到半天仙骨少。罡風復遣落人間。

吳廷華

字中林。浙江仁和人。康熙甲午舉人。官福建海防同知。著有東壁詩鈔。○東壁穿穴經學尤究心。三禮所爲詩。徵引典實。雖風雅不足。不礙爲方家也。

沈孝子行

自注。爲良思觀察子。庠生。數愍作。

我友有子稱小鳳。少歲六經熟磨礱。忘身竟以死孝傳。千古人倫作梓棟。孝子陳情救乃翁。乃翁得旨還天中。自注。時寓居河南輝縣。昨歲母殯。值鄰火撲滅。不覺麻衣紅。麻衣紅。不可褫。寧死肯任母殯燬。頭焦額爛。膚不完。殯宮獲全。孝子死。孝子曾補兩笙詩。南陔白華有新詞。居身潔白守庭訓。循陔乃厄南宮離。我聞客位之殯塗。且殯。攢至西序預火備。此禮廢墜千百年。致令孝子蹈炎熾。我友哭子幾喪明。邦人請旌留孝名。登危臨深古所戒。成仁取義非過情。讀書要在持大節。至行煌煌如火烈。旌廬令典金石光。精神不逐劫灰滅。始而陳情救父。繼恐火焚母棺。哀經撲火。自焚其身。固死于孝者也。得此詩表之。孝子可以死。然孝子於是乎不死。○土喪禮。掘殯見。殯埋棺坎下也。顏延之哀冊文。戒涼在殯。杪秋卽葬。注。三日而葬。

題杜文貞公小像

長樂坡前白讖甫

自注。飯嶺山。唐。據言作長樂坡。

太瘦生緣作詩苦。我聞斯言不謂然。是亦羣兒謗傷語。三人各瘦公有

云。諸弟豈盡能詩人。唐書文苑傳可考。喪亂飢餓叢公身。自公蒞官天寶季。漁陽鼓聲勢何熾。陷賊歸來驚所親。老瘦當知從此始。乾坤瘡痍勞至尊。蒼茫家室空柴門。三年奔走益潦倒。一身皮骨嗟空存。我讀

公詩見大略。浩氣縱橫非束縛。況聞下筆如有神。豪唵安得身如削。披圖恍遇山澤癯。聊存詩案明其誣。聞說李侯亦顛顛。千首敏捷終何如。太白戲少陵語本出雜說不足憑也。以三年奔走空皮骨句爲證。見少陵之瘦由於喪亂而旁喻曲引以破所戲之語無微不至。

卷二十四

徐陶璋 字端揆。江南長洲人。崑山籍。康熙乙未賜進士第一人。官翰林院修撰。○殿撰中歲成詩流於性情溫厚之餘。故動皆有則。

桐廬

輕帆漾微風。到郭及亭午。晷影落清波。銜雲映吞吐。沙渚集漁舫。鷺鷥晒毛羽。參錯綴人家。臨水開牖戶。樓閣見層疊。罅隙松篁補。媿無荆關筆。好景渺難譜。微體幸蕭散。得未羈簪組。心胸湛虛明。俯仰憶往古。近欲訪玄英。頰首拜抔土。遠攀漢客星。高風邈天宇。擬將謝浮名。煙波狎柔櫓。何時攜雙柑。春鶯聽花塢。
上半寫景。下半懷古。心胸湛虛明。二語作上下轉關。篇法整肅。乃爾。

洪忠宣祠

不愁鼎鑊一心堅。辯折金廷氣凜然。舉目動驚風黯慘。攀髯空想淚潺湲。放還北地辭羈縻。淪謫南朝被棄捐。寂寞錢塘孤廟冷。千秋有恨聽啼鵑。忠宣。羈北地十五年。金人鑿其忠。放歸。高宗亦謂其同於蘇武。而秦檜惡其剛直。後至安置英州。檜之惡可擢髮數耶。同時朱弁亦十七年放歸。事與相類。

凌如煥字榆山江南上海人康熙乙未進士官至兵部侍郎

題隆中草廬

攝衣峴山巔。停舟鹿門溪。憑弔草廬人。抱膝山之趾。燭照天下事。未嘗一挂齒。一朝感知遇。臥龍挾雲起。攘外遏強寇。安內輔孺子。伊呂良可追。管樂詎足擬。二表泣鬼神。耿耿光青史。命畢五丈原。恨流江漢水。當年有龐公。隴上秉良耜。足已外無求。民物捐敵屣。惟公立談時。決策挂炎紀。閉戶不失人。救世不枉己。緬懷三代下。誰許齊一揆。用行而舍藏。庶乎子淵氏。忠武自比管樂少陵比以伊呂而此以子淵氏擬之。行藏合宜所謂易地則皆然也。尙論古人正須獨放力眼。

新灘拽灘歌

風瑟瑟。樹蕭蕭。拽灘水落新灘高。蜀道青天不可上。橫飛白練三千丈。居人歡喜旅人愁。千盤萬折過隴頭。

北雪消。南風作。新灘水平拽灘惡。中流伏石如蛟龍。紙船全賴鐵梢公。旅人色沮居人利。石米百錢取如

寄。自注。貨米船下灘經水者。值取百錢一石。○可作古語諺讀。

余敏紳字張佩福建寧人康熙乙未進士

傳臚日記

初日曛刻漏傳。鷓鴣立靜鳴鞭。一聲臚唱纔過耳。五色雲高或在天。幸藉朴誠逢聖世。肯圖溫飽媿前賢。麤才未奏凌雲賦。也向螭頭惹御煙。臚唱日。想到或有韓魏公其人。心事光明磊落。謂他非矜一己也。朴誠自矢。不圖溫飽。可以覘其爲人。

楊士凝字笠乘。江南武進人。康熙丁酉舉人。

不如歸去

不如歸去。省我墳墓。十年萬里白頭親。腸斷縫衣無寄處。歸來五鼎列墓前。有淚不達重泉路。警遠遊子。視東野遊

子吟。尤不忍讀。

吳江

丹楓颯颯下寒塘。財賦江東第一鄉。誰唱吳歌醒客睡。半湖殘月半船霜。

雨霖鈴曲

天子猶難活婦人。梨園枉唱雨霖鈴。萬層劍嶺千條峽。忍使官家掩淚聽。

潘其燦字景瞻。江南吳江人。康熙丁酉舉人。太史稼堂次子。

春風和李玉洲韻

韶華可是隔年期。轉眼春風似舊時。遠客樓高愁獨覺。深閨帳暖夢偏知。分番芳信園中報。一片晴光陌上吹。回首幾多離恨積。憑欄好與訴相思。深閨一語。尤爲著。歷無跡。

登河防口邊城

山海居庸千里長，前朝於此重邊防。藩籬屬國亡三衛，屏蔽中原恃一牆。保塞規模傳魏國，築臺形制說南塘。而今中外爲家日，直北輿圖接大荒。

癸卯歲暮感懷

敝裘燕市又經寒，歲晚冰霜閉戶看。夢斷梅花鄉國遠，愁憑竹葉酒樽寬。郢歌白雪誰憐寡，蜀道青天始信難。寂寞藜牀高臥處，碧霄依舊路漫漫。

翁志琦

字式金，江南吳縣人。康熙丁酉副榜。○式金向曾屬草詩序，因違行未果，今披覽遺稿，多原本性靈之作，采入選中，略補未能應命之咎，故人應亦諒我也。

反班婕妤怨歌行

團扇復團扇，皎皎白於雪。永晝引清飈，良宵延素月。秋來置箱奩，尋常不輕發。薄俗區區故，新君子秉貞節。炎曦會有時，誰云恩義絕。元辭可以怨矣，此更聚心真正，立言有則。

外孫信兒至

七年依我住，晨夕不暫離。三月不相見，惓惓繫我思。歡呼入門來，一笑舒雙眉。登我所坐榻，弄我所吟詩。我吟三十載，苦心實在茲。名山傳絕業，回首當付誰。數篇乞記誦，授之復何私。他時曉人事，應識此言悲。

見無人承柏園詩也，授之外孫，旋付劄。今詩壇傳有孫山姓氏，可慰九原。

答女口號

左家嬌女稟夙慧，把卷問耶欲學吟。耶窮正緣苦吟誤，爾何學吟費苦心。不聞郝鍾禮法重大義，婦德何嘗在識字。正論不驕如李易安轉受識字之累。

連夜夢歸故鄉醒後偶成

夢境原虛幻，情真幻亦真。身嘗爲客苦，心戀在家貧。衣食憐嬌女，憂勞慰老親。不知閨閣夢，曾否見歸人。
白髮

朝來攬明鏡，白髮感蹉跎。畢竟無公道，愁人鬢畔多。

田氏紫荆里

田氏遺墟沒草萊，春風猶見紫荆開。願攜當日連枝種，分與人間處處栽。

張廷璠

字寶臣，江南桐城人。康熙戊戌，賜進士第二人。官至禮部侍郎。著有咏花軒詩。○心躁者，多志微，嚙殺之音，心平者，多順成和動之響。言爲心聲，不可強也。樂齋公不干進，不務華，以介自娛，以誠感人。視學江蘇九年，如和風著物，萬類萌動。既久，士林猶歌頌之。宜發言爲詩，比於水之濼河，春之和盎，讀者心醉氣爽，而不自知也。注力不在五言，故不備錄。

岍山招遊雲龍山用東坡答呂梁仲屯田韻

黃樓嵯峨古彭門，雲龍山下多煙村。暇日招遊恣登陟，壺榼不用燔雞豚。淮泗交流清浪駛，呂梁迅急黃河渾。巖巖似騰北海蜃，巨幘如起南溟鷗。岡阜縈抱氣尤王，洪波襟帶勢欲吞。振衣絕頂俯平壤，川原環

拱雲龍尊。古藤倒垂猿狖挂。怪石礪礪熊羆蹲。青疇千頃水方退。高壩往往留潮痕。禾根猶見集雁鷺。屋外直欲浮蛟鼉。今年盛夏苦霖潦。茅簷白雨如翻盆。水田坐看秋稅減。寒谷惟待春風溫。城中居人尙安枕。萬家鱗次炊煙昏。茲山高曠足眺覽。歸然放鶴亭孤存。石磴逶迤古苔滑。蒼枝詰曲老樹髡。黃茅岡頭指遺跡。羣羊髣髴眠雲根。山人已往坡老逝。空嗟歲月如濤奔。殘碑寂寞野煙霏。虛廊蕭瑟寒雲屯。勝遊憑弔增慨歎。不辭斗酒傾匏樽。用蘇韻。便近蘇詩。

送魏定野歸柏鄉

蕭齋把臂足清歡。聯句論文夜漏殘。楊柳旗亭偏送別。杏花郵店尙餘寒。萊衣愛日春方永。謝草關情夢未安。無計留君倍惆悵。心隨歸騎過邯鄲。楊柳旗亭一聯似人人意中語。然佳處正在自然。一加韻琢。恐失天趣。

賦得落日樓臺一笛風

餘霞散漫晚煙浮。長笛風前響欲流。幾點鴉歸遠村樹。一聲人倚夕陽樓。梅花早向江城落。楊柳曾傳絕塞愁。何似神仙騎鶴背。凌空吹徹萬山秋。

哭梁貢

秋風素旆聽虞歌。月落空山叫夜烏。堂上白頭翻哭汝。膝前黃口已成孤。魂依姜被霜華冷。腸斷蘇機血淚枯。寄語閨中鬢髻婦。茹哀還慰八旬姑。此哭女夫而作也。白頭無子。黃口無父。人生最不堪事。末囑空閨鬢髻。抑哀慰姑。望其節孝兩兼。立言真至。

恭和御製秋蒐雜紀元韻

登陟岡巒勢磊嵬，經過澗壑水潏洄。騎來天廐三千駒，蹋破秋雲幾萬堆。林外瑤戈隨豹尾，峯頭黃繖傍龍媒。從知蒐獵闢戎政，載筆還須付馬枚。

南歸

廿載勞人得賜閑，故園風景隔塵寰。潏洄馬鬣雙溪水，層疊龍眠萬笏山。巾屐獨尋新蘚徑，煙雲仍護舊柴關。林泉瀟灑無拘檢，大似開籠放白鷗。此五章致政歸時所作

天池水擊有鯤鵬，蜩鷲榆枋自不勝。腰綬已拋三尺組，頭銜猶領一條冰。收將帆櫓乘查客，攜去瓶盂退院僧。日上松窗新睡覺，還疑帶月望觚稜。忠愛之言於極閑處傳出

松風蘿月送餘年，暮靄朝風別有天。門爲看山寧用杜，車還駕鹿不須懸。烹茶泉比中冷水，荷鍤秧分下澗田。老我得從耕牧者，蕭閑真覺主恩偏。杜門懸車歸田後常語也一經翻用便覺生新

由來齒角未容兼，獨荷生成意已厭。奉席兒能謝簪紱，扶筇婦尙理齋鹽。含飴孩幼甘同剖，高枕林廬夢亦恬。慚愧此生論取與，天公傷惠我傷廉。從熊躡魚腹豈能兼意化出極欣喜意轉似以咎出之妙不可言

舟泊無錫

九龍山色何媚嫵，坐見白雲生縷縷。空濛散作波上煙，篷窗一夜蕭蕭雨。

送楊升聞歸里

節近傳柑花映扉。山園且莫戀芳菲。遲君一葉樵風便。流過春江燕子磯。詩中天籟亦以不離琢得之。

鄭

江字磯尺浙江錢塘人康熙戊戌進士官至翰林院侍講著有筠谷詩鈔○筠谷以詩爲事業有指其失及改定其詩者終身敬禮之

西溪草堂圖

吾鄉山水窟。莫如西溪幽。延緣一徑通。落落清瑤流。夾岸無雜樹。鹿角枝相樛。霏微嵐翠間。香雪千林浮。有時略約橫。野竹寒修修。尋幽窈窕入。落英滿扁舟。花陰路疑盡。豁然見平疇。四山圍澗綠。土俗勤鋤耨。此中隱君子。毋乃栗里儔。一茅粗翦葺。六枳紛環周。虛室靜生白。恍然物初遊。羸鶴唳天半。若與孤情酬。仙源在枌榆。余胡久淹留。西溪在北高峯背舟行凡十八里溪窄只容一舟梅林兩岸風翻落英沾人衣袂錢唐幽絕境也昔嘗經其地與會未到難形語言讀此詩令人神往可當重矣

度輦嶺

新安僻一隅。崖谷莽相圍。寒雨度輦嶺。悄然徒御悲。匪悲道路險。疲氓寒無衣。祇役我之分。勞民毋乃非。旣不能重趺。復不奮翅飛。民勞豈得已。王程不可違。酬民以價直。幾爲吏囊肥。詰問得其情。懲吏乃用威。疲氓感我意。繞座涕泗揮。民情大可見。豈願咸其腓。勞勞道路閒。志在救朝飢。飢寒苟不恤。焉用長吏爲。勤勞王事而不忍以賦役入仁人之用心也詩之朴老近元道州

常山縣

風帆沙際落。嵐翠碧叢叢。一縣江聲裏。四山雲氣中。迎人幽鳥語。隨意野花紅。回首鄉心遠。沿流直向東。

殘柳

畫橋斜去水東流。落日西風澤國秋。樹下彩雲都散盡。夜來明月尙勾留。碧蹄馬老憐荒驛。白髮人間倚酒樓。六代離宮鴉數點。滿天疎雨不勝愁。五六取題之神。不黏。不脫一結。尤有遠韻。

釣臺

高臺俯暎暮江清。葉葉風帆盡日行。碧水幾時停過客。青山終古屬先生。可知避世原持世。始信逃名是愛名。慚愧萍蓬無定迹。滄洲暫借濯塵纓。避世原持世。謂東漢節義之風。從羊裘翁開出也。逃名是愛名。工於著辭。他手以釣臺爲釣名。淺而無味矣。

飛來寺

澄江綠瀾潔于苔。羣峭摩天一線開。吉貝花中聞梵唄。兜羅緜裏現樓臺。榕陰濃疊千重翠。松吹晴喧萬壑雷。瘦石玲瓏霞縹緲。卻疑巖岫亦飛來。

鄒升恆

字泰和。江南無錫人。康熙戊戌進士。官至侍講學士。著有借柳軒詩。

分賦得采香徑送沈歸愚太史暫假歸里

吳宮花草今何處。巖畔猶餘采香路。當年越女顏如花。蓮舟蕩漾雙槳斜。後宮羅綺照野水。鴛鴦作隊隨

溪沙六千君子一朝起。臺上佳人委流水。相逐鷗夷泛五湖。羞見荷花守紅死。千年遺跡想依稀。過客唯應弔落暉。詩人家傍采香徑。不采穠香采紫芝。老入承明親禁掖。顰辭卸砌還山澤。洗硯池邊訪舊蹤。樵翁溪友還相識。自憐軟土滯年年。何時同泛香溪船。不采穠香采紫芝爲歸人增長聲價然愚實有媿其言也是日贈行者共十有二人先生詩尤高雅錄此

并識一時良會

丁香和韻

春空煙鎖綴星星。兩樹瓊枝占一庭。交網月穿珠絡索。小鈴風動玉冬丁。傍簷結密人難折。拂座香多酒易醒。只恐天花散無迹。擬將湘管寫娉婷。羌無故實自足風流

宋

照字謹涵江南長洲人康熙戊戌進士官翰林院庶吉士

霧淞

風寒霧下成銀沙。徧穆林木垂鬢髿。天公知我太岑寂。先遣萬樹開梨花。梨花一望杳無際。應是碧空慣遊戲。東方漸見升陽曦。還憐化作輕雲飛。冬月行德州曾見此景因憶嘉州千樹萬樹梨花開句然未形諸詩也讀此歎作者先得我心

白雲寺閣次壁間張使君韻

白雲小閣與雲平。開閣瑩然眼界清。飛鳥沒邊孤塔見。亂山缺處夕陽明。僧投遠寺煙中去。筏下空江鏡裏行。林外聲聲啼布穀。青郊應及試春耕。

王 恪 字愚千，江南太倉人。康熙戊戌進士，官知縣。著有長留詩集。○愚千爲家台臣先生女夫，指授既正，而筆力清剛，一空時下纖穠之習。觀詩集命名，知其自信者素矣。

椒山先生祠

風節容城仰，斜陽憑軾時。疏成十罪定，獄借二王辭。大鳥前朝墓，披鱗異代祠。病中虛拜薦，欽挹起餘思。
椒山先生疏成，蓋之十罪，千秋定案矣。如此著筆，筆有風霜。

水宿

水宿風餐裏，栖栖過此生。米原無帖乞，碑信有雷轟。中土多凋瘵，西陲尙甲兵。休從詹尹卜，歸去好躬耕。

寄題陳橋驛

五代干戈苦戰爭，天心撥亂已潛生。營光久應焚香祝，檢點曾傳得讖驚。倉卒黃袍酌素志，綢繆金匱負遺盟。最憐永棄幽燕地，當日師名是北征。
黃袍加身後，杜太后云：我兒素有大志，則宋祖之不臣顯然矣。雲水棄，強名北征，宋之積弱已萌於此。此種詩可當後世春秋之筆。

送楊文叔北上

自注：從洗馬川中學幕歸，卽借北上。

萬里征塵拂袂初，驪歌促別意何如。已看蜀道非難上，誰說長安不易居。作客仍依王儉幕，故交好借惠施書。
自注：指仲孺太史。知君負米緣情切，早寄鄉音慰倚閭。
三四語工於點化。

石鼓

當日岐陽獵火紅。大書深刻配車攻。奇文人嗜三蒼並。盈數天虧九鼎同。歌託韓蘇參史筆。辭超奏漢繫

王風。重搜殘日成完璧。千古輝煌太學中。辛鼓流落人間。改作春曰。故云九鼎同也。後復搜得。同置太學戟門。

王懋竑字予中。江南寶應人。康熙戊戌進士。雍正中。以教授改官翰林。入上書房行走。○太史精研理學。身體力行。一時有小朱子之目。詩亦言其所得力。不求工於詞也。

書座右二章

長隄潰蟻穴。君子慎其微。生平操持力。不敵一念非。波浪浮天闊。澆澆決四圍。內省增歎息。已往安可追。奔馬不可馭。盤石不可幹。是非反掌間。鉛刀貴一割。我心似寒灰。百念俱利剗。願更塞其端。絕之在由枿。

此音慎獨之功。欲念乍萌。絕之於微。勿使其潛滋暗長也。妙在親切。不覺其腐。

吳家駙字晉綺。江南吳江人。康熙戊戌進士。官至禮部侍郎。

聖駕南苑大閱恭紀

鸞旂肅肅駐郊坰。輦道風和霽色明。四海無塵寧弛武。六軍有紀盡知兵。瑠弓親試穿雲箭。繡罕還巡夾日營。昨夜賜酺恩澤溥。馬騰士飽遍歡聲。城南帳殿曉雲開。萬騎星羅拱日來。虎旅自諳司馬法。鷁班齊侍晾鷹臺。兩行列陣堅於壁。九進聞聲動若雷。變化方圓包地軸。君王元裕統天才。

楊忠愍公祠

忠愍千秋總不亡。折姦那惜觸鋒鏦。不須蚡膽當三木。祇請龍顏質二王。讞上霜飛章急下。城中風慘鎖猶香。平生未了伊誰補。浩氣常餘百鍊剛。一歸自然。鑄化傳中語。

萬邦榮 字西田。河南襄城人。康熙庚子舉人。

偶感

世無名與宦。人心皆太古。世無輪與蹄。人皆守鄉土。造物鑿混沌。驅人投網罟。誰能翔天外。超然黃鵠舉。

此即老氏之學。欲返三代為太古也。然亦自成名論。詩格老幹千尋。盡莖枝葉。

成敗何足校。英雄自有真。據跡鼓唇舌。千秋一酸辛。不見屠狗輩。乘時滅強秦。臥龍思復漢。齋志何曾申。

不以成敗論人。是作豪傑語。

致君復淳風。杜老有夙志。南山石可耕。俟時合高寄。胡為望吹噓。干人欲涕泗。區區愁餓死。餓死乃常事。

叩門隨肥馬。自反恐含媿。上書光範門。斯亦賢者累。杜韓志在救時。故急欲見知。與後世之就利祿者異也。然持此責備。西田之安命。俟時。皎然共見。

鄭世元 字蕪參。浙江餘姚人。康熙庚子舉人。著有耕餘集。○耕餘詩無鶴本。浙中亦無道及名姓者。茲從令嗣炳也。太史處借得。未嘗求新立異。而胸次高朗。卓犖可觀。會稽詩人中罕此矯然者。

感懷雜詩

貧賤非所憂。菽水有餘歡。毛義喜形色。意詎榮一官。用愧七尺軀。無由潔晨餐。斗粟不任舂。負米計彌艱。

大義在不辱守身重邱山安得力畊養十畝樂閑閑

以不辱身事親樂於畊養矣此義知之者少

劉勰著雕龍懷之謁休文磬折車輻下有才懼無聞又聞鮑明遠奏詩義慶門韜知恐沉沒上書以求伸

無稱雖可疾榮名胡因人榮名雖可寶此身亦宜珍銜玉賢者羞自媒貞女嘖崇實賓自至奚爲喪我真

因人成名屈辱甚焉此義知之者尤少

泰山不自高因丘垤以形河海不自廣因溝澮以名他山有礪石良璧逾晶瑩木槿爭朝榮松柏彌見貞

何妨粟有糝維箕簸之精何妨苗有莠罇趙畊者明

純用比體拉雜成文在詩爲鶴鳴在文爲枚乘上吳王書皆開先也作者工於用比最耐人思

出門別妻子

病身不得安行役赴南嶠五嶺天之末未知幾時到仰見秋鴻征嗷嗷背雲叫回首望鄉里魂夢使顛倒

我恨不如月兩處能相照轆轤挂心頭轉輾向誰告

不能如月兩照樂府中每有此種話頭

在家不知好出門使心悲嬌女繞我膝小兒挽我衣似亦解離別卻去還復來惟此不忍割令我殊依依

昨日適南市思買繒綺歸綺要機中織蠶婦方縑絲將絲撚作線成衣知幾時我老待兒養場焉摧心脾

勿用顧旅人我猶得自強融融榮衛間漸覺回三陽飢已思食粥渴已思飲漿前途雖然遠有弟相扶將

只愁雁鴻少勿慮歲月長但看嶺梅發知我思故鄉明年五六月寄汝荔支嘗

觀音巖

粵山山山奇。茲巖益奇絕。嵌空有神功。壁立淬寒鐵。曠崢山精藏。靈秀眞宰洩。赤日萬古陰。江霧晝常結。飛樓騎危駕。石隙透微穴。拾級如盤螺。堂皇忽開列。僧梵響出雲。鍾乳倒垂雪。南思羅浮佳。北與大庾別。目謀觀斯奇。殊使羈心悅。

鬱鬱詞二首

年荒有兄不顧其弟者。作此詞以感之。

鬱鬱紫荆。枝條紛紛。枝條雖分。其本則均。父母生子。惟我弟昆。弟昆分形。血氣一源。予手若創。予足不伸。予體不伸。予心煩冤。兄兮不關。誰知予之飢寒。

相彼鳴雁。猶同其羣。胡今之人。不知有弟昆。我視之弟。親視之子。念我父母兮。心熱而顙泚。呼父母告之。辭彌朴聲彌哀矣。近井有不顧父母之飢寒者。更當作何語以感之。

捉船行

客行在西吳。喧呼聞捉船。云奉憲司票。取數須一千。烏程縣堂曉傳鼓。縣官排衙點船戶。東船西舫寂不行。里正如狼吏如虎。行人坐守居人困。百里官塘斷商賈。罟師漁父都含愁。城南城北水斷流。千艘萬櫓城中集。葦岸蘆港風悠悠。大船競輸錢。差役幸暫免。小船無錢只一身。捉住支吾應供遣。自從名隸公家籍。日日河頭坐白日。太倉合米聊入腹。誰爲饜殮顧家室。可憐有船何處撐。江千萬衆俱吞聲。捉船不行。日坐河干。

可發一歎復一笑也。予有民船運一篇。情事正復相類。

官賑謠

黃鬚大吏駿馬肥。朱旗前導來賑飢。飢民腹未飽。城中一月擾。飢民一簞粥。吏胥兩石穀。我皇聖德仁蒼生。官吏甚勿張虛聲。中閩四語似兒童謠辭古今一轍付之無可奈何而已。

檢先大人遺集

清氣迴天地。丹心在簡編。平生千古意。屬望後人賢。馬服深慚括。周南泣授遷。空嗟不能讀。三祝未終篇。歎已之徒讀父書。謙辭也。對以司馬談之周南授遷。自任何等服其隊仗之高。

看客舞刀

秋水飛雙腕。冰花散滿身。柔看繞肢體。纖不動埃塵。閃閃搖銀海。團團滾玉輪。聲馳驚白帝。光亂失青春。殺氣騰幽朔。寒芒泣鬼神。舞餘回紫袖。蕭颯滿蒼旻。

觀槍法

聞聲馳鐵騎。過影走金蛇。進退真神捷。盤旋任屈斜。毫光團白雪。風雨散梨花。一氣如相貫。全身總被遮。陰陽回地紐。狐媚遁天涯。髣髴陳安技。真堪任虎牙。上章舞刀。此章舞槍。無一語可以互易。令讀者如置身玉輪梨花之間。是何神異。

厲

鶚字太鴻。浙江錢塘人。康熙庚子舉人。著有樊榭詩集。樊榭學問淹洽。尤精熱雨。宋典實人無敢難者。而詩品清高。五言在劉春虛常建之間。今浙西談藝家專以釘釘掃掃為樊榭流。

派，失樊樹
之真矣。

永興寺二雪堂曉起看綠萼梅是馮具區先生手種

幽人先鳥起，林磻正寂然。是時春空霽，山翠爭便娟。的花間雨，澹澹花上煙。煙雨爲合離，花態亦變遷。祭酒昔遊此，手種猶生前。傲兀根倚石，欹倒枝曠泉。微馨委陳迹，高格同枯禪。儒官罷亦得，不廢招隱篇。攀花久延佇，世已無其賢。起句傳曉起之神，花態隨烟雨變遷，靜心遊覽，人方領得此趣，具區手種梅，只淡淡寫之。

西溪巢泉上作

翫溪遂窮源，東峰屢向背。朝日上我衣，春泉淨可愛。不知泉落處，濕濕竹籬內。喧開兩疊瀉，靜見一潭匯。松風颺織碧，花影蓄深黛。名言猶有相，幻照乃無悔。悠然巢居心，頗欲終年對。曉起觀泉，初陽上，衣寫得字字入神。

春陰望西溪人家雲山梅竹互爲掩映

溪聲迤西流，寺橋扼其隘。分餘落麥田，綺秀渺方巽。行人越阡陌，春望怡我輩。俯俯遠梅林，映山青晻曖。下有漁樵塵，竹樹互襟帶。炊煙化山雲，雲起半明晦。花原色不同，輞口境如在。悵矣懷閒居，悠然悟天繪。炊煙和山雲，幾合而爲一，此云化山雲見炊煙，亦神靈物也。筆有化機，無施不可。

西溪曉起

首春溪中寒，偃臥在巖穴。宵分天柱夢，覺來轉清切。開門殘月在，下見數峯雪。雪際生白雲，宵映不可說。

登橋水市靜。尋徑冰泉裂。田翁尙無事。初陽候林缺。懷新意似欣。理舊抱已結。何如巖棲人。糲竹飯松屑。

行田至荆山嶺下作

大山何連延。細岑若迴顧。中有微逕通。兩村隔松霧。平疇開朝日。宿麥半凝沍。雲根脈未洩。涓流但微注。野人籬落小。鳴雞隱雜樹。雖無汜勝書。農話眷幽素。稍營下澗業。更羨上澗住。竹橋滑春霜。往來定非誤。
狀村落
狀如畫

理安寺

老禪伏虎處。遺跡在澗西。巖翠多冷光。竹禽無驚啼。僧樓滿落葉。幽思窮扳躋。穿林日墮規。泉咽風淒淒。
寒翠欲滴野禽無聲非
此神來之筆不能傳寫

二月十七日重遊洞霄宮探大滌洞天

振衣浴罷體更輕。竹枝投石聲彭觥。空山昨夜龍洗窟。雨過萬壑泉縱橫。山靈知我有默禱。故遣浮雲散縈繞。一峯陰見一峯晴。天柱中央翠於瑤。元同先生昔隱居。洞天長鎖琅函書。前遊日夕未曾到。恨身不得乘飄車。穿盡幽篁履苔石。驚見谿窅洞門圻。童子曾爲擣藥禽。桃花解笑題詩客。此中日月停兩丸。想象九夏尤清寒。微明秉炬觸暗壁。古靈題字來尋看。玲瓏乳竇隔凡處。路接華陽不歸去。有人問我洞中來。爲說浮雲如柳絮。
日月停兩丸謂洞壑陰森叢蟻旋
轉其光不到也通體疑有仙氣

過宋通問副使朱公少章墓

突兀殘碑立古阡。行人猶記紹興年。青衣已見君王辱。白髮何期使節旋。老淚冰天他日恨。遺文曲洧至

今傳。一抔築並花宮地。夕暝晨鐘更惘然。宋公留廢地。值徽宗粗落。哭以文云。歎馬角之未生。魂歸雪窖。攀龍霧而莫盡。淚洒冰天。一切御容御畫。從五國城寄歸宋之

蘇屬國也。放歸時年已老矣。墓在九里松。詩句句穩貼無一剩語。閑字。

方正瑗字引除。江南桐城人。康熙庚子舉人。官至潼關道。著有連理山人詩鈔。○引除自高祖廷尉

餘事也。然皆古茂純正。蔚然成一家之言。

述母訓

藐孤幸有托。一線書種留。辛苦四十年。淚枯心未休。從政居大夫。國恩亦已優。秦中十五城。一箸兼爲籌。萬命倚生死。焉可私殖謀。大本貴先立。清風領諸侯。廉泉可以飲。腹滿他何求。喜兒赤子心。慮兒骨不逾。引索馭奔馬。一蹶韁難收。勿逐驍騰飛。信道從天遊。上以酬君恩。下以解親憂。通體皆母訓。稱述外不贅一語。

度秦峪嶺至商州與王刺史自注如致宛平人。

梯雲數千級。忽登秦峪頂。羣壑馬蹄下。商顏尙延頸。風過虎氣腥。山荒草木警。民脂竭土祠。落日丹青冷。射矢黃沙岡。鳴鉦藥子嶺。百里多陶煙。十八九垂瘦。下鞍問疾苦。農樵意自騁。刺史政不苛。安居樂鄉井。夜黑月未上。燈火散林影。

關西書院落成示諸生

西岐聖人邦。治化隆終古。粵自漢唐來。功利雜尊俎。今茲禮樂備。文明會當午。未免征戰餘。習俗尚黷武。青袍少業儒。鐵衣多擒虜。豈知陝右地。原為理學藪。叶讀書不講道。忠信更無主。笥中歲賜金。買得百弓土。築屋跨山河。聊以蔽風雨。矜式祀二賢。自注。唯州。湯文正公。斌。曲阜。孔公。與。鈺。皆前任。潼關守道。諸生聚三輔。學為聖人徒。方圓就規矩。何人非顏曾。何鄉非鄒魯。殊塗而同歸。狂狷各有取。勿謂岐陽遙。流風動鐘鼓。以理道化剛武。使士人。有鄒魯之風。仍復。

放羅浮蝶

八幅裙開葉葉新。金籠初放翅如輪。神仙自合離塵網。顏色由來誤美人。莫向花邊迷舊影。好從洞口覓前身。蠻烟蠻雨還家路。飛破江南一片春。顏色固誤美人。不知文采亦誤才士。借題抒寫於言中。言外求之。

古鏡

土花點點上青螺。珠匣塵封委綠莎。絕代應憐顏色少。六宮曾識舊人多。月沉碧海秋無影。雲暗滄江水不波。一照尙能愁鬼魅。雙盤龍氣未消磨。六宮一語於古字不取貌而取神。彼死煞刻畫者少得其形似而已。

葉士寬字映庭。山東籍。江南吳縣人。康熙庚子舉人。官至寧紹台道。

司馬悔山卽和司馬承禎山居洗心韻

山中雲霞古。山外草樹腥。出山猿鶴寂。還山夢魂清。流水斷復續。空谷幽而明。坐我石榻穩。著我羅衣輕。眼中何所見。太古苔痕青。耳中何所聞。絕頂波濤聲。吾心既已洗。誰博浮埃名。無求安有悔。遺身自忘情。豈必三山去。卽此凌青冥。有烟霞氣。浪斧鑿痕。無求安有悔。見有求必有悔也。指示迷途。令人深省。

斷橋山用少陵白波渡韻

欲斷不斷橋。萬丈臨坼岸。有湫起乖龍。破石入雲漢。帝怒割左耳。置之懸崖半。老猿此迴踪。山鳥隔林喚。澗底雲濤翻。陂上雪花漫。奔湍往復迴。噴沫迸且散。我來臨深淵。下視日光亂。仙境無由登。凡骨自悲歎。刻畫斷橋。至於猿猴迴踪。山禽不度。安問行人作皮膚語者。不解如此用筆。

上黨

上黨天邊郡。壺關控扼齊。羣推九州險。全壓太行低。往恨經羆虎。清時絕鼓鼙。從知秦趙鬪。只在故城西。天下勁兵處。嚴疆自古憑。虹鱗卷飛旆。獸角斷懸繩。三輔真肩脊。河東舊股肱。至今唐使節。猶得義陽稱。蒼茫渾厚。胎源少陵。

許廷鑣字子遜。江南長洲人。康熙庚子舉人。官武平知縣。著有竹素園詩。○子遜少英敏。長弓刀馬。梁編歷四方。友海內知名士。居官有善政。去官後人歌思之。詩嚴於唐宋之限。五律近李。翰林七絕近杜。樊川諸體中。二體為尤工也。高文良公章之。對客每吟子遜佳句。而文良有作子遜每與商略藝林兩賢之。

湘帆圖

湘山蒼兮湘水流。波平一鏡兮輕煙浮。美人自抱香草怨。鷓鴣啼出蒼梧秋。渺湘波兮紛幾曲。帆轉隨湘兮何處宿。遙山九面碧參差。暗水浮香流碧玉。羌峭帆兮何人。涉澧浦兮弔靈均。披圖笑爾日孤往。故鄉不憶秋風蕪。擢澗洄兮意超忽。睇峨眉兮在天末。醉來長嘯湘雲飛。一笑停帆弄江月。詩與題稱妙在若不用力

采石

投竄歸來後。驚波弄月圓。江山無太白。寥落幾千年。予亦騎鯨客。來乘牛渚船。登樓人不見。春水上青天。全是太白近代徐昌穀亦有之

黯淡灘

驚灘來黯淡。行旅奈愁何。山鬼荒啼雨。江鼉怒蹴波。舟從天上落。人似夢中過。歲歲勞于役。危途歷已多。
白菊

正得西方氣。來開籬下花。素心常耐冷。晚節本無瑕。質傲清霜色。香含秋露華。白衣何處去。載酒問陶家。晚節五字可傳品高處在絕去鏤刻

中秋大風雨後看月有作

已分沉滄海。清光不上天。乍驚東壁曉。仰見一輪懸。萬里人同節。中秋影共憐。何能負良夜。讌賞又經年。一氣直下不以對偶爲長

和顧大嗣宗傷春之作兼送南歸

離亭微雪點征衣。惆悵天涯事已非。萍葉只隨潮信轉。楊花爭見雨中飛。夢迴遙夜驚明燭。人對殘春戀落暉。望遠思鄉兩無賴。故山空自寄當歸。寶主不偶。俱於傷春中見之。

七夕雨中

不見西南玉鏡明。佳期迢遞隔層城。頻飛千里針樓夢。獨聽空堂夜雨聲。烏鵲橋成頭漸白。銀河天遠水空盈。但令此夕常相會。牛女何勞別恨生。

蕪城感舊

雷塘春盡草如煙。落拓江湖又一年。吟遍吹簫橋畔路。無人知有杜樊川。風神絕世。高文良最賞心者。
三千殿腳總如花。斷粉零香散暮霞。唯有離宮舊明月。夜深還上玉鈎斜。

題畫菊

芳菲過眼已成空。寂寞籬邊見幾叢。顏色祇從霜後好。不知人世有春風。晚節自佳。不受春風煦育也。覺老杜富貴應須致身早句。猶爲淺。

重過東園別墅感舊作

午橋莊閉少追遊。樹色波光帶雨愁。今日羊曇頭白盡。尙零衰淚過西州。此感婁東王氏而作。與趙嘏過汾陽舊宅一首同一風神。

七夕有感

離多倍覺故情歡。卻望針樓欲上難。記得星橋逢兩度。玉釵人共凭欄干。
自注。去秋閏七夕。○情深矣。以神韻佐之。覺其情愈深。當求之

語言之外。

初八夜見月

鵲橋昨夜玉駟回。雲散香銷盡可哀。寂寂空房正腸斷。清光一片為誰來。

卷二十五

黃之雋字石牧。江南華亭人。康熙辛丑進士。官翰林編修。著有唐堂集。○雲間詩。自陳黃門振興

才力。又足以驅策之。故能自開生面。仍復不失正軌。謂之詩學中興可也。

雜詩

絲布皆可服。本自機上分。布作縞素色。絲成羅綺春。載染紅紫豔。花色爭鮮新。紫綺裁窮袴。紅羅製舞裙。細腰同結束。密與支體親。回顧衣桁間。縞袂積埃塵。羅綺雖見愛。私褻不可陳。布素雖見棄。拂拭有餘芬。
言文采炫於一時。不如太質之可久也。此六義中比體。不用說明正意。

卓文君寄遠

靈禽有良匹。邕邕叶和鳴。奈何拚飛去。忽然棄平生。鳳鳥不變音。君子不變心。故人恩愛重。夙昔念同衾。明月在天上。流水在地下。秦蜀路非遙。人心自相阻。春風桃李花。綠葉對青枝。願爲歲寒友。偕老何不宜。
原辭白頭吟。閩中頗有英爽之氣。此云鳳鳥不變音。君子不變心。卽謂君子之恆久不已可也。有韻之言不妨斷章取義。

種王瓜籬豆諸蔬

昔逮養親日。灌園佐擊鮮。親亡事奔走。忽忽二十年。倦遊返衡門。老圃聊息肩。修我灌園業。情事恍如前。汲水諒非水。清淚同涓涓。此蔬親不逮。此圃親所傳。終作抱甕身。五鼎未列筵。瓜瓠如有知。爲我根蔓牽。蔓則蔽蒼野。根則入黃泉。以告我父母。貧賤子可憐。瓜瓠莫結子。有子亦徒然。
老圃親之所遺。因灌園蔬不及待。皆淚痕血點凝結而成者也。予亦有地一區。係先君子向時藝花者。因貧售人。今欲贖歸。藝植而親不及見矣。讀此詩爲之泣然。

水碓

轉輪在水稻在屋。糠粃如塵米如玉。誰其爲之機與軸。坎臼在地杵在水。橫貫輪心輪運瀑。以溪之水代人足。列杵五六杵齒齒。一杵入臼一杵起。圓輪迫杵水迫輪。急急晨昏春不止。溪女鬢插花紅。列坐曰旁如課功。從容揜袖簸揚畢。勞逸不與吾鄉同。我來如聽一部之水樂。輪音爲商杵音角。
細寫難狀之情。正於瑣屑處見筆力。此古文敘事手也。熟精左史者能之。

登報恩寺塔絕頂

到眼無埃壘，蒼茫入素秋。萬家斜照外，千古大江流。金碧翔霄表，虬龍壓石頭。長安稱雁塔，此亦舊皇州。
三四語登塔時所見略同，而於長干寺塔尤切。以帝王之州，長江環抱也。十字揮之有聲。

漂母祠

少年欺帶劍，老母念垂竿。恩怨一時有，波濤千古寒。封侯金自易，乞食飯應難。最是窮途感，英雄淚不乾。

武昌懷古

碧眼孫郎此建都，憑陵中國控全吳。危磯冒堞猶黃鶴，長鎖連江豈赤烏。霸業久隨流水去，客愁唯對楚山孤。太平城郭周遭在，戰壘荒荒隱綠蕪。
長鎖連江，乃太康元年事，計無所出，聊以禦晉。若赤烏時將相有人，必不為此下策也。孫皓之失，言下顯然。

題李草亭畫寒江送別圖

長江風定水無波，歲晚天寒客又過。一度送行傳一畫，人生那厭別離多。
從黯然銷魂中傳出異樣，風趣熟處生新，不落習徑。

儲大文
字六雅，江南宜興人。康熙辛丑會元。官翰林院庶吉士，著有存研樓詩。

秋江詞

瑤草湄，瓊樹杪，海客居。何縹緲，泛長江。楚天曉，木蘭舟外煙波繞。江上景，山嵯峨。仙人樓迥輕雲過，美人簾卷秋色多。鴛鴦隊隊忽驚散，西風遙送采蓮歌。采蓮歌，怨遲暮。芙蓉花，墜江露。
意言無盡，下不意言無盡，下不

謝道承
字又紹，福建晉安人。康熙辛丑進士，官至內閣學士。著有小蘭陔詩集。○閣學高行，屢聞於家。光祿敬亭後於令，似敬處得其遺集，讀之，仁孝之思，時時流溢。洵為德人之言也。瑣係予

戊辰所取士官
比部亦敦本行

冬筍

蒼巖鬱寒姿。先雷蓄孤勁。砮崖凍壑中。氣盛萌欲迸。譬諸君子心。虛直含至性。胚胎何堅貞。節目自苞孕。長鑲雪外攜。剽取雪沒脛。清幽蘭比德。潔白玉同整。品格遠膏腴。烹飪戒餽釘。莫嫌滋味薄。能使襟懷淨。試看山林人。蕭然祛俗病。不須故實。自然雅切。從物性中傳出。君子德性。理足於中。隨所感觸。所云惟其有之。是以似之者也。

承晨昏省侍太夫人。必詰問史事。或對稍延訶責。隨之今不復聞矣。

兒來前。自堯經。今凡幾年。兒彊記。自堯經。今凡幾帝。兒時應對稍逡巡。母顏變色。旋恚嗔。陳篋孫志學人責。稽古胡不如婦人。吁嗟乎。母言在耳。兒顏猶泚。安得我母常噴兒常泚。於今勸學無聞矣。

歸山後家園蕭颯。甘旨缺供。太夫人見憐。每食減嗇。乙卯十月爲二子璫璫析箸。愴然几筵。永志

餘痛

切肉作羹。母呼進菜。侍側勸餐。母匕不再。懶能報本。烏返哺。夕膳晨羞。闕供具。母曰。汝貧。母以我故。加豆盈觴。匪行我素。俄焉空庭。感風樹。爲豐爲嗇。總不御。吁嗟乎。兒無母哺。哺於兒。撫茲柩。捲雙淚。垂。上章憶母氏之

勸學。此章憶母氏之慈愛。字字從至性流出。去三百篇未遠。每一披讀。令人欲泣。所感同也。

一枝山房見新月

牆角光仍隱。檐牙淡欲流。葛衣涼似水。板屋靜于秋。山鬼弔鐙暝。林鴉繞樹幽。關河同一照。招恨此淹留。

送友南歸口占

親老偏爲客。家貧卻在官。百端俄頃集。豈獨別離難。

陸奎勳

字聚侯。浙江平湖人。康熙辛丑進士。官翰林院檢討。著有陸堂詩學。○陸堂穿穴五經皆有述作。今人中井大春也。詩獨風流明麗。廣平賦梅花不礙心似鐵。洵然。

江南曲擬梁昭明

江南草長鶯亂飛。柳花如雪黏人衣。龍頭畫舫送將歸。送將歸。兩持楫。妹桃根。姊桃葉。

詩至梁陳已開調。人小令之漸。不始

於李太白溫飛卿也。此故得其神似。

移居

地偏仍在市。具少不須車。將隱文焉用。雖貧樂有餘。故交三徑月。歷劫半牀書。錯擬臨江宅。空教庾信居。

不須車。比少於車更貧矣。古人語。須如此活用。

湖上念金心齋

鈿車輕轆碾芳塵。湖上重遊隔幾旬。柳絮忽黏空外雨。犂雲不斷夢中春。渚藏冶綠潭迷路。佩結幽香別贈人。寧料湘潭憔悴客。仍逢瓊女冒申申。

柯

煜 字南陵。浙江嘉善人。康熙辛丑進士。官宜都知縣。著有石菴樵唱。○石庵因頓揚屋老而始遇。一官顛顛以病乞身。至薦舉鴻博。而石菴則已沒矣。詩私淑牧齋。親炙鈍翁論者。謂得兩

家之長子謂不襲兩家之貌斯爲善學兩家者

古詩

小智欲求道，得失常相因。如鏡不瑩背，如燭不耀晨。鏡燭豈不朗，操舍還由人。蕩蕩至人出，羲陽徹八坤。浮雲絕蔽虧，萬古光華新。小智自用不能燭理所見者偏也惟性體虛明不矜私知則物無不照矣說理詩以比興出之遂不流入於腐

總總六合間，萬物各有我。臆見苟未除，名理動相左。譬彼迎嘉賓，重門反深鎖。宕胸生虛明，灼然勝觀火。我見未除何由入道萬物一體唯聖者能之

述懷

仕宦已三世，我豈石隱流。高堂漸斑白，誠懷捧檄謀。三釜計不就，五畝遄歸休。長跪謝阿母，阿母屢點頭。折腰非爾願，飲水非吾憂。是母是子

屋上三重茅，已爲風捲去。天教屋漏痕，供我學書具。肯同桀黠奴，三窟竄狡兔。煙塵罨琴檜，荒穢塞畦圃。一笑姑置之，拂拭書中蠹。先祖有風雨絕句下二語云天公助我臨池興牆角新添屋漏痕心思所到先

輕薄也況王在李前豈前人反襲後人語耶

勸農

兩足秧針滿，翠色迎衣裾。牛背一鴉立，夕陽人力鋤。萬物自閒暇，三農日勤渠。豐樂今伊始，勉旃事菑畬。

往見石田翁畫鴉立牛背今爲石菴詩寫
出詩中有畫畫中有詩豈獨摩詰然耶

題潯陽送客圖爲宋蘭揮檢討賦

梁園才子瀛洲仙。幕府讀書方少年。潯陽樓高試聘望。雕闌一曲橫江天。登臨懷古意繚邈。生綃染出琵琶篇。當時白傅佐江郡。曠懷日習東林禪。無端送客成邂逅。京都音樂聞江邊。青衫紅袖兩悽惻。千秋歌曲爭流傳。只今丹粉紛本事。水雲彷彿鳴香絃。貞元朝士感淪落。善才弟子餘嬋娟。霓裳六么疑可識。檀槽手撫神宛然。古來悲歡事何限。豈必同病纔相憐。高歌妙繪恣揮洒。動盪胸臆開心田。乃知賢豪襟韻各有託。非同非異非言詮。奇章贊皇兼將相。豈若香山佳句爭流連。還君此畫情悄悄。幽齋燈地耿不眠。疎簾剩有玲瓏月。曾照西江詩酒筵。

贈沈魯瞻

男兒蹤跡誤浮沉。把臂相於快入林。客館因依同雁序。霜天酬唱作龍吟。一燈分照還家夢。千里誰明抱璞心。請念退之論駑驥。莫將高價索黃金。

蔣恭棐 字維御。江南長洲人。康熙辛丑進士。官翰林院編修。

景州董子故里

嫚秦廢學校。坑儒并焚書。師吏辜誦說。六經歸榛蕪。漢興雖天授。創業由征誅。典禮命叔孫。繇葛誠區區。

百年生董子。私淑洙泗徒。下帷絕窺園。精心究典謨。從容對三策。致君期唐虞。武皇內多欲。遇之以虛拘。詎能崇正學。詔令相江都。後復相膠西。驕主重詔諛。誠正能感通。兩地無齟齬。主父偃。公孫弘。謫計何從據。春秋詳災異。衆口訾其迂。弟子昧師說。呂步舒。妄謂論大愚。獲辜得免死。誠口全其軀。所幸聖道明。邪正分殊途。以待後來者。迭起胥匡扶。有宋五子興。直溯姬孔初。日月懸中天。夢翳消雲衢。何人啓竊徑。廣川實先驅。而胡昌黎伯。吐辭取敷腴。屈原司馬遷。子雲與相如。論道遺董子。所見猶偏隅。我過景州里。祠宇叢枌榆。稽拜瞻儀容。和粹緬真儒。王道復誰陳。攬轡空踟躕。昌黎。秦以後。至董子始昌言聖道。後文中明。則董子實有守先待後功也。後半透發此旨。有聲有光。

馬維翰

字墨麟。浙江海鹽人。康熙辛丑進士。官至四川東道。著有墨麟詩卷。○意不肯庸語。不肯弱莽莽蒼蒼。縱筆揮霍。雖未神來已梯階險。墨麟學杜。可云循牆而走矣。

蚤發併浦

寒威凜冬季。木落風淒緊。束裝適京國。夜漏短無準。父母送臨河。肫復辭難罄。首言慎起居。次言遠馳騁。得既勿滿盈。失亦戒孤憤。努力崇正軌。緇塵發深警。長年動蘭橈。瞻顧兩未忍。俯首別淚滋。回汀更引領。細雨權橫塘。廬舍去隱隱。銘心寶訓言。守身日三省。初出門時。矢志便已正大。後時出政。自能不辱其親。

九折坂

自注。用杜詩。木皮嶽瓶。

盤盤出鳥道。杳杳行人村。斗起邛峽山。仄隘逾劍門。天險遡開鑿。未可常理論。陰陽分向背。旦夕殊寒暄。

連山走雲氣，倏忽同追奔。一峯獨秀出，頗似嶽勢尊。其下九折坂，剗絕割厚坤。况復急雨薄，萬壑當晝昏。回輿與叱馭，北轍視南轅。所志各有託，忠孝惟其根。踟躕兩不決，心緒蠶絲繁。峭壁落井底，一髮青天痕。人生鮮百歲，只有名常存。勒銘匪易事，或用酬驚魂。奇險句似得力老杜發秦州詩以下諸咏皆然

瀘定橋自注用杜詩石櫃閣韻

落日嵐氣陰，斜照峯頭赤。瀘河捲雪來，激盪河邊石。底定定何時，盤馬對絕壁。鐵索繫兩岸，縛橋渡行客。人影漾驚波，行空無轍跡。前灘勢未平，後浪聽轉迫。孽龍蟠深淵，長虵赴大澤。驚魂定無時，王事敢求適。

梅花

疎枝雀啁轉春溫，正試東風第一番。每自凝神當遠驛，為誰孤立向荒村。晴雲曳宕春無限，午夜分明月有痕。索解此中渾未易，目成脈脈在忘言。已能脫俗

沈懋華字芝岡浙江歸安人康熙辛丑進士官由翰林改侍御○侍御詩意主蘊含不欲說盡唐宋之分斷斷如也晚歸佛氏教不復作詩

秦和道中

行子易時序，但嗟江路難。孤帆轉天際，遙出青林端。山影落空翠，濤聲生夜寒。鄉書猶未達，雲海正漫漫。

渡江

路盡鳥飛外，微茫一葉舟。月斜江岸曉，潮落海門秋。山色南朝寺，鐘聲北固樓。寄奴城外草，隱隱入邊愁。

此詩吾友許武平極稱道之。謂其調高意遠，直接唐人。

秋夜東湖玩月

洞庭木脫渺愁余，倚櫂寒流挹望舒。笛裏關山清夜怨，鏡中樓閣美人居。天高風轉依枝鵲，川靜波騰縱整魚。直是乘槎度銀漢，都看白露下前除。字字清遠，妙在言言之餘。

魯曾煜 字啓人，浙江會稽人，康熙辛丑進士，官翰林院庶吉士。

商婦篇記汝陽事

問妾何人婦，商家執巾緹。枯楊生其稊，亦自稱連理。前年賑洞庭，今歲耀吳市。妾嘗處空閨，獨宿鮮娣姒。妾貌苦之榮，妾心水之止。東鄰何少年，自矜冠玉美。妮詞致黃金，新聲挑綠綺。爲妾謝少年，越禮禽行耳。庭前雪皚皚，江上石齒齒。石堅不可泐，雪淨不可滓。付命朱絲繩，妄念君休矣。男兒愛後婦，女子重前夫。以拒狂且，何辭婉而意嚴也。此云越禮禽行，死志已決矣。詩亦從漢人中出，而立言各有體裁，扶持名教，賴有此種。

李

鍼 字含奇，直隸盧龍籍，江南吳縣人，康熙辛丑進士，官翰林院庶吉士。○太史館選，未幾旋卒。彼山澤之士，沉淪而不章者，可勝歎哉。

雜感

爛漫年華爛漫愁，春光春水兩悠悠。卷施有葉心先斷，杜宇無聲血已流。歎逝陸機同閱世，思家王粲獨

登樓。此鄉信美非吾土。冷落胥江一釣舟。此章自歎下章傷逝斷腸人遠。傷心事多年之永不已兆於此。

生別吞聲已不禁。頻為死別更摧心。圍棋寂寞虛山墅。清宴依稀憶竹林。自注叔季兩叔相繼早世。季子遠攜留墓劍。

自注密友鬱馨聞墓草已宿。女嬃空冷搗衣砧。自注同懷姊喪。三年伏枕雙垂淚。腸斷清猿向曉吟。

送友歸鑑湖即赴辰陽幕

易別還如商與參。醉歌燕市悵分襟。旅遊舊雨聯今雨。歸客越吟還楚吟。潮落嚴灘殘雪盡。春生湘浦紫

蘭深。相思一夜江花發。千里月明同此心。越吟楚吟謂鑑湖辰陽也。此句虛領下又分承格法極細。

甘曰懋字黃夫四川大邑人康熙辛丑進士。

華頂道院見三十六峯老農吳青霞題詩壁間寄贈

袖拂剛風倚天闕。忽見龍蛇氣蓬勃。君從三十六峯來。獨上蓮花攬明月。自是君身有仙骨。放歌長向煙

霞窟。回頭卻笑韓退之。痛哭蒼龍嶺上時。

王恕字中安四川安居人康熙辛丑進士官至福建巡撫著有樓山集鈔。

牧牛詞

童兒長成何所求。農家職守惟牧牛。春風著物百草長。驅牛嚼草來沙洲。童知牛性不擇草。遇丰茸處俱堪留。乘間好弄三孔笛。綠楊影裏聲悠悠。天上日車休輓轆。少待吾牛飽其腹。牛得飽兮安吾心。牛不飽

兮媿吾牧。不施鞭扑牛馴擾。順牛之性無機巧。牛蹄彳亍牛尾搖。背上閒閒立春鳥。高下陂陁任所之。牛日肥兮牛不知。嗚呼司牧盡如此。人間那受飢寒死。通體說牧牛。牧民之道。已曲折詳盡。正意一點自足。○牛肥必求牛知。此小補術也。不使之知。上下兩忘。

過十八灘

補天剩塊截江流。今古驚濤咽暮秋。萬石稜稜爭出水。千崖疊疊曲行舟。猿啼頻下孤臣淚。日落重增旅客愁。惶恐灘頭征雁斷。幾人回首望神州。

邵

泰字峙東。直隸大興籍。江南吳縣人。康熙辛丑進士。官翰林院編修。

壬子正月重赴金陵志館。偶誦陶詩。遙遙從羈役。一心處兩端。句愜然有感。

春風從何來。所過不留跡。人與物同春。欣欣各自得。而我獨何爲。當春轉蕭瑟。親老不能待。飢驅此行役。縱非出山泉。仰媿入林翮。一心信兩端。繹思有餘戚。緬昔負米賢。歡焉供子職。太史以母氏年高。居官未久。即請終。循陔之養。詩中暫赴志館。感然於中。仁孝之思。可風矣。

儲雄文。字沱雲。江南宜興人。康熙辛丑進士。

有訪

未遇幽人又獨還。貪看落日立溪灣。隔溪幾處炊煙動。遮斷寒林數疊山。

訪朝陽道院

竹逕陰陰磬韻流。行來便覺此生浮。道人所得惟貪懶。滿地松花散不收。兩斷句氣韻欲流。如讀有聲之畫。

蔣

深字樹存。江南長洲人。官山西朔州知州。著有續谷詩鈔。○續谷以纂修書畫譜得官。居官有政聲。詩亦時露警句。名揚中交重之。

蠅

趨熱性能慣。貪饕死亦輕。未容隨驥尾。先欲亂雞鳴。把劍何堪逐。無屏謾點成。秋風蕭颯後。憐爾竟何營。
嘲趨熱客也。語語典切。得少陵詠螢火遺意。

過落花村寄姚水部梓嵐

蒲邨西十里。隔水澹斜陽。花落不知處。人行覺路香。雞栖烟箬密。鴉曳暮雲長。想見湄潭老。探幽覓句忙。
村名韻極矣。三四語傳出村行者之韻。而水部之韻亦於言外見之。

軍旅

書生事軍旅。奉檄楚江遊。人度危灘月。猿啼獨夜舟。遙聞刁斗靜。猶喜甲兵收。不作從征詠。登樓客已愁。

曉行

聞雞莫歎客途窮。拂曙星河倚劍雄。馬上續完鄉國夢。笛中吹起戍樓風。雲開泰岱天門白。人渡津關海日紅。湛露未晞秋信到。蘆煙深處數聲鴻。
舊語一經點換頓覺鮮新。

麻陽船口號

逆流好用船頭力，下水偏將船尾行。一葉不妨危地過，此心平處水皆平。此心不平，坦道皆危地也。以平

自得矣。此作者閱歷有得之言。

魏荔彤字念庭，直隸柏鄉人。官觀察使。著有懷舫集。○觀察為文毅公子，嗜古學，勤著述。詩歌雜文，不下數千章。今鐫板俱散軼矣。祇存平時記憶二章。見鱗爪，可想像雲中龍也。

題沈歸愚萬峯獨立圖

峯峯卓立斷躋攀，筇屐逍遙鳥道間。試問此翁登眺後，何人更上萬重山。向更有七律贈言，末云：他年旌節臨吾土，便合掃門迎故人。後

余奉使之楚，道經其地，而觀察下世久矣，為之慨然。

馬陵道

戰壘千秋沙草平，更無殘戟礙春耕。荒城夜半喧雷雨，還似當年萬弩聲。天然映合。

王濤字衡山，江南含山人，拔貢生。官兗州府同知。著有青霓閣集。

贈唐魏公

轅駒苦局促，寒蠟多羞縮。市兒眼如豆，羣疑偏滿腹。欲吐還復茹，囁嚅私相屬。多君挺英姿，天馬脫羈束。雄辯驚四筵，高談折五鹿。聞者舌盡橋，言出人人服。豈惟言服人，石畫如劔竹。一官聊攝間，舌敵穎亦禿。願垂竹帛名，志不在食肉。會當攜巨觴，對君洗塵俗。同登光嶽樓，齊魯歸洞矚。岱峯雲盪胸，東海日初浴。

俯仰天地觀好縱千秋目。讀此詩知衡山志在濟時不隨刀筆。管篋徒也。屬於下僚有願未遂惜哉。

李蓮字少峯湖廣荊門人。

石城

晉代衣冠空薜蘿。石城埠塊尙峨峨。鎮雄江漢山增險。藩撤孫吳水不波。混一方知臣力瘁。憂危孰料女

戎多。廢興堪下千秋淚。若問浮名心已磨。晉平吳後。賈后之禍旋起。羊祜所謂平吳之後。當勞聖慮者。耶。陸之役。晉已勝楚。范文子謂外寧必有內憂。卽是此意。

計字希深。江南吳江人。○此甫草先生子也。遊遊四方。名滿日下。晚歲余曾評定其默詩。今令子維殿物故。無從徵索矣。於汪堯峯集中錄此。附存二章。可以想見其餘。

和汪鈍翁姑蘇楊柳枝詞

紅橋綺陌柳陰濃。歷亂飛花類轉蓬。怪殺前山女貞樹。能禁二十四番風。見柔靡不如豎貞也。然以神韻行之。與罵詈者迥別。

去年折牘復依依。贏得江頭紫燕飛。委屬東風與將護。一枝留待藁砧歸。

湯字稗平。河南睢州人。○稗平爲文正公季子。幼承家學。以樂天守道自期。詩不求工。而陶治性靈。自足天趣。詩以人重。人。不以詩重也。作序者以孟山人林處士擬之。恐非其倫。

詠史

唐伐羌成盛冉駹。韓公謀略信無雙。年來西域勞兵革。願築三城署受降。築受降城。自是禦戎長策。卽先王守在四夷之意。

臨漪園

閒園隨意采芳蓀。興到常攜酒一尊。卻笑平泉太多事。苦將木石戒兒孫。達人

桃源

柴桑便是羲皇世，智慧相忘息衆喧。能使此心無魏晉，寰中處處是桃源。靖節含意未申，此申言之。

徐善建字孝標，浙江嘉善人。○此陸清獻公高弟也。究心周易及宋五子著述，教人讀小學，字義諸書，謂先識體段，方可入精微處。學者多師事之。

觀鳥哺兒有感

抱兒嬉樹下，新綠遮庭戶。忽聞啾啾聲，仰見春鳥乳。不辨誰雌雄，四翼共辛苦。一出掠春蟲，一居禦鷹虎。出憂居力單，居憂出遭罟。瘁羽豈暇梳，嬌音不遑吐。黃口快得食，那知翁與姆。感此撫童雛，何如此禽羽。上念父母恩，淚下如注雨。性情淺者，只感觸己之哺兒，今上念父母哺己之恩，慨然震然，可以教孝。

王汝驥字雲衢，江南金壇人。由選貢生官通江知縣。○雲衢丈制義宗工，中歲爲詩，不落宋元氣習。古體尤上。外人不知爲詩人，以文名掩也。有嗜痂癖，每來吳中，酒後背誦余詩，至數十章，人多笑而怪之。詩稿未鐫，葺詩時屢訪不得。祇存其舊詩鈔贈二章，比之吉光片羽焉。

雞頭關

征馬鳴蕭蕭，澗水流潺潺。水鳴何嗚咽，馬鳴多哀酸。借問客何之，言上雞頭關。關門開一線，羊腸裊青天。上有千仞壁，下有百丈淵。驚風吹落石，洪流盪奔湍。危途無返轡，微生寄征鞍。靡靡遵木末，遙遙造雲端。故鄉杳何許，天路安可攀。側聽隴頭吟，感我涕洟瀾。

黃牛峽

三峽天下奇，黃牛險尤絕。奔騰萬里流，磔豎兩崖裂。舟從罅隙行，身在古石穴。驚濤般怒雷，爛石散晴雪。纜牽如蟻進，橈退只一瞥。舟師喚奈何，長篙屢撐折。哀猿數聲叫，客子雙袖血。到此英雄人，自顧同蠓蟻。生涯抵投荒，輕身計何拙。載詠小旻詩，撫心媿前哲。連上章能造險語，彷彿老杜入蜀諸詩。

陳奕禧字謙六，浙江海寧人。官石阡太守。○石阡以字學鳴詩亦清穩。王新城尙書嘗稱賞之。

望中條山有懷吳天章玉溪隱居

雪晴初日照，歷歷中條岑。下有幽人宅，長鄰洞壑深。松門閒倚杖，潭水坐清心。靜聽風泉落，冷然彈玉琴。

虞帝陵

陵寢古鳴條，平岡入望遙。自注：陵在鳴條岡之盡處。殿庭二女侍，冠珮五臣朝。府事開神禹，文思協帝堯。饗堂合樂處，彷彿奏箎韶。

郭元鈺字于宮，江南江都人。官中書舍人。○于宮亦江左十五子中之一。嘗輯金源詩，無挂漏者。可補元遠山之缺略。

答邵子湘

芙蓉湖上邵髯翁，高行鴻文眼界空。京雒聲華懷漫刺，江湖蹤跡趁歸鴻。南豐不讓劉中壘，杜甫平交嚴鄭公。老卻少微星下客，夢魂肯踏軟塵紅。五語高子湘之文，六語高子湘之品。

顧文淵字文寧，江南常熟人。著有海粟集。○蔣文肅題其集中云：不作廊廟歌，云是騷人詞。寫出肝膽語，願得知已知。不得知已知，甘受他人嗤。觀此贈言，其詩可知矣。其人亦可知矣。

余錦泉席上聽衆姬琵琶箏

有酒易傾不夜之圓月。有金難鑄不謝之名花。秦川公子發大笑。偏與花月爭豪奢。左秦箏。右琵琶。九枝蠟燭光如霞。青蛾皓齒兩行列。袖拂紅牙低按節。初調絙朱絲。峽口春冰裂。再彈捍撥齊。鈴聲雨淋咽。江妃漢女玦環鳴。相和箏琶同撇捩。俄驚雙鳳凰。飛上梧桐岡。啁啾屏盡百鳥喧。誰誰和鳴向朝陽。逡巡換宮商。倏忽移角徵。朔風應手捲驚沙。白草茫茫雁聲死。飲恨羈臣擊劍歌。裏創戰士聞笳起。淒斷故園心。擾破離人耳。停絃兩兩寂無聲。織織憐殺春葱指。天孫織錦作纏頭。五色綵雲遺彼美。花殘月落不忍歸。捲下珠簾隔千里。起結神似太白。中間移宮換羽。頓挫激昂。使讀者目眩神移。盡於應接不暇。

十八灘

荒荒異縣經萬安。毒霧散影分林巒。暮愁雨宿朝風餐。前途遙數十八灘。一灘一險俱心寒。青螺層層如抱擁。石插旋渦各森聳。寒流百道噴石孔。七千里外宋孤臣。落日灘頭說惶恐。宋孤臣指東坡。

暮帆齊落喧鳴鏡。村人堵立林塘坳。利箭在箠弦在鞘。不知何山逐獐鹿。巨天野火燒黃茅。危磯千文蔽天宇。長年日晚忽停櫓。月逆行雲吞復吐。虎俛啼過斷人聲。叢莽中間伏強弩。

煙中振舵水倒衝。千篙爭力怖殺儂。森森石齒排劍鋒。人言險灘最天柱。水底白日蟠蛟龍。五章又似少陵短章。

嚴啓煜字政林。浙江歸安人。官永康訓導。政林嘗言昌黎昌谷雖非詩之極至。然針砭庸俗。廓清之功。真乃比於武事。又言二昌乃吾死友。今披其集。皆和平中正。無詰屈奇詭之習。豈善學

者不求
形似耶

留別吳門諸子

夕陽衰柳繫歸橈。離思孤隨鴈影飄。豈類穆生忘設醴。自傷伍相久吹簫。遊雲變滅元無定。盤谷寬閒實見招。祇惜舊時諸伴侶。春燈花下隔吟瓢。
背花寧待管絃終。歸臥雲林半畝宮。世外漁樵有真趣。山間雞犬盡淳風。采松袖染秋嵐碧。擣藥窗留夜火紅。他日臯橋明月裏。故人應共念梁鴻。

汪文桂

字周士江
南新安人

秋日曹秋嶽先生過飲桐溪草堂別後有作

謝公屐齒款雙扉。點筆翻書對夕暉。徑仄秋花迎客座。夜深涼月戀人衣。驚心蕉鹿追宵夢。款語滄桑坐石磯。曉柝更催歸棹發。望中帆影思依依。
寫得涼
月有情

秋日同季弟歸里和韻

秋深才得返鄉閭。弱弟偕行賦遂初。衣上辛勤慈母線。篋中珍重故人書。白雲紅樹堪移棹。萬壑千峯擬結廬。到日松楸親拜掃。山田猶待把犂鋤。

汪文柏

字季青。浙江桐鄉人。官指揮使。著有柯庭餘習。○竹垞朱先生序其詩。謂匪僅開宋元之窳。與直造唐人之室。而噴其馘。不無溢美。然謂時有佳句。比之孟山人之微雲淡河漢。疎雨滴。

梧桐斯
爲得之

盛湖

矮屋環湫市。洄流界疊陸。夜燈千疋練。秋雨半湖菱。擊榜吳娃捷。評珠賈客能。辛勤終歲力。猶未足催徵。
夜燈十字非親語其地不知其妙即景成詩差無故實應得於有意無意中

登煙雨樓

十度憑欄九度晴。今朝煙雨一舟橫。雁飛難辨空中字。櫓過惟聞暗裏聲。軟浪成花侵寺壁。冷雲如墨擁軒楹。舉觴放眼唵長句。始信高樓不負名。
櫓過惟聞暗裏聲自是佳句然施之此題彌見其佳

費錫琮字厚蕃四川新繁人著有白雀樓詩○厚蕃爲高人此度長子克傳家學五言亦有大江流漢水孤艇接殘春之概新城王尙書惜未見其詩

黃河

靈脈來天上。渾流晝夜奔。縱橫穿套口。屈折下龍門。地入滎陰斷。山臨華嶽尊。何須逢漢使。便擬溯崑崙。
一氣鼓盪力逾氣雄

登北固山

絕嶺橫江岸。登樓望渺然。潮來徐福島。山出寄奴泉。境界分吳楚。波濤混海天。千秋征戰地。今喜靖烽煙。
字滋衡四川新繁人○此此度次子然古樂府詩中蒼蒼莽莽有古音然亦不無粗率處淘汰之取其古而近雅者迥異時

兒語

鶴鷹搏雞。雞有母護。離親出門。心寒行路。連下章。竟

食魚去乙。食李去核。治國去賊。

送劉得柔入秦

紫騮卸玉羈。故人來齊安。昂藏河朔氣。兩鬢蕭蕭寒。爲言三載別。岐路各漫漫。燕秦二千里。浮雲會江干。雪堂寂寞秋。傾蓋暫盤桓。片言瀉黃河。隨風生波瀾。虵虺橫江湖。噬螫太無端。湛盧不在握。徒手空長歎。明日東西別。征車不可攀。

湖山

碧澄千頃豁。青立一峯孤。月似懸秋鏡。人如坐玉壺。煙光隨地盡。水色到天無。肯與漁翁醉。鄰舟近可呼。水色到天無。言遠水接天。合而爲一。不見水也。此工於鍊句。

海村雜詩

海樓秋易夕。水寺晝長昏。穀貴難成市。時荒早閉門。蛇龍各自媚。禮樂不言尊。寄問西邨叟。方飢劇草根。難成市。不言尊。荒年景象如見。

少年行

臂上角弓強。腰間劍似霜。舊從李都尉。新拜漢中郎。愛馬黃金埒。調鷹白玉牀。平原秋草淺。射獵出長楊。
汴城晚望

落木蕭蕭汴水清。雲沙何處雁飛聲。河蟠雍豫千支合。地拓中原萬里平。累代廢興難屈指。百年禾黍獨
關情。夢華空有遺民記。不是宣和舊帝京。

變歌

東門楊柳枝。早晚遭攀折。今日是相逢。明日是離別。六朝小詩。

相逢

岐路不相識。一言傾寸心。贈君腰下劍。不在直千金。以千金直重。則義氣減矣。此善翻前人句意。

吳姬勸酒

吳姬十五髮鬢鬢。玉腕蒲桃勸客酣。但過黃河風色冷。更無春酒似江南。如聞勸酒之聲。而渡河以北之風塵。言外可想。

陳玉齊字在之。江南常熟人。著有情味集。

秦皇

離宮環極起周廡。萬里滄波候大魚。入海雲迷徐福島。封山雨濕李斯書。華陰道上逢沉璧。陽武沙中失副車。王翦用兵真老諍。尚留三戶未驅除。

徐

蘭字芬若江南常熟人流寓北通州以終著有出塞詩○芬若亦字芝仙長白描人物詩無一語不奇吾友徐龍友見之幾於下拜奇人見奇詩尤契合云

雨阻黑河

天地有此河墨流獨浼浼黃河曾爲聖人清濁浪咆哮獨不改迢遙西上勢蜿蜒兩旗疆界相鈎連自注

武兩都統分地受降城頭坐飛將牧馬不敢爭河邊上有共工觸破未補之漏天下有鮫人痛哭不測之深淵陽

春有腳走不到那得兩岸生人煙但見奇花寒洲渚色如人面形如拳花裏見魚不見水一網可以盈一

船飢兒阻雨不須哭朝魚暮魚食尙足雷電光中住過春腳底莓苔黯然綠天晴曝衣上古原白骨堆邊

檢金鏃境奇詩亦與之俱奇芬若又有大松山詩起云一峯飛入雲雲故推之

燐火

土雨空濛著衣濕燐火如螢飛熠熠須臾散作星滿天空際如聞衆聲泣有火獨明必鬼雄衆鬼吐燄無其紅約束羣燐共明滅無乃昔日爲元戎別有火光黑比漆埋伏山坳語啾唧鬼馬一嘶風亂旋千百燈從暗中出電光閃閃兩軍接狐兔草中皆震懼一派刀聲不見刀髑髏墮地輕於葉血過千年色尙新那知白骨化煙塵新鬼日添故鬼冷無復寒衣送遠人寫燐火之忽聚忽散鬼雄鬼馬之光怪離奇紙上幾於有形聲矣後又寫羣鬼之接戰更幻更奇矣道子

善畫鬼亦未到此

歸化城雜詠

祁連呼吸與天通。不與人間節候同。後騎解衣風柳下。前軍墮指雪花中。髮離漢地根先白。淚過秦山色
變紅。騶伍漫勞歌況瘁。侯王猶自佩瑠弓。奇人總無凡語。

塞下曲

萬騎從天下。邊人拭目看。長城無限窟。飲馬一時乾。

關山月

城頭一片秦時月。每到更深照黑河。馬上萬人齊仰首。不知鄉思是誰多。

出關

憑山俯海古邊州。旆影風翻見戍樓。馬後桃花馬前雪。出關爭得不回頭。眼前語便是奇絕語。幾於萬口
者。流傳此唐人邊塞詩未曾寫到

清詩別裁

卷二十六

沈用濟

字方舟，浙江錢塘人。國子生。著有方舟集。○方舟足跡半天下，至廣南與屈翁山、梁藥亭定交。詩乃大進。遊邊塞，留右北平久。詩皆燕趙聲。一時名流，幾莫與抗行。然所成詩，一句一字，實之同人，有譏彈輒改定。所由完善無罅漏也。向見重紅閣主人輩下名大著。余留京邸時，知方舟為詩人者，寥寥矣。不知向後有能傳其人否耶。感慨係之。

燕山

我行經燕山，憑弔古戰場。當時銳頭兒，誓死事戎行。功業未得成，金鏃遺山岡。阜鵬如車輪，飛來立人旁。黃雲蔽四野，風沙浩茫茫。驅馬行出關，悲歌慨以慷。身著短後衣，劍佩百鍊鋼。扼吭度飛狐，仰面看天狼。生當為冠軍，死當為國殤。慨當以慷，阜鵬十字。讀者如置身邊塞間。

妾受命辭

妾受命兮少孤，師氏教以詩書。阿母愛予早有家，託君子以賤軀。解一乘華軒兮歸德門，曳綺縠兮羅金尊。上事公姥兮無間言，俯蓄五子兮今有孫。解二何以奉君朝餐，銅盤或炙或燔。何以奉君禦寒，裁縫越布吳紈。解三鼠穿墻兮狼入室，唇乾口燥兮不可與說。無褐無衣兮迫冬日，晨雞咿喔天雨霜。明星煌煌出洞房，為君秣馬遊四方。解五丈夫氣磊落，朗如日照臨。渴莫飲盜泉水，倦莫憩惡木陰。解六出門常言遠，在家常

苦貧女子當門戶百難萃其身解七思我君子兮蔚爲國華富貴勿喜兮貧賤勿嗟履仁服德兮名乃紛葩

八解○此代其配朱夫人立言也先言奉公姥撫諸雛次言持門戶次言遭家難次言送遠人未勉以修德行得雄雉不悅不求何用不臧之意立意音節在東西二京之間

黃河大風行

黃河之水自天落我舟來向黃河泊遙看雲氣如飛龍知有東南大風作大風一起天茫茫排山倒海不可當浪花捲起高十丈虛擬沉牛截狂象危檣大楫撼不停霎時飄散同流星高岸倒震鼙鼓裂怒濤亂捲蛟涎腥暝來打篷聲膈膊半爲雨點半冰雹夕陽欲下風更狂吹落孤帆天一角一舟重有萬鈞力颺入泥沙脫不得一舟觸石摧鵠尾窺見青天在艙底水面一舟飛鳥輕無枝可棲心目驚其餘溜急難鼓柁客船十個碎兩個同泊尙餘四五船船船相觸繩相聯長年當風立至曉我輩安得高枕眠近見青齊成水府況聞中州少安堵皇天降災良有因汝曹定觸河神怒不爾風濤何太苦男兒勿恃膽氣粗要知蹈險非良圖新河安穩路徑直汝何不趨趨畏途豈惟黃河爲畏途波瀾平地無時無詩亦有雲垂海立之勢近七子中李獻吉結意忽然換境感觸者深

大同道中

千嶺朝陰嶽三城控大同雲形隨列嶂山響應瑠弓馬踏黃河雪鷹呼白草風飛狐那用塞天險古來通一路邊塞之詩俱沉雄峭拔不在李北地下○沙乾奔渴馬風急下飢鷹亦邊塞中詩附錄於此

太行山

山作潼關險，艱哉勢獨雄。千盤拔河內，一折走遼東。大壑雲雷伏，陰崖日月通。巍巍天下脊，元氣結鴻濛。

登八達嶺

策馬出居庸，盤迴上碧峰。坐窺京邑盡，行繞塞垣重。夕照沉千帳，寒聲折萬松。回瞻陵寢地，雲氣總成龍。

行經將軍猛虎諸灘

高高灘十丈，直下響成雷。舟擲波心去，人穿石窟來。虹蜺雙瀑挂，菡萏小峰開。濁酒酌三老，傾危仗汝才。

擲字穿字，千捶百鍊而得。

潼關二首

重關踞天險，三輔重神京。繡嶺遙尊嶽，黃河曲抱城。一夫今保障，羣盜昔縱橫。星隕何年事，徒傷父老情。

自注：謂孫督師傳庭。

窺關如在井，立馬一峰高。竟失山河險，徒誇汗血勞。沙蟲迷白日，陵谷徙洪濤。翻使黃巾笑，橫行遇汝曹。

黃巾笑，謂不能力戰，盡進降表諸人也。孫督師周寧武外，有一人忠勇者乎。

登建陵

鼓櫂辭西粵，開帆趁北風。水聲飛弩下，山勢鬪雞雄。雨歇秦關外，秋深蜀道中。稻粱謀故拙，吾愧信天翁。

前所練在處擲字穿字是也此所練在寔飛弩鬪雞是也

昭平道中

灘勢奔騰下舟行次第高瀑流爭一石人力盡千篙壁峭奔雷雨林深聚羽毛江鄉歸未得夢寐亦風濤

此所練詩眼又在爭字盡字加捶鍊功則無草率之患

從彭蠡轉九江泊小孤山下

不信滔滔者洪荒直至今高帆轉湖口片石奠江心鷹匝亭臺迥龍蟠窟宅深迎神歌一曲絃響下青禽

花田

埋玉傳南漢花田今尚存雪中香不散煙外月無痕芳草尋詩路青旗賣酒村漫將蝴蝶數一一美人魂

前一路詩皆英雄氣此首又兒女情見英雄兒女原不必分也雪中謂花開如雪非真指雪言

登泰山絕頂

丹梯飛磴接天門杖底風雷萬壑奔四嶽共推青帝長一峯還占丈人尊漢家雲氣封中出秦代松陰石上存俯仰不知天下小蓬萊宮闕射朝暉

無懈字無浮詞勝于鱗元美作○方舟詩雖切礙於藥亭然古體或遜藥亭五七言律遠過之也近人用耳不用目誰能信之

望西嶽

五千仞削勢崔巍西鎮坤維玉作臺海日夜從金掌出蓮花春向石盆開宮臨白帝三峯立城繞黃河九

折來欲跨茅龍問酒母。芝田堪種乏仙才。精神滿腹亦勝元美作。○酒母酒家媪也。仙人子先與之騎龍上華山亦成仙呼爲酒母見列仙傳。

湘江道中

越客歸舟向洞庭。心隨一鴈入空冥。烟開沅水雙流合。帆轉衡山九面青。魂返江楓哀楚些。曲終瑤瑟怨湘靈。振衣已出塵埃外。漁父何因笑獨醒。

由麗江抵北流

頻年鞍馬歷荒陬。唐代羈縻是此州。猿洞千蟠攀嶺怯。鬼門一線入天愁。朝昏吹角呼林鹿。婦女張弓射野牛。卻望伏波銅柱在。飛鷺跼跼海西頭。鬼門七字筆下有陰險愁慘之氣。

天下大師墓

曾聞遁跡入禪關。身似浮雲到處閒。解道龍蛇潛草野。何年弓劍傍橋山。緇衣那有中宦識。御馬誰迎老佛還。一自櫻桃無薦地。肯留封樹在人間。曰曾聞曰解道曰那有曰誰迎曰肯留見蓮社。凡蹟皆致身錄。從亡隨筆等書造作之辭其實未嘗有迎歸事也。實錄稱帝闕宮自焚中使出其屍於火七日乃葬是明明死於火矣。至天下大師墓朱竹垞謂房山僧塔或題司空司徒或題帝師國師金元舊制皆然後人附會爲建文墓也。此詩故作疑詞使人言下自得。

海幢寺觀大水西下

鬱水西來萬壑奔。倒翻塔影盪雲根。中間一束高腰峽。直放驚濤出海門。

題謝皆人詩後

紅桂飄香月露清。玉完天上奏瑤笙。白頭弟子秋風裏。來聽霓裳第一聲。

筒溝早發

北風獵獵水茫茫。多謝吳門鼓柁娘。鐵鹿長橋四千里。送人夫婿早還鄉。載兒夫婿去。劉采春怨之。送人夫婿歸。方舟又謝之。舟人受怨。

乎。受謝乎。各見吐辭之妙。

櫂歌

風江潮動月茫茫。懊蕩聲中夜未央。南北東西盡蓮葉。不知魚戲在何方。

毛張健字今培江南太倉人貢生官訓導

寄衣曲

去年寄衣秋月明。絡緯索索窗前鳴。今年寄衣風復雨。不識何時到邊土。邊城八月多早寒。清霜觸體愁衣單。千絲萬縷妾手製。中有珠淚焉能乾。不願功成垂竹帛。但願全軀返鄉國。學張王體難於別開生面。意緒自抽一歸敦厚如舊。

穀中春出新粒也。

少年行

千金寶刀紅玉弮。繡鞍蹴踏長楸下。揚鞭不避執金吾。橫過禁園矜善射。自云生長金張門。意氣雄豪那可論。小時便食天家粟。曾向長楊奉至尊。隴西老將七十戰。絕域到身空浩歎。羨君不識兜與鍪。襟中骨

相當封侯。

以飛將軍之到身絕域。觀出少年之寵榮。卽所云。生年十二有重封也。寒郊類轉蓬。烏乎知之。

賈客樂

布帆滿幅高百尺。知是賈人遠行役。賈人生小樂風波。不戀家中好田宅。瞿唐豔潏平地過。此行金錢十倍多。更促前程向江口。淮南米貴今如何。春閨少婦空房宿。聽罷烏啼淚盈掬。原詞極形賈客之樂。此於苦末二語總於換韻。換意中翻新。

毛

序。字東球。江南太倉人。著有靜娛集。

偕同人散步

殘紅委煙水。潭深淥更淨。臨流弄清泚。鬚眉淡相映。冷然洗我心。迴絕非人境。鯁魚從容游。鷗鳥度明鏡。物我兩俱忘。不減濠梁興。回首林邱間。閒房一聲磬。心和氣平。物我皆得。其不着力處。正不易到。

輓龔敬五

執友驚淪逝。霑袍涕泫然。卑飛辭捷徑。少別卽重泉。燈暗匡衡壁。塵淹子敬氈。如君瑚璉器。何可使無年。天意原難問。龍蛇厄運過。青山仍落魄。白髮竟如何。講誦生徒散。叢殘著述多。黃墟感存歿。回首邈山河。

陳培脈

字樹滋。江南長洲人。國學生。○樹滋篤於友誼。壯歲與諸才士角。逐名場。然衆人升雲路去。而樹滋終老諸生。無幾微見色也。詩宗法盛唐。晚遊新城。尙書之門。所詣益進。

相逢行贈宋六木天

一年相逢在輦下。秋雨槐花對僧舍。同時獻策不見收。劇飲淋漓共悲咤。一年相逢在濟南。擁鑪未盡深宵談。烏啼曉霜催別緒。送君道上鞭羸驂。一年相逢在淮口。我挂征帆方疾走。君時追送騎馬來。隔岸遙遙但揮手。淮口一去歲一更。斷蓬落葉愁飄零。詎意今宵燈火裏相逢。又在曹邱城。人生聚散本難定。暗中有物持其柄。一年一度一相逢。如我與君良足慶。歡遊莫道在異鄉。寒梅著花春酒香。日日看花共飲酒。從今且得無參商。只敘聚散自見交情。

登娑羅坪

絕壁迢迢上。忘危勝可探。百盤窮大壑。千仞度層嵐。采藥逢毛女。藏書問老聃。白雲如可臥。一枕學圖南。

南越王墓

天下亡秦日。乘時據粵中。自娛聊竊帝。大長竟稱雄。炎海風濤壯。孤墳草木空。千年餘霸氣。常繞尉佗宮。
一筆寫就。不加追琢。比之彈丸脫手。

登慈恩寺浮圖

飄然天半御風輕。身在浮圖絕頂行。三輔山河掌上盡。五陵雲樹望中平。氤氳香界從朝暮。高下桑田幾變更。故事尙傳唐進士。曲江宴罷共題名。
五陵三輔。收之指掌間。何等胸次。章八元登此塔。至云危梯暗踏。如穿洞絕。頂初攀。似出籠。豈不成語。當時元白盛稱之。何耶。

蓬萊閣觀海和觀察宋公

傑閣峻嶒倚杳冥。憑高望遠極東溟。龍宮潮湧千重白。蜃市烟消萬點青。鞭石荒唐懷霸主。浮槎恍惚遇仙靈。蓬萊咫尺非難到。便欲攜筇叩紫扃。

徐州懷古

紛紛楚漢當年事。憑弔西風向戰場。隆準至今尊帝號。重瞳終古怨天亡。呂梁濤落蛟龍走。芒碭雲深虎豹藏。王氣彭門消歇盡。孤城一望水茫茫。

恆山

上應天樞象北辰。衆山環拱碧嶙峋。雲霞隱見金銀闕。昏旦盤旋日月輪。呼吸蒼冥通一氣。逍遙紫嶠會羣真。陽終陰始扶元化。朔漠長留太古春。

氤氳霧靄擁危巒。象肖靈虵勢鬱盤。望去神光凌斗極。飛來秀色落桑乾。龍潭雲出千崑雨。虎口風生萬壑寒。我欲摩崖登絕頂。扶搖何處覓青鸞。恆山詩罕有佳者。作者以全。副本領赴之。遂覺神力俱佳。

陳留弔蔡中郎二十四韻

道出陳留郡。車停潁水濱。不勝懷古意。爲弔鼓琴人。王粲稱前輩。張衡記後身。軼才真曠世。偉貌迥殊倫。淹貫鴻都學。輝皇清廟珍。干時良策蘊。應詔直言陳。鸞鳳偏垂翅。驪龍漫觸鱗。幽囚北寺獄。遠徙朔方塵。禍稔天心酷。憂深國步屯。妖氛纏黑氣。賊寇起黃巾。炎祚傾危日。梟雄剝亂辰。徵車憐迫促。解綬悔逡巡。

殄滅嗟元惡。彌縫賴大臣。然臍誠已晚。動色亦何因。過細寧難宥。冤奇竟莫伸。踉蹌付廷尉。涕泣遍朝紳。已矣儒宗失。悲哉史筆淪。無兒延嗣續。有女歷艱辛。忠孝名終在。風流蹟未泯。篆書垂一代。碑版照千春。尚論追芳軌。遐思托德鄰。茫茫尋故里。寂寂委荒榛。事往浮雲散。文傳炳日新。虎賁猶得似。想像為傷神。
董卓既誅。中郎在王允坐上。言之而歎。有動於色。是其所短。餘如諫三互法。諫市買。謬為宣陵孝子。諫天降災異。條列七事。皆原本經術。有裨政治者。即董卓初徵時。因不能逃避。始就。既就。亦屢次箴規。而王允恐其作史。誦之。必欲死之。毋乃已甚乎。詩中逐層排比。得失並陳。工力悉敵。頗得少陵家數。

張錫祚字永夫。江南吳縣人。○永夫野居南園。後遷木瀆之下沙。三旬九食。經年臥病。居半以藥石為餐。殮也。詩初以生新為宗。能盤硬語。後一歸平澹。在草左司。柳柳州之間。年五十餘。窮餓以卒。葬靈巖山麓。碣曰。詩人張永夫墓。好事者每攜酒酌之。

編籬

林壑有真趣。塵俗難相通。清晨飯藜藿。荷鍤春風中。薜荔劇鄰園。杞菊采榛叢。枯朽既芟除。柯條盡青葱。日入返茆檐。羅植清溪東。屏藩宛天成。束縛隨人工。放誕世所棄。舒散豈爾容。已造自然

重九後溪南采杞菊

佳節倏復過。寒商激林杪。霜清杜若洲。花發蒹葭島。空庭無嘉卉。何以慰幽抱。緣源路轉迥。穿林人漸少。朱實披榛叢。黃花掇香草。尋異心無厭。適己物逾好。即此俗慮遺。逍遙可忘老。

贈澗上僧

竹庭殘雪淨。林壑寒流清。經聲靜夜闌。水月生空明。道人了觀化。心止神流行。空齋一相對。澹然離俗情。
色香臭味俱淨。此種詩幾不能品評其佳。

訪沈石田故居

抗心希古賢。閒情緬高士。孤舟渡平湖。日落遵枉渚。逶迤入荒村。徘徊覓遺址。人語散鳧鷖。草長眠鹿豕。何處有衡門。田中間孫子。

田家詩

礪确土無膏。人棄爲原陸。釋子云西來。挂笠結茆屋。學空易爲悅。機熟遂衆欲。嫗老苦力田。薄言往種福。日出聽談經。暮歸悔碌碌。惟我喜飲酒。醉鄉數往復。酒醒春鳩鳴。踏月起浸穀。所願穀抽芽。生理良已足。
學空兩言見空幻易於動人也。然福田之虛無。孰如力田之實獲乎。飲酒浸穀。乃見本分。

雨夜懷曇長老

寂寥湛深夜。青燈照空宇。花發嶺頭梅。人聽窗間雨。情虛遺衆緣。境清望眞侶。釋子臥雲居。幽襟共誰語。

晨詣南園采蕨

閒居窮簞翰。理生愧無術。隔屋聽鳴雞。啓扉看曙色。逶迤板橋西。俯仰清溪側。薄物世所遺。采掇欣有得。悠然盈傾筐。延詠忘朝食。

題美人歲朝圖

和氣散林臯。江梅香滿屋。佳人愛新節。朝光畫眉綠。素琴靜清聲。翛然倚修竹。不須粉繪。如見美人。覺周叻諸人。祇傳形似。

寒食日龍友于且招集歸愚書屋感舊述懷用昌黎寒食出遊韻

一百五日修復來。羣陰盡剝陽氣盛。惠風出谷雲霧開。霽色花光共輝映。病夫寂寞臥蓬蒿。囊空莫與繁華競。忽逢朋輩遣長鬚。招我城南共遊詠。林塘歷盡入溪灣。到門始覺日影正。滿堂豪翰筆不停。猛氣紛紜鼓已更。曹鄴淺陋真小邦。曷敢與抗惟稟命。憶昔橫山有遺老。海內獨司騷雅柄。良辰燕賞集嘉賓。泉流風發交相慶。當時豈有文雅飛。但期不失門人敬。詩壇十載淪荒蕪。墓門草塞音容息。荒郊茆屋晝閉門。得句欣欣謂予聖。那堪畏友今盈前。陳劉應徐四座併。銚心劇目豈人工。文章竊渺出天性。洪濤初過澄波鮮。平坡未盡奇峯橫。諸公才調皆揆天。如予只合遐荒迸。奈何並轡得聯鑣。好醜妍媸同一鏡。雕蟲小技不足豪。正變源流那能政。由來人物忌刻削。萬事終須蓄餘勁。日斜投筆酌深杯。束手高齋聽號令。中一段感舊述懷悼橫山先生已亡。無人主持風雅也。一氣卷舒。略無痕迹。○連上一章。皆三十歲時作。

冬夜懷天寧曇長老

野塘無暮柝。燈暗識深更。溪盡斷人語。月明聞櫓聲。薄帷塵夢冷。趺坐道心生。遙憶安禪客。龍眠萬慮清。

謁韋刺史祠

平生輕吏舍，祠宇傍宮牆。誰載花林酒，來分畫戟香。道心棲野寺，詩思冷秋塘。日暮瞻遺像，斜陽正滿堂。

牡丹

深院東風入，開簾香氣清。名花愁采摘，獨立殿殘春。格貴誰求價，庭空欲避人。玉臺今寂寞，對爾覺傷神。
此因牡丹而悼亡也。五六語獨見清新。

杏花

零落江梅悵別離，小樓人靜倦吟詩。孤村花發春當路，十日雨晴紅滿枝。谷口耕夫歌斷後，壇邊漁父棹回時。南軒老樹誰相賞，日暮淒涼傍酒旗。
數枝豔拂文君酒，半里紅欵宋玉牆，自是凡筆。此則清遠過之。論品格不論風藻也。

遣愁

老屋欹斜挂薜蘿，柴門寂寂斷經過。擁階梧葉落無數，帶雨黃花開正多。三易龍蛇輕動墊，二南鐘鼓自平和。素心人遠誰同調，絺綌淒風獨放歌。
動墊則晦吝生焉，平和則曠蠟淚焉，二語已見易詩大旨。

蔣廷鑑

字律先，江南吳縣人，諸生，著有半關詩集。○半關嗜義山詩，不喜老杜，不知義山詩正從老杜出也。茲錄其有神韻三章，得義山之一體者。

落花詩和韻

王孫何事不重遊，零落穠華略似秋。燕蹴恰逢沾舞袖，風扶猶欲上歌樓。今生約已東皇判，未了緣從夕照留。色相由來總無著，有生只合住丹邱。
第四語寫得無情者有情，今生約未了，因天然對偶，合之感舊二章，知借題以託興也。裴回吟誦，輒喚奈何。

感舊

玉洞桃花也自紅。擬將爛漫答春風。豈知狂客歸來晚。零落青山碧澗中。
習靜長翻般若經。每依月觀與風亭。自從環珮無消息。簷馬丁冬不忍聽。

般譽慶字彥來。江南江都人。○王漁洋嘗稱殷彥來之才。憐其屈抑未遇。余未與相識。竟其稿不易得矣。於友人處得近體二章。皆首尾完善。有聲光者。

玉山亭

萬頃澄光倚翠屏。磯頭縹緲峙孤亭。窗收吳楚千帆白。座揖金焦兩點青。高岸浪交遙似沒。危崖木落倒堪聽。扁舟待渡依江滸。疑有魚龍積氣腥。

暨陽懷古

此地勾吳戰壘開。尚餘重鎮楚江隈。城邊斥堠連天遠。海上魚龍捲浪來。黃歇塚荒迷蔓草。延陵碑古蝕蒼苔。西風入夜鳴哀角。并和砧聲徹曉催。

李疇端字蒼存。江南盱眙人。著有焚餘稿。○王漁洋稱蒼存詩文從衡有奇氣。江淮間才士。今讀其集。工麗之作居多。

寒日登寶積山與客談宋南渡事懷古有作自注。宋與金和於此。山納歲幣。因以得名。

愁雲萬疊鎖層峯。石徑猶疑戰馬蹤。南渡衣冠慙小國。北人臣妾視高宗。金繒不惜拋流水。社稷何曾復故封。登眺枉為韓岳恨。夕陽寒寺一聲鐘。

芳樂苑故址

王氣江東勢漸傾，紛紛土木壯臺城。苑從趙鬼歌中起，花向潘妃步底生。蔓草久依馳道長，清塵無復屬車行。山僧莫更談遺址，落日秋風只雁聲。東晉從趙鬼之言，起芳樂苑，鑿金爲蓮花貼地，令潘妃行其上，句與前寶積山一結相似。唐人許丁卯亦每有此病。

仲春漫興

午困常貪睡不醒，殘書架上任零星。年饑未敢呼庚癸，命賤何煩問丙丁。疎幕婢留飛燕路，小窗童挂護花鈴。春來頗說山遊好，愛惜芒屨懶踏青。隊仗工穩，不落小家。

張元昇

字時升，江南江陰人，布衣，著有半園詩。○半園早歲壯遊，中年後隱居荒江之濱，不與人接，入選中，意者自嫌工巧，未歸高格耶。余嘗寄詩贈之，中云：潮回疑蝕岸，雲動欲移山。穴並臺佟鑿，門同栗里關。傾倒之者，素矣。

送友人東軒對月

今夕不爲樂，明月竊笑之。故人有好懷，招我坐軒墀。涼風颯然至，葛巾吹欲欹。金樽泛清醕，滿酌不容辭。蕭條人間世，昔人渺難期。作者詩學杜陵，一起又卻似太白。

舟中

一身嗟浪迹，九月更浮舟。宿鷺依頽岸，寒花逐亂流。江雲昏對雨，市火細明樓。漂泊孤帆暝，悠悠動旅愁。

氣味近杜，不在形貌。

眼復明呈諸舊遊

不信多愁眼，還堪照古今。皇天終不棄，孤客亦何心。身世宜新哭，山川續舊吟。但能從我好，窮餓自鳴琴。

亦突兀，亦骯髒。

贈別雲間高日采

兀傲嗟予舊，清狂識汝新。蒼天憐骨格，老眼拔風塵。倚劍寒燈夜，題詩異國身。從來蓄性懶，相對獨情親。

沉鬱蒼涼，上章言會合，下章言送別詩中章法。

乍見真堪樂，將歸卻可憐。亂山孤客影，斜日欲離天。別淚江亭上，鄉心馬首前。淒涼分手處，後會在何年。

度隴雜詠

寂寞經荒縣，蕭條只幾家。邊雲迷古堞，嶂月冷清笳。小市都無米，居民不解茶。破檐門不設，愁殺曉風斜。

高秋

寂寞高秋晚，微霜下古城。西風吹鬢老，落葉入詩清。天地孤鴻影，關山畫角聲。只思歸去好，閒臥聽春鶯。

落葉入詩清，五字苦吟而得。

過雁

遠渡湘江水。來悲海國秋。幾重黃葉路。萬里曉霜愁。片影迷寒月。孤聲落暮樓。西風正蕭瑟。對汝淚堪流。

曹叔方以久客夜吟題請予賦詩。自注：叔方楚人。時值兵亂流寓江陰。

清漏迢迢夜正闌。寂寥孤館劍光寒。半天霜墮杵聲急。一院月明人影單。海國燕鴻秋思苦。湘山烽火楚城殘。自憐頭白不歸去。空倚西風泣路難。

晚秋感懷

霜濃日瘦半溪陰。一片西風百感侵。窮海天高寒鬢影。空山木落老秋心。年荒貧病堅辭鶴。竈冷淒涼泣問琴。卻歎吟殘重岑寂。更誰載酒過花林。五語言無糧放鶴六語言無柴鬢琴也貧況可想

夏

弘字任遠江南揚州人。○殷彥來寄亡友夏任遠詩於流洋。流洋賞其中有晚唐佳句并謂彥來友道可風。皆古人誼也。見分甘餘話中。附記於此。

秋夜讀九歌

娟娟涼月生虛壁。酒罷攤書讀九歌。興託美人情最切。思深公子怨何多。湘皇淚雨滋叢竹。山鬼悲風帶女蘿。一夜寒砧催木葉。洞庭今已起微波。末點秋夜仍關映九歌

春寒

門掩蒼苔一徑中。鞦韆閒在曲闌東。梨花落地半窗雨。柳絮入簾三日風。鬪草懶舒紅袖冷。啼鶯無奈畫屏空。江南二月韶光賤。孤負枝頭蛺蝶叢。搖之曳之風神無限

孔東塘博士招同人集傍花邨

傍花村裏花如雪，撲席浮觴二月時。莫向伶人爭畫壁，雙鬢都唱使君詩。死事活用。

廖字人也，廣東曲江人，諸生。

飲酒

萬古此一時，天地爲我宅。紛紛各有求，何時免憂戚。我心清且閒，順逆等朝夕。微酣意自佳，興至境多適。悠悠欲忘言，仰睇寒空碧。是飲酒起法。

劉祖啓字顯之，廣東東莞人，貢生。

喜鍾紳是至

草色滿階除，君來獨慰予。人當離亂後，交在死生餘。冒雨沽村酒，衝泥得野蔬。共談身世事，款款月來初。
王文潛字清淮，廣東南海人，布衣。○清淮流寓吳中，落拓不偶，詩成隨手散去，他人襲之，亦不知爲己作也。客死，同人葬於虎邱之半塘，詩一首從友人冊子中錄出。

丙申歲春留別松蘿

驛路梅開春正芳，歸心偶動問輕航。經年半醉湖田上，自注：松蘿隱居湖田。何日重攜虎阜旁。煙水夢魂千里月，乾坤吟嘯一頭霜。同懷莫訝輕離別，難遣羅浮業盡荒。留別後仍未得歸，卒歿於旅寓，亦可悲其窮矣。

黃河激字葵之，廣東南海人，著有葵村詩。

歸燕

昔別依窮海。今來逐暖風。細微無物役。飄泊有人同。正喜銜花語。仍勞葺壘工。遙憐楚江外。棲止盡林中。
寫歸燕而已之去來無定亦在其中咏物詩須如此作

送胡長史從軍鬱林

野燒明虛帳。秋聲落戰旗。可能聞笛夜。相忘在家時。阮瑀工書劄。陳琳解賦詩。知君年少日。曾慕帝王師。

嬌女

嬌女如新月。微光欲照人。眼邊頻顧汝。掌上更無珍。紺髮翦齊額。紅衫裁過春。歲華看漸老。歡喜入佳辰。
比嬌女以新月不類而類情至者知之

邊馬

暴露風霜早。長嘶傍塞門。歿無文梓槨。身有僕姑痕。暮齒愁相棄。成功不與論。殊方來汗血。玉輦日承恩。
三四典雅結意深遠明皇用蕃將代漢將言外可思

南海神祠

神奠南溟靖海妖。開門風浪極天遙。凌虛臺榭觀初日。排仗魚龍候早潮。祝版御名皇帝署。祠官儀品太常標。地靈不共桑田變。賸有唐碑歷數朝。

翁字元將江南吳縣人上舍生

題金亦陶運甓圖

清談坐嘯晉祚圻五馬南奔避劉石長沙勵志向中原朝暮州齋運百甓樽蒲戲具牧奴事生既無聞死何益高論猶堪振懦夫光陰分寸誰珍惜金君名字慕古人昂藏磊落自寫真雞羣獨立千里鶴形貌不與尋常論八州富貴非所羨名山大業當精勤君不見棄官歸去彭澤令祖孫高躅千秋敬撫松采菊良可師運甓君偏希士行吁嗟乎少年掣電須臾過努力不早奈老何及時矻矻休蹉跎亦陶之考為孝章節者亦陶不師淵明而師淵明之祖意各有取也然亦陶非用世人故云八州富貴非所羨而勉以能惜分陰用意微至

吳之驕字鳴夏江南歙縣人諸生○此友生吳太史瑾含祖也詩稿甚富瑾含郵寄偶然散失祗存記憶二章比於吉光片羽惜之益珍重之

登金山塔

踏盡層梯到半空洪流一柱鎮蛟宮義娥近走簷楹際江海平分指顧中帝子鳳笙吹縹緲仙人桂館啓鴻濛三山採藥堪長往我欲歸乘萬里風賦此題者過於求奇每流荒幻若此氣足神完無一閒筆浪墨洵推高唱

出軍羌馬上漫成

亂鴉散盡曉煙濃馬首青橫劍外峯斥堠東連秦鎖鑰雍梁西界漢提封天邊烏道秋無際雲裏猿聲樹萬重極目黎城何處是西風寂寂下高春

先 著字遷夫。四川瀘州人。遷於金陵。著有之谿老生集。○遷夫自云。先世瀘州。或云託言蜀地。并託言姓先。猶明代之孫一元。不知果秦人否也。詩有生趣。不必以正聲繩。

述懷

勞生百年內。患有入之形。一身歸虛無。萬念偏營營。雖有賢智人。惟與憂患并。不能棄人紀。焉得辭天刑。絕類廢羣生。造化難爲情。已矣何所逃。安之以無爭。老氏之學。歸到不能棄人紀。安之以無爭。仍是孔門一脈矣。

堰北水

堰北水。一日高一尺。十日一丈強。秋來淫雨多。千里萬里洪流長。報水汎人善泗水。入水不愁沉水底。順流一日五百里。自注。裹皮。漚。泗水。而日五百里。修堤築堰年復年。安得水勢倒行還上天。決口乍塞塞口決。明年再請司農錢。

病起截句之一

移植甘蔗爲綠陰。經年長大已成林。天寒霜落休輕翦。恐有秋來未死心。自寫逸民身分。

贈海雲子

相逢炎月亦蕭森。來處家鄉是古斟。自注。壽光。卽古斟國。與論山川幾人物。仕秦王猛亦何心。自注。景略縣人。○嵇

孔明魚水之合。然責其不仕。晉而仕秦。自是正論。

李

崧字靜山。江南無錫人。布衣。著有芥軒詩集。○芥軒天眞未瀉。視天下無不善人。人有機械者。對芥軒亦無所施。生平在春風和藹中也。居鵝湖之院。香園。妻子奴婢。蕭然自得。晚歲盲於

目詩成。每令
童孫書之。

沈莊樗古隸歌

銀光橫陳瀉寒玉。力排龍虎斷鰲足。兵甲銷磨古戰場。折戟沉沙遺鏃鏃。是誰作此古隸書。莊樗先生出凡俗。先生者年鬢蕭騷。手撫碑版情偏豪。蒼崖古廟及破冢。每過其處常周遭。一點一畫無假借。心摹手追不輕下。青霄紛紛亂粟雨。烟颺呼號鬼神詫。秦有程邈漢蔡邕。鍾繇梁鵠稱神工。有唐鼎足韓木蔡。有李湖兼擅數子推元宗。封禪碑直追漢人。國初顧苓與鄭篋。大江以南稱兩雄。苓也謹嚴筆屈鐵。篋也流宕徒橫從。先生奮起更超越。網羅今古無遺蹤。贈予長箋并短幅。大如盆盎細如粟。玉軸牙籤座上陳。周鼎商彝眩人目。海陽程旭吾及門。善寫丹青頗得名。一見法書狂叫絕。臨摹面壁搜杳冥。苦心經營忘晝夜。形枯神瘁戕其生。嗚呼造物毓才稟元氣。君之精力雄健誰能爭。此芥軒贈先大夫作。中間品評恰如分量。結意從橫恣肆。不得以尋常方幅繩之。

宴溪亭翫牡丹感舊歌者

去年清宴此花前。一串歌珠粒粒圓。今日花前追往事。空留白髮照嬋娟。

周龍藻字漢南。江南吳江人。○漢荀為忠毅公後。學使者。試士。輒冠其曹。名著大江南北間。以識真士終藝林惋惜之。詩稿甚夥。所鐫惟樂府三卷。諸體俱未遇目。故所收亦止在三卷中。

大牆上蒿行

牆上蒿。自誇託根高。根高苦不固。萎落隨風飄。牆上蒿。自喜擢秀早。秀早苦不長。離披抱霜槁。蒿生蒿死

曾足計。但恨踞盤難得地。明堂選柱少成材。等閒齊把蕭蘩棄。伏波慕良臣。肯逐井蛙住。亞父好奇策。終被重瞳誤。丈夫未遇魚水知。且辨隆中高臥處。眼前富貴輕秋毫。搏扶豈必假羽毛。紛紛依傍何其勞。君不見牆上蒿。見居高位而不能有爲。不如棲隱蓬廬。待時而出也。元辭含意未申。此以議論傾吐之。

隴頭水

隴坂遙遙九折長。驅車欲渡心蒼茫。忽聞有水喧道傍。人言此水聲聲別。盡是征夫眼中血。萬古千秋共嗚咽。嗚咽聲流未已。輾轡聲行不止。夜半吹寒笳。邊風四面起。悲莫悲隴頭水。

後怨歌行

藕絲斷不再連。銅鏡破不再圓。卽看金屋人如舊。昨日恩情今日捐。情多情少安足計。只道色衰恩始替。驚心最是落花風。偏在溫存旖旎中。妾恨不爲珠娘樓。窈娘井骨碎。君前猶耿耿。求鳳曲化白頭唵。撥盡紅爐灰已冷。當初離鄉來。滿望登玉階。玉階非不登。轉瞬沉草萊。乃知苦樂真相倚。纔隔衾裯同萬里。升沉反覆變須臾。縱有容華難久恃。雨落不上天。水覆難再收。只道得色衰愛弛。此卽從溫存旖旎中見已伏絲斷鏡破之根。比青蓮意翻進一層。令人思梁孟之合。以德不以色者爲可久也。

周在延字龍客河南祥符人。樸園侍郎幼子。

送吳冠五至歷城

白雲縹緲唱驪歌，朔雁迎帆渡大河。自昔吳公天下少，至今名士濟南多。探奇莫負勞山約，觀禮應先闕里過。齊魯當年故友在，煩君問訊近如何。三語送冠五美其治之第一也四語至歷城嘉其地之多賢也詩能典切便不膚浮

錢良擇

字玉友江南常熟人著有撫雲集○玉友隨大吏出使海外又同朝貴使塞外絕域爲詩感激豪宕不主故常而所選唐詩又兢兢規格如出二人議論不可一律拘也

觀小妓娟娟舞劍作

蛾眉有英雄，晚妝脂粉薄。短鬢白衣裳，窄袖錦纏縛。背人緊湘裙，端捧蓮花鏢。請爲當筵舞，佐此良宵樂。取筆漬硯池，授客使分捉。舞急各蘸灑，客漫應曰諾。小立寂無言，左右試展拓。微卓蠻鞞尖，撒手忽然作。初如雙玉龍，盤空鬪擊擢。漸如曳匹練，旋繞紛交錯。須臾不見人，一片寒光爍。直上驚猿騰，橫來輕燕掠。膽落迂儒愁，傾心壯士作。羸童縮而遜，姦人戰欲瘡。墨灑密雨叢，筆敗硯池涸。罷舞視其身，點墨不能著。嬌然泥人懷，腰肢瘦如削。兒時見湯丈式九舞劍謂矢不能入衆以鳴鏑試之連斷三矢此蘸墨灑之不能著點同一神伎也自初舞及罷舞如見其人妙在是美人不是壯夫此作者極用意處

關山道中

于役方知行路難，兼程莽莽過重關。鳥隨落葉下枯樹，人帶夕陽穿亂山。廢耒江淮愁木酪，荷戈秦楚盼刀環。季鷹豈有封侯骨，甘棄尊醪去不還。

寄內

六分春色四分過。夢斷家山近若何。九陌鶯花情緒少。十年夫婦別離多。無方賢俊皆簪筆。有道乾坤漸止戈。只有恨人歸未得。鏡奩閒殺舊青螺。三四語天然入妙情。到最真不煩鑿琢。

得劍村寄懷詩次韻答之

亦知信美非吾土。誰說狂夫不憶家。昨夜客窗風雪裏。夢歸山館種梅花。憶家成夢。夢歸種梅。於不著緊要處寫情語。淺情深得。古風人

秋夜聞歌

雲停碧落桂飄香。竹肉齊聲起後堂。壯士尊前驚變徵。美人帳下怨清商。繞梁何處傳新譜。擲笛誰家傍短牆。流落江南老詞客。還思天上詠霓裳。

陸

穆字念爾。江南長洲人。著有湖村詩。○念爾天才高曠。謂詩專主性靈。以人工累之。猶太虛中著浮雲也。此言恐開廢學之漸。然冰雪襟懷。略無渣滓。朋儕中無與偶者。三十餘。中齒毒死。倘使之永年。加以學力。所詣可限量耶。

白雲洞

我遊白雲洞。身在白雲裏。落葉和松風。時聞響山雨。石牀不可留。清寒逼衣屨。隔塢暮鐘聲。雲留我歸矣。從柳州小記中悟出。

遊鄧尉山

停橈費家湖。山翠圍幾重。捨舟事筇屨。漸入香林中。鄧山峙湖濱。峯勢高龍從。三萬六千頃。湖流浸長空。花外見晴雪。花裏聞香風。朝煙而夕月。泠泠沁心胸。小憩上竹關。恍然覩支公。跌坐鳴蒲牢。嘒如吼蒼龍。清音應虛谷。餘響入深松。憶昨西谿宿。醒時聞此鐘。

山行

去祖塋數武。循小徑入。泉聲淙潺可聽。梓籬半掩。蘿屋一椽。有僧居之。樵者置束薪於門。僧鑰扉以去。松風吹衣。蒼苔濕屨。獨行久之。了無人跡。唐一序清絕似小文字。

獨行披荒叢。信步得異境。山色淨杉柳。泉聲寒藻荇。恍疑石屋中。疎磬烟蘿暝。欲問無人家。夕陽照孤影。

次和荃谷寒夜獨坐之作

抱鄰虛堂上。燈前顧影雙。霜林風葉盡。山月正當窗。庭訝翻巢鳥。村疑吠客厖。有懷淞水畔。一葦釣寒江。不着一字。盡得風流。

過石樓贈山僧不羣

萬峯臺下碧山岑。疎竹圍窗白日陰。僧古已無煙火氣。樹枯饒有雪霜心。洒空松吹飛寒雨。捲壑風泉響夜琴。不是樵人偶相識。那知尊宿在祇林。

陳

鍊字道柔。江南武進人。諸生著有西林詩鈔。

野望書懷

霜晨閒踏舊魚磯。地僻應憐屐齒稀。何處水雲孤雁叫。滿天風雪一僧歸。杜陵廣廈蓬茅是。白傅長裘犢鼻非。豈獨袁安正僵臥。千村隨在足寒飢。書生負如許懷抱。語中可以想見生平。

朱

經字恭庭。江南寶應人。諸生。著有燕堂詩鈔。

寡言

隴山多飛鳥。翱翔適其生。鸚鵡誇能言。樊籠苦拘縈。鐘鼓懸太常。考伐聲鏗鏘。不叩而自鳴。羣謂之妖聲。吉人以行重。躁人以舌輕。緬懷磨兜堅。守口心怵怵。

責己

勿謂寸陰短。既過難再獲。勿謂一絲微。既緇難再白。赴善登崇山。寡過掃塵積。一日省一愆。三月未盈百。責人不肯恕。責己每自匿。願言砥廉隅。此身敢虛擲。

惜日

江河日流注。難挽東逝波。羲和日奔馳。難回魯陽戈。終日但飽食。冉冉歲月過。此後悔失時。荒毫無如何。浮游水上萍。奄忽霜餘莎。勉旃復勉旃。慎無悲蹉跎。以上三章。吾輩讀之。幾欲通身汗下。○嘗論詩貴理。每以語錄成詩。不無泛濫。若切己箴規。可以省身治心者。又當別論。蓋有覺德行。基命宥密。雅頌中不廢斯言也。

徐恪字晉民江南江陰人貢生

桃葉曲

春雨木蘭舟。春風桃葉渡。嬌鶯自在啼。雙槳橫塘去。橫塘繞山斜。一徑采山花。門前舊湖水。還對莫愁家。三月桃李飛。四月蘼蕪欸。五月南風來。谿頭長蓮葉。蓮長過人頭。折來寄西洲。西洲望不見。煙雨空江樓。樓前雨如絲。樓上烟凝黛。日暮瑣窗寒。風吹雙縷帶。雙帶結同心。江深情更深。相思不相見。獨自理瑤琴。瑤琴復何許。憶得橫塘語。郎從蓮葉翻。儂比蓮心苦。千里下關山。不將書報還。夢中金錯翦。擊碎雙鴛環。殷勤再三道。西風寒料峭。只恨柳絲輕。莫遣桃花笑。昨夜佇回車。葱隴聞井鴉。那知風雨隔。望斷長風沙。
全學四洲曲神行於纏聯繫鎖之間。

謁方景二公祠墓

蒼松吼靈雨。白日搖孤光。宗臣儼像設。肅拜趨祠堂。成王周公辨。大義聲雷琅。精誠動星象。袍笏飛秋霜。當時棄朽骨。匿跡埋山岡。後來公是非。何曾恕文皇。年號創建文。瓜蔓屠忠良。一死明大義。萬古扶綱常。鍾山石馬蹲。孝陵寢殿荒。雲旂肅奔扈。千載遙相望。
成王周公一聯指方公。精誠星象一聯指景公。下合言之是非長存。不恕文皇人心所以不死也。此種詩乃不徒作。

顧紹敏字嗣宗江南長洲人陳生著有陶齋詩鈔。○嗣宗屢試南北闈終於不過。晚而著書自娛亦足悲其志矣。詩自中唐以下兩宋金元明無不舍咀采擷而成家。平昔論詩以情韻為上。

風骨次之。故稱中詩
品亦恰如其議論。

牧牛詞

秧鉞短短湖水白。場頭打麥聲拍拍。絲楊影裏繫烏犍。雙角彎環臥溪碧。晚來驅向東阡行。踢角上牛鞭。兩聲短童腰筵唱歌去。草深撲撲飛牛蠹。但願我牛養黃犢。更築牛宮伴牛宿。年豐不用多苦辛。隴上一犁春雨足。

澹泊居花下招同惠仲儒鄭季雅沈歸愚徐龍友王斗文小飲作歌卽送季雅入都

清明雨過春濛濛。情懷索莫如寒蛩。西河有淚久嗚咽。夜半夢覺驚惺忪。古香荒土翻新塚。一杯清醕澆
蒿蓬。書齋魚尾鎖寂寞。蛛絲冒席垂簾櫳。誰知造物每多事。也復亂發花叢叢。鼠姑兩本色欲絕。開軒一
笑驚春紅。家人怪我少歡緒。依然羅幕張輕風。竹萌如玉鱠如雪。好友招集開醅濃。索郎快靚碧椀凍。花
光酒色相瞳矓。清平三調久稱絕。元輿一賦誰爭雄。諸公才思並清俊。妍雅合度吹笙鏞。所疑雲龍本一
氣。愈何軒達郊何窮。飲停鄭子語刺促。忽爾言別辭江東。榆錢散打綠陰暗。黃沙撲面飛蓬鬆。去年作客
太無賴。秋南春北隨飛鴻。何如束腹臥窮巷。卷書細讀聽長松。鄭子掉頭意不爾。令我愁別悲忡忡。平
敘去。注意在送鄭入都。見出不知處。果能薄身厚志。窮居亦是自樂也。贈人以
言。聖見古道交意。得此一段。遂覺通體皆活。○時主人喪子。起手從此敘入。

秋夜聞笛有懷

雨過秋堂夢不成。旅人獨坐夜淒清。竹梢露下鶴初警。牆角月明蛩有聲。舊恨每從燈底得。閒情只向笛邊生。誰憐一掬窮途淚。獨有陳留阮步兵。
山雨乍來。亦溜濕溪雲。欲墮竹梢低。石田句。寫微雨入神。此寫秋夜入神。覺章莊羅隱風趣。猶存也。聞笛有懷。只於來路一點。

秋日感懷

霜染林臯木葉催。兼葭秋水隔重隈。美人有怨收團扇。狂士歌呼托酒杯。映日芙蓉依淺沼。掠寒楊柳下荒臺。子山詞賦傷搖落。秋老江南亦可哀。

夢醒孤窗細雨斜。賸將薄病對黃花。心情略似窺籠鳥。歲月渾如赴壑蛇。楚國有人憐息媯。蜀箋無信報秦嘉。天涯知己誰相問。好負羊裘上釣槎。
息媯。媯音。平仄兩收。

秋來無事不傷神。風物從教又一新。沙雁隔雲將別浦。寒蛩覆葉漸依人。中郎應自憐焦尾。巧匠何堪笑斲輪。只有閒情忘未得。柴門還對舊松筠。
三味寫景中。便帶比興。當合言中言外求之。○寒蛩一語。狀寒士依人。見王粲馬周未遇時。俱不能免。爲之慨然。

贈山陽程爽林

無端意氣漫崢嶸。知己天涯涕欲傾。駿骨可能招樂毅。狗屠從此識荆卿。論交不忘期終始。有道真堪託死生。與爾蒼茫同弔古。黃金臺畔暮雲平。
爽林慷慨好義。能赴友朋之難。有道真堪託死生。一語足以見其匡略。

渡江

驛路長亭復短亭。柳花漠漠畫冥冥。人歸冀北衣原素。山到江南眼更青。雨過夕陽看度鳥。風來遠浦數

揚舲開尊且酌高郵酒。不共靈均歎獨醒。此陶村北閘不遇。渡江而歸也。三語反用素衣化爲緇句。妙於點化。四語倍形南還之樂。視嘗此境者始知其工。

卷二十七

金志章

字繪貞。浙江錢塘人。雍正癸卯舉人。官口北道。著有江聲草堂詩集。

因樹亭觀唐明皇磨崖碑

明皇昔日侈東封。千乘萬騎紛雲從。超然意象小秦漢。七十二代思兼容。金泥玉檢著符瑞。江茅鄙黍昭虔供。禮成大祀頌聲作。鴻文典誥鏗鐘鏞。天章神筆縱揮灑。鸞飄鳳泊翔遊龍。磨崖深刻紀歲月。萬古照耀天門東。是時國家正全盛。地大物阜民和豐。廟堂宴安漸鴆毒。玉魚繡襍酣深宮。侈心一開蠹隨入。九廟俄頃飛灰紅。淋鈴蜀道馳萬里。百神不救塵埃蒙。徒存茲碑峙巖壑。雨蝕薜剝雲煙中。牧兒野火燒不得。至今椎搗傳遺蹤。吳郎嗜古得此本。世守什襲裝池工。高齋招我共銷夏。披襟展玩清宵同。規連珠樹矩折玉。墨彩騰上光熊熊。手摹口誦極贊賞。忽憶往事心神忡。中興反正頌神武。亦有巨刻磨巖崕。盛衰治亂互倚伏。鑒戒實可垂無窮。殷憂啓運滿致覆。此理自古關昭鑿。開天已遠代幾易。猶留寶刻珍書叢。摩挲掩卷三歎息。人君莫漫誇豐功。

鈴山行

鈴山四繞青谿窾。袁江一線盤脩蛇。東西峽口兩洪東。東為昌山洪。西為鑑山洪。臨城中裏如蓮花。此邦何人昔最著。

豪貴屈指推嚴家。早年登第競名譽。追逐何李矜浮華。歸來築室此山頂。圖史枕昨旁人誇。青詞晚歲博

金鉉。萬事橫決如搏沙。文章不掩孔雀毒。膝下豺虎兼婁緞。讀書不識忠孝字。廿年辛苦何為耶。立身一

敗媿鄉里。至今齒冷千秋譁。清江六月燒晚霞。長橋終古緣城斜。薰天之勢竟安在。徒令弔古興咨嗟。文章

不掩孔雀毒。姦佞之人雖有才華。莫能蓋也。讀書不識忠孝字。令閱者悚然。

白溝河弔二忠祠張公叔夜文公天祥

白溝河上夕陽時。下馬荒原弔古祠。北渡中宵悲扼吭。南冠孤憤漫題詩。鬼謀曹社家同破。龍去崖山事

不支。太息殘碑焚野火。六陵荒草共淒其。分咏二忠。語皆典切。

黑峪

盤盤鳥道上青雲。峻坂危坡路不平。入險橫穿豺虎窟。凌虛俯瞰鸚鵡羣。三關形勝憑高盡。二水波濤出

塞間。極目長城回望處。河邊飲馬漢家軍。

二十四礮

驚濤如雪濺長空。峭石峻嶒訝鬼工。二十四礮帆側過。不知身坐浪花中。

鷓鴣塘

客情鄉思總淒迷。睡起篷窗日欲西。忽聽一聲行不得。鷓鴣塘外鷓鴣啼。天

姚

湘字行表。江南桐城人。雍正癸卯舉人。官常熟教諭。

郭林宗墓

知人薦士緬遺蹤。此日經過馬鬣封。一木勢難支大廈。六屯禍不及潛龍。登仙祇合同元禮。表墓寧須藉蔡邕。更有申屠共標格。高風樹屋獨名儲。桓靈兩朝朝局。黨人之標榜喪身。林宗之不爲危言。嚴論得以免禍。三四語盡之。末引申屠蟠見因樹爲屋。同於儲人者。爲更高也。詩須如此。作方不浮泛。

梅

任爾冰條濕粉痕。何須紙帳護春溫。紅亭遠隔人千里。翠羽初飛月一村。留得寒香清到骨。莫聽羌笛暗銷魂。幾年孤負西園約。凍合孤山獨掩門。與愁在三更。挂月村同妙。

荊州道中

女鬟砧響杳冥冥。楚些吟成不忍聽。行過渚宮神黯澹。猿啼夜半在空舲。

邵錦潮

字賜。析直隸宛平籍。吳縣人。雍正癸卯舉人。

兼葭

秋色浮江上。煙波共渺然。蒼茫迷遠渚。寥落向遙天。折葉驚寒鴈。飛花點釣船。伊人不可卽。悵望水雲邊。

喜晚香辭幕府歸出示新詩留飲

千尺流泉百尺松。白雲丹嶂自從容。偶同麋鹿遊城市。終覺鷄鶩厭鼓鐘。句就煙霞頻出手。醉餘魂夢肆填胸。明朝便蠟尋山屐。到處隨君躡舊蹤。一筆揮灑絕去雕飾。此境正未易到。

閨人贈遠

日夕上高樓。雲山一望秋。悠悠渡頭水。空送往來舟。

曹庭樞

字古謙。浙江嘉善人。雍正癸卯副榜。○古謙。應博學鴻辭詔。入都日課一賦。一詩。同人斂手推讓。試後放歸。復入都。病歿。此就向所錄者存之。

春雨和錢嶼沙編修韻

兩兩溪邊水鳥呼。漸看檐際濕模糊。憑欄花重紅疑滴。隔座山橫翠欲無。吟苦縱愁春冷淡。病多偏穩睡工夫。卷簾自愛虛無景。未要瀟湘入圖畫。

陳祖范

字亦韓。江南常熟人。雍正癸卯會試中式。乾隆壬申。舉經學。官國子司業。著有見復詩草。○見復。捷春官。未殿試。歸著書友教。垂三十年。大臣以經學薦。授少司成。居家受宜。生平以天道氣。不得以詞入之。詩目之。

恆雨

春末夏之首。恆雨連數旬。吾土異高低。高者下種勻。溝車挂梁壁。婦子紡以紉。但俟水勢減。耘耔及良辰。低者淪江湖。波濤浩無垠。雞犬悉上屋。舉家寄河脣。相去數十里。彼此殊越秦。苦樂宜均被。譬如人一身。

半體雖獨活，偏枯爲不仁。所以君子心，溥遍無涯鄰。憂喜不以已，四海熙陽春。物我同體，已見此詩。

感秋

人生弦上筈，流光迅於矢。春鳥暢歡情，秋蟲感衰耳。萬籟乘時鳴，一心異悲喜。中宵不成寐，輾轉攬衣起。今人未嘗生，古人未嘗死。欲求不死方，從師悔晚矣。讀未四語，令人內慚而赤覺，可愈頭風，可愈瘡疾，只是語句奇險耳。

夢述

自從別家來，十夕九夢親。父念子行役，不因存歿分。存爲倚門望，隔形不隔神。歿爲空中魂，魂依遊子身。危高山之巔，慄深水之澗。悲哉同行子，生獨爲鮮民。白雲處處多，天涯見無因。可補陟謁，藝裝之缺。

與星旋釋

爾我各異趣，青山爲之媒。爾心與山靜，我心對山開。山意不將迎，能通彼我懷。書聲雜梵唄，瓶鉢偕尊罍。大道固無礙，何從起嫌疑。推窗月皎皎，梅花點蒼苔。結得澹然。

答任翼聖計偕留別

往還多面朋，孰是心所同。鄉薦忝伯仲，時論推雲龍。一友教四方，一匿影蒿蓬。相見苦不易，終歲欣相從。得窺所學富，飽聞議論雄。冥搜力沉著，集益心虛冲。烏能石攻玉，媿用莛撞鐘。聖籍久黯黯，遲子發羣蒙。斯行匪干祿，要展經術功。析理戒穿鑿，守道無窮通。釣鼈不釣魚，君家有任公。析理十字，作一生得力。

詠史

吾慕江州陳宗族七百人。每食設廣席。長幼列坐俱恂恂。和氣感畜犬。百犬共牢食。必均爲問此何時。豺虎磨牙噬生民。君如奕碁國傳舍。天下不復知尊親。世上自亂家自理。閉門別有無邊春。

送西京訓導宣城

老爲千里別。何以遣離情。道在官無小。風清宦易成。議參秦博士。詩繼謝宣城。遙識青衿子。趨風江畔迎。

寄沈歸愚

把酒論文記往年。隱侯格律敢隨肩。宮中久識元才子。明主終收孟浩然。鶴怨猿驚懷故地。馬遲枚疾鬪

新篇。嗟予守兔清江曲。燕樹參差悵各天。簡寄詩篇亦寓規諷。良友贈言何時敢忘。

繆曰芑。字武子。江南吳縣人。雍正癸卯進士官翰林院編修。

書杜少陵詩後

稷契成虛願。詩篇軼衆羣。吐辭皆信史。每飯不忘君。汗馬懷諸將。龍池望五雲。千秋惟白也。可與共論文。

平穩寫去。已盡老杜生平。

秋柳

搖落西風裏。垂條浪不生。本非攀折候。猶有別離情。涼露成清滴。寒鴉噪晚聲。吾生饒短髮。愁對淡煙橫。

前中正寫後半虛
寫處虛有遠神

潘

果字師仲江南無錫人雍正
癸卯進士官辰州同知

觀星臺

太虛茫茫星吐精。仰觀何托觀羣星。三垣高居列宿拱。七曜以次升天庭。觀星之臺自此築。古器森立交
崢嶸。吐吞日月孕精氣。異采煥發堅光凝。夏官歷歷親示我。法象粗得知其名。渾天最古位居右。西泮測
景開皇清。自注銅象凡十三座皆古物日躔月次分杪忽。相風高尺晴空橫。憶從虞后在玉衡。子來繼咏
靈臺成。狂秦亂紀失遺法。漢更七帝銅儀興。自注制自宣帝時遞相精核迄元代。人巧上與天工并。直收萬象入
指掌。豈比露盤承六莖。緣何末造不能守。往來再徙歸燕京。昔聞王孫論九鼎。雖小亦重大或輕。鑄金象
物尊尙爾。況爲於穆圖真形。何以守之德是憑。惟皇得一符清寧。用意全在末段必如此詩不徒作

蟻磯孫夫人廟

江神踏浪朝靈宮。靈宮夫人下幽穹。女官擗甲擁前後。寶刀爛若銀芙蓉。阿兄虎視霸南國。玉顏小妹饒
家風。天教帝子作之偶。明珠斗帳藏真龍。赤壁戰後老瞞懼。不敢南下馳鱗鱣。如何昏姻失前好。忍教與
國連兵戎。臣服魏廷亦豚犬。仲謀那足稱英雄。蜀帝復讐狷亭敗。永安遺詔蒼黃中。夫人有家歸不得。九
嶷夢斷尋無蹤。蟻磯自沉靈魄在。于今遺廟留江東。廟中傳芭女巫舞。報賽神鼓聲瑟瑟。江流有盡恨無

盡疑有淚竹斑斑紅。仲謀降曹真不可解兩國連兵不獨蜀之遺恨失吞吳也借題發出見權有媿于其妹一起如見夫人英武一結想見夫人抱恨玩其音節得樂府迎神曲之遺

項王廟

威望居然壓沛公。指揮一誤霸圖空。縱留子弟八千在。早失關河百二雄。遺廟可堪隣泗上。英靈只合返江東。所嗟銳氣真無敵。不出淮陰數語中。項王失策在王漢王於巴蜀漢中使得還定三秦則大勢全在漢矣詩中指出具有卓見

桓宣武墓

笑爾何心蓄不臣。餒魂終此伴青燐。生初枉自呼英物。身後教誰歎可人。自注溫過王敦墓輒歎曰可人可人江北柳圍空

長大。洛陽鐘簾竟沉淪。縱然未死膺殊錫。地下如何見太真。

尹會一字元字直隸博陵人雍正癸卯進士官至吏部侍郎著有健餘詩草

居庸關

莽莽關山起暮愁。亂雲層疊隱危樓。雕弧控滿清宵月。畫角吹殘紫塞秋。旅夢無端空索莫。歸心何事更夷猶。燕南碧草還飛蝶。已見桑乾帶雪流。月與雕弧相關秋與角聲相關此詩律細處

陶正中字田見江南無錫人雍正癸卯進士官翰林院編修外轉至山西布政使

讀史

商君修耕戰立約於徒木。賞信罰隨彰。卒以震巴蜀。梟雄負異能。斷制貴專獨。民可與樂成。創始每弗欲。

君子重遠衆，持衡妙善俗。握機良所同，用意乃各屬。不見褚衣冠，終焉致巷哭。子產商君同是變革舊政，而用心各別。一是斷喪國脈，一是整齊風俗也。同中見異於公私義利判之。

徐以升 字階五，浙江德清人。雍正癸卯進士，官翰林院編修。轉御史，外轉至廣東按察使。著有南陔堂集。

炙硯

文思忽飛揚，冰凝硯一方。炙餘資石炭，化處受玄霜。調燮交離坎，中和適燠涼。不須呵彩筆，抒藻有輝光。調燮中和由於家人之反身，小中見大，咏物詩須如此作。

關山月

大旗霞捲夕陽殘，旋見邊城湧王盤。鼓角無聲霜氣肅，山河流影鏡光寒。白頭漢將占星立，紅淚胡姬倚馬看。淨掃煙塵天闕迥，清輝多處識長安。神似李北地，以長安月作結，頌揚天朝，前人未到。

金鳳綸 江南嘉定人。雍正甲辰舉人。

冰花 自注：元人有題無詩，作此補之。

犁星沒後水藏漪，潯畔鱗鱗見異姿。凝艷不教青帝主，鬪華休遣夏蟲知。凌波神女寧還薄，作雪天工翦並奇。莫訝清英易消歇，楊家山已付流澌。律之細也，字之穩也，人巧盡天工，出應從偶，然得之。

王峻 字次山，江南常熟人。雍正甲辰進士，官翰林院編修。轉御史，著有良齋詩集。○良齋素行備，王峻，彈都御史某，視趙用賢之彈張江陵奪情，則又過之。詩亦英爽，如其為人。惟於王新城詩。

時加詆誚趙秋谷諸公聞之應云將伯助予也然即此亦是不隨衆好處

禹州道中

茫茫四野寒蕭騷。朔風動地聲怒號。車帷卷破馬蹢躅。夕陽慘澹橫平臯。行人瑟縮帽簷側。手脚凍冷面如墨。晚來投店滿衣塵。童僕相看不相識。

題戴巨川庶子畫馬

自題曰稱德圖

先生畫馬如畫牛。不著鞍韉不絡頭。超遙肯與駑駘伍。放曠還同麋鹿遊。先生相馬如相士。德合剛柔比君子。神閑氣靜在平時。電激颺馳日千里。拈毫十日又五日。慘澹經營能事畢。恍疑貌出古纖驪。直壓開元册萬匹。君不見黃金之勒錦障泥。多少款段當風嘶。安得壯士馳駿足。層冰蹴裂交河西。少陵照畫馬出古纖驪直壓開元册萬匹英氣直欲追逐少陵

謁岳忠武廟

強弓手挽雅歌嫺。未許韓劉伯仲間。誰使朱仙回玉帳。轉愁雪窖有刀環。長城自壞天難問。半壁偏安王厚顏。遺廟近鄰嵇紹墓。靈旗風靜古碑間。此湯陰岳廟也當時三字賦成固由秦檜之姦而小朝廷之不欲復仇其罪更大轉愁雪窖有刀環七字直誅高宗之心

李重華

字實君江南吳江人雍正甲辰進士官翰林院編修著有玉洲詩集○玉洲天賦俊才復得

山之助宜足繼匠門而興起也詩話二卷或引而不發或金針度人可希風昌毅談藝錄

道古

子長憤著書。論或憑胸臆。殷勤表素王。已足稱神識。時方貴黃老。經術尙薄蝕。卓然仰高山。先路導其惑。駢羅七十子。附聖爲羽翼。遂使絃誦堂。崇祀盛軌則。我嗟衛道人。曾未預配食。盲左旣酌功。腐遷何媿色。漢代表章聖道。廣川以後。有太史遷世家列傳。羽翼之功。不可沒也。配食廟庭。前人未開此口。

劍閣

我行閱雄關。天劍殆無敵。迢遙來一髮。突兀遏重壁。望望嗟呀間。豁礧不盈尺。到關穿雪竇。窺戶睇月隙。峩峩二山中。萬丈一磐石。都無客土附。而總精鐵積。其間鬱叢箐。其底亂深射。烏兔失飛走。蛟螭避堂宅。入門循地隧。雙峽巨而窄。左作長鯨掀。右類巨鼉擲。雷轟泥斧鑿。雲蔚隨縷脈。迴風驟長驅。雲氣砭領脊。洪荒想胚胎。元氣更併迫。倘非仙掌排。亦屬應龍劃。五丁力不逮。渠能萬靈役。殘山通仄狹。留險藉控搃。誰知徒長奸。據竊逞荷戟。炎漢固殊類。偏安我惋惜。子陽先覆轍。王孟後接迹。稱帝旋洞胸。降王遞銜壁。何況獻賊流。蝮蝎恣毒螫。張牙縱狂嚙。擢髮終寸磔。伊昔凋敝初。人煙莽蕭瑟。生息今百年。墾闢連萬陌。文翁兼詰戎。武鄉兼教澤。遼絕若番藏。條瞬達重譯。而此枕席安。號渙誰擁隔。地利分險夷。皇圖觀順逆。磨崖奮如椽。申命誠梁益。前極形劍門之險。後屢述竊據之敗。見有德則可守。恃力則速亡也。未歸美本篇。皇圖觀順逆。五字收下半篇。

望太白

太白羣山外。峒峒淡莫分。遙知千歲雪。正雜萬峯雲。鳥道蹤應絕。龍湫吼若聞。帝臺三百里。香氣接氤氳。

雞頭關

雞頭千仞峻。白道細如絲。怒水盤根迅。雄關立壁危。北來天去握。南望漢爲池。咫尺襄城驛。連錢蹀躞馳。
漢爲池對天去握是爲活對

五丁峽

絕壑靈奇盡鬼工。停眸便識五丁通。雙崖翠影侵天合。萬竅雲根入地空。杜宇魂生迷鳥道。蜀山蛇拔剩龍宮。金牛縱被秦人誤。開關何曾讓禹功。
萬竅雲根入地空他人贊作賦才雖千百言亦寫不到

劍閣

宋玉狂言亦快哉。果然長劍削天開。泉聲獨引雷車落。峯影雙扶日馭回。壯士枉窮排嶂力。大文終重勒銘才。中原龍虎無消歇。日見關門駟馬來。

過居庸

大行東驚正迴環。界截煙雲是此間。九土橫分雄地軸。三邊總會扼天關。羽書報捷風雷迅。戍卒承平虎豹閒。此去漢南皆枕席。馬蹄思踏賀蘭山。

登蓬萊閣

檻底滄溟浸太空。凌乘如到蕊珠宮。波間萬怪時噓氣。天外三山日御風。術士妄尋焉得遇。詩翁偶禱竟能通。良宵會約羣仙醉。待看重輪徹地紅。三語寫海市可見四語寫神山難到也下聯分承海市神山卻用顛倒承之化板為活術士指文成五利詩翁指東坡

書周遇吉傳

為擾潼關突薊邱。大同搏戰鬼神愁。辭家戰士無旋踵。報國將軍有斷頭。致死已摧狂孽勢。迎降真恨賊臣謀。十三陵末餘抔土。千古忠魂哭未休。寧武破時賊兵傷戮過半李自成謂自此至京尚有險要四關降表相次至賊遂直破京師詩中三四表周將軍五六恨二賊臣也如許發揮不啻披閱史傳

與張支百研江話詩隨筆

李杜橫馳翰墨場。如椽韓筆頗相當。數篇琴操尤高躅。束皙何因便補亡。束皙補亡前人議其去雅音甚拘幽一操真能道止敬心事補亡六章中殊未有也此種論詩具有確見

俞

勃字碩卿福建莆田人雍正甲辰進士官長寧知縣○碩卿居官清正以失

迂溪草堂初成

何妨環堵即為宮。適趣依稀栗里同。不速到門惟夜月。無私惠我有春風。是非難染溪邊石。得失奚關塞上翁。閉戶領來清淨福。卻忘身在萬山中。三四有風浴咏歸之趣

張鵬

字天驥。江南嘉定人。雍正丁未進士。官至詹事府詹事。著有南華詩集。○南華天才敏捷。賦雁字詩。日未午。成七言律三十章。實和御製。頃刻數篇。○上褒美賞。實之有經進詩。上時轉

次其韻。比太白之君為調羹。東坡之金蓮燭。送歸院。遇尤榮也。後更喝韻成詩。捷于擊鉢。然風格亦少減矣。工畫。捷同于詩。生平專事洒落。人目為漆園散仙。竊自喜中道。祖謝九重。惋惜歎才人。之不易得也。卷帙甚富。茲錄進

經史法戒詩

呈法戒詩十餘篇。近體略及。

夏造衰兮殷道興。得賢臣兮作股肱。股肱辛勤親五就。故主荒淫終莫救。歲苦旱兮殫憂心。躬為犧兮祀

桑林。苞苴女謁備自責。禱辭未畢傾甘霖。至誠感神信如此。天道砥如人道邇。一夫失所真宰愁。莫令君

門懸萬里。此法保民自責。至誠格天也。

成康既遠王道微。昭既南征兮穆又西馳。騁八駿於萬里。觴王母之瑤池。事雖荒而難信兮。徵祈招之風

詩。神仙不可期。遠略難為續。至尊居九重。王度式金玉。此戒肆心荒遠也。

春秋見至隱。履霜防忽微。人主不早慮。因之致顛危。前有讒不見。後有賊不知。晉獻惑嬖妾。優施教驪姬。

分明置董毒。乃謂愛我為。卒至兩敗傷。智謀亦何施。覆轍示深鑑。足為後事師。此戒信讒人重內寵也。

天王柄下移。征伐強侯出。伯業亦寢衰。陪臣勢無匹。強私家弱公室。三桓六卿互分析。豈無衣六與七。不

如子衣安且吉。壞法亂紀自王朝。史書特繼春秋筆。此戒政柄下移也。周盤王封武公為晉君。威烈王封魏斯趙籍韓虔為諸侯。此王朝壞法亂紀之甚者。故

表而章之。

國有謀臣鄰寢覺。貪人敗類乘僥倖。秦穆悔過著聖經。潘潘黃髮實邦榮。入朝見嫉入宮妒。殃及黎民終弗寤。善善不用笑郭公。仁賢雖在國虛空。此法秦穆之悔過任賢戒郭公之善善不用也。兼法與戒言之。

漢高大度膺神器。弘遠規模傳世世。恭儉尤稱文帝賢。身衣浣濯爲民先。年年禱祀祈民福。鄭重農功珍

五穀。但令閭閻常富足。國家何用儲金玉。此法恭儉重民食也。

神仙有無何恍惚。黃帝廣成但傳說。秦皇漢武慕長生。方士怪迂始百出。安期盧敖去不來。文成五利徒

喧豕。神君未下鬼先集。世土烏有神仙哉。蓬萊可望不可卽。但願人人足衣食。昇平樂過華胥國。此戒求仙也。

六經燼後羅殘缺。博士儒生集羣說。欲施仁義法唐虞。及事神仙亟征伐。天馬徠時海內虛。窮兵黷武竟

何如。當年幸下輪臺詔。後世猶傳封禪書。此戒黷武也。

近小人。遠君子。桓靈之衰只繇此。跋扈纔誅任宦官。一時鈞黨盡摧殘。俊蔚顧及空標榜。白馬清流釀禍

端。士氣衰。國運否。人才與國相終始。千古興亡鑒青史。此戒親佞遠賢勸正人。珍邦國也。

治安共說梁天監。南北通和救塗炭。金甌無缺侈心生。白馬青絲輕納叛。薄心腸。激成變。果致紛紜滋反

間。捨身同秦會無遮。血食性怪改爲麪。貪噴至竟未能除。荷荷空悲淨居殿。此戒佞佛無益。祇速禍也。

閱武堂前種楊柳。至尊屠肉潘妃酒。祇愛蓮花步步生。曾知國步艱難否。百年南北擅風流。誰信無愁果

有愁。纔見荒宮餘辱井。又看芳苑起迷樓。阿麼詎惜好頭顱。瓊花只戀須臾景。解道真仙也自迷。不知狂

魄何年醒此戒色荒也齊陳隋一轍故合言之

臨淄英武摧羣凶。美政開元繼太宗。臺閣名臣刺州郡。人情和洽多年豐。歷年既多心漸侈。國事無端寄

楊李。長安一騎荔支紅。萬姓那知作瘡痛。漁陽鞞鼓太無情。入蜀青驄辛苦行。誰將夜雨淋鈴曲。更作朝

元奏樂聲。此戒荒以後任姦邪寵女謁也。

宋家累葉垂遺澤。求治賢君方側席。天津橋上聽啼鶯。禍亂將興任安石。相公新法執持堅。祖制詎難背

變易。忠良屏黜奸邪升。朝局如碁互廢興。千古知人誠不易。那論福建誤金陵。此戒變祖法用言利臣也。○做西滙樂府而略變音

節自成一格共五十三章。茲存其尤者。

有所思行

落花紛紛如雪積。明月皎皎如霜鋪。攬衣步月躡花影。悄然孤館空庭隅。沉思欲寐不能寐。明月燭牀花

滿被。客遊花月故園心。廬山高。高湘水深。遠書欲寄空沉吟。虛寫所思。意言不盡。

長沙

碧湘門外渺寒波。欲采芙蓉奈晚何。今夜黃陵廟前月。茜裙誰唱竹枝歌。神似何信陽。

曹 鑾字玉如廣西全州人雍正丁未進士。

苦水舖今名甜水舖。

苦水舖神仙過，留箇布古斷頭掉尾，今無人五尺之童，穩行路載重貨，輕身過苦水舖爲甜水舖。斷頭掉尾四字

寫盡從前擇惡，竟可作古諺諺讀。
劉青芝字華嶽，河南襄城人，雍正丁未進士，官翰林院檢討。

寄李侍御

驄馬乘來四載餘，京華處處避旂旗。飽聞聖主求言詔，未見諸臣諫獵書。豈是陽城方簡默，不勞永叔代躊躇。老生局外多私計，勿使吾曹望或虛。古道照人，昌黎廬陵復見矣。李侍御能如亢宗希文與否。

吳履泰字茹原，福建晉江人，雍正庚戌進士，官翰林院侍讀學士。○我師立言致行，一歸誠實，初謁見時間以持己立朝之道，曰端本原無私心而已。卽此訓言終身行之不盡者也。讀韻語二章，可以想見其爲人。

讀書一章示諸童子

讀書無源委，有如斷港流。濡潤涔蹄間，不能溉田疇。驕陽涸原澤，能有點滴不。苟能探其要，河漢當清秋。倒注屈千里，中有萬斛舟。六籍開其源，羣史決其溝。精華吸百氏，下逮騷人儔。元元復本本，千載窮冥搜。以此負文雄，氣盛言畢浮。奈何末學徒，顛倒不自尤。童髻髮未燥，猥以詞賦投。譌音復舛韻，殼殼聲啾啾。小年資弄舌，學語成呶呶。問以經史事，茫然張兩眸。俗學吁可嗟，舉世多謬悠。古人誦亡書，三篋探諸喉。吾歌爲此詩，非敢相嘲咻。持告爾小子，庶以鑒前脩。詞賦惟獵浮華，元元本本，總歸經史也。近人只守兩

醉矣前輩為後生言語語棧實可以揭之座右

蠶

八繭稱佳種。三眠貴早成。豈因能補袞。不自愛餘生。縈裹真何益。纏繇適見烹。縑絲悲老婦。索索紡車鳴。

事君致身於織小題傳出得杜陵之遺矣

曹一士字謂廷江南海人雍正庚戌進士官兵科給事中○謂廷諸生時名滿大江南北既為黃門所條封事皆去積弊培元氣有利國家者藝林吐氣賴有斯人奏疏可覆按也詩亦不肯

韻俗時露奇警

擬古

曠野張異樂。如在洞庭旁。元氣裹六極。太音彌八荒。不顧世上耳。安能主故常。聽者惑且駭。充耳神茫茫。焉得萬里風。吹送來帝鄉。一奏四時理。再奏百族康。未遇時自命何等宜立朝風節嶽嶽不凡

鸚鵡

飄零綠羽向秋陰。風雨時能惠好音。老去詩篇多錯落。閒來佛語費沉吟。十年廡下高人跡。萬里秦山故國心。惆悵雲霄空有志。病軀擬共息長林。頭聯傳出高人踪跡高人心事從來詠鸚鵡者未見及此

聽彈塞上鴻

龍沙漠漠草荒荒。嘹唳冰絃落雁王。作陣陰山呼伴侶。離羣葱嶺入微茫。欲彈閨閣刀銀淚。可寄關山錦

字行聽到一聲邊月白。受降城上有新霜。

馬樸臣

字相如。江南桐城人。雍正壬子舉人。官中書舍人。

漁

自把長竿後。生涯逐水涯。尺鱗堪易酒。一葉便爲家。曬網炊烟起。停舟月影斜。不爭魚得失。只愛傍桃花。

七夕

何關人事說年年。此夕銀河分外妍。閑對半灣無主月。癡看一片有情天。別離隔歲仙難免。飄泊經秋客可憐。忙煞隣家小兒女。喁喁乞巧不成眠。句句是客中七夕。別離感隱然言外。

秦淮水閣醉題

一杯清酌獨婆娑。笑倚朱欄對碧波。月影分明三李白。水光蕩漾百東坡。愁來天外鴈飛遠。秋到人間客占多。我自胸中有憂樂。阿誰吹笛夜深歌。三李白。百東坡。此種對偶。何減元遺山秋風客春夢婆句。

張映斗

字雪子。浙江烏程人。雍正癸丑進士官翰林院編修。

咸陽

河山百二西南抱。終南山色開堂奧。西周豐鎬陷戎塵。秦得咸陽廓新造。當時一劍掃六雄。焚棄圖書絕蒐討。鞭笞四海震匈奴。皇功帝德彌穹昊。傳世從茲憶萬年。國祚何煩子孫保。沙邱一石鮑魚腥。東海神

仙竟杳渺中原逐鹿莽狐虵孺子堪憐出軹道咸陽宮殿久榛蕪豈待今時跡如掃千秋龜鑑示興亡仁義從來爲國寶

張一鳴

字鳳舉江南長洲人雍正乙卯舉人著有樂圃詩鈔○鳳舉受知張清恪公清恪被誣幾蹈不測鳳舉蹶險尾行士林重之生平好義多類此所著條上張撫飭吏議十則箋注杜樊川

集若干卷詩其餘事云

過詩人家永夫墓

天意篤之子使之長賤貧賤貧滿世間若個稱詩人詩人葬空山抔土亦有神山鬼穿幽篁入夜常相親千秋此巖阿永永棲吟魂采菊爲君薦聊此同清芬惟長賤貧故得成詩人是天之厄之正所以篤之也然賤貧滿世間而一人獨稱詩人此又永夫之不負天別於滿世間之賤貧者也立意既高筆復矯折不使人一覽易盡

登金山

萬頃驚濤孤岫懸登臨身世兩茫然飛樓倒瞰眞無地危磴高盤別有天白下朱方頻戰伐吳頭楚尾總雲煙晚來擬放江心棹欲試中冷第一泉自注泉在江心石簪側月夜起沫始可沉銅瓶汲之○是登金山詩移不得大孤小孤等處

歸鴉

稻梁計拙海田荒薄暮哀鳴去路長欲覓一枝何處所滿天風雪漫回翔作者留滯長安欲歸無計比擬歸鴉直覺百端交集

王時翔

字皋謨江南太倉人以諸生薦舉官至成都太守著有小山詩鈔○小山初爲晉江令前令尙擊斷人皆股栗小山曰此吾赤子敢以盜賊視乎自是歷任守此心外嚴內寬一歸仁厚

所謂經術飭吏治者也詩能從情性中出往往清絕

于忠肅公墓

北狩倉皇日孫申爲鄭謀變疑鵲鶴識冤起鸞鷲謳社稷功千載湖山土一抔嗟哉徐石輩青史祇遺羞

鵲鶴識以昭定兄弟之變比英宗郟王也于公被禍後時民謠云鸞鷲冰上走何處覓魚鱉魚鱉音同于謙蓋鳴其冤也以此屬對工而能切

贈金東塘

五字隨州擅君家許問津自逢彈古調不敢薄今人楓影寒孤榻鐘聲淨六塵隱居兼德耀酬唱共忘貧

東塘詩長於五言以清勝人篇中正賞其清也醜亦能詩故有末二語

過戴高士南枝舊寓

短簿祠前路遺民寄旅魂誰憐晞髮叟未葬白雲村

南枝嘗備書葬徐侯齋先生而已之遺棺未葬宜小山感慨係之

寄范聲佩進士都門

我占湖濱一釣竿相思有夢到長安美人何處碧雲合欲贈芙蓉江水寒

遠韻

賽音布

字九如滿洲人

贈吳四師牧

少小負奇氣長爲邊塞遊合圍秋射虎聚讌夜椎牛幾奪匈奴幟曾分天漢憂卽今年七十不肯解吳鉤

杜曉峯出塞

龍庭余舊到。送子淚沾衣。風定樹猶怒。日高霜正飛。嘯陰山鬼過。叫月野駝歸。常使心魂感。還家夢亦稀。

邊庭詩。每多擬作。九如身歷其境。故於贈送人出塞。尤能傳出沙漠之苦。軍中之豪。幾欲與崔司助岑嘉州比埒。

劉廷璣字玉衡。遼陽人。官至江南淮徐道。著有葛莊詩鈔。

折楊柳歌辭

含淚送君行。送君到南浦。楊柳最無情。不知離別苦。折取煙中枝。千絲與萬絲。人從此時去。卻向何時歸。有言未盡中心曲。長條難繫斑駁足。望中不見遠行人。河橋搖曳傷心綠。詩亦以描曳取神。

晚投村莊

白草荒烟澹。蒼山古道斜。雁將天作路。雀以樹為家。日暮樵歌返。秋成社鼓搗。村民性淳朴。留客話桑麻。頗能造句。

題韓王故里

釣魚城下餓王孫。一旦登壇九命尊。進飯不忘猶報德。解衣常念肯孤恩。仰天若挈陳豨臂。相背應聽蒯徹言。隆準也同烏喙忌。功臣千古共銜冤。明淮陰之反。即於本傳中辨之。○弇州牧齋二作較勝。

蔣錫震字契潛。江南宜興人。著有清溪偶存。○契潛少參洞中呼崖和尚。後歸儒。師儲同人先生。學古文。制舉業非所好也。喜探奇。嘗獨經董山下。聞上有孫皓圍碑。日已沒。步山椒觀之夜中。

抵家其好奇可知矣。詩亦有奇氣惜不多見。

梅花

竹屋圍深雪。林間無路通。暗香留不住。多事是春風。

不藉籬籬自作局。避風應笑肉爲屏。似渠雅製誰宜稱。合號乾坤一草亭。使俗事能雅。便是能手。

徐夔字龍友。江南長洲人。廩生。著有西堂集。龍友。真才高俊。讀書一二遍。終身不忘也。與予結詩課。時專學昌黎。芒角四露。之廣南學。幕後醉心義山。謂以男女會合。喻君臣事。使得風騷宗旨。格律又一變矣。年五十。歿於廣南。攬歸。廣南詩散失。茲所收者。皆向年朋舊論文時作。讀其詩。猶見其尊酒澆胸。灑胸氣概也。○注義山詩與朱長孺注互有異同。與惠定宇棟注。王漁洋精華錄。

徐夔

字龍友。江南長洲人。廩生。著有西堂集。龍友。真才高俊。讀書一二遍。終身不忘也。與予結詩課。時專學昌黎。芒角四露。之廣南學。幕後醉心義山。謂以男女會合。喻君臣事。使得風騷宗旨。格律又一變矣。年五十。歿於廣南。攬歸。廣南詩散失。茲所收者。皆向年朋舊論文時作。讀其詩。猶見其尊酒澆胸。灑胸氣概也。

○注義山詩與朱長孺注互有異同。與惠定宇棟注。王漁洋精華錄。

已經行世

移居贈永夫

吾友永夫古狷者。不義予之弗受也。十年臥病時掩關。戶外紛紛看野馬。當年側身五塢山。予亦結廬山之下。已哇先生盛生徒。擯斥僞體親風雅。時予年纔十六七。不克升堂聽誠夏。韓門磊落多奇才。鏐鐵銀鏤盡鎔冶。永夫之詩比昌谷。永夫之窮過東野。先生曰。吁。子來前。有粟可分館。可假朱門時。亦饋梁肉。掉頭不應如聾啞。龍蛇道厄先生殂。侯芭有淚時傾瀉。幾年漂泊東西游。到處逢人皆竊罵。爾我重訂雲龍交。歲惟作臘月當且。新知落落無幾人。略如陶謝結白社。鯀溪沈子筆最奇。手掣神光仞紺闢。葑田吳郎

多態度。婀娜欲弄河間姪。永夫出語必驚人。鏤脇穿心慎揮洒。自鄒以下皆無譏。兒子紛紛鄙執袴。一日對我頻纒眉。鄰家老婦顏如赭。惟鵲有巢鳩居之。依舊淹留無片瓦。入門家徒四壁立。短衣往往不掩踝。孺子黑瘦弟凍皴。新詩盈帙欣可把。近來又復學古澹。刻玉作鈎改作鈞。囑我試作移居詩。萬壑冰壺雜土苴。永夫永夫。敍君生平有如此。嗚呼吾意其誰寫。生平誦法昌黎而此章尤神似寄玉川先生作蓋永夫之怪奇寒餓原與玉川類也此種筆墨吾黨中恐

無第
二手

苦熱

衆星夜出如張羅。更深月黑天無河。梧桐無聲竹森立。毒霧著體心煩苛。吾吳自昔稱澤國。襟帶江海中盤渦。時當朱明司夏政。綠楊匝地清風過。晚涼理榜入浦潏。鳧雁飛起穿菱荷。搗來炎官執柄令。赫赫火繳高嵯峨。蝮虺雄虺蝨人骨。磨牙螫尾餘么麼。蝦蟇鼃黽固同類。洒灰不禁其如何。日輪當午照下土。操鞭弭節非羲和。雷師無權阿香死。造化誰爲司天戈。舊時靈雨不復作。坐見舉國來奔波。吾聞堯時十日出。草木焦卷同蓬科。彎弓射鳥墮羽翼。此事荒遠疑傳譌。天心仁愛古所著。茅茨土簋知無佗。方今泰階四時序。陽侯何事收滂沱。中田無雲日杲杲。春可無麥秋無禾。珠簾冰簟正愁絕。何況賤子嬰沉疴。安得白雨洒秋令。擊壤一和陶唐歌。炎官執柄以下。恣肆言之。軒然起大波。不使人一覽易盡。

蔡將軍歌序

將軍諱人龍。吳縣人。明天啓壬戌進士。授潯州守備。平猺。力戰死。子至中。率死士入賊巢。獲父屍。執劇賊歸。猺人散走。潯州平。詔贈遊擊將軍。

潯江萬重山。門戶爭一峽。賊兵巢其中。出沒獷獫捷。將軍慷慨真人雄。南入百粵西擒戎。有子驍勇如奉叔。前身應是周盤龍。均房山斷無鈎梯。三軍前行路欲迷。大星昨夜隕如火。黃雲闔闔天爲低。豺狼轉多路轉惡。將軍勇氣十倍作。左右盤空搗寶刀。頭顱滿地馳風飄。深林密箐伐鼓急。戰馬悲鳴軍吏泣。仰天拔劍振臂呼。血濺蒼穹據鞍立。長君年少忠勇俱。義激諸軍馳百夫。背負髑髏血模糊。深入賊巢執其俘。咸陽一炬狐兔盡。大藤險惡今坦途。男兒要自獲死所。慘澹陰風足千古。卞壺握爪誰其儔。溫序銜鬚此可數。軍前將士手口瘡。隴上歌成血淚枯。矢窮兵盡無時無。如公父子真丈夫。嗚呼。如公父子真丈夫。潯州者。將軍子至中。入手先伏有子驍勇如奉叔。二語下深入賊巢。不嫌突如此。文章家倒插法。中寫將軍義勇如子。璋。髑髏血模糊。可以愈瘡。

觀秦丞相李斯鄒嶧山碑

碑在鄒縣治之右。宋元祐間。縣令張重摹上石。無識其字者。予爲書一通付胥吏。

魚膏燈滅銀鴈飛。荒陵火入化寶衣。輻涼骨臭已千載。何況金石埋烟霏。嶧山之碑野火燎。棗木傳刻形摹肥。誰爲伐石蠹立此。大書深刻高巍巍。細觀似同騎省本。相斯刀筆存依稀。我來下馬坐其側。以指畫肚窮是非。蛟鼉斫斷口難讀。無異石鼓驅駢駢。訟庭清寂了無事。二三老吏閒倚扉。見我口誦竊相語。授

以紙筆立周圍。爲書一通導之讀。得所未見驚且歎。當年祖龍踞周鼎。翦除六國如驅豨。井田封建蕩滅盡。剗削仁義爲不禮。相斯佐之更新法。鑿深督責唯刑威。東行郡縣上鄒嶧。鑄剗崖石昭日暉。丞相臣斯臣去疾。咸昧死請無從違。其辭直欲邁三五。讒諂面諛紫亂緋。嗚呼夏殷周禮至此極。千古覆轍堪悲讖。方今廟堂慎旌別。登崇俊良絕脂韋。淫朋比德豈宜有。盍不去此玷翠微。請剗豳風之七月。使彼長吏朝夕知民依。暴君虐政。姦相手書。本不足貴。況又宋代翻刻耶。欲剗除之。而更立豳風七月之詩。光明正大。昭如日星。

登北極閣

傑閣高空近玉京。凭欄一望起秋聲。龍蟠虎踞興王地。白石清江過客情。豈有占星周內史。更無繇絕魯諸生。由來陵谷隨時異。滿目寒雲下古城。閣係前朝觀星處。下爲園子。監勳倫堂。故五六語及之。

聞笛有憶

江月光盈江水深。江干忽聽老龍吟。誰將清夜桓伊笛。吹入山陽向秀心。回樂峯頭胡地管。洞庭波上楚人砧。天涯一種秋聲急。雪滿江南孤客簪。格高音亮。頌聯乃推開旁觀。結意一井收拾黏滯者不解此法。

秦淮雜詩

半山堂屋草萋迷。介甫聲華認舊蹊。欲紀元豐天子聖。天津橋上杜鵑啼。哲宗元豐紀年。係宣仁太后秉政。其時君子滿朝。自宣仁崩。改元紹聖。羣小以紹述爲辭。而賊虐正士。挑釁金人。至於南渡矣。所紹述者。王安石之新政也。詩中意在顯微之間。此種用筆。最近唐人。

鄭

鈺

字季雅。江南長洲人。○季雅少年詩。以日羅桃花米五升。秋聲只在豆花棚。得名。猶徐昌穀文章。江左家。家玉。煙月揚州樹。樹花也。後一變音古。駸駸升大雅之堂。朱竹垞先生極推賞之。有吳人狂鄭生。獨猶吳人詩。靡鄭生獨剛之語。蔣文肅亦奇其才。然不欲因此求進。其品亦有可觀。

擾龍松歌

昔聞散花塢中片石峯。破石孕出千丈之奇松。今觀非松又非石。但見虬枝夭矯向空立。得非寶子明。汝陽放釣來相迎。又疑軒轅帝。拔髯飛騰在雲際。上有鐵幹五鬣長。絕似爪角森森張。下有溜雨霜皮在。鱗甲斑斑色五彩。我欲繫之雙赤縉。雲霧晦冥恐遁逃。凜冽千年遺積雪。慘澹六月聞寒濤。吁嗟乎。秦封大夫寧勝此。何爲偃蹇深山裏。一朝絕壑雷雨起。看爾東行入海水。松在黃山之始信峯。卽所云帝松也。今爲鄰郡人盜伐。東行入海。其信然耶。

夜光木歌

我聞拘彌之國。有變晝之草。豈知興州直北。灤河東。更見夜光之木。生蓬葆。野人剛得盤曲形。皮膜剝盡肌瓏玲。黃昏扃戶置牀側。煜燭幽燄騰寒廳。初疑唐居士。翦紙貼壁弄奇詭。又疑佛圖澄。敗絮塞孔照耀同明燈。髣髴壁社湖中見。神蚌吐珠映水面。得非放螢苑裏遊。冷氣射骨涼颼颼。短檠牆角真可棄。攤卷還能辨細字。駭童刀削玉瑣碎。燐火熒熒忽滿地。吁嗟爾木上稟太陰精。燭龍之所不棲。羲和之所不及。乃是萬古積雪千年老冰凝。結成是以白日韜晦。宵暗晶明。若非周王八駿張騫槎。誰復遇之震且驚。爾胡不學天祿杖。劉向閣中伴書幌。爾胡不學牛渚犀。驅逐鬼怪清鯨鯢。徒然潛伏窮荒外。叢棘柔藤森翳

蒼鳴呼。世間萬物得地方榮滋。豈獨爾木歎息不逢時。騰擲奇恣。凡夜中有光者無弗臚列。不嫌覆不嫌盡也。結意幾令抱材不遇者同然慨息。

寒蟬

衰柳古池陰。寒蟬咽復吟。近兼風裏葉。遠帶月中砧。但覺露堪飲。忽驚秋已深。白頭潘騎省。爲爾不勝簪。
句旬有寒意。不問泛然咏蟬。

劉

震字東郊。江南長洲人。○東郊一布衣。傾動公侯。匪獨才分之高。由胸襟潔白。不爲名利動也。詩英氣逼人。如芙蓉出匣。晚歲感於欺人者之說。謂詩必不循繩尺。衆人共駭。乃佳。自後曠

然放筆。迥如二手矣。予所錄者。俱中年作。一存吾友之真。

易水歌

田光一死今古難。荆軻入秦髮衝冠。倉黃當日繞柱走。踞坐笑語神猶完。殘忍慘刻賈人子。以信服物非齊桓。奈何輕欲學曹沫。可憐易水千秋寒。高漸離。矐其目。人擊劍。我擊筑。報仇更比漆身苦。兩人後先得死所。血隨易水流不止。荆高至今猶未死。君不見鮑魚之臭不可聞。戍卒一叫驪山焚。生切之誤。劍術之疎。荆軻固不能辭。而能奪祖龍之魂。與高漸離俱凜凜。有生氣也。讀至末幅。真覺一字一快。

畫鷹

李君知我善苦吟。圖畫示我開胸襟。芳春爛漫忽如掃。悄然動我三秋心。陰森一樹龍夭矯。尺寸行間千尺杳。千尺高柯立鷲鳥。筆洗秋空天色老。霜翎如劍自無敵。集者欲飛飛者擊。庭中花木雀倒窺。過眼一

飛如箭激。男兒意氣敵萬人。安能刺促老此身。一起無力。以下霜風滿紙。所謂寫此神駿姿。充君眼中物也。

固關道中

崎嶇天路仄。徑絕險摩空。直此盤迴上。何難霄漢通。陰晴山向背。苦樂轍西東。百二秦關接。重重控禹功。
起四語如生鐵鑄成。大歷後罕遇此等筆力。

祖龍

六國邱墟九宇恢。更張周典見雄才。駕臨東土崇臺構。宮壓南山複道開。祇見壁隨山鬼至。邨聞藥自海船來。阿房轉瞬繁華歇。卻與詩書共劫灰。
詩書雖焚。終不磨滅。阿房一炬。蕩爲冷灰矣。作者並論。猶爲怒辭。

望岱

玉檢金泥歷代傳。振衣千仞是何年。風吹一片青冥色。萬朵芙蓉落馬前。

峴山

當塗典午事紛紜。西蜀山川付暮雲。我到峴山無淚灑。秋風曾拜臥龍墳。
無人敢開此口。作者公正。可以想見。

吳承泰字讓三。浙江烏程人。

山行柬周鍊師

蒼峯落日寒。萬壑秋聲起。白日逐雲歸。行人猶未已。
只二十字。可抵一篇山中晚行遊記。

張安紘 字琴父，浙江烏程人。

送燕

節屆秋分社事忙，送君前路入蒼茫。年年不作無家別，半在他鄉半故鄉。言外感已無家。

徐洪鈞

字雙南，江南宜興人。諸生。○雙南喜鈔書，經史子籍詩賦，研語會於心者，必手錄出遊，必載箱篋以行。年六十，右體患拘攣，疾仍用左手書，勿輟也。詩意以沉著為主，品奕本朝人詩，共

五十餘章，多平允者。

和昌黎秋懷詩

萬靈均有知，露零鶴自警。修士多感秋，日短志彌永。學道已苦遲，精進詎嫌猛。尋源有深淺，修短視我綆。耳目淨浮華，寧謐差可幸。會心正非遙，頓使煩慮屏。下一分功力，得一分道趣，百倍千倍，所得因之，所謂修短視我綆也。

書懷

讀書貴神解，無事守章句。混茫萬古心，每於故紙寓。憶昔就傅時，端受鹵莽誤。年來發深省，頗領此中趣。中夜每獨坐，睽睽燈火聚。到眼初茫然，思力未能赴。朗吟一再過，旨趣或流露。迴環三復餘，延緣得津路。此時萬籟寂，炯炯一心注。若距且若迎，適爾忽來悟。頓令千載人，精魄宛相遇。掩書起推窗，皎月挂高樹。秦會之謂書快讀則無味，茲人能道著讀書趣也。篇中寫巽入工夫，語語心得，一結超然，妙在結出題外。

過梁溪

東風作意送歸艤。舟子吳歌盡短腔。一枕夢回天已曙。九龍峯影落篷窗。

卷二十八

朱奕恂

字恭季。江南長洲人。廩生。○恭季二十餘歲。詠懷詩落句云。男兒意氣原無恙。哭向窮途笑向天。抑塞磊落。乃爾。後學日進行日醇。遠近稱長者。四十後不復吟詩。謂於道未尊者也。茲所錄四章。皆壯歲時作。

擬古出塞

束裝赴青海。醉裏別鄉關。少婦識雄心。不復問刀環。笑彼馬伏波。猶戀裹屍還。埋身青塚側。陰雲黯天山。
極形義勇。翻盡白窠。

荷珠

小雨林塘淨碧羅。田田分得夜光多。江姝睡逐天風落。仙掌晴分曙月過。幸未贈來愁結佩。若爲采去誤凌波。蕩舟耶女休相妬。樂府虛裁一斛歌。
刻劃已極。卻似未嘗刻畫者。然此詩品也。往時詩社中作。衆人傳寫。今稿中散失矣。予以舊所記憶存之。

秋日雜感

短蒯長歌二十年。不羈天地總翛然。監河賒許供江水。營室虛償貸聘錢。婦索短絙枯井畔。兒煨半芋敗鑪邊。日高顏巷西風急。傲骨嶙峋萬仞巔。

五人墓

花市東頭俠骨香。斷碑和雨立寒塘。屠沽能碧千年血。松檜猶飛六月霜。翠石夜通金虎氣。荒邱晴貫斗牛芒。片帆落處寧清藻。幾伴歸鴉弔夕陽。不須徵實。自無浮響。

王景琦字韓起。江南江陰人。貢生。

詠淳化里

澆薄已成俗。淳風世所難。兒童知禮讓。父老重衣冠。耕稼惟同井。催科不用官。鄉邦能化此。便作上皇看。

朴老得力於杜。

同錢青在夜飲賦此贈別

青鐙酒數巡。寒夜獨相親。以我無家客。逢君失路人。吟魂清遠道。堅骨鍊長貧。又逐征鴻去。輕車少住輪。

唐人風度。

侯

銓字秉衡。江南嘉定人。廩生。○乘衡。太常諱震。鳴曾孫。國學諱岐。曾之孫。修髯長身。談及忠義。言箴規。不失先世風。乘衡沒。同學中直。諒者少矣。錄其詩。因追憶其風概如此。

南屏晚鐘

聲喧百八起西冷。敲徹斜陽近翠屏。閒逐野雲停半壑。遠隨孤棹落前汀。六橋金粉人初散。十里鶯花夢

乍醒斷續聽來何處好。碧烟明月冷泉亭。妙在語語是晚鐘。粗心人不解辦此。

清明日作自注時鄉試報罷

連日陰寒乍放晴。愁邊不覺是清明。漫從榆柳分新火。枉向鶯花憶上京。得失已空蕉鹿夢。浮沉聊結鷺鷗盟。宵來盼斷松楸路。有淚無言對短檠。

蹉跎身世苦無惊。開遍來禽興轉慵。璞玉無言寧自炫。蛾眉已老爲誰容。餘光猶鑿鄰家壁。浪迹休嫌廡下春。安得故園營十畝。一犁烟雨傍吳淞。隔斷故園又傷落。懷鄉感舊情見乎詞。

送西京再至京師次西澗翁韻

才得言歸又欲行。黃梅雨過片帆輕。家庭兩月團圓話。客路三千去住情。梁穩香泥憐燕子。花飛柳陌怨鶯聲。匆匆便作臨河別。離緒無端觸處生。作客苦況。領聯道盡。

不寐

露滴寒蛩咽。風高枕簟涼。歸心憑短夢。一夜幾還鄉。

題桃花扇傳奇

青蓋黃旗事可羞。鍾山王氣水東流。滄桑眼底傷心淚。付與詞場麴部頭。賦此題者甚多。未免過於瑣屑。著筆滄桑不黏兒女。故爲雅音。

胭脂井畔事如何。扇底桃花濺血多。長板橋頭尋舊跡。零香斷粉滿青莎。

葉舒璐字景鴻江南吳江人歲貢生著有分子詩鈔○已哇先生輩從皆能詩

孟夏同沈公倚昆季暨家弟姪輩泛舟登斗姥閣讌集劇談寓都門事帶月而還集杜三十六韻

我衰易傷感林甘憶昔少壯日別垂老脫略小時輩壯遊人寰可超越畫行惆悵年半百秋立平生心已折地愁寂

意不愜李公賴有杯中物巴西但遇新少年水上老矣逢迎拙贈盧文瑒通家惟沈氏沈丈早通交契密寄張彪同

姓古所敦孫從嗣宗諸子姪佐姪痛飲情相親寄薛郎中入門高興發與李白招邀屢有期陪李司馬交會未斷絕

喜今夏草木長述懷甘酸齊結實北征四月熟黃梅梅雨薰風行應律暮春雲溪花澹澹次驪亭驛霧潭鱉發發題張隱居

景從陪羣公在往差池上舟楫白沙渡灘淺正相依陪王漢州一邱藏曲折早起隨喜給孤園望兜律寺野寺江天豁游四

樓角凌風迥東樓仰穿龍蛇窟登慈恩寺塔築居仙縹緲贈陳諫議得非玄圃裂奉先劉少府澤國繞回旋秋日原野轉蕭

瑟留花恣意同遠步西村力稀經樹歇九月一日進舟泛迴溪泛溪水深波浪闊夢李白展席俯長流李公見斑白居

上列後出塞二勅廚倍常羞鄭典嘉蔬既不一暇香芹碧澗羹陪鄭廣文經齒冷於雪槐葉冷淘嗜酒益疎放故鄭公劇談

憐野逸白李斜暉轉樹腰絕句涼風起天末懷李白餘酣漱晚汀軍中飲酒飄蕭覺素髮義行時復問京華上軒冕

羅天闕贈奉常張卿南宮吾故人別唐時來如宦達寄高詹事文章實致身贈鮮于京兆聲華當健筆故李公嗟余竟軼軻

吟江湖漂短褐寄章文雲泥相望懸送章書記不才甘朽質宴王歌長擊樽破原回首肝肺熱鐵堂慷慨有餘悲

水歡樂會倏忽七此會共能幾送嚴侍御舊遊易磨滅贈汝陽王同人惜解攜水宿臨歧意頗切送李校書遲遲歸路賒入

口 江城帶素月。聽楊氏歌○集杜成古詩前人未開此體隨題段落風折迤邐幾如無縫天衣。

讀杜白二集

子美千間廬。香山萬里裘。迥殊魏晉士。熟醉但身謀。拈出二公大節。知人論世。不當如是耶。

索得學山兄遺稿

忘年羣從絕追攀。入夢遺容想像間。秃筆纍纍猶作家。可堪埋骨欠青山。

南北馳驅客路長。依人空辦嫁衣忙。阿連自爲文章哭。豈特傷心舊雁行。首篇悲其未葬。次篇表其文章。而羣弟之誼自在言下。

司馬相如

挑得琴心正倦遊。壚邊尙典鸚鵡裘。長門解爲他人賦。卻惹閨中怨白頭。

索人題照

鍼孔流光露電身。靈臺本合淨根塵。君能索我形骸外。翻覺廬山面目真。此不取形而取神也。七言斷句。都能翻空。回視死煞句內者。有

牀上下之分。

宋 樂字玉才。江南常熟人。陳生。○玉才少年多才。以嘔血卒。陳亦韓司成。囑子定其遺詩。七言絕尤工。向未鐫板。已散佚矣。祇存其能記憶者四章。

送別

別路風光早。江南芳草天。人心似春色。千里逐君船。

瀟湘曲

楓落早鴻過，洞庭無限波。相望終不見，只是白雲多。
意不必深，風神絕世。

答揚州喬子

病餘纏縛似春蠶，詩酒風情亦尚堪。日落離心滿揚子，知君江北望江南。
近劉賓客。

蘇臺柳枝詞

十里珠簾映碧流，絲絲金線拂船頭。閨門過去盤門路，一樹垂楊一畫樓。
又有句云：不知飛絮隨流水，化作浮萍箇箇圓。上言思婦之感。

別離也。失記全文，附錄於此。

鄭玉珩字荆璞，江南江都人。著有止心樓詩。○荆璞大父，為名侍御，晦中先生，文章諫草。著聲於時。荆璞述祖勵行，詩特餘事也。采取二章，嬌嬌拔俗，知留心此藝者久。

銅雀臺

露下金甌冷，風來玉座清。美人掩瑤瑟，獨對月華明。橫槊虛豪氣，分香感故情。西陵松柏響，猶似管絃聲。

微調高於痛斥，是為詩品。

渡江

鐵甕城高落日沉，秋濤滾滾起層陰。天教設險分南北，水識朝宗自古今。風急江狹吹白浪，月明烏鵲繞空林。千年銷盡英雄氣，留與吾儕擊楫吟。

葉永年字硯孫江南上海人貢生官
轅榆訓導著有玉壺詩稿

虎邱山樓卽目

闔閭城南桑滿枝。闔閭城西柳絲絲。一百五日雨過候。二十四番春盡時。花妥真娘曾入夢。月明山鬼亦題詩。何妨索取銀瓶酒。一醉前山短簿祠。不必奇警。風格自高。

燕

芹泥重葺舊巢新。記取年年及社辰。入幕不驚揮塵客。巡簷如喚卷簾人。鴛鴦樓外春如海。玳瑁梁間月似銀。閑向主家談故事。昭陽臺榭已凝塵。五六空寫一聯妙仍是不離李樊南時用此法。

方

還字冀朔廣東番禺人貢生著有靈洲詩集。○冀朔爲九谷先生長子所學一本庭訓移家於吳倡詩教喜賓客四方詩人來吳者每登方氏廣歌堂賦詩讌飲稱一時之盛。

舊邊詩九首

鐵嶺迢迢接錦川。關城三面繞烽烟。春深秣馬蒲河北。秋老連營木葉前。滄海舊聞通運舶。金州誰解議屯田。諸軍自失橫江險。白草黃沙暗朔天。

右遼東

北平雄鎮翼幽燕。千里潮河朔漠連。司馬高臺聞夜吹。盧龍古塞入秋烟。開疆競說分三衛。籌國何因棄外邊。歎息寧封南徙後。遂令烽火達甘泉。初以大寧爲外邊。永樂中寧王內徙而薊始重內邊。此失策之大者。詩中暢言之。

右薊州

萬全八驛接神京。上谷千年漢將營。地險旌旗藏殺氣。山盤鼓角壯軍聲。邊歌竟日來紅石。鐵騎中宵度赤城。誰識興寧殘廢後。漠南無計援開平。棄大寧後。土木之變。又棄興和。則開平亦不能守。

右宣府

馬頭北去是雲中。極目川原處處通。繞鎮衛城分十五。沿邊都閫轄西東。自注。明初設山西行都司。管轄東西二路。一十五衛。頽垣正接葫蘆海名。曠野長吹鵬鷲堡名。風聞道頻年還調戍。諸臣何策建奇功。

右大同

三關平列勢逶迤。日落連城鼓角多。帳外深煙迷衆堡。營前孤月墜長河。赤山寒谷驚烽燧。青塚秋原入駱駝。誰使總戎移逸地。偏頭空曠牧人過。自注。嘉靖中。撫臣請移總兵於寧武。而偏頭一帶。地皆空虛。

右山西

榆林四望黃沙際。千里連墩絕塞天。夾道陳兵橫套口。長城環塹繞延川。徙邊御史籌無缺。自注。舊治綏德。成化間都御史余子俊建議。移鎮榆林。內地遂安。折色司農計苟全。自注。弘治中。改延慶等府本鎮之稅為折色軍用。始寤。此地從來多勇敢。莫教枵腹事鳴弦。

右榆林

鎮城西倚賀蘭開。滿目沙飛筆築哀。冰合黃河朝走馬。雲迷紅寺夜登臺。膏腴昔日稱蕃庶。蹂踐連年盡

草萊欲識金城舊方略。濬渠卽是靖邊才。自注：自陝西築爲邊牆，竇爲溝渠，修復秦漢故跡，邊城外固，濬渠內深，以資灌溉，全陝之利也。

右寧夏

秋入平原動鼓鼙。弓鳴風勁塞雲低。漢家營壘沿山後。秦郡川原盡隴西。徵調頻年憂戍士。逃亡何計復蒸黎。徘徊險阻誰爲守。花馬池邊落日迷。固原爲八郡咽喉之地。虞詡守階州招流亡。開漕道。羌人懼服。卽其地也。明代顏調臨鞏。西鳳兵防守。蜀糧在本軍。輜內支給。

乖前人策矣。詩中見及之。

右固原

風急荒原落雁聲。西河霜氣逼嚴城。金笳幾處秋乘障。鐵馬連羣夜點兵。充國留屯沙際沒。嫖姚遺壘月中明。古來無限安邊策。哈密徒勞苦戰爭。丁酉秋。同人集廣歌堂賦舊邊詩。時家方舟。劉東郊。李客山。孫丕文。及子。諸人俱在。或成一二首。多者四五首。裝朔日纒亭午。已成全詩。又皆按切時勢。同人歎服。選中因全錄之。

右甘肅

鎮海樓

獨立危城城上樓。層層遙接大荒秋。三條江色來千里。四面山光盡十洲。東海雞鳴紅日擁。南溟鵬徙白雲流。試觀百粵聲名盛。離火文明貫斗牛。

少年行

不解陰符與六韜。似知名姓五陵豪。此身未識爲誰用。慷慨長歌看寶刀。傳出姦政荆軻心事。視不通名。姓粗豪甚。及繫馬高樓垂柳邊。

皆皮膚語耳。

方

朝字東華。廣東番禺人。國學生。著有勺湖集。

中宿峽

滄海雲際來。一瀉開地軸。嶽岑雙屏轉。塊軋森草木。仰窺流光短。益覺日晷速。乃知東南天。於此亦不足。蛟宮倚禪房。魚梁飲麋鹿。帝子去杳然。清光映江曲。維舟探遺蹤。雲旗想幽谷。起步突兀。東南天亦不足。此景此意。無人道過。

出峽

烟橫山根青。日落水面赤。孤村牛羊下。出峽景已夕。網罟歸澄潭。麝轡戀幽石。蒼然前林遠。江天月流碧。山水信足佳。其如在于役。

由臨川北道抵餘干山行五首

雞鳴發征夫。驅馬萬壑黑。仰觀參星橫。俯怯厓石仄。烽迴溪流轉。林密寒光逼。空山鳥吟悲。百里無人跡。安知叢莽中。不有猛獸匿。驚風吹客衣。佇立增太息。

寒泉瀉崇阿。絕壁開古道。暮投漁樵煙。朝拂谿澗藻。征雲遘微風。相隨越林表。出門聞雁聲。客舍非春草。江湖風波輕。夢寐間關杳。蒼茫問前途。下視見飛鳥。

炎暉焦林木。客子朝雨汗。側見垂蘿靜。四嶺雲氣斷。幽崖響淙潺。竹泉遠分灌。行行度谷口。黯淡驚雷電。馬頭風雲興。澗底蛟龍見。蒼黃顧僮僕。中道已失散。

出郭落月輝。涉澗山日晝。客行路紆迴。我影忽左右。懸猿嘯風枝。飛鳥來煙竇。回瞻寒潭口。瀟灑石泉溜。東臯苗尚青。溪南稻多秀。神明何施爲。物情自爲候。

山行宿常遲。白日忽已墜。美人在天末。明霞情誰佩。總角事遠遊。夙昔臨東岱。中懷念舊丘。極目炎雲外。奈何來豫章。咫尺庾關在。明朝乃迴車。轉欲向吳會。老莊告退。山水方滋。昔人以品謝公者。請移贈斯人。以品地風格。略近前賢也。末章已近庾嶺。未返南粵。

倦倦有故國之思焉。

開先寺觀瀑布

客尋瀑布來。恰到雲歸處。層巒聳萬疊。懸霤空中注。白晝瀉銀潢。中天昭太素。逝者無終窮。千秋等朝暮。古寺枕寒澗。蒼崖噴長霧。蛟龍卜靈窟。形神洽幽趣。洗心視聽外。無言發清悟。可參子在川上章。不止清言起悟。視東坡作境界又矣。

三峽澗

宿昔夢龍門。茲晨越三峽。湍雷翻水花。林風墜霜葉。行人與飛鳥。邂逅忽相接。寺門蒼崖削。松臺紫雲疊。我欲窮源泉。於茲將遠涉。所恐觸潛虬。俯視爲氣懾。

碧落洞

日暮棹秋水，煙花滿江曲。翠壁何嵯峨，幽巖鑿山麓。我來縱遊觀，天風振樛木。其外不可攀，其內可以屋。洞底上迴磴，茲山乃空腹。石閣兩三層，蒼蓮根地軸。香烟老苔蘚，佛牀女蘿綠。老僧擊晚磬，寂寞共雲宿。
會稽吼山鑿山空腹，人力既盡，轉近天工。洞底十字，令我如遇舊遊。

力田

躬耕習農時，豈敢稱高蹈。侯門不可干，聊以從吾好。方春理耒耜，隨時調水潦。布衣足掩形，茅檐頻洒掃。日暮耕者還，斗酒相歡勞。四運有常功，吾生復何校。

倉庚鳴桑林，喚我荷鋤子。雨澤一以降，耕作從茲始。黃犢分我勞，葛條繫我履。行行石梁畔，澗道多新水。草花紛芳菲，山光無表裏。乘閒偶流眄，木末春雲起。
胎原陶公起四語，已到自然地位。

春日自鄧尉移權支硎山中信宿

川原既逶迤，我遊亦無定。甫別湖上峯，旋躡雲中磴。臨淵想修鱗，過寺聞清磬。漁樵相引接，水石交繚亘。野風吹春服，低徊發清興。林端斂斜陽，浦上輕雲暝。

月下自寒山還至蓮花峯下

西閣寒日沒，策杖尋松徑。歸鳥半在巢，山家煙火靜。清月流素輝，幽篁生虛聽。依然向來路，雲影飛無定。

欲逐樵人踪。盡識山中勝。行行見柴門。寒潭似清鏡。

大江吟

大江曲。山樹秋。天寒日暮。野鳥啁啾。中流激蕩。風濶濶。北兼漢沔。東下揚州。滄波浩瀚。誰能收。江上何所有。芙蓉北渚。葭菼中州。江中何所有。鯨魚鼓浪。天吳嬉遊。峨眉雪消。春水漲。瞿唐巴峽。猿啼幽。奔濤瞬息。千里瀉。雷霆懾赫。日月愁。思欲一濟。無方舟。美人旌旆。雲外浮。乍去乍來。不我求。青鳥欲語。意夷猶。天路險阻。懷靈脩。白日西馳。不我留。長歌徙倚。增離憂。末段緬雲路之阻長。歎靈脩之未遇。正則遺音。耐人吟詠。

藐姑山

一角青天缺。孤峯補白雲。洞深泉自出。山險路難分。日月愁關鎖。風雷亂見聞。但令栖隱去。何必遇神君。風雷亂見聞。深山中疑鬼疑神。真寫得出。予遊良常山。有風雷生絕壑。旬然自視。覺平近矣。

落

偶爾逢時雨。延生過井欄。託根多在石。爲性不知寒。古洞封長滿。陰崖濕未乾。是誰留屐印。幽處久盤桓。水流濕水不知濕也。火就燥。火不知燥也。唯其性生也。性本寒。故不知寒。五字可以見道。

江夜有懷

風力捲雲霾。孤舟傍翠崖。江星動魚脊。山果落猿懷。旅夢灘聲斷。鄉心驛路乖。不知蓮社客。誰最念天涯。

江星二語字字生新而山果落猿懷尤極自然卻又無人寫到或謂近賈長江愚意轉覺過之

清溪

清溪知幾曲。深處有樓臺。樹杪江帆去。門前潮水來。溫風丹荔熟。明月素馨開。童稚歌連袂。橋南浴始回。

峽口

峽口波濤壯。居人不滿村。衆山風落木。深洞月歸猿。水并星河瀉。雲兼石壁翻。千秋追帝子。如可夢精魂。

聽撫洞庭秋思曲

曾放扁舟泝楚天。清猿淚竹思淒然。廿年夢裏湘山月。今夜分明在七絃。只末句寫聽曲作法最工

程

鳴字友聲江南歙縣人

論畫答王耕南

杜陵贈畫師。五日畫一水。意在落墨先。苦心究終始。前賢論惜墨。其意端在此。第云墨如金。祇取減省耳。

王洽米襄陽。烟雲常滿紙。

學古希古心。不學古人面。荆關境在胸。揮灑付柔翰。規矩雖具陳。神明取能變。試看造化鑪。新機異昏旦。

而胡丹青家。刻舟以求劍。為臨摹古人者更進一步

顧我錡

字湘南江南吳江人廩生○鄂文端任江蘇藩使時古學試士得五十三人湘南為冠後舉博學鴻詞文端奏請若為湘南設也及詔下而湘南歿矣豐於才奮於命文端歎息彌襟

趵突泉

泰山之水環山來。陰崖汨汨逝不迴。

自注源發於岱巖之陰至渴馬崖始伏

陡然一落不復見。渴馬立壁空崔嵬。濟南城西

天下絕。珍珠金線交橫發。伏流到此修復通。平地跳出三白龍。初疑風雨至。萬籟翻空波撼地。繼若驪宮

傾珠璣。瑟瑟騰光晶。雷奔箭激不可以逼視。天矯勢欲升天行。其旁有高樓縹緲如仙靈。流丹百仞映涯

浚。飛沫萬點噴蒼楹。揮手倚樓坐。對此可以傾醪醴。吾聞匡廬瀑。天紳倒挂變峯巖。又聞太華頂。綠淨紅

酣池萬頃。未若茲水虛可驚。倒行逆出相喧爭。乘風我欲破空去。轉恐平地洪濤生。

此句奇天

如置身其間

海山亭觀落日歌

羲和鞭日聲隆隆。朱輪丹轂雙碾空。塗窮猝入大瀛海。迴光倒燭深潭龍。海水忽湧沸。銀燭如屋相撞舂。

欲吞不吞吐不吐。但見萬里鎔紅銅。陽侯驚詫海若笑。幻出萬象真無窮。天矯一金蛇。獨臥洪波中。連蜷

鼻窺千萬丈。小虵蜿蜿來相從。熠然變火光。傾瀉玻璃宮。浮光照曜際窮髮。餘光溢出難為容。飄飄海山

亭。結構當海衝。我來露頂坐其上。放眼頓覺開心胸。霞收景滅忽不見。皎皎玉鏡升天東。

正寫落照旁寫餘光真能狀難

狀之象

九日登縹緲峯

太湖湖水平如油。南臨吳興北常州。雲濤瀆洞千萬頃。天遣峭石支中流。奇峯羅列七十二。意象峯窮窮
 雕鏤青螺勢。繚延支聯脈。綴相沉浮。就中一峯起。天半孤撐磔卓無朋仇。有如端拱坐清殿。奔走萬國朝
 羣侯。置身峯巔斷塵土。縹緲雲煙鼻孤柱。微波一曲辨荆溪。頑石數拳窺顧渚。未知大地竟安窮。但覺長
 空浩無主。孤舟遠泛若停橈。斷雁低飛如鍛羽。是時秋空方泱寥。丹楓黃葉山之椒。彭澤把盞正采菊。中
 山搖筆還題糕。我貧無物作重九。憑仗兩腳升青霄。指揮雲物作几案。呼叱巒嶸同兒曹。吳山簫鼓真一
 笑。苦向平地誇登高。峯為七十二峯最高。俯見荆溪道場山等處。然自下而上。無亭臺樹木。有登無頓。不
 易造極也。作者浩氣孤行。豪憤直上。不負登高之目。末言吳山簫鼓。平地登高。真堪
 笑。

周

遠字少逸。江南吳縣人。

京師九日城南黑窰廠登高

愁思天涯九日晴。憑高閑望夕陽明。天清萬丈秋潭影。風急三關落木聲。雙闕參差連御苑。亂山合沓入
 邊城。懸軍絕幕思飛將。聞道河西已厭兵。明後七子中。最近滄溟。

朱厚章

字以載。江南崑山人。寓居嘉定。廩生。著有多師集。○以載長身鶴立。言論侃侃。嘗於座間。見
 人參錯。書之。序長律。俱工。已所錄。無譌字。五官並用人也。徵博。

學鴻詞。病卒。門下士金君昂。午刻其集。行心喪禮。鄰邦並重之。

拜方正學祠

秋氣凜毛髮。祠門弔落暉。何人加白帽。大節在麻衣。草亂疑瓜蔓。庭空絕燕飛。景公遺廟近。化鶴並來歸。

寄答王千里

留滯通侯邸。真成客裏家。高門賀燕雀。華髮吐煙霞。逸士方三拜。才人溫八叉。知君懷故里。邱隴有梨花。
千里客徹侯張氏廿年不歸作詩調之猶古道交也。

題清溪集

黃柳花飛撲醉巾。六朝滾滾馬頭塵。也知李嶠真才子。可但江淹是恨人。澹粉輕煙疑在眼。珠簾甲帳最傷神。倩誰譜入參差玉。訴與無情古月輪。

九日登東城寄南華

蒼煙影裏獨憑高。瑟瑟寒生薜荔袍。我願滿頭常插菊。天生左手爲持螯。雲隨暮鳥歸村樹。風捲秋鐘撼海濤。佳節一杯桑落酒。故人何處鬪詩豪。

歲暮雜詩

吳氓殫力辦租庸。霖潦深秋駭老農。信有檜巢師鳥雀。盡拋穉稷象魚龍。漫空水氣難爲雪。照野陽威未化淞。聞道中丞能入告。便令寒谷轉春容。
雍正丙午七月連雨至明春始晴禾稼不堪問矣。頤聯寫景紀實中丞入告而曰聞道詩人婉調之詞。

秦淮絕句

風花無力撲簾波。佳節偏從客裏過。聽說兒童挑薺菜。青青只有故宮多。

觀柳河東初訪半野堂小像

蘼蕪脈脈柳疎疎。想見文君放誕初。誰識秋風搖落後。獨將一死報尙書。詞婉意微。當於言外領取。○隲蕪河東君小字。

謝芳連

字皆人。江南宜興人。國學生。著有香祖詩。○皆人工短篇品。地在色香臭味之外。新月在天。殘雪在地。可以想象其詩。

月夜汲中冷泉

新月泉上出。江華照衣冷。扁舟蕩秋槳。汲取波中影。昨與山僧期。煮月翻瓦鼎。

孟夏山中晚坐

孟夏變物候。景仄風光稀。石林湛雨氣。山月連陽暉。鳥語遍幽澗。人聲隔翠微。彈琴遲漁者。衣上落英飛。

溪邨早起卽事同邵八丈子湘

早起杏花白。飯牛人出門。野田多傍水。深柳自爲村。比屋盡耕稼。服疇皆弟昆。爨煙猶未散。林鳥亂朝暾。

妙在絕不用力。惟不用力人不易到。

宿山園

小雨松逕寒。人歸夜深火。宿鳥栖未安。驚飛落山果。輞川外又開一境。

密雪望行人

人行犬寒吠。密雪迷村影。欲扣酒家扉。山橋一蓑冷。山橋五字入畫。

題李百藥三十六湖草堂

釣罷歸來解釣筒。題詩燈火夜深紅。湖村犬吠人眠盡。商女棹歌煙月中。

孫

字量如江南桐城人國學生。

過倪雲林祠

玉山池館已荒煙。清閼祠堂尙儼然。破產放情多難日。無家投老太平年。碧梧修竹騷人節。遠岫平林水墨仙。應與所南同俎豆。遺民心事畫中傳。自注。雲林山水不畫人。所南畫關不著土。兩公宜並祀一堂。○三語指元時。四語指易代時。下半人品畫品俱見。

黃侍中祠

金川萬騎蹴煙塵。叩馬難將大義陳。妻女一時同殉節。君臣千古有完人。魂歸羅刹江聲壯。碑照秦淮血影新。咫尺孝陵松柏路。夜深風雨走青燐。

吳學濂

字曦洲江南休寧人浙江仁和县諸生著有香雪堂詩。

送梅藕長令浙東

廿年臥對敬亭雲。名士如君始是真。太白樂章驚賀監。微之辭句誦宮人。素衣不受緇塵化。墨綬偏膺白髮新。山水永嘉堪眺覽。謝公遺跡未湮淪。

楊椒山公祠

祠宇重新古驛旁，姓名猶覺滿城香。五姦已褫權臣魄，一疏堪爭烈日光。謝卻蚶虵真有膽，撐將鐵骨不隨楊。階前請鑄分宜像，斫地行人共激昂。滿城香不隨楊皆椒山朝審詩中字也末用岳墓鑄秦檜像事

劉正誼字戒謀浙江山陰人著有宛委山人詩集

自笑

自笑情何僻，謀生竟未能。鬻田買古硯，貸米給詩僧。花月耽成癖，禽魚狎似朋。室人交謫我，婦語不須騰。想見雅人風趣僻士襟懷

訪毛西河太史留贈

充棟書成自不刊，頻年握槩暑兼寒。魯魚舛後多釐正，秦火焚來盡補殘。畫舫兩湖明月共，籃輿十里好山看。感施餘論沾荒帙，白葦黃茅足改觀。三四是西河身分末二句應是西河作序詩以報之

曹煜曾字麓高江南上海人貢生著有道腴堂詩

水仙花

江湍漱雲牙，夜濯宓妃魄。一洗羅襪塵，踏霜曉無迹。冰肌歸藥房，清芬襲巾烏。脈脈契素心，疎梅影橫壁。清氣逼人

曹炳曾字爲章，江南上海人。諸生，著有放言居詩。○曹氏昆弟，人比之劉孝綽。三昆齊名，詩品亦復相當。

九日送人北歸

折取茱萸當柳條，送君明日上蘭橈。望鄉惜別分南北，并作離魂一夕銷。望鄉，指所送之客。惜別，指送客之人。兩層都到。

曹煥曾字春補，江南上海人。實生，著有長嘯軒詩。

病中雨夜

鐘煙濃欲篆，夜色淡生陰。病骨秋花瘦，愁懷暮雨深。疎燈孤榻影，衰草亂蟲吟。無限關心事，朦朧夢裏尋。工於琢句，外此如殘歲斜陽促，輕寒落葉知，酒力緣愁薄，詩情到枕工，語不必奇，耐人吟咀。

秦時昌字枚謬，江南震澤人。

方竹

舉世尙圓通，爾形獨合矩。不同睢園種，亦殊嶰谷侶。直方坤之德，鍾秀天特與。雖驚世人眼，實爲君子許。稜稜霜氣凝，矯矯峻節舉。宿土移數竿，歲久森圃墅。堅竹豎爲杖，登臨藉撐拄。毋令柔媚人，一朝削圓女。見君子當終守矩矱，勿違圓通，改節末路也。前半自矢結意自規。

周瓚字黃在，雲南大姚人。官翰林院孔目。

柳絮曲

點點覺春深。飛飛恨不禁。露沾疑妾淚。風散比郎心。曉月隋隄畔。殘陽灞水陰。年年飄蕩處。腸斷白頭吟。

劉宗霈字蔚園江
南興化人

看菜花

乍逢紅雨點迴塘。又見平畦千頃黃。色比散金無異種。香連繡壤不分疆。已娛老眼消春晝。旋引歸心立夕陽。自注予家以
夕陽園為業。燕麥兔葵無感觸。不須佳句憶劉郎。通體俱著題。未免近板。得頭聯空寫上下六語皆
散金指春日黃花也。唐代以黃花句試士。通場皆指菊花無一
合者。故太白云。張翰黃花句。風流五百年。詩中第三語本此。

沈源字蘊久浙
江歸安人

聞柝

擊柝嚴城淒復清。聽來一一觸離情。天街夜靜霜初落。繡閣燈寒夢未成。宵恨短長隨曉箭。韻移高下逐風聲。座中有客支孤枕。歸思驚催白髮生。三四工
於取神

趙關曉字開夏浙江
歸安人諸生

踏雪

踏雪訪山樵。山樵踏雪去。一路草屨痕。尋入松深處。神合唐人松下
問童子一絕

贈友

不向人間留姓名。草衣木食氣嶢嶢。山深虎出偃聲急。夜半長歌空手行。

周振采

字白民。江南山陽人。選拔真生。○白民制義。比於天半。朱震雲中白鶴。典江南試者。每以不得白民爲媿。然終於不遇。天也。詩不多作。亦矯矯拔俗。

晚甘園芍藥盛開。葦江招飲。

君留燕。吾適魯。去年花時各羈旅。鞭梢兩地恰歸來。一時花下同賓主。殿春朵朵翻瓊英。白頭相對千花明。有酒但作長鯨飲。有句肯學寒螿鳴。物情共艷三公爵。魏國聲名兆花萼。我與君家共息機。無須離別悵分飛。朱朱白白皆堪賞。不羨揚州金帶圍。

老將

百戰沙場功未耐。偏裨年少早封侯。敵人俯首驚無恙。法吏吹毛對若讎。老馬蹠雲偏伏櫪。蒼鷹羈鐵欲騰鞬。請看猿臂終強健。射虎南山氣尙遒。此白民自寫照也。三語暗用郭令公見回鶻事。四語暗用大將軍急責李廣對簿事。

王應奎

字東澂。江南常熟人。諸生。著有柳南詩鈔。

簪包船紀事

有船銳其首。以簪包裹之。名爲簪包船。聚泊疑茅茨。浮家無定所。忽湖忽江涓。居貨挾土產。擅技兼卜醫。中有無良者。行乞同殘黎。詎料豺狼心。所志竊童兒。神咒與餅餌。給兒兒輒迷。牽引至船中。毒手恣所爲。或爲瞞其目。或爲攬其肢。或屈曲其體。如籬籬成施。形骸幾變盡。父母居然疑。清晨負之出。索錢號九逵。

夕仍負以入。傾倒囊中資。數尙有不充。攢刺加鞭笞。苟延此殘喘。性命危如絲。有時更肆惡。視彼軀幹肥。入之人鮮甕。飽噉若鋪糜。吸兒腦與髓。嚼兒肝與脾。從此筋骨強。便堪耐刀錐。更聞藏祕器。賣以療疔羸。一七爲神膏。索值恆不訐。淫人祈長生。食之甘如飴。又聞湖海濱。茫洋有神祠。神曰抽筋母。此輩所皈依。重午暨中秋。廟門塞靈旗。羣船競祭賽。以兒爲牲犧。祭罷飲福酒。狼籍幣與飀。年來迭敗露。官長胥周知。勿問所從來。立斃陳其屍。謂足抵兒命。此外無窮治。不究其本根。徒然翦旁枝。官長法深刻。胡獨偏仁慈。其毒仍滋蔓。其故難尋窺。誰爲采風者。聽我歌此詩。此皆一一紀實。曹惡敗露後。被殘肢體女子。詳述於公堂。詳述於父母者也。獨是官長祗斃所獲者。命不解。吾亦不解。

湯懋統字建三。江南巢縣人。官遷江知縣。○兄名懋綱。官刑部郎。詩品清高。今家居著述。弟兄均擅清名。此居巢所僅見者。

歲暮得家書

冉冉逢殘歲。迢迢隔故廬。一燈遊子夢。雙淚老親書。敢怨功名薄。深慙菽水疎。卻思諸弟妹。繞膝意何如。
情真語不雕。琢而自工。

除夕

殘臘辭人逐漏頻。寒氈堪笑獨吟身。僅支鶴俸能供歲。輕擲魚竿自取貧。柏酒竟疎婪尾醺。梅花虛擬故園春。遙思伯氏京華久。一樣燈前憶老親。

故衣

檢點衣衫敝篋存。十年相與歷寒溫。香塵慣惹春風陌。寒杵多敲落月村。贈友未堪酬縞帶。思親每爲染啼痕。貧居賴酒消岑寂。曾典青錢向市門。四語不離不即前人所謂取詩之魂也。六語著題中傳出孝思尤爲難事。

趙虹字欽谷江南嘉定人布衣。

戊午七月自大梁東歸感喟成詩用以自贈

飄零淮楚踰河朔。轉徙幽州更大梁。迢遞關河雙去鴈。古今岐路幾亡羊。時無燕趙悲歌士。坐有邯鄲挾瑟倡。但得翠娥深勸酒。不辭酩酊罄清觴。

問訊滄浪舊釣磯。樵兄漁弟共相依。眼看西北高樓遠。心逐東南孔雀飛。園吏好尋濠上樂。丈人已息漢陰機。浚郊不用弓旌辟。自署中吳老布衣。此飲谷倦遊後作。年七十餘。未除芒角。宜壯盛時能以高談雄辯服衆人。

王泌字儕鄂江南元和人諸生。

越女祠

一曲菱歌韻碧瀾。耶溪歸櫂日將殘。情多自易含惆悵。不爲秋深怨路寒。哀怨起騷人。極低徊掩抑之致。

陳倫字遜其江南無錫人諸生。

張循王墓

六丁不下驅天驕。宮車碾雪夜渡遼。白頭烏啄大家屋。衣錦王孫路旁哭。一馬化龍浮渡江。臨安王氣於斯卜。烽火江淮草木殘。中原血戰腥風寒。揮戈誰洗靖康恥。屈指英雄岳與韓。區區子英奚爲者。片紙屢書背人寫。風波萬里壞長城。二字翻稱廷尉平。北人歌舞南人泣。賀蘭鐵騎仍縱橫。兩宮魄冷冰天月。配饗反旌讒詔骨。麒麟墓道枕蒼煙。御墨淋漓灑碑碣。墓門高揭對晴湖。松栝深深叫訓狐。金陵城外蒼茫處。醜繆堂封千載汗。張俊承秦檜意。鍛鍊張憲。至自爲獄辭。以成岳忠武之獄。蓋姦惡之甚者也。高宗賜天然相對。惜無有人平其墓者。

沈炯字遜揚。江南吳江人。諳生。

過惶恐灘

疊疊青山勢鬱盤。片帆遙泝贛江瀾。危灘共指名惶恐。古縣空聞號萬安。自注。縣屬吉安府。灘在縣南三里許。風撼巔崖崩巨石。雷喧礪壑走驚湍。勞人略與孤臣似。不獨東坡泣路難。自注。東坡有地名惶恐。泣孤臣句。○惶恐萬安。天然反對。灘本名黃公。東坡有慨於中。故云。

書懷

七度長江向石頭。依然蹤跡半沉浮。草玄字字翻成白。刻棘年年未類猴。老我也曾磨鐵硯。古人先已敝貂裘。從茲萬里堪乘興。浩蕩難馴似野鷗。

程簡字一江南長洲人

冬夜讀書

讀書有味聊忘老自注放翁句此意誰云只放翁今古英雄當末路消磨歲月短繁中有老驥伏櫪之意

蔡書升字廷彥江南長洲人官成縣知縣改通政司經歷

橫塘道中時清明日

東鄰愁冷食。穉子叩柴門。舊俗分新火。三家共一村。草深眠鹿子。莊老出雞孫。細雨看荒塚。梨花開正繁。

橫塘西名三家村天然屬對

余

京字文圻江南丹徒人布衣著有江干詩鈔○予游焦山見山間有文圻石刻詩頗有警句胸之詩格意俱高尤長近體既老從遊日衆然得其一體無能爲替人者

畢孝子寧古塔負祖父骨歸里

混同江畔沙草黃。陰雲晝翳天無光。羈囚廿載老爲鬼。往往夜哭思家鄉。虬山孝子痛父戍。費志窮荒願身赴。蕙蘭憔悴春暉蚤。向秋風委霜露。鐵嶺遼河五十秋。旅魂漠漠傷淹留。雞竿明詔下。驚禁忽許枯。骼還山邱。孝子遺孤年已壯。帝闕奔號請歸葬。西曹求檄願故遲。躑躅京華家破喪。萬里窮多事遠征。饜風密雪躑長城。呵冰鬚髮曉每凍。聞角區脫背常驚。幽泉負骨旋鄉里。馬鬣齊封堂斧似。兩世精誠事竟

成不愧一門雙孝子。其人可傳詩亦足以傳之。

七夕妙高臺坐月

今夕天風爽。吹余到十洲。瑤臺孤島夜。銀漢半輪秋。潮響龍移窟。江明鵲起樓。憑欄星斗近。指點說牽牛。

秋杪薄暮登北固木末樓卽事

鴈背遙翻落照來。樓登木末客徘徊。江山曠劫爭棋局。燈火光陰促酒杯。萬井人煙秋慘淡。百年戎馬地蒿萊。西風歸路吹殘醉。雲掩高城畫角哀。起句得勢以下便如剗竹。

八月十三夜焦山坐月同學菴釋巨濤

月出雙峯斂暮嵐。臨流久坐借僧菴。澄清銀漢露涓滴。浩蕩碧波帆兩三。龍戲夜珠藏海底。雁隨秋氣落江南。惠休有句通禪味。金粟香中好共參。

十四夜焦山水晶菴看月

薄暝疎鐘隔樹聞。海風收盡嶺頭雲。住山夢好經三宿。看月光圓到九分。天淡銀河涵水氣。江平冰縠織波紋。僧窗不用呼燈火。老眼能書白練裳。

暮春同吳門沈歸愚登蒜山憇清寧道院

老去攀躋興尚存。蹒跚陪客躡雲根。天晴煙樹分瓜步。春漲波濤拓海門。野馬綢緼頻過眼。沙蟲變滅幾

招魂亂藤荒草山前路。鐵騎曾經十萬屯。盧循率十萬衆爭蒜山劉裕以長刀斫敵破之未旬用其事

藉草峯巔片刻留。曠觀身世歎蜉蝣。殘年歲月雙筇杖。吾黨乾坤一釣舟。夜雨苔痕山徑滑。夕陽松影石壇幽。勞生多病惟謀藥。丹鼎猶存五粒不。

雲房杯酒坐閒身。白首相知感慨新。廡下梁鴻誰共語。樓頭王粲尙依人。青山有夢常爲客。黃鳥無言自送春。歸舫吳門櫻筍熟。柳花風起石湖濱。廡下梁鴻文圻自謂樓頭王粲謂予也時予授經魏觀察署中故有是語

秋杪登清寧道院與漪亭學菴同賦

扶杖登高愴客魂。西風黃葉滿前村。林間佳菊能留客。江上名山總到門。飯罷楸枰消白晝。酒闌鐘鼓報黃昏。甕離城郭無多路。便覺漁樵地位尊。江上名山總到門金焦北周五洲皆在檻前也結爲布衣增價翁山詩往往有之○五日泛舟丁卯橋領聯云小橋疎柳唐人

宅落日寒湖楚客魂真名句也因通體未稱故附錄于此

秦應陽字含真江南長洲人官六安州教諭

飛蛾

飛蛾性趨炎。見火不見我。憤然自投擲。以我昇炎火。動靜自有常。躁急適賈禍。明發天宇空。飛躍無不可。惟趨炎故躁急茫茫六字見我者有幾人哉一結天空海闊無適不可

徐翔鷗字雲客雲南昆明人

普安道中

暮色蕭條歲欲闌。長途猶自赴征鞍。橫穿峻嶺幾千丈。直下危峯數十盤。古樹夕陽鴉影瘦。亂山殘雪馬蹄寒。風塵滿眼愁無奈。始歎當年蜀道難。

葉肇梓 字季良。江南和州人。

橫江詞

人道橫江惡。儂道橫江好。不是浪如山。郎船去已早。
翻太白意。詞轉似太白。

集歸去來辭字為詩追次坡公韻

涉世知無策。還鄉路可尋。孤行聊自善。萬感復何心。雲岫遙扶杖。風泉遠入琴。東臯清絕徑。容易得登臨。富貴求焉得。耘耔樂有期。歸與無不可。行矣欲何之。獨酌向庭菊。孤懷寄賦詩。息交聊自遠。疇復是心知。不悟今時是。安知昨日非。泉飛還入壑。雲化復成衣。引酒寄情遠。撫琴得趣微。晨窗觀去鳥。日盡自歸飛。
無集字述與坡公相近。

汪紹焯 字鐵南。浙江秀水人。歲貢生。

項王

騅馬虞兮可奈何。漢軍四面楚人歌。烏江恥學鴻門遜。亭長無勞勸渡河。
鴻門之遜為避禍也。推孝惠魯元墮地乞分太公一杯羹。無復

人理矣。此詩抑倒沛公，能爲項王吐氣。

劉伯倫

生死窮通付醖醢，婦言雖好不須聽。利名役役眞成醉，只有先生是獨醒。當塗典午間，誰非中酒者，以獨醒許伯倫，喚醒醉夢人不少。

邵錫榮字景恒，浙江錢塘人。

舞劍篇與陸方義

我嘗高詠古人古劍篇，我欲起舞追飛仙。古來劍解七十二，惜哉後世無人傳。陸生陸生爾且前，我今試舞雙龍泉。長兵短接須精練，雌雄爛燦落銀霰。萬人力敵莫可當，頃刻風雲看百變。忽徐忽疾疑旋蛟，忽連忽斷驚飛雁。聳躍星流身不見，雨打梨花團雪片。陸生此時觀之驚絕神，且願執鞭追後塵。慎勿輕攜此劍渡江海，只恐雙飛出匣歸延津。

錢錦城字鏡先，江南常熟人，牧齋宗伯孫。

席上詠物分得橘

丹實離離間碧林，千頭聲價重南金。踰淮若改平生質，孤負當年作頌心。言堅貞之質，不可變易也。乃祖能守此兩言，便爲東林完人矣。

安期字亦生，江南無錫人。

流螢詞

熠熠流光漾水烟。池亭雨歇晚涼天。西風吹墮紅蕖裏。照見鴛鴦自在眠。池塘中每有此景。卻無人寫到。

卷二十九

錢之青

字恭李。江南震澤人。乾隆丙辰舉人。官寧武知縣。陞保德州牧。旋歸里。著有數峯詩鈔。

歸里後親朋枉過有作

吾家聚族居。比鄰皆親友。念我遠道歸。胥來問安否。回首出門初。變遷幾八九。門庭半更新。舊存惟榆柳。尊長既凋零。輩行俱老醜。遠歸非不適。離別苦太久。追往更撫今。恐作窮獨叟。重感丈人情。爲我治斗酒。連下一章。脫胎杜老羌村之作。而情事各別。杜傷亂離。此感盛衰也。

斗酒不復卻。丈人前致辭。消長各有數。聚散亦有時。陳迹已往矣。良會喜在茲。爾我不相見。誰爲把酒卮。況今逢令節。日永薰風吹。丹華耀榴火。圓葉滋荷池。子其愛景光。爛醉毋推辭。聞言散幽懷。醉鄉同赴之。去年當此日。觸熱方驅馳。

宿村家

入夜投村路。家家列炬迎。長官無善政。父老自多情。敢謝盤中黍。相期壟上耕。夜闌聞笑語。今歲喜豐盈。

歸途作

客久餘蓬髮。歸途負薜蘿。兒童皆晉語。舟子自吳歌。茆屋秋風破。原田荒草多。所欣安夢寐。依舊碩人邁。

中秋夜述懷

去年醉月曲江頭。綠酒紅牙記勝遊。今夜中秋形對影。故人還復上南樓。

張若需

字樹彤。江南桐城人。乾隆丁巳進士。官左春坊左贊善。著有見吾軒詩。○宮贊爲葑齋公令嗣。孝友篤實。一承前人詩筆。各標面目。而性情溫厚。異而仍同。人比之蘇瓌有子。

生日太夫人自乍浦寄衣適至

侵晨遠人至。寒衣寄江城。珍重一開絨。光采生敝籬。老親念幼子。稱體新裁衣。書云禦爾寒。著以湖綿輕。寒燠隔異地。猶厯慈母情。憶茲初成時。長短勞經營。襟袖密密縫。十指鍼線縈。健婦把刀尺。指點熨貼平。感激母意厚。顧我非童嬰。二十要自立。儉素敦家聲。五陵自輕肥。溫飽無令名。今茲茹冰槩。用佐嚴君清。短褐取蔽體。寧羨羅綺榮。被服矢無斃。敢忘我初生。至性流出。不假雕琢。

陳思王墓

鄴水東流勢已分。空餘感激誦遺文。五官嬗代羞當壁。七子論才合冠軍。白馬詩篇悲逐客。驚鴻詞賦比湘君。魚山縹緲留清梵。何處春蕪沒故墳。洛神賦。猶屈子之詠湘君。後人以爲感甄。非也。作者故有特識。

五日潤州

第一江流盪畫橈。虛傳競渡踏風潮。五絲誰續庚寅命。雙槳人過丁卯稿。令節只今成寂寂。懷沙終古恨

迢迢何如滿泛菖蒲酒快對金焦破決寥

三語五日四語潤州天然典切○金山競渡極盛康熙某年沈沒幾舟後遂禁止詩中云虛傳云寂寂蓋為此也

包

彬字文在江南江陰人乾隆戊午舉人

遊弘濟寺

秋江靜無煙山影恍圖畫晨登燕子磯塵鞅一時卸徑轉直復曲奇峯若相逐岡巒中斷餘兩崖仍可跨
迸石樹無皮疑是白龍化花宮隱深雲香風逗林罅娑羅落高陰傍戶枝柯亞洞穴豁堂皇禪房半相借
上有銜花鳥下有投巖麝綠壁陟高閣山川拓眼界江明匹練橫天際波濤瀉此境足勾留儔侶催返駕
徘徊石磴旁歸雲擁足下只秋江靜無烟五字近六朝人

錢塘詠古

宋祚將移訝鬪星君臣跡似浪中萍黃龍出海朝廷小白雁橫江戰血腥南國無家歸燕子西臺有淚哭
冬青諸陵麥飯今誰薦風雨蘭亭夜火焚此詠宋亡國事

倪承茂

字稼咸江南吳縣人乾隆戊午舉人著有頓塘詩稿○頓塘得名最早成名甚遲藝苑方重望之而後焉辭世予哭之以詩末云比似方干差足慰生前鄉舉已題名慰之實悲之也素

長於詞而詩亦工穩妥貼不落宋人以後

九日道中

一年兩度涉淮黃擾擾緇塵染素裳衰柳共憐殘鬢短閒雲應笑客程忙南歸無分吟風月北去先愁飽

雪霜孤負故園叢菊好。不知今日是重陽。

錢塘懷古

五代興亡一夢中。射潮江滸想英雄。錦衣木石沾恩幸。鐵券山河誓始終。鳳舞龍飛形勝在。虎符玉節霸

圖空。花開陌上年年好。無復行人指故宮。此獨詠吳越王事。

鈕汝騏字稼仙浙江烏程人乾隆己未進士官翰林院編修著有南雅堂詩。

題黃夫人寄升菴詩後

猜忌君臣際。自注升菴諫議禮譎成後世宗猶有餘憾每問楊慎云何侍臣以老病對乃稍解升菴聞之遂伴狂以免乖離夫婦間百年悲死別兩地夢生還。

市上簪花髻。閨中損玉顏。至今傳錦字。流唱滿南蠻。此千秋恨事也四十字中委曲道盡。○原本萬里夢生還句法劇佳但蜀中距漢初非萬里故易二字。

辰龍關自注吳逆作亂時沈辰道梗王師由此入黔滇。

飛將急前鋒。危關實要衝。虛聲經亥豕。問道出辰龍。自注王師聲言由五溪入黔故賊將不備此關亥豕誤名。六詔驚天降。羣蠻掃地

從。皇威清萬里。徼外樂耕農。王師入黔滇意西崖少率渾言之此暢言之。

舒瞻字雲亭滿洲人乾隆己未進士歷任浙江知縣。○雲亭親交衛覆在京師屏居委巷如寒素。瞻然既出仕而浙東西頌其廉明傳其風雅古所云文學飾吏治者也。詩品在元白之間近情易及。

處迥不易及。

別竹田

莫向風前折柳枝。桑條原不綰相思。人生難得惟知己。天下傷心是別離。半載篝燈同聽雨。何年把酒更論詩。西冷夜夜添新夢。多在烟江月上時。古之傷心人耶。讀竟輒喚奈何。

留別當湖諸人士

萍絮何須問舊因。離筵開處對殘春。誰言琴鶴非家具。自喜溪山似故人。北道應牽歸客夢。東風偏上苦吟身。歸舟莫笑輕如葉。千卷殘書已不貧。不忘知己。不忘溪山。近日仕途中能有幾人。

偶占

芳草青青送馬蹄。垂楊深處畫樓西。流鶯自惜春將去。銜住飛花不忍啼。於無情中寫出情來。

為朱蘊千題杏花春雨圖

淺深春色幾枝含。翠影紅香半欲酣。簾外輕陰人未起。賣花聲裏夢江南。夢江南本屬韻事。夢於賣花聲中。又添韻事一重矣。入唐人絕

句中亦稱中劇。

為葦浦太史悼亡

工愁善病最憐君。夢裏啼鴉不忍聞。彷彿舊時蘇玉局。自將詩句哭朝雲。

張進字翼庭。江南吳縣人。乾隆壬戌進士。官翰林院庶吉士。著有綠野園詩。○予與徐子龍友。語

者皆結詩課時作。

由空谷至中峯

出谷山路轉，松深餘落暉。隔林聞語響，始知人采薇。歸鳥引前路，殢花點客衣。倚筇憩梵宇，鐘鳴自掩扉。
華鴻山學草左司可云循牆而走作者似欲過之

雪中憶家園池上草堂

客居常苦寒，況復積深雪。夜明山鳥驚，清響寒柯折。遙知池上園，虛白人蹤絕。

五人墓

意氣偶然激，成名竟殺身。空山餘落日，古木出青燐。地近要離墓，雲連胥水濱。匹夫能就義，嗟爾附炎人。
恰是五人分量，結意指顧乘謙魏廣微一輩見。纓冠中人，不如市井中人也。四十字字字老成。

夢

麟字文子，蒙古人。乾隆乙丑進士。官至工部侍郎。○樂府宗漢人。五古宗三謝，七古宗杜韓。雖不能至，心嚮往之。不必議其不醇也。近日臺閣中無逾作者。備天假以年，烏容量其所到。

雉朝飛

雉朝飛，其羽灼灼。雌前越，子後躍。于田于薄，是飲是啄。我弗如爾，行樂爾樂。我哀朝行出遊，日暮獨歸。獨歸兮心悲，羣嗷嗷兮夜飢。我無術兮哺兒，先我死者知之。
借樂府題悼亡詞古情繫於安仁子荆外又關一門戶

哀歌行

誼者勿誼，歌者勿歌。嗚呼我哀，我哀奈何。父知兒寒，母知兒飢。我無父母，飢寒誰知。親在憶親，親沒戀墳。

魂斷難復。草荒更新。夜坐秉燭。兄右弟左。同爲孤兒。哀哉生我。抱女置膝。忍涕中悲。兒亦無母。我懷痛之。燭短夜寒。予心之酸。男兒低頭。顧影自憐。蓼莪之詩。皆直白語。而千古哀痛。以此爲至。此作復相似。然前繁懷宜年命之不永也。哀父母。後哀無母之女。與幼女之母。人倫缺陷。一身當之日夕。

西澗赴山將往雲罩憇天香禪刹

天雞叫海日。晴翠濃諸峯。丹崖媚朝霧。了了青芙蓉。尋溪背初旭。入谷聞驚風。半嶺生飛烟。忽沒巖邊松。仰睇辨蓮宇。稍見僧樓紅。流雲布羣壑。清梵生虛空。石徑去不極。前路誰能窮。鉤索得懸解。妙寄饒歸宗。跣趺憇蓮社。歎息懷支公。西澗一路。予曾早發。讀此。如置身其間。

由天香行藥西盤初入山口

巖秀澄孤懷。趣塗意先往。理策遵迴溪。空林得樵響。幽悰眷岑寂。矧茲秋日爽。霜徑稍曲盤。虛翠忽晃朗。漸歷紆巒深。未識迴塗廣。孤暉隨趣濃。懸磴披烟上。杳藹接諸天。振衣發遐想。王裴不可作。邱壑誰心賞。何時飯名僧。松檐稅塵鞅。

朝往香山

夢覺鐘魚清。褰裳月在棟。盪濯辭精廬。山僧出林送。苔衣潤芒屨。昨宵知露重。亂泉聽乍失。溪澗澀餘凍。石骨生清涼。逼人寒欲中。日出照幽谷。山鳥發新哢。微風蕩空翠。流雲散巖洞。永懷煨芋者。隔岫聞清誦。

曰清曰新曰生曰真四者兼之此種詩可以滌人塵俗發端尤警

夜過青浦

理棹投暮烟。餘暉黯遙巘。輕舸尋歸流。空波肆怡衍。野風送香氣。浩露滴微泫。重疊林景昏。微茫峯色淺。遠火辨孤城。隔岸聞亂犬。稍別林墟移。漸覲雉堞轉。華月澹始照。流雲蔚初展。一與清景俱。乍喜塵襟遣。惓惓懷前蹤。餘風動深緬。

臨江樓

亦知非故土。扶杖且登樓。落日萬古色。長江千里秋。浮雲蔽楚望。朔氣老邊州。無限關心事。憑欄起暮愁。

孫貽武

字紹衣浙江歸安人乾隆乙丑進士

吳越王

鳳舞龍飛地脈優。挺生人傑說婆留。潮迴龜赭三千弩。地擁金湯十四州。承寵樹皆披錦繡。稱藩臣自息戈矛。櫛風沐雨辛勤甚。圓木驚眠老未休。第六語譏其不討朱溫也。婉諷賢於直斥。

吳

槃字青然江南全椒人乾隆乙丑進士官刑部主事

詠懷

曲徑非不捷。由之轉窮途。欲速嗟無成。蹇步愧亨衢。徘徊望觚稜。我思鬱以紆。致身有本末。朱芾難苟圖。

突梯性不適，那敢輕賤軀。夢鹿忘覆蕉，伺兔笑守株。得失良偶然，豈必巧有餘。立身居官，可云不苟。

晚次彭城

薄暮荒城首重迴，雲煙芒碭客愁開。三齊驛路連天闊，萬里河流動地來。戲馬臺前寒日落，斬蛇溝外野

風哀，狗屠獄掾皆黃土，感歎當年楚漢才。

林明倫

字穆安，廣東始興人。乾隆戊辰進士，官翰林院編修。記名御史，出為衢州太守。○穆安留心正學，嚴義利之介，方保舉御史時，有勸其謁掌院者，答曰：御史以求而得，何以自立耶？後守衛潔己，卹民困，調上臺，稍遲，疑其傲，以才力不及，劾之，落職，衛人哭而送之。

弔五人墓

西市繁霜日，南躔貫索中。歌詩憂板蕩，占象歎屯蒙。國柄歸旁落，刑餘蔽主聰。衣冠嬰赤族，屠狗叫蒼穹。竟觸貂璫怒，誰憐骨鯁忠。捐生片語易，仗義五人同。道直心寧悔，名存死不空。招魂隄水上，葬骨武邱東。墓草侵堦綠，山鵲帶血紅。要離三尺土，千古共英風。

張

晚字蓀九，江南長洲人。布衣。○蓀九窮居郊外，世緣中絕，素交二三人外，車騎造訪之，弗接也。論詩必泝源唐人以前，有與爭辨者，至面赤不顧，或目為詩癖，為詩愚，乃大喜，身後詩篇零落，祇存社中，共賦一篇。

移木芙蓉植後園

吟罷楚客辭，逍遙向園圃。緬彼拒霜花，一枝移帶雨。我生同弱植，終當委草莽。況茲搖落辰，孤芳誰擧取。

淺土託根荻，松菊聊爲侶。借隨自寓，品地如見。

張 鈇字少弋，江南華亭人，布衣。

月夜黃姑灘露坐簡山中一二知己

明河淨無波，憇息愛幽境。良遊值杪秋，佳趣心各領。頽陽匿餘暉，微月揚清景。草中僧獨歸，烟際鐘初靜。霜林颯有聲，風壑悄多警。悵與賞心違，長謠一延頸。僧歸二語寫山寺晚景如畫。

閩中九日寄吳中諸兄弟

海天萬里獨登臺，佳節空嗟白髮催。愁絕雁聲從北至，蒼然秋色自西來。霜清烏石巒烟豁，潮落金崎越艇回。遙憶故園兄弟在，幾人同把菊花杯。

金義植字立斯，江南吳縣人，諸生。○太白於右軍書目以清真，清則不雜，真則不僞也。惟詩亦然，立斯之詩清而真矣，與其配倡酬於楓江之濱，晚歲耳聾不聞世事，尤得安分自適之趣焉。

懷高武康侍御軍臺

身訝新擢甲冠爲舊觸邪，一言陳白簡，萬里度黃沙。食祿應持論，投荒肯顧家。從戎堪報國，垂老莫長嗟。起二語侍御及從軍皆見下表其正直勉以報國得古人立言之體。

懷三弟

東粵攜家遠，南荒作尉難。五旬雙白鬢，萬里一微官。城郭新教築，衙齋未得安。遙憐蠻海畔，辛苦百憂攢。

自注陸豐係新分邑。○詩品之高。總不外一真字。本乎性情則真。

江上

江上不來雙鯉魚。隄邊空過七香車。結交無力綠金盞。泛宅何之且陸居。紫塞月明千帳外。綠窗人靜卅年餘。此時聊得閒中趣。仲蔚蓬蒿亦自如。五句對第一句。猶詩之彼采蕭兮也。六句對第二句。猶詩之出其東門也。無力結交無地泛宅。惟領閒居之趣而已。

尤

怡字在京江南長洲人。布衣。○昔皮襲美寓臨頓里。陸魯望自甫里至。與之定交。倡和其地為皮市。在京居其地。周子迂村。亦至自甫里。相與賦詩。怡符皮陸也。在京就韓伯休術。欲晦姓名。詩亦不求人知。而重其詩者。謂得唐賢三昧。遠近無異詞云。

雜感

春至陽氣動。輕雷殷方鼓。晴川泛朝光。草樹沐新雨。農人負耒出。操作及童豎。有生寧不勞。俯仰各有取。曰余本拙懶。逝將事農圃。所急在治生。豈伊慕高古。貧賤惜筋力。憂傷亦何補。陶公心事。正於不諱。治生傳出。

明月流素影。照我室中帷。清光缺復滿。佳人難再期。寶鏡不復開。玉琴生網絲。翩翩雙黃鳥。巢我庭樹枝。雄銜原上草。雌啄澤間泥。辛苦被流沴。一旦傷其雌。身死亦何言。悲此巢中兒。此首悼亡。

驚馬策蹇足。馳望崑崙丘。自非千里姿。焉得追驪駒。斥鷃翔數仞。黃鵠四海遊。豈不願高舉。羽翼非所儔。慎爾失故步。躓蹶乃貽羞。天分固有定。躁進非良謀。此警躁進。

山居雜興

晨起草木溼。林霏散清曙。始知東峯雲。夜作澗上雨。光風葉上泛。新泉草下注。羣鳥林際鳴。遊魚水面聚。萬物各有分。勞生轉多慕。倖中成虛名。多爲來者誤。君看區中緣。擾擾曷有數。

劉東郊歸自關中述華山之遊爲作詩紀之

劉君新從華陰歸。爲我口述華山遊。華山巖嶮五千仞。金精白氣西作秋。初向雲臺辨雲樹。已是希夷棲隱處。足捷如騎酒家龍。眼明未厭公超霧。徑迴路絕飛鳥還。清壁杳藹凌雲端。停策仰望坐歎息。安得羽翼臨風翻。垂垂鐵綆一千丈。烈日長風久摩盪。半足入壁出壁間。雙手緣雲上雲上。蒼龍當我來。兀稟露半背。我欲踏之勢恐墜。不知天際去之幾。俯視人間已無地。比時賈勇氣轉健。矯首三峯忽當面。峯頂玄鶴鳴向人。雲中玉女遙相見。仰天長嘯天宇空。浩浩萬里來罡風。幸不吹墮塵埃中。五陵北原青未已。黃河無聲流向東。平生浪跡長遊衍。太華峯頭足蕭散。以茲頓遣胸中憂。卻使雲泉今尙嬾。吾聞此語心茫然。天池仙掌紛眼前。忽憶十年意不樂。魂夢卻墮東峯巔。何時拄杖凌紫烟。仙人金液非我意。試看峯頭玉井蓮。

詳華山之奇險。然語語是友生所述。別於記遊結意撇開求仙正見高曠。

寶劍

寶劍芙蓉鏗。韜光匣裏橫。星辰秋忽動。風雨夜還驚。邊郡今多事。故人方遠征。徘徊欲相贈。不獨爲平生。

一氣鼓鑄。精力尤在後半。神到候自然遇之。人工不與。

秋晚登樓

澹雲含雨過城頭。獨自凭闌豁遠眸。萬木秋聲來大壑。亂山寒色上危樓。登臨不爲依人感。搖落應添攬鏡愁。聞道菊花堪泛酒。共誰來此一消憂。

館娃宮

峯頂曾開置別宮。艷歌嬌舞欲無窮。美人一去碧雲冷。行客獨來山殿空。香徑落花春度曲。古廊依樹夜鳴風。登臨漫爲勾吳感。舊館荒臺處處同。

白秋海棠

誰將清淚灑幽墀。散作瑤華別有姿。最是玉人腸斷後。淡粧無語背人時。只瑤華二字點白。餘皆以神韻傳寫。悠然自遠。

江聲字飛濤。江南常熟人。

病起卽事

日暖風恬春正酣。閒聽歸燕語喃喃。形同陌上三眠柳。心似篋中八繭蠶。洛下有書憑犬附。牀頭無易任難談。拋荒殘卷塵凝榻。裘褐蕭然擁一龕。

柳絮次陶菴韻

茫茫如夢復如塵。時逐遊絲送暮春。連臂踏歌招不得。就中愁殺倚樓人。連臂踏歌。用楊白花事。落句傳出遠神。

周天藻字拔之江人

題劍南詩後

歸老雲門著句多。往年豪氣未消磨。杜陵集裏收京詠。垂老懸懸望兩河。萬六千餘首中。標出北定。中原之志。才是放翁知己。

病中遣興

量減三蕉衆所知。興來時復一中之。此生頗似靈均醒。也和淵明止酒詩。淵明之醉與靈均之醒。同一心事。詩中頗能見及。

陳燦霖字雨巖江人

詠橘

洞庭朱實飽經霜。信手拈來滿座香。有柚願教兄弟合。自注。淮南子。楓榆與橘。柚合而為兄弟。成林休慮子孫忙。厥包錫貢

來天府。作誦留名重楚湘。但得真心能不改。縱令移植亦何妨。兄弟合。子孫忙。如玉合子底。遇著蓋也。結意翻得獨高。

古怨

獨臥繡牕靜。月明宿鳥啼。不嫌驚妾夢。羨汝是雙棲。妙在不怨之怨。

陸文銘字書巖江人。諸生。○書巖甘於食貧。舅氏為荆山吳文恪公。居六卿之貴。無一語干瀆。品可知矣。詩亦憂憂獨異。適如其品。

擬古

明月在濁流。不改月色清。孤松盤曲徑。不改松性貞。君子遇險巖。此心恆蕩平。此見德性既真。不隨物變也。詩中興體。

雜詩

天地不生成。古今有何事。茫茫萬劫中。生民多所嗜。黃金變爲土。盜跖亦柳季。造物起爭端。無怪人趨利。有酒且斟酌。萬事付一醉。莊生之旨。見造物亦爲多事。何獨聖人。

利器行

干將之刃。篠簳箭。斬騎貫草如飛電。不逢揮劍發機人。鋒銛未許傷縞練。鉛刀蓬矢各逞奇。光芒駭目莫敢攜。風胡去兮。養由逝。吾安歸兮。長相思。不逢真識。利鈍混淆。感慨無盡。

日入行

崑崙山摧若木枯。虞淵泛濫沉金烏。羲和沉湎不肯醒。后羿奮臂開雕弧。八龍骨朽呼不起。石馬嘶烟塞月裏。玉桃潰裂飽青鸞。方朔偷兒今日死。茫茫元氣千古浮。劫灰飛盡天地愁。回顧長叫廣成子。黃帝何爲土一抔。全學昌谷。

李 璧 字雲和。江南句容人。

烏棲曲

花影參差覆轆轤。空房淚滴一燈孤。無端金井梧桐月。偏照雙棲白項烏。

馬長海 字匯川。遼陽人。著有雷溪草堂詩。○匯川遺棄櫻帶。意氣自豪。嘗遇之環亭。都統席間時環亭防秋。匯川脫魚腸劍贈之。悲歌感慨。卽生平之詩。可知矣。

移居滄洲蔡玉躬閣學以詩送行次韻奉酬

仕官亦人情。沉淪墮其志。徒深山水懷。喜無兒女累。期爲塵外遊。今鼓滄浪柁。峨峨黃閣老。瀟灑饒逸志。送我河之干。贈言有餘味。非不惜離別。孤懷喜能遂。滄洲海一隅。可訪安期輩。爲問天地根。果否生天地。長跪謝微言。我將從此逝。

再贈西山隱者

山路逶迤入本冥。十年重訪枕烟庭。問名揩眼看蓬鬢。留客呼兒挈酒瓶。雲似客閒朝出袖。鶴如人立夜聽經。先生不與寰中事。長嘯一聲天地青。

讀陶詩

處士胸中別有春。田園寄託寫人真。義熙尙有關心事。豈便羲皇以上人。窺見陶公心事。予亦有句云。至今南村詩。可續西山歌。予詩明

言。匯川蘊蓄。覺蘊蓄者耐人尋思。

金

紙字絲五。江南吳縣人。官宣城訓導。著有蘊亭詩稿。○蘊亭詩頁奇氣。磊磊明明。不肯一語庸平。比之利劍。寧寸寸折。不爲繞指柔也。晚年研究易理。不復成詩。

自三山至牛渚連山盤屈舟出其下

晴日山照耀。林巒現金碧。何年浮屠宮。恃此奇險石。鐘磬不可聞。天風蕩虛壁。輕舟出其下。牽攬不得力。巉巖更陰森。使我毛髮磔。驚濤噴晴雪。盤屈增險阨。上視飛鳥絕。下瞰鼃鼃逼。寒江靜魚梁。細路隱樵迹。

我欲逐孤猿。濟勝理輕策。高妙躡雲關。力扶義御側。風水趁前途。回首空歎息。

熟老杜發秦州雜詩。有此筆力。有此神氣。

舟曉

寒潮月稍落。漁浦煙初起。蒼茫鐘出林。蕭瑟雁飛止。須臾沉霧迷。不辨天與水。使我神恍惚。置身雲海裏。日出影漸開。遙山樹如薺。翠微半出沒。滄波亦流綺。指顧遠帆生。一勢千里。清景曠無垠。吾心淡如此。

起繪舟曉令讀者如置身其間。霧不生於平旦而生於平旦以後。日高則散矣。老於道塗者始知。

采石磯

揚帆泝江濤。江關沿疊嶂。詰屈百里間。一一奇鬼狀。篙師太鹵莽。撥石輕奔放。崢嶸屢縈迴。采石屹相向。天風颯慘來。險絕不可仰。昔聞忠武王。揮戈實開創。於此奮神威。力騰千仞上。眞宰有驅除。中原氣自壯。至今三百年。談者神猶旺。龍虎一失險。洪波空蕩漾。鬱鬱松柏枝。鍾山日相望。

村居答社中諸子

柴桑有處士。襄陽有遺老。盡室入蓬蒿。終年顏色好。人生苦不足。吾道無求飽。願得同心人。浩歌藉芳草。

入蓬蒿而顏色轉好。人情已難。況加以盡室終年乎。惟梁鴻王霸夫婦足以語此。

送劉東郊

木落嶺猿愁。江帆開素秋。寸心千里遠。孤劍一身留。閩海天垂盡。仙山雲半浮。安期方待子。且抱古琴遊。

律詩最爭起手。起手得力。下
迎刃而解。鑿飲盛唐者能之。

寄芝仙西征幕府

枚生長托乘。王粲始從軍。會有平戎策。能開西極雲。令嚴千雪帳。犒士萬羊羣。指日應降虜。鏡歌奏凱聞。

周

京字少穆。浙江錢塘人。○少穆足跡遠到。欲結契字內英傑。召試鴻博。不遇歸時。借一二友生遊讎西湖賦詩寫懷。蓋自此無四方之志矣。詩體和平中正。不爲纖刻艱深之語。

武功縣望太白山

百里武功縣。明當太白山。雪從何代積。春到幾時還。清霽迴晴昊。高寒指翠巒。軍行休鼓角。風色正愁顏。

褒斜谷

關道橫空去。連峯疊嶂開。地隨秦塞盡。山自漢中來。行蟻綠旋磨。黏蝸上古臺。當年轉戰處。彌望滿蒿萊。

自注。黃牛鋪爲吳康卿戰金兵處。○十字包括秦漢力大於身。

代州

青巒萬壑鎖巖疆。舊繞樓煩古戰場。冷磧雨收秋草綠。大荒日落塞雲黃。滹沱河去包并冀。句注山橫下狄羌。惟有年年關外雁。不妨迢遞到衡陽。

燕來

烟兩疎疎覆綠苔。海棠時節燕重來。不辭故國三千里。還認雕梁十二回。荒草誰家深院落。繁花何處好

池臺卻憐舊館曾相識。爲把湘簾手自開。

楊花

南陌風光劇可憐。楊花撩亂撲鞦韆。一年春事拋流水。半醉心情付別筵。冉冉慣尋芳草岸。濛濛欲下夕陽天。殘紅同盡無消息。又化浮萍上釣舡。三四空寫一聯。離形取神。晚唐時有此格。○同友人湖上。有句云。野鷗導我有閒意。新柳笑人成老夫。風趣可挹。

二十六日曉過德州河

卽次停驂客夢殘。又攜殘夢上征鞍。小人有母憶嘗食。遊子離家空復還。沙月渡頭斜欲落。野風林外曉生寒。廿年明發天涯淚。到此真成行路難。

方肇夔字引譜江南江都人諸生

客中送春

記得離家是首春。與春相伴走風塵。而今杜宇頻頻喚。半餞春歸半勸人。感春歸而已不能歸也。語近情遙。得司空表聖俯拾卽是。觸手

桃花塢弔唐六如墓

先生胸次海天寬。只愛桃花不愛官。荒土一抔魂魄在。滿溪紅雨落春寒。唐墓在橫塘。桃花塢讀書處也。誤認者多。此從桃花著筆。而六

如襟抱。如或見之。

繆宗儼字敬思江
南吳縣人

虎山橋玩月

山白月當空。平波乍磨瑩。入雲淡欲無。蕩水光難定。長松倚層崖。風吹韻笙磬。橋下漁舟歸。權歌入清聽。
夜深琴動息。一嘯衆山應。清絕。

洪嘉植字去蕪江
南歙縣人

蕪州禹廟

羅州之臺。蕪水東。江聲千古環卑宮。盤龍山高風落石。乾明巖斷雲迴空。地平天成豈蒼水。九州四載疑
玄熊。朝宗於海自江漢。巍巍黻冕思神功。以古詩行律體。胎原少陵東坡亦嘗爲之。

朱瑄字樞臣江
南吳縣人

祖龍引

徐市樓船竟不還。祖龍旋已葬驪山。瓊田倘致長生草。眼見諸侯盡入關。嘲笑求仙。祖龍有知亦應齒冷。

漢宮詞

閶苑瑤池路邈然。廷靈高築迓羣仙。豈知待詔金門客。偷墮塵寰十八年。連上一章。神似義山斷句。

周杭字祖望江南
吳江人諸生

題倚劍牧馬圖

百金買一劍，千金買一馬。十年磨劍不得試，驅馬歸來牧巖下。憶昔錦衣狐白裘，身挾兩龍萬里遊。爾時意氣輕王侯，吁嗟丈夫有命那可說。紫髯如虬，悲白髮。雄心難待馬生角，袖手應憐劍虛拔。君不見古來窮達變化猶飄雲，南山尚有射虎手，無人知是李將軍。劍與馬或合或分，結出飛將軍射虎大有英氣。

俞玉局

字交心，江南無錫人，諸生。

題劍南詩稿

年垂九十恨誰知，腸斷偏安恢復遲。高孝光寧身備歷，滎河溫洛見無期。夢中拜手遷都疏，死後關心家祭詩。個是詩壇老方叔，壯猶彈壓幾偏裨。寫放翁忠心豪氣俱見，若第揚其詩便爲凡手。○滎河溫洛中原所失地也，對高孝光寧四朝流走不滯。

翁

格字去非，江南吳縣人，諸生。

暮春

莫怨春歸早，花餘幾點紅。留將根蒂在，歲歲有東風。安分俟時，意言俱妙。

陸蒼培

字學起，江南長洲人，廩生。

詠懷

燕市相逢處，吟壇與酒壚。雲山萬里別，天地一身孤。元叟聊稱漫，儀曹自號愚。從茲懶求友，耕釣是吾徒。

五六承一身孤言之言自此無意求友矣學起見賞於輦下諸公故有是云

開雁

夢斷空堂萬里酒醒秋夜漏三更他鄉風雨此時急獨聽南飛雁數聲

殷再巡

字二南江南常熟人○二南受知於趙秋谷曾為點定其詩

漢武帝

雲旗不動射蛟回宴坐承華月滿臺花發碧桃方朔過窗開青鳥阿環來靈壇夜靜光三燭仙掌風微露

一杯萬里貳師歸絕幕只盤天馬賦龍媒

華龍翔

字丕光江南無錫人諸生○予未識丕光杜雲川太史為予言同人賦詩丕光詩成衆俱斂手邑中才人也後華生漢畿授予遺稿尋味之果如雲川之言

感遇

憂憂高岡梧孤榦修以直疎陰不自庇蟲蟻爭蠹蝕鏗然遭斧斤謂是中琴瑟朱絃徽黃金綺囊護丹漆知音世所希俗耳聰若窻何以摧為薪猶足供鼎食言知而不知不知不知也此作者有激云然

翠聲閣

雲壑架書巢庭戶滿空翠空翠本非色尋聲復何在淵明無絃琴音在絃指外獨坐泥見聞悠然自來會古云空翠雖強名翠中有聲只可意會不可注解

恭壽先生于黃山深谷得杖一枝雙莖盤曲節目輪囷首尾仍合併爲一極離奇瑰異之觀爲作

短歌

恭壽之杖一而兩。夏后雙龍落吾掌。恭壽之杖兩而一。駉蛩相合幾忘匹。驪珠百六節可數。追琢丁丁缺鬼斧。八年刊木徧神州。遺卻黃山笑神禹。或言軒轅丹竈多遺薪。自注黃山有黃帝浮邱公鍊丹處燼餘裂石蟠靈根。雙極競茁不相讓。欲劈未劈成輪囷。或言扶桑相糾老東溟。孫枝迸出仍駢穎。九鳥長喙日夜啄。節目虬虬墮殘梗。我來欲把不敢觸。恐是生蛟遭縛束。先生興至時捉之。不藉雲駉駕雙鵠。世途夔峽從崎嶇。扶攜直過三山曲。都從一枝雙莖著意。離奇詰屈。排蕩繼橫。極才人之能事。

示仲孫應和時將北上

牖下嗟吾老。天涯憶汝單。因人知不易。行路敢辭難。有舌囊宜括。無魚鉞莫彈。饑驅爲客早。惜別恨千端。

劉瞻榕字于根。江南無錫人。諸生。

春日田家

草廬負高阜。柴扉面清池。村居本安閒。況值春風時。春風果何心。如與邱園私。一夕逢好雨。千頃新綠滋。朝來荷鋤出。對此情自怡。時運無或愆。力田復何疑。倉庚先已覺。飛鳴桑樹枝。春風之私。正言其公。語妙從杜詩中出。

送須覲予還晉陵

啄粟野田黃口雀。盡日揮之苦難卻。翛然老鶴迥出羣。連軒矯翼誰能馴。春風樓前梅花白。看花君作西
洲客。細雨冥冥梅子肥。鷓鴣聲裏送將歸。何須咎君言別早。客舍雖佳歸更好。一帆明日向東去。正是鄙
夫心憶處。起四語與觀予之
歸得六義之一。

馮嗣京

字留士。浙江桐鄉人。貢
生。官長興縣學訓導。

上韓慕廬學士

門分洛蜀路多岐。中立如公總不移。進退每關天下事。襟期獨有聖明知。後堂長蓄公田釀。外國爭求賀
雨詩。莫漫抒辭頌功德。卽論風雅亦吾師。一起四語與匠門先生暗合。時文懿
公中立不倚。故詩家以此爲贈言。

宋匡業

字鼎來。江南長洲人。貢生。以子宗元貴。謚贈中憲大夫。○生平謙退。謹
約無疾言。遠色。遠近稱善。人性愛梅。詠梅詩成帙。茲取其尤高潔者。

庭梅

屋角冷雲破。橫空挺一枝。瘦應同鶴立。清似畏人知。寫影惟憑月。傳神不在詩。空山流水外。脈脈寄相思。
以清畏人知品梅。極見
成語。從前無人道及。

梅花

不染紛華別有神。亂山深處吐清新。曠如魏晉之間士。高比羲皇以上人。獨立風前惟索笑。能超世外自
歸真。孤芳合與幽蘭配。補入離騷一種春。傳梅之品。宋人誤
徑一掃而空之。

陳葉筠字廷望江南崑山人諸生○廷望論詩斷斷唐宋之分有近石湖劍南者必排斥時共目爲怪人陳子樹滋獨推重之情中道徂謝遺稿散佚采錄三章比之一鱗半爪也

張睢陽廟

喪亂逢天寶江淮障一身死甘爲厲鬼生豈負人倫卞壺拳還握蓂弘血尙新靈旗風捲處猶似掃黃塵

厲鬼人倫卽用張中丞語神完氣足居然唐音

滇陽峽

一徑入峽口盤盤往復回煙橫兩岸合水劃萬峯開命託長年手魂驚亂石堆前途望不極何處越王臺

寄許子遜

不見南來雙鯉魚風塵落拓感何如偶過燕市悲歌地會上長沙痛哭書芳草天涯分曉夢暮雲江樹惜離居春深何處堪憑弔爲我攜尊酌望諸

張琯字紫維江南太倉人

弔鸚鵡

雕籠悲越鳥飲啄豈無情本爲多言誤翻憐一死輕聰明應再世文采畢今生猶記南窗下春風自喚名

語是弔

張嵩齡字東嶼江南太倉人諸生

流鶯詞

日暮聽流鶯。流鶯啼不住。上苑春來又幾時。深閨夢醒驚何處。初聞彷彿在東牆。又見隨風出綠楊。眼睨枝頭明似翦。錦蠻樹底巧如簧。豪門爭擁顏如玉。斗酒黃柑共相逐。宛轉疑吹秦女簫。悠揚勝度吳娘曲。獨有高樓粉黛人。年年夫婿怨飄零。鴛鴦獨宿銀屏冷。倚徧闌干不忍聽。綽態柔情。初唐風調。

南昌秋夜

秋氣頻侵袂。空宵獨掩扉。愁來心易醉。客久夢難歸。燈燄牀頭短。蟲聲戶外微。起看烏鵲影。三匝向南飛。比夢裏還家不。當歸更深一層。

程之鵝

字羽宸。江南歙縣人。著有練江詩鈔。○練江遊踪。幾徧大江南北。及楚越東魯。而登眺不倦。尤在黃山。故發而為詩多登臨憑弔之作。同郡曹進士震亭與之倡和。震亭多才。不輕許可。獨折服練江。則練江之詩可知矣。子篁友管庭寄遺集乞序。因采而錄之。

蘆花被

不並青綾一樣看。祇從江上借秋寒。覆時應共鷗羣夢。卷處渾疑雲影殘。中夜月侵如有失。半醒霜凜覺無完。可知雪滿江南路。借與袁安臥更安。三四正寫五六虛寫結。意舊穀中春出新粒也。

曉過平望

半夜帆開遇好風。平明平望一湖通。人家水氣涵虛白。野樹霜華染淺紅。舵尾魚蝦吳市早。船頭歌唱越

吟工前途煙雨樓邊過身入空濛羅畫中五六恰是過鷺臆湖詩移易他處不得

黃山

黃山三十六芙蓉浴罷湯泉曳短筇仙樂鳥名疑聞緱嶺鶴鉢孟名峯欲象鼎湖龍迷漫雲氣皆成海穿穴峯頭半是松始信到來仍不信天工理外若爲容自注黃山有始信峯又有說也不信扁鵲○予嘗遊黃山始知此詩布置之穩始信猶云到此始知也不信猶言天地間無此幻境也

兩層作一層故妙

抵金陵

曉風策策柳毵毵帆影遙天破蔚藍一片傷心金粉地落花時節到江南六朝舊地已足傷心況落花時節乎全在神韻動人

席

鎬字渭南江南常熟人著有西墅詩鈔

除夕感懷亡弟湘北

去年當此夕步履過子廬候門肅以入列坐情怡愉是時羣從集燈火熒前除兒童繞我戲捋髭牽衣裾流光如轉燭景物與時俱痛子竟長往浮雲變須臾弟兄我七人強半歸坵墟存者與子三何堪返黃墟在原愛由性撫時感如初百年洵難料一歲行看徂強壯子已矣我衰當何如直白說去情事最真

周孝學

字孺仍江南吳江人諸生

登穹窿絕頂望震澤同蔣香山作

吳中富名山。穹窿獨稱長。鬱律聳晴空。憑眺快無兩。茲來值秋霽。疎翠攬盈掌。行行躋笠峯。孱顏俯羣象。天平遙措笏。卑猶成覆盎。雲從嶺下飛。飛鳥不能上。西南臨具區。風濤相震盪。煙消螺髻浮。日落新鏡晃。混合天水色。分坼吳越壤。呼吸凌青冥。嘯歌脫塵鞅。何當尋赤松。相與出世網。

李

果字客山。江南長洲人。布衣。著有石閣集。○滄洲陳公羈管京口時。客山投詩造謁。公遂與定交。後大理李公因其謹慎。欲任以鹽筴。力卻之。及李公被罪。諸任事者皆罹禍。客山超然人。服其識詩格。蒼老一洗肥膩。有一二字未安。屢改不倦。晚年文譽震鬱。過吳門者爭識其面。幾以魯靈光目之。

示兩兒

初冬可讀書。披帷對月影。困窮亦何常。天意默示警。所期在遠大。忘此清夜永。經義纂孟荀。如汲得修綆。摘辭芟繆悠。百家足馳騁。蘊輝珠處淵。含英金在礦。世人競目睫。欲語還如哽。但求寡悔尤。焉用名炳炳。馬援屢聞過。柳玘重行己。吾家舊遺經。先德盛積累。黽勉無異營。頗識剝復理。中歲偶行遊。致汝業漸弛。我無一頃田。經籍足耘耔。義理苟能通。出處有根柢。醫藥與貨殖。困窮亦可倚。吾生少失學。垂老方知悔。展轉力就衰。炳燭思曉起。努力愛景光。汝曹從此始。首勉以窮經。次期以述祖。少年子弟共宜佩服斯言。

王將軍劍歌

神物鑄成干將手。三尺蒼龍半夜吼。七星吐燄燭銀潢。魍魎潛藏白猿走。將軍匹馬來疏勒。手握寒光邊塞黑。贈將海內有心人。風吹一片無情色。半行籀文不可認。血花點點荆卿恨。平生慷慨思報恩。尊前睚

賦何須問。

懷陳處士陽山

老臥天池嶺。寒松骨共蒼。人如陳仲子。詩是孟襄陽。有女尸蘋藻。無兒受縹緲。風流今已矣。忍更過書堂。
三語狀其孤介。四語表其清疎。

泛艇木瀆

晨光初泛艇。流水枕清酣。風定晴湖渺。雲生遠岫含。梨花明月寺。芳草牧牛菴。多景靈巖近。乘春取次探。
明月寺。牧牛菴。木瀆之佛刹也。加以梨花芳草。遂成名句。

晚菊

迎冬方吐豔。籬下竟誰看。豈敢傷遲暮。何妨歷歲寒。孤懷原淡泊。獨立未凋殘。遲爾風前落。騷人佐夕餐。
可當作者寫懷。

關山月

重關峻嶺鬱嵯峨。月色偏臨絕塞多。萬里寒生玄菟郡。三秋光射白狼河。黃榆風急傳吹角。玉帳沙明照枕戈。最是空閨音信斷。中宵愁聽隴頭歌。

范文正公祠

石筍排空山骨清。范公祠廟儼崢嶸。獨從天下關憂樂。尙想胸中富甲兵。晚穗迎霜遺斷隴。寒烏啼日傍丹楹。先皇銀榜龍章在。紅樹階前交映明。自注：康熙四十四年，聖祖廬濟時良相四字，榜其祠。祠前有楓樹三十株。○憂樂甲兵，人人意中語。此嘉其安放之工。

韓

騏字其武，江南吳縣人。貢生，著有補瓢集。

趙忠毅公鐵如意歌

妖墓障日天地閉。代州戍卒性疆桂。手中剛鐵尺二長。得共朱雲劍爭利。額圖星斗背弓彎。羅紋細蹙銀花斑。銘詞奇倔篆文古。彷彿鑄鼎昭神姦。百餘年來親手澤。古今義憤通呼吸。想當邊城起舞時。魑魅潛形鬼神泣。千秋正氣座右存。物因人重珍瑤琨。指揮欲落崔魏膽。把玩許招楊左魂。嗚呼明社久已屋。一器森芒奪人目。風前還弔宋遺民。擊將如意西臺哭。後半寫趙忠毅寫鐵如意，合井不分。結出西臺痛哭，義士忠臣，天然作對。

五人墓

英風颯颯繞迴塘。舊冢纍纍俠骨香。一擊自同椎博浪。百身何異痛三良。頭顱敢爲忠臣惜。販負能增黨籍光。變例春秋墓前碣。先人特筆凜嚴霜。自注：崇禎初，逆案既定，吳人共毀逆祠，卽其地葬五人遺骸。先必得異人題碣乃稱。大父承命大書五人墓四字，勒石墓前。晚開部大臣。屈膝闍寺，稱子稱孫，人道滅矣。書曰：人子之也。所以愧天下之不爲人者也。

高日新

字健明，江南長洲人，諸生。

詠阮步兵

長嘯哭途窮。風流懷阮公。胸真多塊壘。時定少英雄。白眼相看外。黃壚酣飲中。步兵堪吏隱。誰與測冥鴻。
時無英雄。非指高皇時。謂魏晉間無人也。玩上句。胸多塊壘。其意自見。

馬

位字思山。陝西武功人。官刑部員外郎。○思山貴公子。喜與寒士接。老蒼遇之。謂如飛鳥。依人。人自憐之也。詩品追摹李奉禮時與神合。年方壯卒。豈天上又成白玉樓。又須作記耶。

湘中絃

水宮仙子湘江妃。芙蓉裳兮芰荷衣。張翠蓋兮搖雲旗。月光蕩漾煙霏霏。采芳洲之薔杜。弄明珠於澧浦。老鼉擊鼓羣蛟舞。洞庭波兮秋風。若有人兮蒼茫中。九疑山青雲夢綠。千年血淚啼斑竹。

鸚鵡

吳音好鳥來隴西。翠衿紅背架上栖。金屋花深隔嬌女。紗窗如煙傳笑語。銀縑繫脛不得飛。人前飲啄矜毛衣。園中歌舞曉攜出。高挂綠楊迷一色。富家買爾巧舌聲。那聞布穀催春畊。
人每傷其文采。被累此。另換意作結。更高一籌。

程

樊字是若。江南山陽人。安東諸生。○是若抗心希古。屹屹於學。詠懷次章。其自寫襟抱也。乃年命不永。托之空言惜哉。

詠懷

蘭爲王者香。芬馥清風裏。從來巖穴姿。不競繁華美。龜以告猶亡。翟以炫采死。不善保厥初。受患每如此。莘野彼何人。三聘乃一起。如何志士軀。輕用徇知己。
此爲帶文。若輩言。要離聶政之流。又不在。此數也。太易。慎其隨語。當深思。

塵囂多稠濁。雲物俱不靈。所以山水間。往往有餘清。緒風發爽籟。幽谷舒芳英。草木覺生色。泉石俱空明。

余懷本貞素。對之神益澄。寧靜自致遠。何爲營浮名。

蕭趙琰字琰三江南宜興人諸生○琰三抱才不遇年復不永遠近惋惜所存詩無幾皆近食薺腸亦苦強歌聲無懼者言爲心聲信然

桂之樹

桂之樹托根君之墀。大火當昏鬱鬱離離。桂之樹結葉葉交枝。枝中有丹心。君不知。君不知。含情直待秋風吹。秋風吹君知之。卽張曲江丹橘一章意音節古使人不覺

溪橋候月

候月荆溪口。初涼橋上生。星辰秋在水。河漢夜無聲。農火歸殘巷。漁家話淺更。興來忘所待。人影欲同行。星辰十字在賈長江集中亦爲傑句

過淨梵寺弔周瑜城

松濤聽不盡。鐵馬去何之。只有僧歸寺。更無人守陴。亂鶯公瑾曲。遠岫小喬眉。多少徘徊意。春風解纜時。五六語偶然關合不覺其纖

汪天與字蒼字江南歙縣人官刑部郎中有沐青樓詩

西海門

鳥道直穿雲。不暇盤旋上。有時膝代足。手捫那容杖。目眩怯回頭。坐穩時一放。精神猶惚恍。心胸爲滌蕩。

力竭到峯巔。平衍神忽王。亟趨西海門。路轉光明藏。千峯劃然開。紫翠呈萬狀。夕陽在東麓。倒射芙蓉幃。誰爲問巨靈。仙窟何年創。石牀置碧霄。玉屏列丹嶂。雲巒一萬重。三神山在望。何須臨仙蹤。且快茲遊壯。

予登蓮花峯。有句云。四體失所司。目眩心忡忡。即驚中有時。膝代足。手捫那容杖。二句意也。未經歷者。不知此語之真。

穿鯨魚洞度蓮花溝上文殊頂

巨鯨潛海中。何年此遷播。古洞恆陰森。屏息不敢唾。偃僂穿脅出。延緣捫脊過。眼明一松橫。根穿石壁破。風雲看飛騰。江海幾掀簸。逕度蓮花溝。心膽寒無那。懸崖如泛虛。股栗神已懦。每涉懼不測。佇足欲相賀。降若探龍淵。陟如轉蟻磨。九地升九霄。始達獅子座。蓮花入雲開。蓮蕊日以大。迎送松依然。澗底龍猶臥。至此筋力疲。藉草一少坐。歷歷憶生平。久慣經坎坷。此間覺平夷。無須咎摧挫。度蓮花溝。由百步雲梯而。所云九地升九霄。始達獅子座也。結意翻開有無窮身世之感。

題雪莊和尚小照

雪莊開士居雲舫。三十餘年不下山。何事塵緣消未盡。尙留面目在人間。雪莊入都。見重朝貴。譏爲塵緣所縛。故作詩以風之。

吳瞻泰字東岩。江南歙縣人。諸生。○東岩爲大司成。麟潭先生長子。少留心經術。思爲世用。入省闈十五。終不遇。乃遨遊齊魯燕冀。及江漢吳楚閩越之交。詩品日高。然以詩人名。非其志也。所

著有彙注陶詩。陶詩提要。刪補選注等書。

過虎村上芙蓉嶺

山深異氣候。四月正流澌。冰有夏蟲識。花無春鳥知。村寒烟不起。徑險杖難支。一線開天竇。芙蓉更擅奇。
猶是卽今河畔冰開日。正是長安花落時。意一經錘鍊。更覺適警。

宿松谷菴聽瀑

向晚投松谷。青蒼夾洞門。沙流侵客屐。筍迸出雲根。凍雀千林靜。飛濤萬壑奔。一宵疑驟雨。起坐見朝暾。

自題蓮花峯頂試泉圖

萬仞青蓮上。梯雲爲試泉。誰將一勺水。引上九層天。氣帶流霞色。香無下界烟。茶經曾品未。興發自吾先。

起步與王右丞萬壑樹參天一章同一起法。

送洪去燕入黃山度歲

怪爾衝寒入杳冥。一筇萬里破空青。雷奔石底晴看雨。人在空中夜摘星。喜就溫泉除宿垢。懶將仙箬問

山靈。鼎湖龍去留丹竈。元日朝參紫玉屏。
空中摘星。登黃山時真有此景。度歲只未一點自高。

計元坊。
字維嚴。江南吳江人。○維嚴爲曹草先生之孫。希深同學之子。經經自好。詩有源流。雍正甲辰訪予於葑溪老屋。不值而返。寄詩三章。已臻古淡。今雖散佚。每一追憶。如塵如夢。不勝惘也。

惘也。

勵志詩

青青園中林。並望成嘉樹。或者干雲霄。或者苦顛仆。豈真托根殊。亦異灌溉故。人力不滋培。棟梁安得具。

而何蚩蚩氓。榮落委天數。見大有為者貴以經術培其本根也通首比體。

士人乏奇才。動輒咎貧賤。豈處貧賤中。抱負遂難見。曲逆方宰肉。一鄉已稱善。諸葛當躬耕。三分定佐漢。

內反無足憑。氣餒徒炫亂。不見玉韞山。與石自有辨。貧賤中正可樹立根基激有志氣人不淺。

鳩毒惟晏安。古人戒自適。所以陶士行。運甕日累百。破賊石頭下。精勤由素積。奈何卑棲士。嗜懶如有僻。

志為氣之帥。志銳氣自役。願師聞雞人。無蹈嵇阮迹。南朝八達流弊足壞士品足壞國家標出陶侃劉琨最有定識。

述興

人方危苦時。薄施輒感德。自昔奸雄輩。持此羅上客。蔡邕依董卓。有才而無識。受恩旋殺身。士貴能挺特。

所以孟夫子。餽餒戒樂克。見因不失親。不可輕受人惠。

徐志巖字象求。浙江德清人。歷任開封北河郡丞。著有抑齋詩稿。

謁張文獻祠

曲江風度遠流徽。姚宋同心日並暉。金鑑果能陳黼座。玉環何事繫羅衣。貶官荆楚緣持正。遣祭邱墳為

見機。自注早識安祿山有反相請誅之上不聽。古廟肅瞻松柏下。藹然遺象見依稀。唐五行志術士徐邈周詩曰若逢山下鬼環上繫羅衣。帥馬鬼之讖也。三四見信用

曲江必無六軍不發之禍。

卷三十

高述明字東瞻。滿洲人。東軒相。兄官至涼州總兵。

塞外

雲暗難分騎。沙深欲陷車。炎風初解凍。夏草漸萌芽。義勇心能一。尊嚴令不譁。樓蘭猶未斬。那敢顧身家。

人日塞外馬上口占

馬蹄猶得蹋黃塵。馬上猶吟塞外春。只謂此身常近鬼。豈知今日又逢人。綵花翦細風光舊。沙海雲開氣

象新。便擬題詩寄良友。草堂何處轉傷神。寫人日。切定塞外。俱能作驚人語。

高

賦字東軒。滿洲人。官至大學士。○東軒相公。研窮易理。居已廉靜。待人以誠。與之交者。必使之得其意而去。所謂休休有容者也。詩多說理而不腐。別於白沙定山一派。

次韻奉和西林先生

忠信良非易。好學古所難。緬維顏夫子。得善斯拳拳。固守幾於化。深造居乃安。哲人亦已遠。勉矣士希賢。

讀書必自期。責已何敢寬。西林有美人。悵望青雲端。

鮑

鈐字冠亭。奉天人。官海塘通判。

范忠貞公祠自注。公贈太子少保。兵部尚書。副君亦由浙閩制府。歷陞大司馬。

當年閩海見傳烽。犀兕空多棄甲重。大節並推顏魯國。孤忠直繼段司農。碑題峴首留殘碣。世握兵符踵

舊封應與睢陽同廟食。堂堂授命盡從容。無一字無來歷便是好詩。

李

錯字鐵君奉天人。著有豸青山人集。○豸青係助臣後。當得大官乃替其配。隱於盤山。既老歲一至京師。然一二日即歸。人罕見其面。詩古典峭。自關門徑高者。胎源杜陵。次亦近孟東

野

江南

江水是弱水。久已沉羽毛。江水是江水。我豈無輕舸。中流雙鴛鴦。唼波影凌亂。鴛鴦且莫飛。我有好鍼線。繡在合歡被。與汝日相見。古音古意。

當來日大難

駕青驪。驂駁牛。西上臯蘭山。直入崑崙邱。求西王母不可得。歸來還作人間遊。人間逼人來日幾何。但見北邙之山。如楊如麻。纍纍坡塚皆誰何。昨日前日對酒當歌。只末二語見歡樂之境不可常也。若從歡樂說到喪亡。便直而少味。

項王祠

白蛇斷。烏騅窮。海內莫敵隆準公。百二小兒歌沛中。霸氣汨沒三戶空。眼中成敗勢卽判。大王叱咤終英雄。楚雲沉沉壓祠堂。千秋伏臘猶鼓鐘。鼉龍叫嘯寶劍血。草木慘澹雲旗風。乾坤失意丈夫淚。大江日落寒濤東。落句妙於寫景。含卻無限蒼茫。即駱賓王易水結法。

聞歸雁感賦

畢竟家何處。而云北是歸。高城殘照下。萬里一行飛。風急毋相亂。沙寒定有依。畸人方失序。緣汝淚沾衣。
竟似出杜陵人手。所云四十字。皆君子也。能事全在起結。

新秋雨中塞曉亭侍郎招飲署齋卽席分賦

飛鳥無心惜羽翰。遊魚隨處狎波瀾。於人豈敢行藏異。好我何妨禮數寬。頭白親知稀握手。酒深風雨一憑闌。年光向晚貪高會。已醉遼東管幼安。

陳景元

字石閭。奉天人。布衣。○石閭。甘老布衣。恥言名利。交與惟李彥青。幾輩不妄交也。雷副憲賞一視學。浙中成懷。五布衣詩。石閭居一卽石閭。可知矣。詩亦清矯不凡。

詠懷

高閣臨清池。明月當天心。萬有坐消歇。可以鳴幽琴。上絃來別鶴。下絃起龍吟。夜靜天地清。指中出正音。不惜操縵苦。持此感人深。
夜靜十字。寫琴理最高。

嚴陵釣臺

釣臺臨絕壁。巒壑抱幽深。一片桐江月。千秋出世心。獨尋高士蹟。忘卻客星沉。予亦懷微尚。徘徊聽瀨音。
不著議論。嚴陵之品自見。王貞文作後。應推此篇。

古北雜詩

昔者楊無敵。英名代朝聞。我來北平右。人指令公墳。尙勇兒童拜。酬神酒肉分。邊庭重死節。不祀李將軍。

可以
教忠

山夜

登眺忘疲茶歸來約四更人依山鬼宿星代月華明入寂無昏旦觀心一死生野溪流不斷風定夜聲清

高

岑字峴亭河南商邱人官豐城知縣○峴亭為宋商邱冢宰外孫故詩有淵源歸田後學力尤進

秋日書懷

江城木葉已翻飛深巷蕭蕭獨掩扉北鴈應知書有淚西風不管客無衣他鄉歲月秋難遣故國親朋日漸稀坐盡殘陽燈火上滿天雲影望依依

暮春送別

飛花萬點撲征衣南浦依依怨落暉腸斷離亭煙柳色留君不住共春歸送別逢春於一語中兼到

姚世鈺

字玉戩浙江歸安人諸生

將至揚州與家人病中別

暮齒千行淚新年百病身自然憔悴盡何待別離頻藥裹關心勸衣裝倩手紉平安早相報江上有春鱗

哭女

十歲言詩有性靈木蘭愛說替耶征黃泉不是黃河水聞否耶孃喚女聲即從木蘭詩中生情觸手生哀高於微之哭子諸作

貧家生小儉梳妝。竹筍練裙少盛裝。繡得羅襦幾回著。送終猶是嫁衣裳。

傳業方今羨蔡邕。慰情那更比陶公。明知此恨古人少。哭女偏當無子翁。

哭女可哀。無子哭女倍難爲懷矣。句中兼寫兩層。

姚世鈞

字炳衡。浙江歸安人。諸生。

饒州舟次獨酌醉後放歌

東風吹我來饒州。因循又作兩日留。乍晴乍雨天氣換。一杯聊復消牢愁。寓形宇內一瞬耳。雙丸轂轉如浮漚。春來秋去陋鷓鴣。朝生暮死嗤蜉蝣。我今頭顱歛老大。蹉跎壯志無一酬。尋章摘句守矩矱。庾辭謎語工雕搜。有時隨俗恣諧謔。浩歌一發商聲謳。賈生淚忍但暗下。班超筆在仍空投。芸牕俛首歷幾稔。幽憂之疾無從瘳。鶯花三月辭故國。飄然來作南楚遊。衝風踏浪無不可。三千里路望阻修。蒲帆十幅釣臺轉。輕舸一葉錢塘浮。饒州自古稱上郡。土地則廣人民稠。鄱陽瀕洞恰繞郭。瑞芝峭削纔當樓。茲遊信宿敢易視。湖山暫向筆底收。遠涉思入女兒港。近眺擬泛琵琶洲。左挈偏提右不落。狂呼驚動東西舟。遙汀魚跳刀潑刺。垂楊風捲絲颼颼。水天下上黑如漆。嚴城俄報三更籌。醒無人勸醉莫管。兩行銀燭開雙眸。丈夫意氣貴卓犖。安用狹隘趨時流。周身會須羅千騎。當車只合擁八騶。七尺之軀三寸舌。不取相印終封侯。吟成自笑還自泣。金尊重舉澆詩喉。身行萬里從此始。浩蕩莫讓波間鷗。如潮之洶湧。如風之飄忽。抱才如此。而年命不永。何哉。

邵岷字百峯江南元和人諸生○百峯少歲作詩汨於異說總以險怪爲主後爲劉君東郊女夫而遺稿散軼
歎息彌襟日漸月靡一歸於正至三十餘居然作手矣能者固不可測不信然耶聞其七言律詩最工

趙忠愍公得諡詩

滇南侍御人中傑。氣如虹霓耿不滅。壯猷早著翦萑苻。正色俄看冠朝列。維時明祚丁未造。劫火燒天百川竭。弄兵劇賊覆神州。食肉謀夫營蟻穴。可憐國事無可爲。但見乾坤日流血。闔人夜半開九門。百萬黃巾擁丹闕。君王披髮殉山河。宰執全軀效臣妾。大臣命重小臣輕。勁草何知疾風烈。一呼巷戰千人靡。身首分餘立如鐵。但教心與赤日懸。肯惜身隨天柱折。腐肉馨香何處歸。愍忠寺畔埋冰雪。風雨猶聞嘯國殤。滄桑未許磨殘碣。易名鉅典隆聖代。特采嘉言表奇節。百年幽泐一朝顯。六詔山川增儼潔。丈夫七尺卽泰山。取義成仁在勇決。不爾芳名何卓絕。君不見同時多少儉生人。一念蹉跎成瓦裂。趙侍御名諱雲京師時巷戰而歿藁葬愍忠寺側章皇帝旌表范景文以下諸忠臣因無人奏請偶然遺之乾隆中補臨忠愍此詩凜凜有生氣令讀者如見其銜鬚受刀時

過鹿角岔

橫空斷壁疑削成。上有一罅通人行。左旋右折盤空曲。鋒稜義義欲來觸。蒼藤古木相結纏。白日不到陰崖前。征馬哀鳴僕夫瘁。果然蜀道如登天。憶昔搖鞭過劍閣。逸氣飛騰小川嶽。那知垂老瘴江遊。萬里羈魂銷鹿角。

送友出塞

離笛作邊聲，憐君萬里行。雪埋光祿塞，雲起赫連城。地入龍沙闊，身將馬革輕。封侯原素志，去矣莫沾纓。

秋戌

塞信回窮漠，懸軍尙朔方。殘旗孤壘月，哀角五更霜。榆葉飄金甲，邊風裂箭瘡。黃花猶未解，七尺委沙場。

語語捶鍊而出，捶則聲響，鍊則字新。

將之成都

萬里魚鳧國，青春別恨長。行行穿鳥道，寸寸斷猿腸。人以風塵賤，詩兼鬢髮蒼。謀生宜道路，從此問蠻荒。

謝淞洲

字滄淵，江南長洲人，布衣。○滄淵畫師，元人，得四家意趣，精於鑒古。世宗皇上出內府所藏，命其鑒別，一一不爽。世宗善之，詩學以天趣爲貴，不加纖琢，猶畫中之元人也。

田家雜興

深村犬迎吠，曙色行者稀。歸人自城市，負荷返柴扉。耒耜頗整理，蓑笠亦庶幾。朝來撥春隴，泉脈流微微。

菖蒲亦已生，屋角梨花飛。物候有如此，東作慎無違。

曉色起隴畝，荷耜還西林。悠悠清溪水，自識沮溺心。林際半新月，村靜聞遠音。何人柴門下，慷慨隆中吟。

未知千載事，好風開我襟。忽持一尊酒，蒼然白雲深。五言古二章，俱歸自然，無時下儷氣。

寒夜

含淚別鄉人。翻然作遊子。枕上聽猿啼。家鄉五千里。

吳定璋字友篁江南吳縣人太學生○友篁成七十二學足徵錄表章具區文獻吾黨有心之士也詩不分唐宋以新穎為歸時有名論與翁君琢山稱東山二家

見雁

北雁亦無情。叫月自南去。欲將一行書。托汝遙空寄。遠影沒橫雲。悵望銀河曙。言短韻長

讀文信國題顏魯公祠詩碑

丞相徵兵汗馬馳。魯公祠下特題詩。不圖一旅勤王地。同此空誇冒刃時。慷慨悲歌存正氣。淋漓碧血滿桓碑。兩賢心事真千古。落日西風戈欲麾。生枯俱下之筆倍國魯公一齊並見

補袞圖

杏花紅鎖玉樓人。拭拂山龍日正春。願得聖朝無闕事。不煩纖手號鍼神。

黃子雲字士龍江南崑山人布衣著有野鴻詩稿○野鴻天賦俊才少識詩無一語平庸無一字輕浮真堪壓倒元白中年後成詩的上下卷龍標太白昌黎東坡概為磨斥以下更不足言而已詩頗放前後如出二手矣茲所錄者皆舊稿中作予珍重之又復惋惜之

舟行望南韶諸山

出關青不斷。天地日偪窄。連峯塞東南。顯晦錯朝夕。峭摩層穹心。窟壓厚坤脈。壁面劈洪荒。瘳色向人射。義陽迴六轡。照見靈斧迹。輪困長鯨鬣。嵌空老龍脊。血埋霓影紅。蘚蝕銅花碧。女皇補天後。狼藉五色石。

哀壑慘光晶。沆漭玄雲積。乳竇濺瀑絲。一泓耿幽白。中峯石扇開。直下雷聲割。枯杉皮復甦。臥柏腹全圻。落日風泠泠。山鬼攝人魄。下土徑絕蹤。邈與人境隔。我行踰千里。丘壑興轉劇。逝將凌紫崖。逍遙鍊金液。此意恐未然。一身有驅迫。扁舟轉瞬過。回首已夙昔。

臥鐘

臺城越西隅。蕭颯秋巖清。金鏞臥不起。鼃菴如長鯨。歲久厚地裂。半與泥沙平。下壓黃泉脈。上騰白虎精。虛中廣百圍。出入縱橫行。不知何代物。漫滅無其名。碧埋鬼血鮮。紅蝕土花縈。日月光摩盪。風雷力支撐。對之不敢叩。肅肅棲神明。正始久歇絕。甘同秋草并。大寶關天意。顯晦非人爭。廟廷奏簫韶。世自求其聲。借臥鐘以寫奇才不遇也。沈鬱整肅。得力少陵。○鐘係永樂二年。姚廣孝監鑄。一鑄京師。一鑄金陵。詩中云。不知何代物。未之審視耳。

畫鷹自注。元阿爾裨繪。

軒軒摩空翮。忽入堂楹內。四壁黯光晶。蕭瑟若野外。委形是何年。畫師阿爾裨。苟非大匠手。筆力何超邁。至今天風入。如聞解鏃帶。金眸左右動。輝耀練光碎。亦知邊秋至。毛骨癢生疥。燕雀聲啾啾。懼其轉睛快。聳身欲著人。座客悄懷退。猛氣莽崢嶸。颯與雲霄會。恭惟丹山鳥。大聖自仁愛。緜邈煙霧際。不乏梟獍輩。何由厲霜飈。搏擊清草昧。顧盼粉墨姿。陡覺雄心在。斂翮難飛騰。中懷空抑噫。此章如竟出少陵手矣。至今天風入以下數言。錄稜神氣俱到。

蔣子空水刀歌

金甌颯颯霜天高。高堂白月明秋毫。錦袖掣開寶刀露。蔣侯直立欄前操。此物來自海西國。影落洪波斷。鼉極不知何代降。元精使我白帝生。顏色迴看天地莽。崢嶸晶光所向無。留行五陵俠客久。錯莫牀頭夜。吼聲鏗鏘。銅花拂拭蒼鱗碎。將軍戰血餘腥在。鋒鏑摧崩鼓角前。精靈蹀躞風雷外。此時起舞月光寒。雪龍掉尾凌空翻。泰山欲倒海水立。二十八宿皆離垣。玉關殺氣連穹昊。安得西走咸陽道。天生神物豈沉淪。歎息風前我將老。梁藥亭日本刀歌中云。抽出天上星搖搖。歎爲奇杰。篇中此時起舞以下四語。怪偉生動。正復不讓前人。

山中守歲歌

山扉淒淒煙日暮。瞥眼新年年復故。還欣齒髮未盡凋。頗覺村園亦成趣。黏戶重書鬱壘符。插簷高折冬青樹。茆堂灑掃豁心顏。博山一縷沉香煙。廚門之東出新婦。手捧餠膾盈盤餐。大兒隨行主家祭。稚女移燈封井泉。中天空光若電掃。知是鄰家共迎竈。僮呼如願未移時。山妻亦媚西南奧。繞室鑪添松火溫。一枝梅破冰瓶笑。黃昏促席飲屠蘇。上座居然屬老夫。我家瓦盆盡陳列。興酣小大相歌呼。遭逢苟非堯舜世。腐儒安得歡妻孥。來朝天子朝元初。誰補幽風守歲圖。

度仙霞嶺

鳥道紆迴上。猿聲縹緲聞。峯盤三百級。身入萬重雲。天地閩中險。陰晴嶺半分。出關盡蠻語。端合作參軍。

大洋

不覺舟如葉。隨風入宵冥。潮來天宇白。日照海門青。孤嶼遙相認。危檣覺有靈。中流撫身世。萬里一浮萍。
時徐激齋太史奉命册封琉球野鴻隨行故有大洋望海諸篇境奇詩安得不奇

那壩望海

大塊更無外。鴻濛混兩間。龍行何處雨。蜃現別洲山。一氣涵諸夏。層波走百蠻。茫茫萬餘里。仍向此中還。
一氣涵諸夏五字中包括九有

孟廟

歌馬餘殘照。循牆謁闕宮。冠裳王者並。俎豆聖人同。戰國風趨下。斯文日再中。低徊撫松柏。惆悵仰龜蒙。
不黏著孟子七篇及孟荀世家卻一字不可移易自是作家手段

毛氏園觀牡丹

十畝芳菲宅。名花最後看。乍疑春欲醉。可愛露難乾。倚日自矜寵。迴風不受寒。藥闌頻徙倚。吟望夕陽殘。
脫去習語方許作牡丹詩

題太白樓

文章睥睨世無敵。湖海飄零氣轉遒。六代詩壇餘此席。一江春色獨登樓。為君天特開青嶂。題壁人今亦

白頭猶有浣花祠屋在。懷鉛直欲錦城遊。全在對偶。欸側處見長。題太白樓。卻有自己在也。一結即乃所願。則學孔子意。

翁

照字朗夫。江南江陰人。太學生。著有禮密高二相國。先後以鴻博經學薦。皆不遇。與予相約。為耦耕伴侶。

結廬有日矣。乃倏焉。祖謝友生為位以哭。多失聲者。少年詩。專工佳句。後漸臻老境。識力俱高。有虞伯生老吏斷獄之目。

詠史

周衰政不綱。征伐強侯擅。霸業復陵夷。私門勢強悍。三桓七穆興。魯衛勢衰悞。六卿專晉權。揚水為之先。

爭強互相吞。三晉六國半。俱酒為家人。倒置履與弁。如何周威烈。封侯遂其願。壞法自天朝。史筆昭獨斷。

司馬續春秋。豈獨重辭翰。分封三晉。壞法亂紀。自王朝始。以司馬溫公資治通鑑。託始於威烈王二十三年也。○俱酒晉侯子趙襄子廢為家人。

秦趙會澠池。相如稱勇智。秦人詐不行。趙亦嚴兵備。瑟缶互相擊。計實同兒戲。何不講戰守。乃以人國試。

沛公赴鴻門。累卵危不啻。項莊劍已拔。亞父玦屢示。如廁間道歸。偶值猛虎睡。輕兵躡其後。釜魚那能避。

不見楚懷王。留秦死秦地。見詭謀。雖倖成。不如講戰守之正也。以楚懷王入武關。客死於秦。作證義尤顯然。

嬴秦失其鹿。羣雄互吞齧。沛公能任人。左右有三傑。炎威既施張。西楚遂灰滅。一朝飛鳥盡。良弓自摧折。

功人既囚繫。功狗焉望活。而胡豐沛遊。歌風起激越。韓彭並菹醢。猛士懼流血。誰願守四方。保身自明哲。

韓彭菹醢。後而思猛士守四方。誰願為韓彭續耶。漢祖歌風。乃無聊之詞。非有悔心也。命斬樊噲。更在歌風之後。

武皇重經術。發策策賢良。廣川抱碩學。天人語周詳。賈茂董更醇。治道通陰陽。而胡命世材。出俾相驕王。

守正端軌則。推誠化披猖。留滯終外藩。稍異投沅湘。曲學阿世人。升之在廟廊。漢業不復興。格心誰周防。
葉公空好龍。見龍乃張皇。策賢良欲得正人輔翼也。而柄用者偏在曲學阿世之公孫。欲望漢業之醇。豈可得乎。

文成五利封。尙主亦不惜。謂世無神仙。佞喬在咫尺。文成五利誅。駢首如羊豕。謂世有神仙。所言皆妄耳。

金銀宮闕間。可望不可到。清心守環中。無爲領衆妙。而況至人徒。修短非可校。不朽超形骸。千秋光遠耀。

清心守環中。老氏要旨。神仙之說不足惑之也。未見顏子。早天。千秋不死。議論更高一層。

孔光譖王嘉。浸潤致之死。馬融排李固。承順權臣指。兩人擅聲華。素推經術士。忽焉好惡乖。交口肆詆毀。

失已違本心。媚人求貴仕。平生讀何書。適佐貪且鄙。一念入奇邪。百世人不齒。願爾願修名。慎勿汙青史。

心術不正。多讀書無益也。孔光馬融。惡爲鑑戒。後王半山亦以經學誤國。豈經學果誤國耶。

送歸愚沈少宗伯予告歸里

片帆潞河來。相值在泔水。知公子告歸。南雲指故里。敬讀御賜詩。千丈榮光起。載賡洵一德。眷注情無已。

遭逢煒虞唐。進退善終始。公歸有程期。我老失準軌。離筵布南池。自注杜老詠詩處。鳴蟬綠陰裏。無計更挽留。去

去波如駛。但願南風狂。維解舟仍艤。憶昔初識公。其歲當壬午。兩地合雲龍。僑札通縞紵。吳門與暨陽。來

往互賓主。砢砢商古今。硜硜訂出處。龍躍終升天。雲散難作雨。遙遙兩地分。間隔寒與暑。雲龍今復合。情

深逾昔者。叶齒增易驚惕。道進無違拒。相期同惜陰。晚節師侃禹。

送公歸去來。悠悠返荷屋。作社赴雞豚。約伴同樵牧。弭櫂香水溪。采芝硯山麓。誰識袞冕儔。依然抱黃犢。道充輕祿位。天定歸淳朴。我將還故林。老去愛雲木。三十三山間。結廬臥空谷。公能復來過。江臯路應熟。念舊話前程。草堂夜同宿。無世俗酬應氣。以道相與。彌堅晚節。今人中古道交也。

蓑衣

記得寒江外。曾披上釣舟。煙波雙鬢老。風雨一身秋。戴笠偏相稱。垂竿亦自由。嚴陵如愛此。應不著羊裘。佳句。○帆影云。殘月半痕。巫峽晚夕。陽一片洞庭秋。與友人尋山云。友如作畫。須求淡山似。論文不喜平。皆鮮新可采。

將之北河留別

織就文禽作對飛。一篝燈火久相依。耦耕當日言猶在。佐讀終年計轉非。但使我能拋犢袴。肯教君更泣牛衣。料應不學蘇家婦。金盡歸來也下機。比孺仲夫婦同其清節。兼之風韻。一結表所配之賢。

贈沈侍御椒園

展卷光騰五朶霞。摠由忠愛發精華。詩宗杜老能憂國。文泝昌黎屬大家。午夜疎燈焚諫草。春風小驛見常花。自注。白傳有常花驛見楊八題夢。兄弟詩時離兄。櫻莊。晤鄭平驛中。懸知兄弟聯吟處。添得新詩護碧紗。

梅花塢坐月

靜坐月明中。孤吟破清冷。隔溪老鶴來。踏碎梅花影。選中五言。斷句。俱近唐人。

錢源來字清許浙江嘉善人諸生

少陵草堂

飄泊于戈後，爲堂傍水涯。三巴五畝宅，千古一詩家。無復臨江樹，猶存覆地花。危樓當北斗，想像望京華。

卽於草堂上表其忠愛何等自然

楊

濬字瞻衡江南崑山人諸生○瞻衡處困窮有客欲招之北往已卜期矣緣其配病癘不能往一二年夫婦並寒餓死文人之厄此爲尤甚

落葉

秋聲一夜撼林柯，極目江潭悽愴多。北雁已辭邊塞月，西風初起洞庭波。飄零愁結蘭成賦，搖落深悲宋玉歌。忽憶故交征棹遠，翻飛如葉度關河。通體旁觀比擬搖之曳之視肥膩者有生死之別

韓忠武王墓

古碑峯嶽倚荒丘，宋室存亡仗運籌。十萬敵兵來假道，八千驍騎截中流。爲慙南國輸金辱，聊向西湖縱酒遊。埋骨青山遺恨在，寒風落日戰松楸。是韓忠武京口之戰不可移入朱仙鎮順昌和尚原等處洵推能手

李

進字亦吾江南華亭人諸生著有四枝詩稿

暮秋訪何雪芳城東讀書樓醉後題壁

城上高樓俯碧波，樓頭小住病維摩。蕭疎紅樹半溪冷，偃蹇青山兩岸多。抱鄴目中無管樂，苦心句裏有

陰何與君且酌匏樽酒。明月鈎簾一放歌。五語高其抱負六語表其詩格對仗工整

追悼友萍次立甫韻

門巷蕭條冷若冰。城南一過恨填膺。誅文作自先生婦。遺稿歸於後死朋。自注余近輯其詩文絕壑窮巖開面目。唐風宋格辨淄澠。那堪池水都成墨。博得生平硯癖稱。

過春山字湘雲江南長洲人諸生

過吳竹嶼園居

雨後遙山色如洗。蘿逕無人暝煙起。露滴荷衣生暮寒。抱琴獨宿秋聲裏。爲君一鼓滄浪吟。萬壑千巖流水深。何處夜猿啼不斷。西風蕭颯引離心。

題石湖煙雨圖

林風吹雨川光暝。遠岸鷓鴣點秋影。小樓人宿水聲中。一枕溪雲孤夢冷。我本滄洲舊散仙。蘋花零落五湖船。如何對此不歸去。七十二峯空暮煙。兩詩脫盡塵氣比之白沙寒流清激見底

周永銓字昇逸浙江錢塘人蘇州籍諸生著有東岡詩鈔○昇逸修己自好如處子然及發言爲詩過之談諧不倦予通籍歸里後并不能一見矣時或議其爲僻疑其爲矯余益重其爲人

西崦舟夜

疎星綴林端。殘月懸峯缺。環嶺抱迴谿。巖燈遠明滅。身落五湖濱。孤舟夢松雪。

義卒行

有客爲余述杭州某姓卒。代兄戍滇事。余高其義。作義卒行以紀之。時康熙五十八年春二月。慘慘堂前紫荆。飛飛原上脊。令桓山之鳥。欲去而哀鳴。苦哉遠征人。陟山望親還。望兄嗟嗟行。役萬古情。解一彼少年者。色何黯然。娶婦未三月。昨來黃紙到官行。將出戍南滇。歸告阿母。阿母叫天。新婦口噤目哆。僕僕不能前。解二小弟前致辭。母兄且勿悲。阿母生我二人。兄今有嫂未有兒。何得遠去。存沒未可知。弟當代兄役。門戶兄自主之。解三阿母兄嫂聞言淚下如綆。靡大兄前致謝。此事甚非宜。感君區區懷。我心已再思。熟知此別異苦樂。何乃反累吾弟爲。切切相勸止。但言兄嫂勿復疑。解四翻然出門去。意氣何慨慷。別我先人墓。辦我行子裝。佩刀三尺餘。挽弓三石強。弓刀及戎服。羅列東西廂。親戚走相送。酌酒歌同裳。解五晨興拜堂上。骨肉相悲切。臨行囑兄嫂。欲語復嗚咽。但得兄嫂一心善事阿母。常喜悅。萬里羈人慰愁絕。解六收淚就長道。關山別思重。白日結愁雲。至情感蒼穹。之子識大義。行當早立功。歸報皇帝陛下。無煩遠顧疊中。揚名史册垂無窮。七解○義卒爲兄嫂言。兄答義卒言。義卒復答兄嫂言。敘述如面語。而卒之義勇孝友。一齊俱見。與木蘭替耶事可以並傳。

鯨溪吟贈歸愚子

鯨溪溪水清且漣。鯨溪水與吳淞連。吳淞片帆挂雲樹。直到鯨溪屋邊住。君家在溪側。我家在江邊。溪光

江色雨瀟灑。往往相思乘釣船。自從我卜城東宅。送君翻作朱方客。君去幾開溪畔花。君歸還臥溪邊石。我來訪君溪上行。溪水迎人如有情。門前問字多俊英。堂上論文皆老成。高齋學士定誰屬。被褐先生方自名。只今五十頭未白。閉戶著書聲籍籍。生徒自重沈雲禎。時俗那知王彥伯。愧我與子稱莫逆。漢落相看感今昔。空憐早歲誤儒冠。徒爾窮年抱遺冊。君不見鱗鱗門外水繞村。田居蠶室好稱尊。與君一詠滄浪曲。世事悠悠何足論。此余五十時贈言也。併徇曲折。一往情深佳處全在音節。

關山月

一片關山接塞天。愁看白月迥臨邊。寒侵古戍秦城遠。暈逐連營漢陣圓。少婦樓頭鸞鏡合。將軍帳外玉弓懸。金波盡入征人淚。回照鄉園路十千。

京口聞雁

楚雨迷紅樹。吳霜老白蘋。一聲京口雁。愁殺渡江人。二十字抵人千百言。唐人後稀見此種。

擬唐人邊庭四時怨

望斷陽和到雪山。故園花月夢刀鐮。漢家雨露提封外。春色遙應度玉關。翻王之渙黃河遠上篇意何等濃厚。
草生邊地夏初回。暑雨刀耕白漠開。愁殺赤亭飛鳥斷。行人何事火山來。
昨夜西風入戍樓。前軍移帳急防秋。陰山獵火龍沙月。同照征夫出塞愁。

萬堡雲迷朔氣凝。雪深馬足失超騰。渾脫駝終歲防飛渡。況復黃河十月冰。見邊防之宜急也。視盧弼原辭四章幾欲突過。

擣衣曲

一夕涼風秦女機。砧聲不待雁南飛。誰知萬里黃雲戍。已有新霜上鐵衣。總能自出新意。

周

準字欽萊。浙江錢塘人。長洲籍。諸生。著有迂村漫稿。○迂村以迂自命。亦以迂自安。生二十餘。襄糧攜筇展游武昌。河漢等處。與盡而返。不謁一人。後聞佳山水。必往遊。既老。之京師。一如

遊南漢時。昔有人問高僧曰。京師許多人。僧曰。只兩個人。一爲名。一爲利。迂村超然名利外。是京師有三個人也。與余同輯本朝詩。皆蓋棺論定者。臨終含笑謂所親曰。我幸甚。我詩可入別裁集中矣。詩宗法唐代以前。五言古七言絕尤善。

宿靈隱寺梵香閣曉起眺望

晚從冷泉遊。遂止招提境。入門聞清鐘。孤閣夜方永。傾耳聽泉聲。聲喧意彌靜。朝來小雨過。宿霧散高嶺。憑窗見層峯。澗壑殊清迥。不知曉雲過。但覺衣裳冷。清飈動林薄。初日照山影。行當訪韜光。直上松雲頂。聲喧意彌靜。深於山水者得之。比蟬噪林逾靜。較有味。

賦得古別離送鄭子

勁羽乏羣棲。轉蓬靡暫息。伊人貧困士。能無去鄉國。辭鄉阻長川。旅迹殊可憐。昨別俄六載。斯遊定幾年。遊蹤渺無畔。淮水連河岸。迴瞻雲樹深。忽忽興長歎。雲外指京畿。秋風冷客衣。可堪聞塞雁。正值向南飛。結語淡淡離情於言外遇之。

發朱砂菴逕觀音巖登石人峯

言探黝山奇。早別朱砂石。升厓得險境。指示深悚惕。熟遊尚色變。何況遠來客。凌空四無倚。投趾不容隙。壁削緣藤行。崖傾藉人掖。所憑勇往志。不隨艱苦易。幽巖旣已經。危峯自不隔。振衣造其巔。奇勝在咫尺。俯身入煙蘿。欲詣仙人宅。即遊山可悟求道。康樂引其緒。此更顯晉。

緣天都峯趾度巢雲洞上升仙梯遂憩文殊院

天都信峇嶢。特立若翠屏。取逕過其趾。俯仰皆奧境。松石俱象形。巖巒類盤纒。將陟目屢眩。恐墜心更警。行經陰洞中。恍惚陷深井。須臾從井出。冉冉首露頂。瞻盼多創造。不類人世景。境斷綠梯升。氣逼毛骨冷。意堅斯有獲。出險真自幸。向晚憩禊扉。一燈照孤影。寫巢雲洞四語。深入險出。殊足駭人。

壯士行

請爲壯士行。用識壯士情。壯士重恩輕死生。主人臨岐。陳設飲宴。悲歌聲徹。客容盡變。酒闌日落。雲天高。遠聞淒風起於曠野。猛虎嘯於林臯。風鳴虎嘯。揚鞭走去。去報讎不回首。如見白衣冠。祖途時情事。

明妃曲

中原消息斷。胡地風沙寒。經年不逢春。悽惻摧心肝。君王遣妾和戎虜。萬里辭家心獨苦。早知塞外不勝愁。那怪將軍怕邊土。君不見百戰生降李少卿。羈留絕域一身輕。丈夫失路尙如此。賤妾含悲空復情。備

李少卿而措詞微婉得風人之旨

懷舊

自失鴛湖叟。詩盟三載寒。已知生死斷。猶作別離看。老去悲丘井。情來望逝湍。還聞淮水畔。禪宇託空棺。
此懷家方舟作

行經拂水山莊

扁舟汎汎越南沙。倚杖愁臨澗路斜。孝穆荒齋猶竹石。摠持故宅尙鶯花。名高那許遺纓絨。情重難教棄室家。太息百年同逝水。淒涼還爲惜才華。
詠此題者不免過於發露作者婉約出之不知微言諷諭過於顯斥也此詩品高下之分

晨自松陵歸渡太湖卽事

迴望垂虹隔杳冥。湖波浩渺快揚舲。半篙日氣霧中白。萬點浪花煙外青。隱隱榜歌來雁汶。淒淒漁笛出雲汀。還憐心切鄉閭近。未暇攜筇訪洞庭。

戍婦吟

淒淒賤妾閉蘭堂。渺渺征人戍朔方。漫擬龍城罷行役。空憐燕閣閱年芳。分弓營畔沙如雪。挂鏡臺前月似霜。絕域荷戈音信杳。幾回清淚濕流黃。
似鶯啼燕語報新年之作

題秦餘女史所畫楚辭圖

繞堂煙浪洞庭深。芳杜幽蘭遍水潯。北渚已傳湘女恨。南征更識楚臣心。雲中桂櫂聲疑咽。天際瑤臺影乍沉。寫盡離騷無限意。竹枝歌罷又猿吟。

江上曲

空江潮落水茫茫。南楚征途萬里長。為是曾經分手地。不聽離曲亦神傷。

塞下曲

持籌絕域感蹉跎。沙塞年年漫枕戈。翻羨蘇卿歸國早。白頭終向茂陵過。子卿歸於昭帝時。時孝武殂落五年。詩意見子卿猶得生還也。

用筆甚曲。

蝴蝶詞

萬花谷裏逐芳塵。自愛翩躚粉澤新。多少繁華任留戀。不知祗是夢中身。邯鄲一夢。以二語該之。世人在夢中而稍不覺寤。何也。

漢川

漢川城郭枕江隄。黯黯煙波日乍低。我欲停橈訪神女。暮山無際楚雲西。

盛

錦字庭壁。江南吳縣人。諸生。著有青樓詩鈔。○青樓詩從大歷下入手。後層累而上。風格漸高。至入蜀詩。得江山之助。沈雄頓挫。直欲上摩王淪洋之壘。以仰窺少陵。蓋淪洋詩以蜀道集。

為最勝也。遊京師。王公以下多折節下之。不耐冗雜。歸丙子歲。殺是歲。周子迂村。朱子木。為注。子山樵。相次歿。吳下詩壇。黯然無色矣。予昔歸後。時與青樓商榷。尤深人琴之感云。

履霜操自註。瀟有撫琴波相傳。尹伯奇彈履霜操處。遂擬是作。

霜體體兮瀟之澗。兒弗履兮畏我父母。叶兒身載寒兮。兒心載苦。兒心兮父心。兒身兮母身。寒兮苦兮。實傷我親。兒罪兮莫追。親心兮可轉。俟日出而回光兮。履霜亦暖。與臣罪當誅。天王聖明。同一悱惻。可以教學。

十二碛

羣峯束奔流。虎牙怒相向。對峙十二碛。羅列鐘鼓狀。巔崖轟層霄。旁竇穿激浪。峽泉落九天。洶洶翻海藏。撐舟出井底。篙師氣先喪。衆工捷如獠。百丈緣壁上。木末縱飛騰。山凹迭升降。一鼓更作氣。千篙力誰讓。造化何神奇。設此待霸王。頗聞白帝子。於此拒漢將。鐵鎖貫浮梁。金戈森衛仗。蕭銑後何人。屯兵倚疊障。羣雄電掃空。故壘猶在望。平生歷險難。未若茲遊壯。萬里投蠻荒。一身墮煙瘴。風餐案傾欵。水宿魂震盪。搜奇命轉輕。得句神益王。詎畏前途修。瞿塘險如象。峽高絳逾百丈。上下不能相顧。故以鼓爲箭。杜詩所謂百丈牽江上。灑船打鼓發。船何處耶也。經其地者能親切言之。

空舲峽

出峽復入峽。兩崖插青冥。中流逐狂飈。奔騰萬馬聲。下灘梭一擲。觸石危檣傾。逆挽勞百夫。十步九倒行。力盡聽所止。刺篙就迴汀。愛此民居壯。凌空駕軒楹。宿雲出洞戶。古木撐巖屏。驚猿或掛樹。怪鳥時一鳴。捫蘿上絕壁。山風動冠纓。呼童拾錦石。信手攀雜英。興幽忘涉險。觸目多怡情。前途苦逼仄。絕境難久停。過午巖日晦。磊落見數星。厓黑畏突虎。蠻語頻丁寧。移舟近湍激。拍枕聲鏗鏘。骨肉緣久斷。中宵夢亦清。

狂吟出險句。那顧鄰舟驚。

前後極形其險。中間忽入拾錦石攀雜英一段。猶杜老北征雜入或紅如丹砂或黑如點漆也。骨肉絲斷而夢亦不接。是遺遊人嘔心語。

過灘

重峽間百灘。一灘度一厄。江渦衆壑趨。厓口亂石積。大石疊鼉鼉。小石攢劍戟。中流若沸川。翻倒蛟龍窟。牽舟逼下流。凜若阻兵革。長篙拄峯腰。遠纜走山脊。鳴金策衆工。銳進不盈尺。一絲中迸斷。百里供一擲。觸石無完艘。沈淵有驚魄。是時雨初霽。沙石多滑澤。亡命爭上厓。匍匐落冠舄。婦孺互扶攜。雞犬任狼藉。暫脫魚腹災。波濤亦衽席。轉思斷鼇初。四極奠磐石。豈其禹力衰。此境終未闢。吾尤罪巨靈。何惜隻手擘。天宰真夢夢。人事日偪窄。波靜有潛鱗。林深多斂翮。寄語營利徒。勿作遠行客。一絲迸斷。百里一擲。前人衽席倒觀出魚腹之險。真十成用力語。

峽夜

噉噉猿啼夜。淒淒鶴唳空。斷厓開四壁。深井落孤篷。樹漏暫明月。湍驚無定風。萬重雲水隔。歸夢亦途窮。深井五字警絕。

虎牙灘

楚蜀分爭地。雄關扼怒濤。灘聲牛峽轉。山勢虎牙高。巖樹丹青雜。舟檣上下勞。新詩橫槊賦。旅興一時豪。

曉發

曉發東安道，輕霜淨馬蹄。亂鴉僧閣外，殘月女牆西。春冷花猶斂，沙平路欲迷。東臯待時雨，取次把鋤犁。
曉行如繪，與雞聲茅店月，人迹板橋霜，可以並傳。

老將

白髮枕戈眠，黃沙帶甲穿。風雲經百戰，筋力盡三邊。舊識飛狐路，高談射虎年。聞笳心未死，尙想勒燕然。
詩家老境，可入極玄集中。

登白帝城

萬仞牆臨灩澦堆，子陽伯業割江開。白鹽峯對城頭出，巫峽帆從地底來。雲起化龍迷故井，風生躍馬有高臺。漢家陵闕同灰滅，淚盡寒猿日夕哀。
深井落孤蓬，從高處入峽也。巫峽帆從地底來，從峽升高處也。

白帝城謁昭烈武侯廟

永安宮殿峽江頭，一體君臣祀武侯。天祖式臨傳詔夜，風雲色變出師秋。鳴鑿久絕空山道，籌筆猶懸古驛樓。瞻尙死忠，諶死孝，千秋配食重詒謀。
領聯頓聯，分寫君臣，結以君臣之後人言，英氣凜凜，瞻尙死忠，魏死諱，周諱死孝，魏死後主，此種詩那得不傳。

蜀道寫懷

辭家動作經年別，去國真成萬里遊。淚眼已枯猿嘯夜，鄉書空望雁來秋。蠶叢路險連雲棧，鹿角灘驚上峽舟。心折江陵灌園叟，黃柑千樹比封侯。
一起四語，直書胸臆，人力不與。

舟抵瀘州

錦江直下古城壕。地入炎荒近不毛。萬里親朋勞夢寐。十旬餐宿托風濤。征蠻羅甸軍聲遠。諭蜀文園典策高。掃盡瘴煙開郡閣。岷峨天半落揮毫。

任城使院晤翁霽堂有贈

並馬長安憶舊遊。逢君意氣振高秋。酒徒半散荆卿市。詞壘孤懸李白樓。握手星辰搖短劍。離心風雨送扁舟。明年醉我南池上。須典千金紫綺裘。

題杜文貞公南池新祠

自注沈某園侍御碑。曾公係配以許主簿。

浣花遊跡寄南池。洗馬鳴蟬感昔時。遇主名高三禮賦。懷人心折八哀詩。鑄同賈島應呼佛。繡比平原合買絲。玉貌仰瞻如舊識。憶曾親拜草堂祠。自注丁巳余入蜀。至瀘西曾拜公祠下。

白蓮

玉井分栽到野塘。冰綃翠袖迥生涼。半江殘月欲無影。一岸冷雲何處香。真相尙留開士社。紅衣盡洗美人粧。水仙操罷扁舟去。誰與凌波解珮璫。青樓中年作也。韻聯遠神。遡韻耐人吟咀。所謂不著一字盡得風流者耶。

別兄弟

未斟別酒已傷神。四海終輸同氣親。此去白雲天萬里。望歸無復倚閭人。

別家人

伏雌烹罷勸加餐。秉燭喃喃語夜闌。點檢篋中裘葛具。預知別後寄衣難。作六千里別。不得不預料寄衣之難。詩之動人。全在一眞字。

入蜀懷沈湘臯

雙溪對掩古溪邊。婦汲兒春各可憐。浩浩乾坤兩萍葉。計程我更遠三千。時湘臯客江漢。故云更遠三千。

汪

俊字颯三。江南長洲人。官禮泉知縣。著有山樵詩。○聖祖第三次南巡。山樵獻詩。命入書局纂修。議敘得官。然敲扑喧驚。非所長也。禮泉罷歸。久之。幾無立錫地。獨能以詩消遣。苦中得甘。而其詩亦不自愛。惜隨手散去。身後得其草稿九束。

大半溫柔鄉語。刪存五章。皆近元和長慶詩人者。

蘆花

爾本無情者。緣何亦白頭。丹楓同瑟瑟。野水並悠悠。霜冷下宵雁。月明來釣舟。相逢秋雪裏。老我不勝愁。

哭少宗伯春暉姊丈

老去身家不兩存。俄看霜後萎芳蓀。燕巢華屋垂新淚。馬鬣空山感舊恩。豈意十年重一面。卻來千里與

招魂。薦蘿雖附潘楊末。未敢同聲哭寢門。春暉宗伯爲其先人營葬。故有第四語。山樵入京。春暉旋沒。故有第六語。

誰知小別竟千年。夢幻韶華逐逝川。我尙拖泥兼帶水。君非成佛定生天。從前似歷華嚴劫。向後休參文

字禪。昨自黃公壚下過。一聲鄰笛欲潸然。

袁墓

香雲漠漠雪飄飄。積翠層嵐近可招。猶記玉堂春夜夢。短篷斜繫虎山橋。因遊袁墓而追憶往昔之夢遊也。修書在武英殿故不礙云玉堂。

元宵憶家

大地冰輪普照。故園想亦共清光。別離人度團圓夜。白髮紅顏各斷腸。與獨眠人起合歡牀同意。眷念家人不比尋常浮艷。

朱受新字念祖。江南吳縣人。諸生。著有木鷲詩稿。○詩體以七言絕句為最難。四句中開闔動盪語。近情遙不鏤琢。不點染而言中言外。神遠韻流。方為盡善。宋元人有心奇巧。往往失之。木鷲

諸作頗近唐人。惜無旗亭畫壁能賞黃河遠上者。

詠蟬

抱葉隱深林。乘時嘒嘒吟。如何忘遠舉。飲露已清心。木鷲為諸生。不應鄉試。抒寫懷抱。已見此詩。

獨處怨

月中自顧娉婷影。鏡裏誰憐憔悴容。永夜製衣金翦冷。秋風萬里度盧龍。

流螢詞

暗飛幾點隔簾櫳。影亂繁星度遠空。莫入班姬金閣裏。恐隨團扇落秋風。典猶帶初陽日影。來對看便知其工。

吳宮詞

夜擁笙歌百尺臺。太湖月落宴還開。君王自愛傾城色。卻忘人從敵國來。眼前語卻無人道破。

春鶯曲

千門春靜落紅香。宛轉鶯聲隱綠楊。任爾樓頭啼曉雨。美人夢已到漁陽。亦與啼時鶯妾夢不得到。遠西對看善於翻用古人。

明河曲

清秋瀉影畫樓前。一水盈盈耿碧天。若果此中風浪靜。女牛何事別經年。

白秋海棠

清秋湛露浥瓊芳。素影風搖玉砌旁。夜靜看花人獨立。水晶簾外月如霜。寫花并寫出看花美人與尤子在京作可云笙馨同音矣。

王大椿

字八千。江南常熟人。諸生。○八千爲畫師石谷曾孫。勵志向學。日夕不倦。將有成矣。中道以療疾亡。存詩一章。詩意欲從學見復望其大叩大鳴也。中正端嚴體如平原書法。

上陳見復先生

讀書不求名位高。飲酒不盡千鍾醪。得心每在澹與泊。此中至樂誠陶陶。先生閉戶穴墳典。卅年門徑叢蓬蒿。三公令僕斷夢寐。淡如雲影輕鴻毛。忽傳下詔賁郡邑。水南水北紛喧囂。公卿合辭拜手薦。漢廷經術千秋遭。申轅年已億筋力。蒲輪難涉風塵勞。上陳著述達黼座。至尊下遣官胥鈔。周情孔思審中正。辨別白黑窮釐毫。少司成職重太學。帝命取式風之澆。先生受官不受祿。几席講學仍衡茅。走也仰鑽希萬一。有似蟻垤窺巖嶠。韓門近在許偃入。欲挾精髓棄粕糟。寸莛鉅杵叩俱應。試聽鑿鑿天半鳴。蒲牢。

李

菟字嘯村。江南懷寧人。諸生。

憶秦淮

清明恰是握蘭辰。遙卜秦淮景物新。楊柳晚風深巷酒。桃花春水隔簾人。橋邊車過香生路。樓外船歸月滿津。憔悴不堪來舊館。相逢誰爲浣沙塵。秦淮風景宛然畫。出令人追憶舊遊。

過廢園

誰家亭院自成春。窗有莓苔案有塵。偏是關心鄰舍犬。隔牆猶吠折花人。以鄰犬之吠人傳出芳園之塵如畫家之用烘觀也。

卷三十一

紀映淮字阿男江南江寧人詩人映

秦淮竹枝詞

棲鴉流水點秋光。愛此蕭疏樹幾行。不與行人綰離別。賦成謝女雪飛香。王漁洋秦淮竹枝有栖鴉流水空蕭瑟不見題詩紀阿男蓋賞

其風神也紀詠桃葉渡中云波搖秦代月枝帶晉時春亦稱佳句

錢鳳綸字雲儀浙江錢塘人

哭伯兄

在昔皇天傾覆卯無完理。兄不卽殉身。感奮良有以。摩挲雙匕首。一夕再三起。千鈞重一發。恐復憂天只。荏苒歲月間。隱痛入骨髓。未堪響人胸。抱疾忽焉死。尸牀目不瞑。不繼非人子。尙有娥親在。李壽汝莫喜。

因兄報讎之志未遂而死。己以一身任之。字裏行間。讀去。鮮鮮有聲。使人增孝思。增義氣也。第未知異日報讎與否。

畢

著

字紹文。江南歙縣人。崑山王聖開室。○著父守蔚。與流賊戰死。屍為賊擄。衆議請兵復讎。

兵追之多。自相踐踏死者。與父屍還葬於金陵。時二十歲。女子也。後來吳中。為崑山王聖開室。與

布荆斂無往時。義勇氣矣。白首相莊。以沒聞。毛太史大奇。載沈列女靈英。為父報讎。及賊事與

相類。豈世亂時。天故生奇女子。不一人耶。抑所傳聞異辭耶。○韜文詩稿。向見於家。來遠山龍潭

中有云。梨花槍萬人無敵。鐵胎弓五石能開。又云。入軍營而殺賊。虎穴深探奪父尸。以還山龍潭

安葬。又云。室中推髻何殊。孺仲之妻。隴上搗鉏。可並麗公之偶。時異其人。鈔錄

五言古七言絕二章。來遠兄沒華詩。徧索不得矣。存此舊錄。聊以見其生平。

紀事

吾父矢報國。戰死於薊邱。父馬為賊乘。父屍為賊收。父讐不能報。有愧秦女休。乘賊不及防。夜進千貔貅。殺賊血漉漉。手握讐人頭。賊衆自相殺。屍橫滿院溝。父體與櫬歸。薄葬荒山陬。相期智勇士。慨焉賦同讐。蛾賊一掃清。國家固金甌。機智義勇忠孝。於一詩中見之。

村居

席門閒傍水之涯。夫婿安貧不作家。明日斷炊何暇問。且攜鴉鶯種梅花。視前詩如出二人。

章有湘字玉篴。江南華亭人。進士孫中麟室。

曉思

窗外雞初唱。花間露未乾。欲臨明鏡照。猶怯翠眉寒。宿鳥翻林樹。歸鴻振羽翰。不知鄉國信。何日報平安。

錢敬淑字師令江南江寧人談允謙室

泊浦子口

殘年泊歸櫂。問酒郭西亭。雪圃芹芽白。江醪竹葉青。夕陽新別路。衰草古離情。隔岸寒山色。含悽望舊京。

吳

琪字蕊仙江南長洲人管助室後寡居岷依空門

送別

雪意滿芳洲。蒼山引去舟。霜風醒客夢。笳月起邊愁。萬里從軍急。孤身倚劍遊。家園落日裏。莫上最高樓。

春晴晚眺

積雨經旬鶴未過。小樓閒眺費吟哦。簾開燕子歸來晚。門掩梨花落處多。新水小橋通蕙畹。亂山古寺入

煙蘿。雲開樹杪看浮棹。畫出春帆送綠波。娟

吳

綉字素公江南長洲人常熟進士許瑤室○馮定遠文集中有與高陽夫人論古詩樂府源流即謂素公也定遠斷斷持論少可多否而推許夫人則夫人之詩格可知矣

嘯臺

魏晉已如夢。荒臺今獨存。龍蛇正交鬪。鸞鳳自高騫。避俗惟長嘯。逢人常不言。始知真隱意。何必入桃源。

入手高朗沈鬱盛唐風槩

七夕

星光歷歷漢悠悠。悵望雙星獨倚樓。莫謂人間多別恨。便疑天上有離愁。梁清謫去誰相伴。子晉歸來合共遊。惟有月娥應最妬。一輪風露不勝秋。

楊柳枝詞

宮柳初開一抹眉。武昌城下乍逢時。春來樹樹煙條綠。欲認何枝是舊枝。寒食東風已滿城。小枝纖弱拂啼鶯。東君不惜離人苦。又向前年折處生。

詠古

公子翩翩信絕倫。擬將豪舉卻狂秦。不知賓客成何事。枉向樓頭斬美人。信陵之得毛薛。可云得士。若三千中十九人皆碌碌也。而斬美

人以謝之耶。平原之徒豪舉。即於此見之。

侯懷風人。字若英。江南嘉定通政諱峒曾女。

感昔

黃河流水響潺潺。當日腥風戰血殷。大地盡拋金鎖甲。長星亂落玉門關。居延蔓草縈枯骨。太液芙蓉失舊顏。成敗百年流電疾。蒼梧遺恨不堪攀。此感恩陵失國時事。降將倒戈。虎臣戰沒。而君王因之殉社稷矣。忠臣之女。宜有是詩。

吳氏。江南桐城人。○未詳名字出處。然以女子能組織史事。殊爲難得。於詩觀中錄之。

詠史

六貴同朝激虎彪。橫江勒馬下秦州。銀鎗酒市春雙鬢。玉屣蓮臺月半鉤。趙鬼西京諳漢賦。阿兄東閣壓通侯。誰知講武旄頭入。芳樂筳聲碧麝秋。蕭衍謂張弘策曰。六貴同朝。亂將作矣。東昏嬖倖之徒。有趙鬼兒。齊主呼爲阿兄。

右南齊

同泰一人歸佛地。壽陽千騎渡江波。盟成自取金甌缺。蔬絕空陳雞子多。五月誰勤君父難。七官先反弟兄戈。江淮廢後襄陽促。秋草臺城放橐駝。臨賀王正德引侯景以千兵渡江。金甌無缺。武帝自矜語。圖臺能匡濟。湘東王釋行七。故云。

右南梁

倪仁吉浙江義烏人。○仁吉工寫山水。嘗種方竹於庭。以自況也。有同志者斫一竿與之。

題宮意圖

調入蒼梧斑竹枝。瀟湘渺渺水雲思。聽來記得華清夜。疎雨梧桐獨坐時。

范姝字洛仙。江南如皋人。諸生李延公室。

聞蟋蟀有感

秋聲聽不得。況爾發哀吟。遊子他鄉淚。空闌此夜心。已憐裝閣靜。還慮塞垣深。蕭瑟西風緊。行看霜雪侵。

此聞蟋蟀而憐遠行也。起十字便已高絕。

熊涓 字魯滄江南長洲人許爛石室

寄遠

幾回聞雁憶連然。天末遙將錦字傳。萬里飄流羈遠客。十年迢遞阻迴船。浮雲目斷蒼山外。落月魂消洱海邊。何日刀環遂初約。免教暗卜擲金錢。

柴靜儀

字季調浙江錢塘人沈漢嘉室有擬香室詩鈔。○本乎性情之真發乎學術之正。韻語時帶箴銘不可於風雲月露中求也。令子方舟能承母教已詳二十五卷中。

與冢婦朱柔則

深閨白日靜。薰香垂羅幃。病起罷膏沐。淡若明河秋。自汝入家門。操作苦不休。蘋藻既鮮潔。牖戶還網繆。丈夫志四方。錢刀非所求。惜哉時未遇。林下聊優游。相對理琴瑟。逸響隨風流。潛龍慎勿用。牝雞乃貽羞。寄言閨中子。柔順其無憂。以禮躬易子以淑慎勉婦閨閣中居然儒者。

子用濟有遠行詩以貽之

吾子廉吏孫。讀書昧生理。三十未成名。徒然還鄉里。外侮旋復來。內憂方未已。忽然遠行役。披衣中夜起。明星光在天。河流正瀾瀾。行雲有返期。遊子靡所止。攬涕下高堂。長途從此始。野雀從南來。翩翩思擇木。感此主人賢。飛鳴集其屋。才地非獨優。處卑願亦足。矧有嘉樹林。朝昏託棲宿。

鷹鷂過莫窺，爵羅無由觸。哀彼黃鳥詩，長謠念邦族。詩中比體，勉其因不失親，隨遇自安也。

昂用濟

君不見侯家夜夜朱筵開，殘杯冷炙誰憐才。長安三上不得意，蓬頭薰面仍歸來。嗚呼世情日千變，駕車食肉人爭羨。讀書彈琴聊自娛，古來哲士能貧賤。立身一敗，萬事瓦裂，皆由不能貧賤之故。貧賤中正可磨鍊人品也。能貧賤他日即能富貴矣。學者宜三復斯言。

長信宮

玉臺妝罷無人見，傷心空自悲團扇。秋草偏生長信宮，春風只在昭陽殿。殿裏君王酒半醺，嬌歌雅舞爭紛紛。三千錦帳飄香麝，十二長裙散綵雲。衆中別有人如玉，新妝豔豔嬌紅燭。不許寒烏帶月啼，恐驚春燕銜花宿。誰憐長夜夢難成，忽度流鶯似有情。片月高高挂天漢，千秋應照妾心明。

秋分日憶子用濟

遇節思吾子，吟詩對夕曛。燕將明日去，秋向此時分。逆旅空彈鋏，生涯只賣文。歸帆宜早挂，莫待雪紛紛。

送顧啓姬北上

一片桃花水，盈盈送客舟。春來萬楊柳，葉葉是離愁。顧我窮途者，逢君意氣投。烟虹時染翰，風月幾登樓。只合薰香坐，誰堪鼓柁遊。燕臺一回首，雲白古杭州。

王

慧所承，受故其詩清疏朗潔，其品最上。王流洋祇賞其一縷，柳花飛不定，和風搭在繡牀前，猶

以尋常閨閣待之也。

山陰道中三首

出郭忘遠近，十里清陰中。川陸互回沒，延緣遂無窮。岡巒去殊勢，竹樹交成叢。安知蒙密處，下有溪流通。石橋路可尋，一轉迷西東。烟空人不見，寂寂山花紅。

行行轉深迥，所得益幽奇。萬壑與千岳，今來始見之。紛紛紅復碧，相引呈異姿。心目所應接，人各領其私。

烟縷出叢薄，山家住茅茨。人世杳然隔，何殊太古時。人各領其私，正以私見公，從少陵欣欣物自私化出。

溪流繞巖巖，一葦去不息。沙瀨清且淺，水底見竹色。文石無歲年，山根浸歷歷。谷鳥鳴轉幽，溯洄安所極。水花愛明淨，絕境杳難卽。可有滄紗人，一笑似相識。

冷泉亭

泉聲檐檻外，林壑杳然深。人世熱何處，我來清到心。松林藏日色，潭底臥峯陰。一自樂天記，山光寒至今。

移居茜里舊宅

新塘一水繞街東，舊是柴桑五畝宮。松菊尙存思祖德，蓬蒿不翦見家風。花深雞犬疎籬外，潮落魚蝦小市中。卻愛堂前雙燕子，還尋故壘入簾櫳。

秋夜夢同先慈賦詩得天上桃花之句覺後因足之

太華峯頭見上真。霞衣綽約是前身。海中若木何嘗夜。天上桃花不計春。瞬息去來原是幻。片時歡笑亦相親。鐘聲已碎昆明劫。好向毘伽問後因。語有仙氣。不因鏤刻而成。

鄰女幼歸儒家因壻無藉淪於塞下聞而有感

曾向鄰居共絳紗。裁雲詠絮鬥芳華。香沾繡帙同分線。春暖妝臺互送花。漫說羅敷原有壻。可憐蔡琰竟無家。於今辮髮垂雙耳。紫塞斜陽泣暮笳。極不堪事。寫來蘊藉。服其筆墨之工。

芝塘候潮因憶亡女

水淺舟膠日半斜。扣舷閒望似天涯。烟深竹塢鳩呼雨。潮落蘆根蟹聚沙。愁緒縈纏同蔓草。年華衰謝感殘花。劇憐弱女常同泊。相對蓬窗數晚鴉。

禹陵

明德彌蒼昊。神功邁大庭。懷襄方盡力。胼胝極勞形。草木開蒙昧。龍蛇滌穢腥。鑄金九土貢。誌怪八方經。蒼水先呈簡。防風後至刑。相傳弓劍棄。此地隧泉扃。三古遺祠廟。千秋共薦馨。壁牲前代典。碑版列朝銘。深殿從羣后。空山走百靈。舊聞雲罕駐。今見翠華停。心法傳何洛。天章煥日星。殊恩沾後裔。異數出明廷。肅穆瞻新像。登臨泊小舲。城垣辭鏤琢。戶牖炯丹青。莫覓藏書穴。徒看窆石亭。蘿長聽竄跡。松老鶴修翎。衆水環襟帶。諸峯列幃屏。橋山同故事。寂寞對秋坰。一起五韻。包括神禹生平。通體整肅。有少陵調。先主廟風格。不意於閭闔中見之。

徐

氏山東新城人。耿侍御鳴世室都御史庭柏母。

寄子詩

家內平安報爾知。田園歲入有餘資。絲毫不用南中物。好作去聲清官答聖時。見王漁洋詩話中。

張

氏山東德州人。麗水知縣田緒宗室。刑部侍郎愛母。封太恭人。著有茹荼集。

示兒

一部楞嚴戶畫扁。木魚竹杖倚圍屏。老人自覺修齋好。不為兒曹講佛經。不講佛經。講孝經可也。宜田氏後有令人。

龐

畹字小宛。江南吳江人。詩人吳鏞室。鏞字開璋。嘗以詩扇贈先大夫。係其夫。人琅窗斷句。余兒時即喜誦之。今錄於此。每一吟咀。猶憶角卯見寶時也。

瑣窗雜事

夫婿長貧老歲華。生憎名字滿天涯。席門卻有閒車馬。自拔金釵付酒家。夫婿身分。即從留寶傳出。而已之賢淑。亦從此可見。

春雨春寒過落梅。連宵不禁晚風催。閒園收拾殘花片。供得兒曹贖面來。

吳永和

字文璧。江南武進人。董玉蒼室。

虞姬

大王真英雄。姬亦奇女子。惜哉太史公。不紀美人死。嘆兮之死。史筆無暇及此。然一經拈出。真見心思。

贈外子玉蒼北上

挾策長安去。誰憐行路難。恐傷遊子意。別淚不輕彈。

丁瑜 字靜綢浙江長興人進士
賦眉錫室著有皆綠軒詩

家居

木石風花結四鄰。寂寥門巷久無人。昔年燕子今重到。始信交情爾獨真。

張令儀 字柔嘉江南桐城人姚湘門室著有燕窗詩集
長女也工古文不專韻語端本植學比於章遲母之授經
○此文端公

西顛

大火既流涼風薦爽。四時代謝成功者往。是刈是穫。東作乃登。馨香玉粒。神享其烝。率我婦子。中夜鳴機。涼霜戒晨。勿使無衣。

玄冥

北戶乃瑾。凝陰沍寒。兩儀混一。雨雪漫漫。何以禦窮。修其旨蓄。草木既胎。蟄蟲咸伏。無視無聽。以還純朴。百爾君子。宜謹嗜慾。於天時為閉藏於人心為守中
得淡人氣息而又別存理趣

不寐

天將降陰雨。病骨必先痛。轉輾不能寐。常至霜鐘動。老覺近年增。愁自三生種。萬慮積此時。疾苦非所重。逝者日已久。憂來誰與共。一歲又將除。五窮復難送。翻羨長眠人。不醒鈞天夢。此稱未亡後詩得白太傅神理

五畝園舊蓄二鶴忽殞其一孤侶哀鳴都忘飲啄詩以弔之

西風一夜返芝田。仙蛻儀形尙宛然。舊過蒼苔猶有迹。重來華表是何年。獨臨池畔悲孤影。唳入秋空泣暮烟。何處惹人情最切。嚴霜落葉五更天。甲鶴實以自弔五六語分寫孤侶哀鳴字字悽惻

病中口占

珍重餘生劫後身。卻憐孤負一分春。殷勤好與東風約。留取餘花待病人。

徐昭華

字昭華浙江會稽人諸暨縣加采室

送虞英嫂歸諸暨

落盡紅衣蓮子多。相看綠水木蘭過。曉風不解吹愁去。偏送佳人到苧蘿。

孫

淑字靜谷江南常熟人諸生許灝室孝廉進益母著有詩集四卷○集中有途哉行作於九十歲時述孫許兩家門戶之盛衰一己終身之閱歷皆樂天安命語也共五百餘言一時遠近

誦傳

五日弔古

田文五日生。屈原五日亡。吉凶同此日。理固難推詳。原與國休戚。一死分所當。漁父櫂自鼓。詹尹龜宜藏。抱石投湘流。心與日月光。文從狡兔計。高枕樂未央。後合魏秦趙。伐齊何披猖。身死薛隨滅。高戶仍不祥。文生雞狗雄。原死荃蘅芳。世人何夢夢。悲屈羨孟嘗。我心獨不然。臨風慨以慷。撫時懷往事。聊進菖蒲觴。

正則之死，賢於孟嘗之生，合兩傳校之，其論自定。定論出闕闕中，大難大難。

金

氏字法筵，江南吳縣人。吳江沈六書室。

偶然作

灼灼庭前花，春風鬥紅紫。隨榮復隨謝，盛衰偶然爾。草木豈無情，誰能一死生。我思更如何，欲種菩提子。

彭

氏河南鄆州人，廣西布政驛而述女。李鴻室。

華山

三峰崒嶭插青冥，高處平捫井鬼星。池上蓮花開日月，礪邊石鼓動雷霆。藥籃何日逢毛女，仙掌於今憶巨靈。願駕鹿輶過霧市，丹爐石榻檢遺經。

王

煒字功史，江南太倉人。陳緯度室。

鄉思

不禁鄉思倚危樓，山色空濛海氣浮。風雨別來花半老，音書隔絕雁驚秋。林間野鶴呼幽夢，天際浮雲帶遠愁。好寄相思與婁水，門前日日有潮頭。

王

瑤湘字瑤洲，廣東南海人。詩人王華女，李孝先室。

獨坐

殘燈明滅裏。遙夜夢醒時。起立庭前樹。孤懷明月知。

擬送別

孤舟暮歸去。別路江南樹。煙外有鐘聲。故人在何處。

朱柔則

字道珠。浙江錢塘人。詩人沈用濟室。○方舟爲紅蘭主人客。道珠遙寄故鄉山水圖。主人作詩有應憐夫婿無歸信。翻畫家山遠寄來之句。方舟旋歸。當時傳爲佳話。

寄遠曲

恨少垂楊柳。殷勤繫玉鞍。夕陽鴉背暖。春雪馬蹄寒。入世逢迎拙。依人去住難。癡兒啼向我。昨夜夢長安。
獵獵風初勁。沉沉雨未闌。因憐兒被薄。轉憶客衣單。栖燕將雛苦。征鴻失侶寒。居家與行路。同是一艱難。
聞說燕臺路。生涯亦可憐。恥彈門下缺。誰乞廣文錢。久客非長策。歸耕有薄田。一棺痛慈母。急爲卜牛眠。
諷遊子以行路之難。彈缺之恥。猶姑氏季調以能貧賤。親正人勗子也。末章望其鄉親急歸。遊子不容不歸矣。性情既摯。詩安得不工。

送外之大梁

前時失意悔遊燕。此去中州枉自憐。飄泊君同蘇季苦。操持吾媿孟光賢。計程已隔三千里。念別誰堪四五年。
自注。方舟云。此行以五年爲期。莫向離亭歌折柳。恐催客淚落離筵。

河渚觀梅約願女春山春山。舟方。

相期河渚玩春華。一棹迎風路未賒。樓外有梅三百樹。美人不到不開約看花。而云不到不開。留其早到也。不妬可知。詎止工於措語。花。

方舟廬先姑墓感賦

寢苦枕塊空山裏，卻望松楸淚泫然。縱使慈烏能反哺，可能飛得到重泉。

張學典 字古政，山西太原人。

感亡姊舊居

繡網蛛絲鏡滿塵，閒花狼藉不知春。添愁怕見梁間燕，猶是呢喃覓主人。

張凌仙 字學島，江南吳縣人。沈某室，以苦節聞。

雜詠

家住青山側，青山斷塵迹。浮世幾興亡，依舊青山色。
明鏡如滿月，朝朝弄妝靚。一自棄塵埃，不照孤鸞影。
夙昔愛鳴琴，流泉指下生。子期今已沒，誰聽斷腸聲。

歲暮感懷

燈前課子誦芸編，百事縈心逼歲闌。泉路十年音信斷，空山風雪一家寒。
四斷句中俱有冰霜之色。

顧英 字若憲，江南長洲人。印江知縣張之頌室。○孺人蕭然，四壁藥房蘿屋間。時聞誦詩讀書聲，遠近稱女學士。

初夏送夫子北上

杜鵑喚春歸。和風吹芳芷。何堪對斯景。把酒送吾子。分手卽天涯。惜此須臾晷。別緒如繭絲。柔情似潭水。離懷寄孤鴻。相思託雙鯉。征途勉加餐。努力拾青紫。上慰高堂親。下酬賢伯氏。君行旣雅醇。君才復俊美。但保金石心。豪門勿投趾。桃李易凋殘。松柏豈朝萎。行矣勿悲嗟。風雲自此始。不恃不求。何用不戚。勉夫石心。斷豪門。迹守此兩言。可云有所不爲矣。此種詩猶存雌雄遺意。

周淑媛字又洲。江南泰州人。

元日哭先大人

一夜思親淚。天明又復收。恐傷慈母意。暗向枕邊流。仁孝之言。自在流出。

張蘩字采子。江南長洲人。吳士安室。

戲爲外子撥悶

失意休教苦自煎。爲君把卷論前賢。兒頑應笑同王霸。婢鈍何須學鄭玄。滌器當壚情更洽。操春舉案志猶堅。久藏賴有牀頭醞。莫負梧桐月正圓。奴愛才如蕭穎士。婢知書似馮康成。向推劍南佳句。得其意而翻用之。以高隱重不以才藻鳴也。家風敦朴。於茲可見。

沈樹榮字素嘉。江南吳江人。葉舒穎室。

送別

落葉楓林兩岸秋。曾於南浦動離愁。祇今一片江頭月。不照歸舟照去舟。

瑯琊女子

浙江桐鄉人

和汪鈍翁姑蘇楊柳枝詞

柳條風靜雨初收。更罷羅衣懶上樓。花下欲將新月拜。一鉤卻到綠梢頭。

葉

榜江南崑山人
許心辰室

孤鴈

一聲淒切度河梁。不訴離羣也斷腸。寂歷寒沙眠鐵羽。空明霜月照分行。無心避患銜蘆荻。肯戀餘生逐稻粱。聞道邊庭尙征戍。孤鳴幸勿到遼陽。

侯承恩

江南嘉定人

丁酉三月葬親吳郡貞山之麓。淚餘賦此。

買得吳山土一堆。思親日夕寸腸摧。粗安窀穸封新鬢。可卜神明穩夜臺。滿目松杉滋涕淚。無情猿鳥亦悲哀。祖先邱隴遙相望。累葉忠魂摠不灰。

薛

瓊字素儀江南長洲人
山人李崧繼室

寒食

一樣鶯花二月天。錫簫聲裏興蕭然。三旬九食吾家事。不獨今朝是禁烟。想見清士家風。

張氏湖北潛江人

絕句

病廢機絲老廢蠶，牙籤細帙與猶耽。唐詩漢賦都收捲，日向明窗誦二南。棄辭藻而重修齊

倪瑞璿江南宿遷人徐起泰繼室○柔順供職婦德也而能發潛

過凌城廟謁古戴二公忠義塚

古諱達可戴諱國柱同以忠勇見知於可法史公自注時史公總督漕運巡撫淮揚懷宗十四年流寇袁時中

寇睢古時駐宿邀戴往擊戰於凌城廟衆寡不敵俱死焉史公隨遣使致祭命於所瘞地刻石

立忠義塚嗚呼二公真烈丈夫哉丁酉秋予同母氏往過拜其墓深惜其事之未傳於史也因

爲詩以俟輜軒之採

秋風鳴高空亂峯下斜照老樹枝交天蒼黃覆古廟入門捫殘碑太息拜遺貌憶昔明運衰羣盜起聚嘯

勦撫兩失策鱷蠱變虎豹所過無堅城蒼生任凌暴二公真人豪忠貞出天造金鐵冶成心冰霜厲寒操

賊鋒一朝來矢石躬親冒官小誓捐軀力薄那自料慷慨互爭先從容共談笑燃炮擊賊人天地爲震悼

賊用魘魅法自注命裸婦人拜炮反震蟻聚蜂屯到衆寡勢不當頭斷臂猶掉成仁併取義日月爭光耀碧血灑平蕪

賊馬不敢蹈至今曠野中白日常見燒如何八十年薦紳少憑弔姓氏已稀傳父老猶相告蘭臺事纂修

幽微須闢耀。誰為秉筆人。搜求不遺奧。勳撫兩失策二語。斷盡熊文燦楊嗣昌諸人。之與古載二公。明史失載。此詩可補闕略。

四弟懇予易其名字。予取文王世子語為更名曰克。听字徵子。因詩以勗。

人生重賢豪。不在名字美。難以易相方。自注。唐進士黃居難。為詩幕。白樂天故名居難。字樂地。赤將白自比。自注。李亦自比李白。豈遂足追配。

效顰空復爾。四弟性明慧。翩翩致可喜。世業下相城。生來故家子。先人早棄世。淪落來居此。家毀不謀歸。

儒寓貧如洗。晝荻復和丸。提攜賴母氏。就傅勤誦讀。弱冠終軍齒。挺然才氣雄。籍甚聲華起。爾字與爾名。

呼之有年矣。忽然厭舊稱。十呼嬾一唯。向我索更之。我特不敢諉。文取世子篇。義載大戴禮。宋郊變宋庠。

飲香從此始。名氏新改初。譬若居新徙。努力事葺修。棟梁庶不圯。莫若江南橘。踰淮化為枳。酌雅稟經。顧名思義。詩不作。

徒作。

戲贈山人李老。自注。山人有足疾。為余舅氏灌園。

李山人年已翁。可憐白髮顏。猶紅矮菊屋。是爾宮。青藜杖。是爾童。烟霞滿懷邱壑臥。夜呼骨痛朝呼餓。戚

施舉步行逡巡。天意厚汝汝莫嗔。汝不見孫臏成名無一足。苻堅快意得半人。

樊大舅客金陵。有詩弔方正學先生。墓予次其韻。

金川門入北平軍。叔父周公逐嗣君。碧血一區埋十族。青山千古護孤墳。祠依忠烈綠同志。自注。聞先生祠與景公祠

相接。薛蝕碑銘認舊文。樵牧那知青史事。經過也復弔斜曛。甲。正學詩。所見夥矣。詞嚴義正。氣足神完。無出斯篇之右。

閱明史馬士英傳自注阮大誠附

王師問罪近江濱。宰相中書醉未聞。復社怨深謀汲汲。揚州表到血紛紛。金墉舊險崇朝棄。郿塢多藏一炬焚。賣國仍將身自賣。姦雄兩字惜稱君。貴陽懷寧二賊臣。祇修復社之怨。報魏閹之驕。王師南下。閹部殺身亡家。遺臭終古。末路安可問哉。姦雄二字。曹孟德輩足以當之。予以姦而不予以雄。具有卓識。

金陵懷古

石頭天險壯層城。虎踞龍蟠舊有名。峙鼎三分吳大帝。渡江五馬晉東京。高臺鳳去荒烟滿。廢苑螢飛茂草生。往事不堪頻想像。夕陽西下看潮平。

憶母

河廣難杭莫我過。未知安否近如何。暗中時滴思親淚。只恐思兒淚更多。因憶母而轉出母之憶女。其情倍深。

林以寧字亞清浙江錢塘人鑲石臣室。

憶父禹都

曉登百尺樓。遙望中條山。天際有白雲。日夕自往還。去來何寥邈。引領難追攀。誰云生女好。少長違親顏。豈不眷庭闈。安能事間關。問寢久疎闕。視膳良以艱。回步循南陔。躑躅涕洟瀾。

陳

珮字懷玉江南天長人江賓谷室。

瘦菊爲小婢作

菊瘦依階砌，簷深承露難。莫言根蒂弱，翻足奈秋寒。

哭程夫人

忽駕青鸞返碧虛，瓊花吹折痛何如。修文應是才人盡，徵到姮娥舊侍書。天上一用點化頓覺鮮妍。

蔡

琬字季玉，遂陽人。綬遠將軍。蔡榮女，高文良公其倬繼室。詔封一品夫人。著有蘊真軒小草。○選本中錄取四章。皆擲地有聲者。

辰龍關

一徑登危獨惘然，重關寂寂鎖寒烟。遺民老剩頭間雪，戰地秋閒郭外田。聞道萬人隨匹馬，曾經六月墮飛鳶。殘碑灑盡諸軍淚，苔蝕塵封四十年。

關鎖嶺

山從絕域勢遙分，天限西南自昔聞。烽靜戍樓狐上屋，風喧古木鶴驚羣。橫盤石磴危通馬，深鎖雄關冷護雲。叱馭昇平猶覺險，揮戈誰憶舊將軍。

江西坡

西嶺千里簇劍鏃，曾壓萬騎羴羊腸。鬼燈明滅團青血，野塚荒涼嘯白楊。夢斷層霄空漠漠，事隨流水去

茫茫只今剩有殘兵卒。指點空山說戰場。

九峯寺

蘿壁松門一徑深。題名猶記舊鋪金。苔生塵鼎無香火。經蝕僧廚有蠹蟬。赤手屠鯨千載事。白頭歸佛一
生心。征南部曲今誰是。剩有枯禪守故林。綏遠將軍平吳逆後。隨獲譴笞。歸空門以終。四章皆懷演。南征戰地悲歌感概。其原出於少陵諸將。咏懷古蹟等篇。

方

克字彩林。廣東番禺人。進士諱殿元。女廣文。金終室。子祖靜。貴。諱封恭人。○恭人承家教。古詩宗漢魏。近體宗盛唐。故所著無宋元氣味。

薤上露

薤上露。日出晞。朝槿花。日暮萎。微物轉瞬間。人生諒如斯。彭祖帝堯民。亦復同所歸。服食求神仙。仙成竟
何時。守道以待終。令名庶可垂。薤露原詞。只言人命奄忽。以挽王公貴人。此陳求仙之謬。而以守道令名為不朽。粹然儒者之言。

送孟調大姪南還

相對疑夢寐。言別百愁生。孤飛易為感。使我心魂驚。聚散人生常。此別難為情。爾我本一樹。相期共枯榮。爾
今折枝條。芽肄何時萌。沾潤我本懷。老髦願難行。爾今返吳中。閉門守硜硜。勉哉崇令德。努力以揚名。取法
不在遠。祖父有遺型。周親我老矣。垂涕重丁寧。古意古音。剔之以正。

示長媳楊珊瑚

十年為婦蓼莪餘。疏水家風樂自如。宛似舉場勤苦士。粧成惟對古人書。姑近儒者。婦近書生。園中樂事備於一家矣。

吳雯華字雲素江南吳江人貢生葉舒齋室

秋日郵居

自愛投閒縱所之。江村林壑漫棲遲。本無喜愠抽身早。須信英雄種菜宜。逸興耽於黃菊候。幽情訴與白鷗知。綠楊影裏三間屋。羨殺漁人理釣絲。

沈蕙玉字晚亭江南吳江人貢生倪弁江室著有聊一軒詩存○讀四箴可補班氏女誠惜年命不永而弁江續學旋亦淪亡評閱時為歎歎者久之

自箴

天生蒸民有覺其性。陰陽肇判。含元達順。琴瑟載咏。蘋蘩攸司。夙夜用敬。猶懼或虧。無曰深閨。莫余云覲。

淑慝在躬。指視暗室。維椒與蘭。植於中田。我思君子。淑慎塞淵。此以慎獨自箴

先民有言。言不出閭。牝雞之晨。厥家用損。節以應佩。琴以和神。詞苟或費。寧默而存。勿尚爾舌。寸心是弛。

既悔而追。不脛千里。嗟嗟愚盲。慎其德音。鸚鵡多言。祗名文禽。此以謹言自箴

紆纒在筥。煥乎有爛。淒其以風。滋我永歎。維織與紉。為坊厥心。舍業而嬉。淫慝相尋。野有絡緯。振迅其翼。

爾安用媮。微羽所疾。雖有孔翠。不如春蠶。之子纂組。不如布縑。此以勤勞自箴

冀妻如賓。孟光舉案。夫豈矯情。媮惰斯遠。啼眉折腰。邦國之妖。彼昏罔知。反以用驕。幽閒貞靜。曰配君子。

載色載笑。若佐之史。敬而能和。穆如清風。修身準此。維以令終。此以和敬自箴

同聲歌

少小屬閨闈。感君意纏綿。聘以明月珠。迎以黃金韉。結褵自今夕。誓好永百年。采蘭涉秋水。薦藻奉華筵。合歡裁作被。朱絲操作絃。雖無蘭蕙姿。向日呈芳妍。一身皆君有。寸心私自憐。何用答嘉惠。持以充豆籩。在天莫爲雲。雨落難上天。在地莫爲影。日暮愁棄捐。婉孌保素志。跬步稱比肩。於同聲中寫同心。有和順無狎昵。所謂有道妻子。皆

得快樂於弁江夫婦見之。

楊珊瑚 字珮聲。浙江山陰人。布衣。楊寶女。觀察金祖靜室。

鄉思樓

旅寓金閭五十秋。親年多半老依劉。嗟予未識鄉關路。廿載空登鄉思樓。淺淺語自。有遠神。

姚世鑑 字金心。浙江歸安人。王豫室。

臥病

臥病逾時歲。又新衡門兩版絕。羈塵垂簾怕放東風入。春到貧家不當春。

姚益敬 字元吉。浙江歸安人。董暨室。

力疾作書寄外因題紙尾

尺素題初罷。輕羅淚未乾。離愁不堪寄。聊復報平安。

周淑履

山東萊陽人。高蔭榘室。○婦爲相國曾孫女。幼工詩。子歸後。夫婦如師友。然蔭榘早歿。家盡落。母家亦落。貧無依藉。織紵以生。教三子讀書成名。下士遠近以女師尊之。

述懷

札札機杼聲。漠漠空天雪。操作入中宵。十指皆皴裂。積絲匹難成。不忍中道絕。著此縞素裳。怡然矢同穴。
積絲十字爲學如是立節亦如是。

孤兒髻鬢年。欲令就外傅。大者陶性情。次亦理章句。寧云致通顯。不敢隕故步。爾父有殘書。慰母在寒素。
冬日送別表妹

蕭蕭風雪逼人寒。欲整行裝忍淚看。珍重送君無別語。高堂代我問平安。

吳

字道調。浙江嘉興人。鄭聯室。

冬日村居讀靖節先生日月依辰至句遂演成一律

日月依辰至。村居歲欲殘。補衣朝旭暖。織素夜燈寒。節分於陵苦。貧借孺仲安。囊空忘羞澀。不用一錢看。

奉懷兩大人

自注幼弟已亡。

復抱西河痛。遙知淚不乾。可憐雙白髮。誰與勸加餐。

癸丑秋陳妾得舉一子時壻年四旬矣誌喜

窮薄還憑世澤存。朝來弧矢喜懸門。翻嗟姑舅先朝露。未得生前一弄孫。
誌喜中轉復增悲。微特不妬。見孝思此婦德之純者。

聞鴈

一字橫排筍柱來，聲聲似撥楚絃哀。願爲羽翼借飛去，縱遇高峯誓不回。

綠牡丹和韻

平臺冉冉黛初勻，不逐鄰園鬪麗春。金谷荒涼成往事，風前猶想墜樓人。商邱宋公任江左屏藩時咏綠

刻畫景狀餘韻無存也此妙在不即不離

錢紉惠江南吳縣人太史諱中諧女武平令許廷鑾室○竹素以詩鳴吳中今之晉靈光也賦配亦高風格趨步唐音

新安江行

乘潮渡漁浦，杳嶂夾江濱。下瞰綠波影，能令織芥分。筏移疑入鏡，碓落自春雲。聽盡潺湲水，灘高易夕曛。

佳句

度黎關

迢遞躡黎嶺，肩輿勝駑駘。雄關限閩越，幽境極東南。地暖常多雨，雲開忽作嵐。鄉閭望不極，聊復上岳龕。

毛秀惠字山輝江南太倉人諸生王傑室○存素娛情畫理不慕榮祿閩中人亦同素心讀其詩想見其幽居之樂

屝水謠

綠楊深沉塘水淺，輾轆車聲滿。驅嘯倒挽河流上，隴飛渴鳥銜尾迴環轉。今夏旱久農心勞，西風刮地黃

塵高原田逆裂龜兆坼引水灌之如沃焦男婦足繭更流血鞭牛日夜牛蹄脫田中黃秧料難活村村盡
呼力已竭其聲促恰稱此題讀雲漢詩可悟

漁父圖

竹竿鼻鼻微風裏失魚不憂得不喜收綸放艇出蘆叢白鷺橫空忽飛起江皋落日江水平水清無復見
魚行仙源有路渺何處雲水蒼茫無限情

錢塘懷古

京洛煙塵棄不收西湖臺閣作金甌流連秋色還春色歌詠杭州勝汴州自願苟安增幣帛誰抒孤憤報
仇讎棲霞嶺畔將軍墓只有南枝記舊邱宋高苟安父雖不報戊午讎議序極言之團圍中亦見及此

乙卯秋外赴金陵省試不售詩以慰之

新粧競掃學輕盈俗豔由來易日成誰識天寒倚修竹亭亭日暮最孤清
寒女頻年織錦機深閨寂寂掩重扉卻憐鳩鳥爲媒者空向秋風理嫁衣
重陽風雨滯幽齋失意人難作遣懷籬菊已花還覓醉便須沽酒拔金釵慰夫不遇喜無嗚咽之音

許飛雲字天衣江南吳縣人諸生王又溟室

新月

遠望雲山暮靄浮。初生纖魄挂南樓。樹頭宿鳥驚弓影。水面遊魚怯釣鉤。淡淡畫眉微有恨。深深學拜便含愁。廣寒風動銀河淺。羅襪新裁夜出遊。此方虛谷所謂著題體也。中二聯寫景寫情。新字於末句借點布置極工。

許孟昭字景班。江南元和人。許廷鑑女。

寒夜曲

金翦生寒夜漏長。玉人纖手嬾縫裳。素娥偏耐秋光冷。來照鴛鴦瓦上霜。有義山絕句神味。

許楚畹江南元和人。許廷鑑孫女。

寒夜曲

沉沉夜永漏聲添。倚戶蕭條對彩蟾。青女不知幽院冷。還吹霜氣入重檐。

陳奇芳字蘭佩。江南吳縣人。舉人。時數五室。

秋風

乍覺商飈動。園林色漸非。井梧吹欲墮。梁燕送將歸。延爽開羅幕。迎涼捲紵衣。漢宮藏扇者。安命掩金扉。

周巽字順吉。浙江山陰人。仁和諸生。沈心室著。有須曼閣小稿。

秋夜聞笛

今夕是何夕。忽聽蒼龍吟。成連之海上。千載有遺音。窺牖月如水。隔牆風滿林。漏深吹忽斷。不盡故鄉心。

通體高格，明人
中近徐昌谷。

汪瑤字雲上，江南新安人，朱昂室。

寒山自注：趙凡夫樓隱處。

飛雨過羣嶺，籃輿陟翠微。幽徑入松際，輕風吹人衣。高士有遺跡，想見疏盤時。老屋就深樹，寒泉瀉平池。墓梅雙虬龍，屈鐵盤高枝。緬懷碩人軸，偕隱賦樂飢。已辭梁棟材，自遠太廟犧。一門擅文藻，淵雅良可師。
白注：凡夫及子靈均，工古篆，配陸卿子工詩，子婦文徽，工寫花鳥。予亦慕高隱，願采商山芝。鹿門期可遂，懷古生遐思。
甲借隱人而已，亦願借隱志趣可知。

吳若華，浙江嘉興人，潘司吳嗣爵女，風恬波室。○若華制藝極工，小題鑲刻近隆萬人，王漁洋稱士女商婦人能工制舉文，此其替人矣。

新磨古鏡

古鏡朦朧減舊清，一朝磨洗倍晶瑩。雲開夜月秋毫見，雨過菱花色相明。閱世興亡疑有眼，辨人好醜總無聲。玉臺粧罷時時拂，莫使浮塵又暗生。
五語寫古字巧，六語喻君子知人不自矜其名也，對偶較勝。

留別淮陰道署

三載依依玉鏡前，舊梳粧處最相憐。不知今後紅窗裏，又是何人點翠鈿。

秋風

滿耳蕭騷夢不成，殘雲涼月夜凄清。等閒吹落長林葉，雜入千家擣練聲。

宋凌雲字逸仙江南長洲人李博室○昔錄部宋南園先生嘗向余言孫女弱齡卽喜誦吾子詩粧臺側時手一編也今將四十年其言如昨而逸仙已歸泉壤矣俯仰三世可勝慨然

偶成

天外魚書絕。征人豈念家。可憐小兒女。夜夜看燈花。

憶父

吳樹燕雲斷尺書。迢迢兩地恨何如。夢魂不憚長安遠。幾度乘風問起居。欲歸未得悵空囊。兒女相思淚數行。苦憶寢門雙白鬢。朝朝扶杖倚闔望。

許權字宜璣江西江州人進士崔謨室

七夕

七月七之夕。家家望女牛。神仙不可見。涼風何颼颼。我疑天孫之巧轉。近拙東瀛隔斷難。越一年一度一分離。千古銀河響幽咽。不須乞巧向天孫。若賜巧來愁欲絕。君不見東家力田婦。耕鑿常相隨。旦暮共苦樂。自首不分離。又不見西鄰有才女。夫婿上玉堂。終年不相見。悵望悲河梁。玉露無聲夜清悄。盤中盼斷蛛絲遠。不知巧思落誰家。只恐巧多人易老。寄語人間癡女兒。寧爲其拙毋爲巧。

尹瓊華字乘貞江南吳縣人卞培基室○乘貞淑慎敦孝行年二十三歿培基以有子不再娶重婦德也

題姜貞女畫自注綸周女名桂字芳華

空閨工六法。取勢入微茫。野渡漲秋水。遠山明夕陽。古心無麗藻。淡墨有冰霜。不點雙飛鳥。圖中斷頡頏。

三四語正寫畫餘俱從守貞著筆不同泛泛。

韓韞玉江南長洲人。宗伯文懿公幼女。西寧知縣顧渭熊室。○前輩韓東籬太史述幼妹少讀羣書。兼工詞翰。年三十時著述已富。病歿前。盡取焚之。不欲以文采見也。渭熊從書帙中檢得十餘首。比於吉光片羽云。

詠鶴

丹頂玄裳白羽輕。芝田舊日得仙名。生來雲水原天性。望裏蓬壺是去程。代遠每過千歲壽。露寒常向九臯鳴。不隨衛國乘軒隊。穩臥松巖夢太清。

楊克恭字德基。江南揚州人。少傳敏莊。公孫女。德清徐志岩室。封宜人。

讀唐書李白傳

汾陽微日無人識。獨有青蓮賞最真。再造唐家緣救免。可知卓見出詩人。太白識郭汾陽於行伍中。為脫解職以贖其罪。新唐書載之。蘇子瞻言之。後人翻駁謂無其事者。吹毛索癩。殊可不必。

金順字德人。江南吳縣人。中書汪曾裕室。夫亡。以節孝稱。

題管夫人畫竹

墨妙由來數仲姬。閨房靜對寫風枝。王孫若解凌霜節。合署鷗波老畫師。題仲姬畫。卻從竹上。風論王孫用意微婉。

袁

機

字素文浙江仁和人太史子才之妹幼許字如皋高氏子後高以子有惡疾願離婦素文曰女從一者也疾我侍之死我守之卒適高高躁戾恣蕩傾奩具為狎邪費不足扑扶外至以

火燒灼之姑救之毆母折齒既欲鬻妻以償博者不得已始歸母家長齋素衣孝養母氏高氏子死哭泣盡哀血淚盡越一年亦死女子中苦行無逾此也檢篋笥得手編列女傳三卷詩一卷

有鳳

有鳳荒山老桐花不復春死還憐弱女生已作陳人鐙影三更夢曇花頃刻身何如蠅與鷯鳴噪得天真

聞鴈

秋深霜氣重孤雁最先鳴響入空閨靜心憐永夜清自從成隻影同是感離情誰許並高節寒林有女貞

應自歸母家後作自憐隻影靜正守真言外絕無怨尤可以哀其志矣

卷三十二

戒顯字悔堂太倉人以下僧詩○玩登黃鶴樓詩

登黃鶴樓

誰知地老天荒後猶得重登黃鶴樓浮世已隨塵劫換空江仍入大荒流楚王宮殿銅駝臥唐代仙真鐵

笛秋極目蒼茫渺何處一瓢高挂亂雲頭起有撼山岳吞雲夢之概具此胸次手筆

止崑字盤堂浙江仁和人著有同凡草○盤堂徐姓名繼恩國變後為僧嘗云人非金石立見消亡不若逃形全真自遊方外詩三卷王新城尚書目為馮惠休帛道猷之流

田家

田家無他望。所望在平畦。但恐終歲力。不得遂其私。何哉造物者。亦得厚我施。夜來微雨過。使我菜麥滋。登邱一憑眺。秀色遠參差。此時桃與李。豈乏好容姿。顧予朴野性。獨與此相宜。及時務耕作。那敢貪天時。
近陶公性情不在面貌。

戲酬友人惠日鑄茶

幾日春遊徧若耶。入城布衲滿煙霞。正愁仙福難消受。又喫人間御貢茶。

月下由御教場下投淨慈宿朗公房

御教場中月直時。下山全不道歸遲。三松影落半湖水。一路沿鐘到淨慈。

南潛字月巖。浙江烏程人。○月巖董姓。說名本質生。中歲出家。吳之靈巖寺。詩思路手筆俱不凡。然多偏缺。欠完善。茲錄其近情者。

招魂曲

夢魂夜逐青桐葉。飛落秋園作蝴蝶。一星鬼火入筵青。法王院榜招魂帖。靈旛翦紗錢。翦紙。月黑松搖古鬚鬢。高僧咒開枉死城。精靈隱隱啼秋怯。嘯聲認得故人魂。猶帶生前舊豪俠。
鬼氣近昌谷。

宮人入道和唐人

聽斷昭陽鼓吹聲。道家衣向御前更。已拋團扇三秋怨。卻勝琵琶萬里行。留錦祗謀裝秘笈。買絲還擬繡

飛瓊。天家異日齋香使。白髮宮奴記舊名。和平之音。

聽雨

梧桐滴瀝客心驚。秋雨能吹白髮生。孤館燈昏惟對影。麗譙鼓濕不知更。前宵松月疑塵夢。明日泥塗聽屐聲。尋著漏痕當屋角。夜深百匝繞書行。

實訥字可南。江南吳縣人。○詩從黃子若。木虛鈔得。無稿本也。氣清語削。滌盡塵俗。見我吳前此大有詩僧。

石公山

湖上山忽起。突兀孤雲中。洪濤日相擊。飛雪灑晴空。懸崖疑欲墮。怪異由天工。雨晴蒼翠濕。水落根玲瓏。時有好事者。閒來窮鴻濛。

傷范東生

茗水清。湖水渾。東西相望愁人魂。君今長別故山去。春光寂寂梅花村。湛園月下池光冷。冷侵芙蓉夜正永。於今何處問風騷。空向草堂弔清影。

江樓望月

江村猶不夜。月已到高樓。碧瓦光相射。虛檐影自流。山山皆在水。樹樹盡成秋。天迥空無著。西風一釣舟。
起與殘夜水明樓同妙。山山皆在水。寫得殘夜山水出。

爛溪訪周公美不值

晚風吹亂葦。簌簌鳴荒疇。山月白如曉。溪雲涼似秋。蟬聲在高樹。水氣生空舟。問主不相見。門前閒片鷗。夜同凝父宿。元朗齋頭有懷秋潭。

簾外絲絲雨。因風亦易晴。孤燈照清話。一鉢了浮生。野鳥不依樹。閒雲偶入城。懸知溪上意。流水是經聲。
生新之句時
近賈長江

答董然明

木落水容淡。寥寥獨鳥還。小樓明月上。照見隔溪山。貽我句何逸。想君心倍閒。前期倘不棄。掃石梅花間。
所選八首中。五首寫月。得月之神。并
儂月下。人性情。前身豈謝希逸耶。

顯謨字言成。江
南吳縣人。

東陸長卿

爲別亦何易。山山盡是秋。曾期過一夜。不見到孤舟。風勁葉離樹。月寒人在樓。所思湖水闊。清夢得同遊。

海遐字介旭。江
南宜興人。

送友之吳門

東風吹柳拭烟輕。折贈柔條空復情。一望吳山千萬疊。知君只在此中行。

同揆字輪菴江南吳縣人著有寒溪詩○輪菴文中翰啓美之子文獻公猶子也

鼎湖篇贈尹紫芝內翰

丁丑戊寅間先公受知於烈皇帝遵旨改撰琴譜宣定五音正聲被諸郊祀上自製五建皇極百僚師師諸曲命先公付尹紫芝內翰翻譜鈎剔時司其事者內監琴張張奉命出宮嬪褚貞娥等禮內翰爲師指授琴學頒賜紫花御書酒果縑葛之屬極一時寵遇迨闖賊肆逆烈皇帝殉社稷諸善琴者偕投內池內翰恐御製新譜失傳忍死抱琴而逃南歸謁先公於香草垞言亡國時事甚悉從此三十九年不復聞音耗矣癸亥秋余在寒溪內翰忽來相見如夢寐意欲薤染事余學佛余傷之爲賦鼎湖篇以贈

鼎湖龍去秋溟溟驚風吹雨秋山青白頭中翰淚凝霰叫霜斷雁棲寒汀烈皇御宇十七載身在深宮心四海一朝地老與天荒城郭依稀人事改當年刪定南薰曲內殿填詞徵召促琴張好學直乾清先公屢賜金蓮燭雅樂推君獨擅場望春樓下拜君王高山一奏天顏喜奉勅新翻舊典章昭儀傳諭何諄切予賚先顏女兒葛上林避暑撫絲桐溫語貞娥遵秘訣流泉石上坐相邀薇省風清玉珮搖神武門前輕執戟永和宮裏薄吹簫如意初殤淚沾臆自注皇五子悼靈王那堪又報河南失鈿蟬零落葬田妃池水蒼茫尙凝碧寒食花飛不見春冬青塚樹斫爲薪煤山一片淒涼月猶照疆場血化燐世間萬境須臾夢老臣剩有西

臺慟四十年來寄食艱。何人再聽高山弄。鑑湖南去雲門外。古寺松篁景旣靄。維舟無意忽相逢。恍惚夢魂同。晤對夕陽影裏話前朝。天壽諸陵王氣消。留得閒身師白足。滿頭白髮影飄蕭。吳梅村祭酒詩。道勝可破管絃。令讀者愀然傷懷。此篇竟似出梅村手。梅村道本身事。輪菴道先人事。其感一也。神來尤在後半。

過五經嶺

絕壑松杉合。懸巖冒雨登。雲中人種麥。天際我攀藤。路盡峯能轉。巢危石欲崩。寒烟滿蘿屋。應有未歸僧。阻風登采石磯云。去帆疑峽走。捲浪駭江飛。亦能作奇語。

吳翼生歸自塞上話舊

七載風霜雪滿韉。曾騎款段獨行邊。之官恰值初裁俸。作吏惟知不愛錢。薄宦暫歸仍是客。殘僧久別已忘年。地爐芋火深宵共。破院相依有夙緣。清空如話。吳洪雅之清味自見。吳後爲冢宰。

大燈字同岑。浙江秀水人。○以下五僧詩皆得自選本中。

秋夜宿八峯山房

黃花籬下亂蛩鳴。古寺秋高嶺月明。夜半石牀清睡去。不知枕上落泉聲。

大瓠字筭在江。南宣城人。

澗墅留贈周玉臯儀部

瓢笠飄然特訊君。連朝風雨惜離羣。青楊花覆山橋路。白石溪連竹屋雲。卻怪鷓鴣嘲鳳德。敢將驪鬘應龍文。荒涼一逕空延佇。回首江關已夕曛。時儀部罷官家居故有五六語。

函可

祖心。廣東南海人。

丁亥春將歸羅浮留別黃仙裳

春盡雨聲裏。揚帆趁曉晴。路經三笑寺。歸向五羊城。末世石交重。餘生瓦鉢輕。悲涼無限意。江月爲誰明。

本源

字兀菴。浙江湖州人。

過王矯菴舊居卻寄郡城

菴城塵跡在。久不住崑阿。白日攜筇到。青山送客多。林空一片月。澗落萬重波。知我無如子。秋深幾度過。

大寧

字石湖。浙江錢塘人。

寄胡柏菴

時有渡江夢。孤懷歷歲深。澹雲歸鳥意。春樹野人心。岸草青連屋。山花紅滿林。好知千古事。明日幾回尋。

成鷺

字跡。廣東番禺人。著有咸陟堂詩集。○上人姓方氏。本名諸生。九谷先生弟也。中年削髮。既爲僧。所著述皆古歌詩雜文。無語錄。偶頌等項。本朝僧人。鮮出其右者。擬之於古。其惟儼祕淑。

之儼

祝髮呈本師

男兒愛身及膚髮，平生一毛不敢拔。蹉跎四十一回春，負此遺骸等株橛。蒙師爲我操慧刀，頭上不與留。織毫一朝四大輕，鴻毛昔日縫掖今方袍。縫掖翁，方袍子，本來面目應相似。鏡中見影不見形，莫道昨非今乃是。請辭大衆入山去，山月松風供穩睡。莫道昨非今乃是，見爲儒未必非，爲僧未必是也。知其未必是而爲之，此何故耶。

羅浮采藥歌

朱明老仙能辟穀，日飯胡麻茹黃獨。輕身直上鐵橋行，踏破飛雲雲在足。四百峯頭種紫芝，千尋澗底菖蒲綠。藥名藥品皆離奇，神農本草那得知。相逢一一爲予說，予心半信還半疑。老仙大笑導予去，指點深山最深處。隨取隨有卻隨無，殺人活人不知數。傾筐不盈盈更歸，歸時忘卻來時路。縹緲欲仙。

秋鐘

寂寞秋原寺，霜鐘韻最幽。數聲生殿角，一夜白人頭。晶晶月當枕，蕭蕭風滿樓。何能此時節，還起景陽愁。

鏡

愛爾本無我，虛明識故人。滯形還偶影，顧笑復憐嬰。虛室自生白，太虛誰寫真。所嗟承弁髦，一見一回新。惟太空，所以無物不照。寫鏡寫心，是一是二。

問影

不辨誰賓主，何因有往還。憐君時一顧，笑我未能閒。世態膠難合，前塵跡可刪。終當事韜晦，相待掩重關。

登大科峯頂

愛山登陟不辭勞，直上嶽岑振敝袍。老去始知行腳穩，年來惟恐置身高。青天有路隨孤鶴，滄海無根仗六鰲。閒倚西峯發清嘯，下方誰識是吾曹。出世人何必作此語耶。

讀宋史偶筆

從來吾道本虛公，洛蜀何因有異同。端禮門前書姓氏，原來都在黨人中。洛蜀同異總在黨籍碑中一以見程蘇之

均不礙為君子也。此種詩可當史論。

大成字竺華湖南隴陵人

山居

一株兩株老松青，松下結個小茅亭。三日五日來一次，肩荷柳栗手持經。讀經讀到山月出，聽松聽罷天

落星。適然拋卷松間臥，夢與松根乞茯苓。有生趣，另備一格。

海岳字中州江南鎮江人

訪友不值

尋君復不見，寂寞出林間。落葉溪邊路，浮雲海外山。午煙桑柘隱，秋色戶庭閒。愛爾幽棲子，歸來不閉關。

天定字雙溪湖北武昌人

涵師峨帽遊歸因贈

峨帽西去似登天，見說親行到頂邊。古木千年都化石，衲衣六月總裝棉。陰風晝灑巖端雪，急雨宵聞洞口泉。袖得圖歸誇示我，芒鞋踏破意忻然。奇語卻是真境，故人黃尊古住義帽牛戰爲予言之。

僧殘字石溪湖南湘潭人

古意

瘞琴峨帽巔，知音何寥寥。埋骨易水旁，俠士魂難招。物性不可違，豈必漆與膠。嘗恨士不遇，白首空蕭騷。齊已能作雄壯語，如拔劍繞殘尊，歌終便出門是也，此更過之。

超遠字心壁雲南人。○心壁出家西江之廬山，商邱宋公巡撫西江，與酬接唱和後移節江蘇，心壁復來吳中，又有唱和詩，時人以東坡得佛印比之。

竹湛

數家煙樹裏，竹湛最佳名。茅屋經秋補，山田隔歲耕。殘陽歸牧笛，零露咽蟲聲。更遇村翁說，生平未入城。

鐵鑊橋

萬山誰劃斷，一水界東西。地曠風逾急，天低雲易迷。半空橫鐵索，千尺跨虹霓。我欲橋邊宿，江猿休夜啼。

曉音字唯菴，著有高雲堂詩集。○唯菴主華山方丈，聖祖御製有欲遊華山未往七絕，唯菴和至百首，迤呈大約以多爲貴者，茲祇錄清真一章，重性情也。

過東寺晤天逸兄別來已二十六年白頭相對慨然有作

吳天楚地兩茫茫。尺素難憑雁寄將。隔絕五千餘道路。自注：兄有母。年逾九十。俄經二十六星霜。祗疑相對還成夢。敢定重逢在

此方。顧我青年悲失恃。羨君白髮奉高堂。

性休字尺木。前朝宗室。後未詳省縣。

漁父圖
東西南北任遨遊。萬里長江一葉舟。夢裏不知身是客。醒來大地忽新秋。從漁洋詩話采入。

德元字訥園。江南長洲人。著有來鶴菴詩。

玄墓看梅

謝卻蘭橈信杖藜。千峯盤磴入花畦。晴雲渡影迷三徑。暗水流香冷一溪。僧寺多藏深樹裏。人家半在夕陽西。登臨更上朝元閣。滿壁苔痕沒舊題。
石牆茅屋老梅叢。仄徑危崖處處通。半嶺人烟香雪裏。下方雞犬白雲中。溪邊楊柳萌新綠。谷口櫻桃綴小紅。還擬放舟明月夜。虎山橋北太湖東。

通岸字智海。廣東人。

采石謁李祠題峨嵋亭

江南雨過羣峯青。沙邊蘭漿時一停。青蓮居士不可見。千秋空有峨嵋亭。峨嵋山月還依舊。昔年曾照杯

中酒爲問騎鯨飛上天，不知更落人間否。

古芸字願來，廣東人。

山行

出門無定所，一路喬松陰。流水道人意，青山太古心。偶然乘興往，不覺入雲深。獨立發長嘯，蕭蕭風滿林。

智朴字質菴，江南徐州人。○質菴主湖州之盤山。作山志與新城商邱諸公往還，其詩不多見。

盤山

蒼松亂插連雲石，石上苔痕行虎跡。拄杖來從飛鳥邊，下視蒼茫遠烟碧。

宗渭字耕池，江南華亭人。○耕池少學詩於宋荔裳觀察，中年後遊西堂，尤侍講之門，得所傳授，嘗謂門弟子曰：詩貴有禪理，勿入禪語。弘秀集雖唐人詩，實詩中野狐禪也。卽其議論可以覘其

格品

橫塘夜泊

偶爲看山出，孤舟向晚停。野梅含水白，漁火逗烟青。寒嶼融殘雪，春潭浴亂星。何人吹鐵笛，清響破空冥。

春潭五字，每於夜泊時遇之。

次韻酬九來

風急樹蕭蕭，思君夢易銷。鳥啼黃葉寺，僧語夕陽橋。得句霜鐘度，安禪佛火燒。十年詩律苦，珍重貯山瓢。

織簾先生書齋晚望時顧伊人屬和

隱几澹無慮。日斜偶啓關。鳥聲寒顧竹。樹色靜疑山。世藉六經重。天留一老閒。落霞江岸遠。如爲嘆蒼顏。

浦城下水

隔宵戒語過清晨。細雨枯篷出劍津。舟子下灘常鬪水。估人遇險只呼神。空門無我休言命。逝者如斯任此身。兩岸烏啼行不得。徧山紅染杜鵑新。

重過海印菴

三年重向虎谿遊。石路依然碧水流。鳥背斜陽微帶雨。寺門衰柳漸迎秋。弟兄誼重難爲別。師友情深竟莫酬。歎息此身閒未得。天涯明日又孤舟。鳥背一層斜陽在鳥背一層微帶雨。又一層七字中寫出三層。渾然無迹。

中秋同鹿洲圮授天行紫英業師坐月

銀河激灑碧雲鮮。徙倚柴門月正圓。影瀉蒼松清帶露。光搖秋水澹無煙。鐘殘自愛添衣坐。香燼何妨後客眠。皎潔一年惟此夜。莫教容易負嬋娟。

早起

宿雨散涼色。竹林煙未醒。流鶯三四語。啼破半窗青。

願光字心月

送陳少菴之楚謁所知

粵國千山外。言揚楚水舡。送君出江口。黃葉滿津亭。樹色寒雲夢。秋聲落洞庭。故人一相見。吟眺九疑青。

薄晚字蘭谷。廣西人。

劍閣

險絕惟雙劍。迢遙一線通。水分巴字峽。山接漢王宮。梯石來天上。穿雲入地中。無知憐李特。漫欲寄蠶叢。
五六極形其險。結意見竊據必敗。猶少陵敘公孫述割據後云。恐此復偶然。臨風嘯憫。悵也。

虎邱訪賣花老人

緩攜柳栗訪山家。一路斜陽五色霞。不是閒園易花國。可留餘地種桑麻。
此正論也。勿謂方外人作殺風景語。

元龍字牧堂。江南華亭人。○牧堂與化李氏。祖父遷華亭。名家子也。聖祖南巡。獻詩。命賦山色。有無中稱旨。賜紫。初成詩。取捷。晚歲自悔。苦吟。存詩寥寥。故所收從略。

秋胡行

養蠶勝養兒。養蠶猶吐絲。養兒防親老。而乃離親闈。君憐采桑婦。不念桑榆人。桑榆景苦短。桑婦時悲辛。還君相贈金。請君斷諸妄。君意在桑間。妾情非濮上。攀條謝郎君。倚門人久望。
顏延年此題詩。詳敘列女自見此。渾括大意。明責其不能養親。而秋胡之不孝。彌見。顏詩妙在詳。此詩又妙在簡。

乞食

林間纔定起。洗鉢出門行。童子亦知善。設齋非愛名。說經酬飯價。回施合凡情。果腹便歸去。寒山萬木平。

大寧字石湖江
南桐城人

雜詠

峯頂屋三間。松邊石一片。早晚雲飛來。只有樵夫見。

元璟字借山。浙江平湖人。○借山以詩受聖祖知。居京師久。後放歸。丙午歲。與予遇於天宮佛寺。名流咸在。時炎月。借山稞程。指予曰。此即長洲洗生耶。既出。詩藪相質。爲點出。敗闕幾處。輒心服。

別時整衣送牛里外。知非一例。傲岸者也。惠天牧學士。不輕許人。向人每稱借山。即詩品可知矣。

三忠祠自注。陸秀夫。張世傑。文天祥。

播越無全業。艱危不顧身。匡山傾一旅。柴市接三仁。棋到殘難算。金從鍊後真。崇祠妥海角。歲歲薦香蘋。

一覽樓

未放九峯舟。先登一覽樓。天清鶴孤唳。地盡海東流。佛土由來淨。神仙不易求。松風和梵籟。滌蕩客中愁。

十月朔入會稽山平陽寺參寒泉老人

雙眼平生隘八垓。江東法社半蒿萊。波光清泛耶溪曲。山色奇爭委宛開。鐘自萬松陰裏出。人隨一雁影

邊來。須知水乳相投合。緇石磨靛挽不回。

蛟門

十丈帆張五兩風，笑談間已出蛟宮。兩拳石束波爭立，一隙門開天忽東。雲壓鼉頭蓬島黑，日翻魚眼舵樓紅。平生夷險經曾慣，要吐胸襟浩蕩中。
與東坡泛海詩同一襟懷，乃偏出自學佛人，知不以禪寂自縛者也。

答徐文虎

偉長詩骨玉森森，顧我城南祗樹林。入夢幾人飛白鳳，登臺終古弔黃金。塵中歲月愁將老，霞外心期話自深。若得把茅靈谷近，瘦梅花底共清吟。

斥塚

五里與十里，一雙復一隻。送盡往來人，轉似無情客。

盧溝橋

日色纔分萬衆翼，黃塵漠漠馬蹄驕。題詩笑問桑乾水，曾有閑人過此橋。
十四字中寫盡往來名刹之客，不啻當頭棒喝。

馬家山

山腳山腰盡白雲，晴香蒸處畫氤氳。天公領略詩人意，不遣花開到十分。
花取半開，詩意亦取不盡，此作者有得之旨。

過楊鐵崖故里

玉削羣峯抱一村，甘泉如乳出雲根。負薪伐木扶犁叟，多是楊家十葉孫。
此詩漁洋采入詩話。

睿字目存江南吳縣人。○目存工畫山水花卉人物，俱師法古人。南宗北宗兼善。嘗路過入京師，旋以疾告歸。方外中淡於榮利者，無詩稿，茲從畫卷中采入。

題簪花圖

莫摘濃香壓鬢鴉。懶將時勢鬪鉛華。他年得入維摩室。不許簪花許散花。圖寫張憶嬾簪花。卷中題詠。幾及百人。獨此首甚超。

然修字桐臯。江南長洲人。○桐臯詩筆清倩。蔡大將軍延之京口。欲其漸次主講席也。年三十餘歿。故詩稿不傳。錄其勒石金山一首。

金山

蒼茫落日下藤蘿。身在荆關畫裏過。飛去斷雲雙白鳥。浴成寒浪一青螺。蘄王有廟疎烟冷。郭璞無墳亂石多。千古寂寥俱莫問。且聽江月送漁歌。

岑霽字越亭。江南長洲人。著有柏堂詩。○上人將母柏堂。盡子道。喜讀儒書。敦友生誼。蓋隱於禪者也。詩品清激無塵。遠近名流。爭欲識其面。越亭歿。吳中無詩僧矣。

貫華閣晚眺

輕颺起長林。疎鐘應巖谷。一徑度修篁。高閣散遠目。江平颿去遲。樹暗雲歸速。春江淡容與。寒花正芬馥。物情愛和煦。人意耽幽獨。悠然酌山泉。夕陽下喬木。

柏堂對月和周昇逸

柏堂今夜月。雲物不能侵。對此碧空淨。聞君白雪吟。入簾明鶴髮。繞樹見禽心。坐覺清言久。疎鐘報隔林。

韜光寺

磴道盤紆上化城。松篁影裏亂泉鳴。徑堆黃葉行偏滑。鐘過白雲聲更清。帶雨秋潮歸海靜。盤空山勢到

江平道人尙有燒丹處。認得當年舊鼎鑪。自注。有呂仙鍊丹處。

西山道中

扶攜筇竹上空亭。夾路長松不斷青。千尺澗泉飛洞壑。百盤螺髻入高冥。人行亂葉雲迷屐。雁下寒蘆雪滿汀。空谷誰能繼遺逸。移文應辱草堂靈。詩思清入骨。

自龍泉關過嶺宿白雲寺

萬丈雄關到始諳。空中斗插五浮嵐。白雲僧下山頭寺。黑雨龍飛石上潭。冰雪百層寒代北。波光一線認江南。閒身隨處堪投宿。直上諸天是蔚藍。

尋澗上先生故居

先民隱迹付寒煙。策杖相過一愴然。谷鳥飛鳴竹林外。山花開落草堂前。鑿坏而遞名難晦。采蕨爲糧世共賢。一曲山泉上沙出。何人溉灌種瓜田。是逸民。是遺老。伯夷邵平。一身兼之。詩品清絕。

露筋祠

沙草淒迷煙樹昏。荒祠寂寞託貞魂。靈旗高捲秋風晚。惟有清淮照墓門。賦此題者。多黏賦近腐。王漁洋者。同一寫景。而意言之外。仍復表其幽貞。故自耐人尋味。

蘋花

翠葉金花雜杜蘅。湘湖千里最知名。秋風颯颯過南浦。鄉思無端一夕生。

德亮

字雲牀。江南長洲人。○此吾友樹滋陳上舍弟也。出家後。豪氣未除。能面斥人過。人以正理責之。亦拜而受。詩不多作。出語必欲勝人。

龍泉關

絕域龍泉限。橫關鳥道開。塞雲昏客路。虎氣伏山隈。風土猶三晉。人煙自五臺。當年頻設險。因憶出羣材。
沉雄無
蔬筍氣。

孤花

一點出塵緣。春情仍自深。香微憐土薄。開晚少人尋。雨漬猶堪賞。風吹略不禁。翛然苔石畔。誰爲表孤心。
極寫孤字。
形神俱有。

佛陽

字旭曇。江
南江都人。

月夜過雷塘道中

誰唱吳歌古渡頭。一聲清怨過迷樓。淒涼滿地蘆花月。撩亂連天鴻雁秋。寒樹著霜猶是綺。廢塘埋玉尙名鉤。道人不爲繁華感。午夜行吟別有愁。

德暉

字潛谷。江
南吳縣人。

探梅

清詩別裁 四 卷三十二

二百五

老戀繩牀癩出村。偶攜筇杖破苔痕。到來晴雪迷巖谷。臥入寒雲冷夢魂。目既成餘唯有笑。心當醉處欲忘言。一瓢此際真堪挂。擬翦茅茨覆葦門。王漁洋以蒼雪僧十日花開湖上路。半春家在雲中山。句采入詩話中。潛谷臥入寒雲冷夢魂。名鶴正復不讓。五六尤覺脫盡。

白策

超源字蓮峯。浙江錢塘人。○蓮峯見知於世宗皇上。召入內廷。勅主吳中怡賢禪寺。一時尊宿也。而其詩揣摩王孟。舉釋典玄妙。融化出之。殊有空山冰雪氣象。

題畫

溪口有亭巖邊有屋。不見人歸空留雲宿。向度謙公讚有句云。石屋不見人。惟留白雲住。不意蓮峯先得我心。

夢故友程風衣

春雨何浙浙。春雲更沉沉。程君已隔世。宵夢來相尋。自言身朽心不朽。象外風月皆吾友。從前膠擾海天空。祇是泉臺無美酒。斜陽煙柳門前溪。欲別不別重牽衣。寄語淮陰小兒女。我今野鶴同翻飛。

友人枉過開化寺

青眼多情客。攜朋問暮秋。人同山共瘦。時與水俱流。黃葉迷村路。清風滿寺樓。荒涼郊外景。肯向錦囊收。

題畫

春浦風生柳岸斜。好山何處著人家。白雲遮斷橋西路。不許漁郎問落花。漁郎問落花。韻事也。今云不許問。尤見其韻。

妙復

字天鈞。江南無錫人。有石林吟藁。○天鈞與榮道士。洞泉社。太史雲川。結詩社。稱九龍三逸。

兩鶴

昔年兩白鶴，巢我青松林。夜寒時警露，衆壑流清音。一鶴戀故栖，子焉守雲岑。一鶴忽遐舉，天路探幽深。神山境恍惚，浩浩誰能尋。驚飈吹未息，素羽愁難任。故林遙待汝，貞此巖阿心。作招隱詩讀

訪山中禪友

曉愛山氣清，晚愛山煙蒼。日夕常在山，遂與山相忘。相忘忽相憶，憶我山中客。松扉輕叩聲，或恐驚棲翼。律然字素風，江南常熟人，著有息影齋詩。○素風於詩友三五人，外不慕爵，道不儲鉢資，坐石經室，歲六十年，人品高故，詩亦不落禪門，偶頌體也。柏太史龜隱許，龜隱，靜若止水，人共信之。

落梅

和風和雨點苔紋，漠漠殘香靜裏聞。林下積來全似雪，嶺頭飛去半爲雲。不須橫管吹江郭，最惜空枝冷夕曛。回首孤山山下路，霜禽粉蝶任紛紛。

西齋小菴初成西澗露涓兩先生見過贈詩次韻

緇廬不厭如蝸小，喜是軒窗兩面開。種竹葉沾新雨露，移松根帶舊莓苔。偏多白髮攜筇過，儘放青山入座來。點檢階除忙未了，幽花野草按時栽。佳句

悼鶴次蔣迪甫太史韻

病久胎禽剩瘦形。朝來羽化竟冥冥。孤情望斷林間影。秃筆書殘石上銘。苔徑忽空新印跡。松巢忍見舊遺翎。高人從此添離索。哀怨還如失一丁。語是悼。

元祚字木文。湖廣雲夢人。西湖。山寺住持。著有鶴舟詩草。

獨樹堂散懷

得失吾何有。榮枯事盡刪。神常遊物外。名恐落人間。流水一聲磬。夕陽數點山。閒身倚枯樹。佇看鳥飛還。棕竹新添杖。扶來步步安。渾如得老友。從此共盤桓。天地孤身在。冰霜白髮寒。一編寫情性。只可自家看。

寄高澹游

賣盡青山說買山。高年正好學偷閒。洞庭儘有梅花屋。何不攜家住此間。澹游工六法。故有起句。

明印字九方。江南常熟人。吳中怡賢寺住持。

秋日過王岡齡山齋次韻賦答

良辰赴幽期。名園散清步。黃菊未辭秋。霜鴻正橫曙。逍遙玩泉石。參差數藥樹。主人出卷軸。精力所凝注。六法韻俱流。五字神或助。把翫媿不如。愛極翻成妬。我見猶憐。何況老奴。妬極翻成愛也。此對面言之。一係佳人。一係釋子。不禁粲然。

陟級已梯空。登茲江畔樓。取適那在高。聊足恣冥搜。虛簷仰晴穹。疎檻臨平疇。西山送遙青。風前上簾鉤。趣以淡為賞。情以忘轉投。寒城送暝鐘。一笑還淹留。